

國學基  
本叢書 續行水金鑑

五





上海图书馆藏书



A541 212 0006 1525B

書叢本基學國

鑑金水行續

(五)

修纂等序世黎



行發館書印務商

# 續行水金鑑卷第六十五

運河水白河 原委一

白河、卽古沽水。源出赤城縣東邊外。皇朝通志。

白河、源出赤城縣東邊外。五郎海山西麓。其北隔重山。卽上都河源也。水道提綱。

白河、其上游沽河也。源出宣化府赤城縣北。獨石口邊外。一曰隄頭河。一曰獨石泉。謹按北方諸水。

惟沽河源流最混。其名稱亦亂。以其下至通州。合東西二潞水。故謂之潞河。以其與潮河合。故謂之

鮑邱水。亦曰潮河。又以其與白馬關入之白河。合流於石塘嶺。故又謂之白河。要皆非其本名也。說

水者當以漢書地理志。水經注爲據。漢志。水經注。惟有沽河之一名。別無他號也。其合潞處在下尾。

安得卽以追被上源。且其與潮河合處。舊在順義縣北一十里之牛欄山之東麓。今改於密雲縣南

十八里。明嘉靖中。遏絕之。不使入順義縣。欲水勢盛漲。以通密雲餉道故也。或以爲於口外霧靈山

與潮河合。非也。畿輔安瀾志。

西南流入邊城。有獨石水。自赤城縣南。龍門水。自龍門縣南來會。又東出邊外。皇朝通志。

西南流入邊城盤鹽口。經寧遠堡東南。有獨石水。自西北來。龍門水。自西來。合而東。會於寧江堡北。

獨石水。出獨石口。南流百里。經赤城縣東北。又東南有一水。西北自鎮寧堡東南流。經縣城南。而東

南會獨石水。又東南五十里。龍門水。自龍門縣城南東流來會。入白河。又屈曲經靖安堡西。又東出

東河口邊外水道提綱

沽河在赤城縣東。其源有二。皆自塞外流入。一曰獨石水。由獨石口逕獨石城西爲西河。一曰紅山水。由紅石山口逕獨石城東爲東河。俱流至城南而合。又南逕龍門山下。名龍門。又南逕書川堡東。又南逕縣東門外。又南逕龍門所南。曰揚田河。又南與陽樂河合。爲南河。又東南經滴水崖堡南。亦曰白河。又南逕延慶州靜安堡。又東至東河口。由邊外達順天府密雲縣之石塘嶺關。此通州白河之上源也。畿輔通志。

又南流六里。逕龐家窰。又南流四里。逕滅虎溝。又南流四里。逕北柵口。入邊城。又南流五里。逕獨石城西北。則有西柵口之水。自西北來注之。又南流五里。逕獨石城南之獨石神廟前。與東柵口水合。卽大砦溝河也。又有紅山水。自口外流入之。二水合流而南十八里。逕頭堡子西。又南流十里。逕半壁店西。又南十里。逕三山堡西。又南流十里。逕貓兒峪西。則有清泉堡之水。自北來注之。又南流十里。逕站堡西。出龍門峽。是爲龍門川。有君子堡水。合松樹堡水。會於羊房堡。與暖泉合流。自西北來注之。又南流八里。逕關門口。則有鎮安堡之水。自北來注之。又南流七里。逕黃土嶺。則有夏家村乾河。自北來注之。又南流十五里。逕赤城縣東繞城而南。則有大石門之水。東南流。逕左右二所堡。合水泉。又合湯泉水。流逕城南。曰赤城河。又南流十三里。逕老幼屯。則有翦子嶺之水。合浩門嶺水。自西來注之。又南流七里。逕柳林屯東。又南流十里。逕樣田堡。則有樣田河。自龍門所。合紅石井水。西水泉。自東北來注之。又南流十里。逕上馬鞍山。又南流五里。逕下馬鞍山。又南流十五里。逕合河。

塞東則有龍門河。自龍門縣西來注之。卽古陽樂水也。有乾河八道。曰黃草梁河、三賢廟河、北柵口河、金家莊河、翦子嶺河、浩門嶺河、周家溝河、長安嶺北河皆入焉。通名之曰南河。折而東流。逕河西堡北。則有白龍潭水。南來注之。又東流十五里。逕青羅口南。又東流十里。出滴水崖下。又東流逕堡南門外。又東流二十里。逕寧遠堡北。寧遠堡南。則有長伸地水。自北來注之。又東流五里。出境屈曲流逕延慶州屬之靖安堡。出邊牆外。共長二百一十五里。畿輔安瀾志。

又東南入邊。南流經密雲縣西。有潮河來會。皇朝通志。

又東北折而東南流。有三小水自北來俱注之。南直懷柔縣正北。又東南入邊古道谷口。經高家莊北。折而南流。有一水自北來會。水北出邊外。兩派合東南流入白馬關西之白崖谷口。又南而西南入白河。又南一水自西來注之。水出邊外。東流入小水谷口。入白河。又南經密雲縣城西。而南與潮河會。水道提綱。

又東流入二道邊垣牆之白河口。塞垣東盡之口也。迤西接長元口。迤東則四海冶口。又東從石塘路。與白河支分。邊外之一支。會其支分之一支。亦出獨石口邊外。流逕鎮安堡東北。一名白遂河。轉爲白嶼河。亦曰激水。又名白狼河。俗稱自在河。亦謂之白漕。又謂之北河。或云水從白馬關入。或云兩岸不生青草。故名對惠河而言。又呼爲外河。或以爲對黑河而言。故曰白河。其以爲卽古孟廣礪水。及以爲發源滴水崖。及霧靈山。爲潮河川者。非也。其水南流與黑河川水合。折東流與延慶州之溪水合。又有四海冶。海子溝之水。合珍珠泉水入之。又東流逕十道河。千家店。又東流與湯河合。又

東流入喀喇河屯屬之寶山寺折西東南流逕白馬關合白馬關河馬家峪河水峪河入石塘路與沽河正流合於石塘嶺自下沽河兼得白河之稱矣屈而西流逕渤海所西又南流逕密雲縣西則引河入焉又南流逕密雲縣南與潮河合畿輔安瀾志。

潮河源出古北口外西北御馬廠地南大山兩水東南流而合又東南有一水自西北來會又東南至近邊有鶴鶉溝水自東北來注之又東南有巴克井水自東北來合一水注之南入邊古北口之西折而東南流有一水東北自土牆入邊來注之又折而西南流經南臺西南有一水自東來會西南逕石匣營南又西南至密雲縣城東北有一水自東來注之又西南經縣城東又西白河自北來會水道提綱。

順天府潮河其河舊無恒流上受通州三河兩潦之水泛溢而下下流淤塞香河寶坻二縣輒受其浸雍正四年疏通窩頭河自百家灣起鮑邱河自魚樁起分道挑濬或循舊流或取直逕皆會於王補莊以八門城口淺窄自林亭口別開直河入薊運河由是故瀆通流二縣始免泛溢之虞按潮河入口密雲首當其衝明嘉靖時雨潦爲患築隄以衛城歲久頽廢本朝乾隆十年以南山碎石傾墮故道填淤河流改衝北岸於是築荆園壩以護古北口提督營署十六年壩復爲夏漲衝刷乃疏濬舊河又於菜園高灘築石壩一道總督高斌恭奉聖訓於就近徑直處別濬一河長一百三十三丈以導水勢由是上流通順徑達懷柔十餘年來隄固河安民賴其利畿輔安瀾志。

西南流經懷柔縣南又經順義縣東又南至通州東北有沙河來會沙河出昌平州之居庸關卽溼餘水。



亦曰榆河。經大興縣北。合清河水。又東南入於白河。皇朝通志。

既會潮河西南流。經懷柔縣東南。有七渡河。自西北來會。七渡河西北出四海冶。東南流經懷柔縣西南。又東南流。有二水自縣東北來注之。又東至牛欄山東入白河。乃折而南。經順義縣東。又南至通州東北。有沙河。自西北來會。沙河出昌平州西北之居庸關。卽溼餘水。亦曰榆河。東南流經南口東。又東南有一水自西來會。又東南至州南之沙河城。有一水自西來會。又東流有一水北自州城之東北。東南流注之。又東一水自北來會。又東南至宛平北境。海淀水自西南來會。又東南至通州北。東入白河。水道提綱。

又南流。逕懷柔縣東。又南流。逕縣東南境。則有鴈溪河。自西北來注之。白河之支。又爲疊道洩水溝。又南流。逕靈蹟山。則有黃花鎮川。合小泉水。亦自西北來入之。又南流。逕順義縣東北境。則有東府村泉入之。又逕牛欄山。舊與潮河合流處也。又南流。逕縣東門外。有清河。會沙河入焉。畿輔安瀾志。

稍南。玉河水來會。玉河源出宛平縣玉泉山。匯爲昆明湖。東南經長春。麥莊二橋。過廣源閘。至高梁橋。分流。經德勝門。入西水關。匯爲積水潭。入皇城爲太液池。環繞紫禁。經金水橋。出玉河橋。達正陽門東水關。至東便門東水關。下注大通河。東南流。設五閘。瀦水濟運。至通州高麗莊。入白河。自大通河以下。亦名通惠河。皇朝通志。

稍南。玉河水西南自都城來會。水道提綱。

白河南流入通州北境。自此以下。通得潞河之名矣。今謂之北運河。又南流。逕通州舊城北關石壩。

外。則有富河之水。自西北來注之。又有通會河之水。自北流合焉。亦曰通濟河。畿輔安瀾志。

南經張家灣。東有涼水河來會。涼水河出右安門西南鳳泉。東流經萬泉寺。分爲二支。一自南經草橋。一自北經廣恩寺。皆曲折東注。至永勝橋。復合東南流。循南苑繚垣而東。至小紅門西入苑牆。東南流經沙底橋。折而南。歷頭閘至二閘。一畝泉之水。自西來會。又南而東。至鹿圈村。三海子以上之水。自西南來會。又東南流至五空橋。出苑牆。經馬駒橋。迤東至張家灣。來入白河。皇朝通志。

南逕通州城東而南。折而東而南。俗稱古潞水。至張家灣東。南海子中。舊有桑乾支水。於此東北注白河。水道提綱。

又南流逕舊城東。穿城而出。又南逕新城東。環城爲濠。又南流逕張家灣城東。則有涼水河之水。自西南來注之。謹按此河自南海子流出。逕半壁橋。出馬駒橋。東抵高各莊分流。一北入張家灣。舊道也。一南入鳳河。新開河也。雍正三年。怡賢親王請自高各莊導入鳳河。以清京西南瀝水。近時永定河東截鳳河之尾。下入天津。此河下稍已爲河所奪。畿輔安瀾志。

經舊灤縣北。折東北。香河縣東。又東南經武清縣東南。又東南至天津府西北之西沽。永定河合拒馬。易水及子牙河皆會。皇朝通志。

又折而東而南。經舊灤縣北。折而東。稍北經香河縣西。又東南經河西務東。又東南經武清縣東南之南蔡村。又折而東而南。而西至楊村東。又東南至天津府西北之西沽。桑乾河自西北來。合拒馬。滌。易。南。及子牙河。皆東流來會。水道提綱。

又東流逕舊鄆縣東。則有灑河。亦曰泗河。來注之。又南流逕牛牧屯。則有窩駝河支分之水。會板營口。運河入之。又南流入香河縣境。則有紙務河。又有牛家河。駱駝港河。新開河。又南流入武清縣東北境。其支分一爲新引河。一爲王家務引河。雍正九年開。又南流逕河西務城。又南流逕南北蔡村。直縣治東三十里。又南流逕楊村務。又南流逕湲溝新莊。西南流逕馬家口。又南流入天津府天津縣北之桃花口。又南流逕孤雲寺西。值丁字沽。合西沽。直沽爲三沽。又南流逕西隄頭。則有永定河之水。北出鳳河之尾。合大清河。水自西來會之。又南流逕紅橋。又南流逕小紅橋。則有子牙河水。自西南來會之。又南流則有賈家口引河。乾隆十一年開挑。二十九年重濬。陳家溝引河。合筐兒港引河。導場河。淀北流入焉。又南流逕獅子林。與南運河合於三岔口。畿輔安瀾志。

按白河會潮。沾榆沙。通惠諸河之水。源高勢峻。有如建瓴。而西北諸山泉流匯聚。每伏秋之際。積雨未歇。怒流已至。頃刻尋丈。非堤防所能捍禦也。康熙三十八年。決武清縣筐兒港。三十九年。聖祖仁皇帝親臨視閱。命員外牛鈕等。於衝決處。建減水石壩二十丈。開挖引河。夾以長隄。而注之。場河。淀由賈家沽道。洩入海河。楊村上下百餘里。河平隄固。有御製碑文誌其事。康熙五十年。以河西務工程險要。親臨指授。命牛鈕開挖引河。一統志作開河西務引河。復以河西務城東有舊河形。對新河下口。至三里屯。長四百餘丈。特命開直河一道。直河。一統志作引河。以上一統志。均作五十四年。次年工成。於是新河之溜。移流於西。而東岸大隄之汕刷。以免。要兒渡之衝險。無虞矣。雍正三年。大水隄岸塌壩。多有衝潰。四年。經怡賢親王奏請。北運河一切工程。歸通水道統轄。河西務設同知一員。

楊村設通判一員。分界管理。增設縣丞、主簿等官。以專防修。五年，河水泛濫。東西岸漫決者四。六年，怡賢親王奏拓筐兒港舊壩闊六十丈。展挖引河。改築長隄。七年，疏濬賈家沽道。分減既多。消洩亦暢。故壩門以下。河水安流。而河西務一帶。距壩稍遠。山水暴至。遂復漫決。上廬聖懷發帑遴員。授之方略。於河西務上流之青龍灣。建壩四十丈。開引河而注之七里海。仍展挖寧車沽河。導七里海水而洩之北塘口。上下分消。區畫盡美。運道民生均獲安謐。而所費帑金已不下六十餘萬矣。畿輔通志

乾隆二年，移青龍灣石壩於王家務。十八年，將兩引河大加疏濬。又歷年建築月隄、草壩、護壩板工。凡十餘處。以資防禦。三十二年，聖駕自天津回蹕。巡視運河。以筐兒港壩身陡下。夏秋盛漲。減水過猛。易致成坑。特命於石工之外。貼築灰土坦坡一十五丈。使漸流勢緩。壩身永固。其減水引河。命與王家務一律疏通。俾無淤滯。按王家務引河。南至七里海。計長一百十五里。筐兒港引河。南至場河淀。計長六十四里。其下流並至北塘口。入薊運河歸海。大清一統志。

乾隆三十五年，北運河東西岸。河水異漲。決西岸之王甫汛、張家王甫隄。及東岸之周家莊等。八處。樓隄先後漫溢。次第堵築。三十七年，請以王家務滾壩落低。筐兒港修築灰土。疏濬減河兩處。培築南北兩隄。四十年，以楊村廳險工林立。工程倍繁。於務關以儘北之王家務。長七十五里有奇。改隸務關同知。四十三年，復以王家務至筐兒港之六十里。河身灣曲。遇漲不能宣洩。於上游吳家窪。添築草壩。以分其勢。中開引河。斜接王家務減河。以導其分。而以吳家窩壩座河隄。改歸要兒渡縣丞。

經營。并以王家務外委。撥歸汛內。協力修防。四十五年。王家務隄漫溢。旋堵塞之。四十九年。石壩南壩臺雞心草壩。改築灰土護壩。嘉慶七年。間挑河溝六處。計一千五百餘丈。培築隄岸十三處。計二十餘丈。八年。於楊村北汛。添設護崖草壩。十一年。復於馬家工壩西。接建草壩。俱得旨允行。嘉慶八年。及十一年。自工部稅局至流水溝。蒆廠以下。均加挑濬。並於東岸挑引河。筐兒港。減河。北運河支流也。首起武清縣。東南北運河東岸隄起。中分二支。限以長隄。北支起西屈河。東流逕大石橋。朱家馬頭。張家官莊。梅廠。郭家莊。周家莊。蔡家莊。陳家莊。楊家河出境。入寶坻縣韓勝莊。注於場河。淀南支起費家莊。東流逕褚家莊。章家莊。梁家莊。陳彪莊。北王平。張五家莊。注於麥子淀。由腰河入於場河。淀穿隄而出。爲陳家溝。賈家口。兩引河。以入於海。長一百里。康熙三十九年開。又賈家口引河。首起天津縣場河。淀之高家嘴。逕宜興埠。燕家口。賈家口。共長二千七百九十丈。入於海。乾隆十一年開挑。二十九年重濬。陳家溝引河。首起天津縣東北之運河東岸。入於場河。淀。長二千九百丈。場河。淀。畿輔通志云。一名大河。淀。卽北運河。筐兒港。藉以蓄洩者也。舊隄天津縣。在城東北四十里。周百里。此淀上無來源。下通潮汐。以陳家溝。賈家沽二河爲出納焉。南北廣十五六里。東西長二十餘里。南有小河一道。出西隄頭。逕城兒上。出七里海。畿輔安瀾志。

### 永定河。別見。

清水河。卽會同河。今名玉帶河。俗曰中亭河。西南自任邱趙北口。東北經保定北。霸州南。由苑家口。東北。經永清。東安之南。桑乾河自西北來會。又東南流至西沽。卽拒馬。涑。易。滹。唐諸水之委匯也。支

流甚多。其最巨者。一曰拒馬河。卽涑水。古桃水也。源出山西代郡廣昌縣北厓古塔。當廣昌城之東。東北流至長城浮圖峪北。有一水南自城南北流來會。又東經長城北。至塔厓驛南。又有一水南自山中北流出城來會。又東流至紫荆關北。入長城。又東北經易州北境山中。折而東南流。經涑水縣北境始出山。又東南至涿州西南。折而東北。經州城北。而東南流。有胡良河自西北來會。又東琉璃河自北來會。又南流經州東。又南稍西。經固安縣西南境。又西南經新城縣城東南。又南有北易水西北自易州定興來會。俗曰白溝河。拒馬。又東南經雄縣城西。而南而東南入泊。又東北經保定縣城北。壩州南。出苑家口。又東北經永清縣東南。東安縣南。桑乾河自西北來會而東也。一曰長流河。徐河。長流河。卽古南易水。一名雹水。一名鮑河。源出易州西南山兩澗。合東南流。經安肅縣城北。容城縣西南。又東南至新安縣西南。徐河合曹河諸水。自西南來會。徐河。卽古大册水。源出易州西南之五回山。曰雷溪。東南流百餘里。出山。經滿城縣北。又東流經保定府治清苑縣北。又東南經安州城西北。有府河。方順河合慶都河。自西南來會。又東經州城北而東。至新安縣西南。長流河自北來會。東入泊。經縣城南。又東爲趙北口。又東與拒馬河會於雄縣。又東北自泊流出。爲清水河。一曰豬龍河。有三大水。曰唐河。沙河。滋河。唐河尤大。唐河卽古澹水。源出山西渾源南翠屏山。卽恒岳西麓也。東南流有一水自西來會。又東南流有溫泉水自東北來會。又南有嘔夷水。自西自槍峯嶺東流來會。又東流經太白山北。爲唐河。經靈邱縣城南。又東折而東南。經三山隘門。廣昌縣南境。入直隸界倒馬關之北。又東南爲曲陽北境。唐縣西北境羣山。有二小水自北來注之。至唐縣北。折而

西南流至大羊店。又折而東南流出山。經曲陽縣北。又東南經定州城北。又東南經祁州南。又東沙河。滋河二水自西南來會。沙河源出山西繁峙縣東界巖頭山。東南流穿長城入直隸界茨溝營北。又東南有小水自西來注之。又東南至阜平縣東南。有一水自西界龍泉關東南流。合一水經縣城而東來會。又曲折東南流。經王快鎮西。又東流經宕城西。始出山。經曲陽縣西南。又南經行唐縣東北。新樂縣城南。又東經定州南。無極縣北。深澤縣北。又東至祁州東南。滋河自西南來會。又北與唐河會焉。滋河源出山西五臺縣東界烏牛山北麓。東流穿長城入直隸平山縣西北界山中。合數小水東南流。經靈壽縣北。行唐縣南。又東南經真定府北。又東經無極縣南。折而東北流。經晉州西北。深澤縣北。又東北至祁州東南。與西來之沙河會。而北合唐河也。唐河既會沙滋二水。東北流爲豬龍河。經博野縣。蠡縣南。俗曰楊村河。又北稍東。經肅寧縣北。高陽縣南。又北至安州之東南入泊水。

道提綱。

淀河在天津縣北五里。永定、子牙、清河之會流也。自河頭至丁字沽。入北運河。長四十里。淀水滄猋。至此始有崖岸。故名河頭。東淀延袤霸州、文安、大城、武清、東安、靜海之境。東西互百六十餘里。南北二三十里。及六七十里不等。蓋七十二清河之所匯瀦也。永定河自西北來。子牙河自西南來。咸入之。清河卽淀池之經流也。其派有三分。自會同河之三汊口。徑臺山而北。出紀家淀而東入勝滂河者。此西派也。由趙家房。徑托蓮泊。出郭家窪。會勝滂河者。此東派也。由下馬頭。徑崔家房。入張家嘴。過任家莊。逕左家莊。歸石溝河者。此南派也。沿大隄而東。逕西馬頭。堂頭。左家莊。會石溝河。則

其支流也。勝滂、石溝二河總歸臺頭。一河經揚芬港而出楊家河。今按揚芬港，畿輔通志作羊窠，安瀾志前作楊芬，後又作羊芬，而注中一作楊芬，又名揚芬，又作羊窠。二書皆經進呈，擇名宜雅，故從揚芬。楊家河至三汊口，計長一百四十里。自永定下流入淀，勝滂河淤，而東西二派無下口。張家嘴淤，而南派無正流，唯沿隄一支，寬不過二三丈，深不過五六尺，何以容西來之巨浸乎。雍正三年，自崔家房以東，決隄九處，各數十丈。文安城郭，宛在水中。怡賢親王奉命查修水利，開勝滂河十七里，而東西二派下口遂通。挖張家嘴河五里，而沿隄一支分流北注，又於上流疏濬中亭河四十餘里。自口頭對岸之下河門，分引玉帶河水入臺山河，其下流石溝臺頭淤淺之處，概行撈挖，數載以來，清流湍駛，隄防晏如。霸、保、文大之間，黍豐稻熟，民享樂利，皆聖主勤卹之德，賢王治淀之功也。按以上諸河，經由泊港，蘆草叢生，壅溜停汛，易致淤淺，舟阻不行，復成斷塞。雖分隸河道統轄，而該管汛員，唯知保守隄工，至於淀之通塞，河之淤暢，俱在積水中，考成不及，誰復過問，殊不知淀河一塞，分消無路，西來之水，并注隄下，一遇雨漲，頃刻尋丈，人力安施，故隄防而不濬，河非計也。今中亭河苦淺，趙家房河苦淤，張家嘴未達於淀，泊沿隄一河，自堂頭以下至壩嘴頭，亦苦淺。石溝通勝滂一河苦隘，勝滂至臺頭一河苦淺，計其丈里，非水涸興舉大工疏濬不可。會同河一統志，在霸州南十三里，又名苑口河，本玉帶河也。自保定縣流入州界，又東北曲折行可十里，爲善來營。北岸有渾河口，又東可五里，爲苑家口，又東五里，爲蘇家橋。河流至此，分爲三道，卽所爲三汊口也。冊說玉帶河至本州境，會渾河東下，名會同河，分二支，俱流經文安縣境，散入石城等淀。本河正派至州東無



梁閣名邊家河。又分一支入永清縣界。名信安河。其正流曲折而東。入文爾諸淀。又東逕東安縣界。爲呂公河。按會同爲玉帶之下流。出自西淀之茅兒灣。至霸州。而拒馬、桑乾、胡良、霸水皆會焉。故名會同河。今諸河俱已改流。唯栲栳圈一河。南北相望。卽中亭河也。首尾皆淤斷。而會同河身寬不逾二十丈。或十五六丈。總會順天、保定、正定三府。西山一帶三十餘河之水。勢不能容。則決何家道口。決鹿曠。決下武各莊。決保定縣。幾無虛歲。雍正五年。中亭河開通。分流北去。玉帶之水十減二三。但河身本淺於正流。而新開之牯牛河。自西栲栳圈會入。擁沙復淤。則浚治一日不可緩。其會同下流之信安河。已成陸地。卽勝滂至辛張。逕褚沽、東沽。達王慶坨之一支。名呂公河者。亦無河形。唯餘臺頭一派爲正流。則上自石溝。下至楊家河。通塞淤暢。所關最鉅。此河道全局之利害也。中亭河亦名新挑河。一統志在霸州南八里。綿亙數十里。按此卽古中亭河也。亦曰栲栳圈河。康熙三十八年。聖祖命河臣王新命開挑。上接十望河。下入臺山河。分減玉帶河水勢。發帑築隄。上下各六工。上六工距河稍遠。以護州治。下六工縷河爲隄。以護田廬。增設州判一員管理。每歲按里出夫。隨時修補。後渾河淤。至勝滂下流。遂塞。而十望河自張青口來者。爲白溝。流沙淤斷。上流自是隄工淺廢。而下六工無復遺址。與積淀相連。雍正三年。怡賢親王奏開中亭。十望二河。四年。中亭河工竣。十望河以積水未開。五年。又大水。遂罷十望之役。自口頭對岸之下河門。挑引河一道。分玉帶河水而注之。中亭河增設吏目一員。分汛防修。七年。州判陳起唐捐貲修築下六工。隄長四十里。西淀跨雄新數邑之境。旣廣且深。西北諸山之水皆匯焉。北自雄縣來者曰白溝河。拒馬之下流也。拒馬發源易州。

廣昌之涑山。至房山鐵鎖崖。分爲二派。一派東入涿州。過新城而南。挾河。琉璃河。廣陽。鹽溝諸水。白玉塘。西域寺。甘池諸泉皆入之。一派南入涑水。經定興而東。易州之濡水。武水。白楊。虎眼。梁村。馬跑諸泉。及迺欄河。女思。澗子。莊溪諸水。俱來會之。二派合流爲白溝河。入柴火淀。西自安州來者曰依城河。曹河。徐河。一畝。雞距。方順。龍泉諸水之所會也。徐水。出五回嶺。經滿城。至安肅。而曹水會焉。一畝泉。出滿城東南。餘小泉以百數。雞距。紅花。名最著。流經清苑城南。至糧河橋。而方順水來會之。方順卽曲逆河。祁水之下流也。五雲。石曰二泉。流爲放水河。五郎河入焉。逕石橋村。至糧河橋。與一畝泉河會。流逕新橋。而滿城之龍泉河自南來入之。至善馬廟。與徐河合流爲依城河。入雜淀。西北自安肅來者曰雹河。源出石獸岡。灌河入之。由新安之黑龍口歸雜淀。新安三面皆水。唯城北爲乾土。而城處容城下流。雨潦南下。則大澱淀一帶。盡爲鄰壑。地最貧瘠。雍正三年。怡賢親王奏請於三台村。開引雹河。逕小王營。尙村之北。至南河頭。入燒車淀。南岸築隄建閘。以裨節宣。隄內大澱淀數百頃。皆引流種稻。屢獲豐收。南自高陽來者曰豬龍河。唐沙。滋三水之所會也。唐河原名澠水。源自山西靈邱。入唐縣。爲唐河。橫水自西北來會。居民引以溉稻。直達下素。町畦相望。經曲陽之鎮里高門。所溉尤多。南入定州。而白龍泉復來會之。王謙。王耨等村。傍河皆圩岸也。沙河來自山西之繁峙。入曲陽界。合平陽河南流。阜平之當城。臙脂二河。行唐之郃河。咸會焉。其上流亦名派水。經新樂。歷定州。沿流多資灌溉。滋河發源山西之枚回山。經靈壽爲慈水。七祖塞岔頭。大明川。壅流可田。入行唐之張茂村伏焉。至無極南孟社而復出。遼縣北旋。經深澤之龍泉。蠡沃仁橋。疏流成渠。皆天然水利。

也。三水頗稱鉅流。畢會於祁州之三岔口。爲豬龍河。逕博野。蠡縣。高陽而入白洋淀。豬龍河水性湍急。奔騰最難捍禦。雍正三年。決柴淀口而東。潰蠡縣口古隄。直衝鄭州驛路十里。浸爲巨澤。怡賢親王親歷相度。疏通豬龍故道。決口始塞。驛路復通。然下流歸淀之處。河紆沙停。壅溜易決。復令清河道王紘於出岸村開挖引河十里。至孟仲峯出口。東岸築二壩以防其軼。西岸截沙嘴以順其流。然後安流入淀。又於放水口斜築長隄。以禦倒漾。蠡縣口殘隄數十里。亦一例加修。以爲重障。於是豬龍順軌。灑河田疇。比年豐稔。但自祁州以下。岸土挾沙。最易坍塌。岸坍則隄無所附。宜於頂溜埽灣。建築挑水。迎水等壩護岸。以固隄根。其下口歸淀之處。近有淤沙漲起。抵闕河流。亦宜開挖。以順水勢。趙北口居西淀之中。舊有石橋八座。白洋諸淀之水。皆由橋下東流。實西淀之咽喉也。而石橋畢隘礙流。雍正三年。怡賢親王奏請易之以木。升高加闊。又增建三橋。俾積淀之水。暢然東注。但白溝濁水自北而下。出河門。而橫截清流。至藥王行宮前。河形拗折。土人謂之鵝鶉。所謂咽喉已通。而胷膈未利也。雍正四年。委員挑挖。經汛而其淤如故。蓋白溝漲時。近自諸山而下。所至沙淤四十里。之柴火淀。變爲桑田者。什三四矣。不加浚治。則西來諸水。泛溢無歸。若歲歲撈挖。又勞費無已。渾流入淀。害常如此。欲一勞永逸。必不使之入淀。而後可查。白溝故道。行於淀外。自龍灣而東。逕道務馬務頭。出張青口。河形宛然。宜疏濬深通。導白溝之流。復於故道。塞其入淀之口。然後將河門淺阻。鵝鶉拗折之處。盡行挑挖。如此則清濁分流。淀清而河亦暢矣。畿輔通志。

清河東西兩淀之經流也。首起河間府任邱縣西北隅。上接新安縣之溫義河。長流河。三岔河。四角

河、安州、高陽、容城縣之水，匯於西淀。明時謂之西河。又謂之清河。謹按溫義河，又有淀頭渠。東西渠水入之。淀頭渠在新安縣東南十五里。淀頭村首起。大淀頭北五里之龍頭關。西南流五里。會端村東西渠。渠在縣東南二十里。端村西北流八里合焉。又西北流一十二里。由太平關入溫義河。長流河一名長溝河。又曰梁頭河。方輿紀要，卽長流河下流也。明景泰中，疏河引流自城西南隅過南門。至東門外三里。卽梁頭河。東流達於瓦濟河。新安縣志謂景泰間縣尹張勉以舟不通縣城關，民無貿易，遂疏此河向北。俾長流河自城而西而東。過東關接梁頭河。流入瓦濟。然則梁頭河雖爲長流河下流，其實新安縣城河之別名矣。考長流河爲府河下尾。府河自石橋河而下。梁頭河之名蓋亦通稱也。又按清苑河至安州爲依城河。又東過西安入淀爲長流河。又東至西淀爲四岔河。又東至淀中爲四角河。高陽河入焉。蓋四角河乃四岔河之下流。而爲西淀中泓。大小溝渠悉注此。有容受涵蓄之功。濁流皆澄。由此導引也。東流逕雄縣孫家莊。又東流逕楊家莊。入任邱縣西北境。又東流七里餘。其分支爲大港引河。出徐家橋下。下流穿大港淀。仍入於本河。謹按大港引河。清河支流也。在清河南一里。往時同上游豬龍河之水入清河。不能容納。故開此河分洩之。又因下流白溝河匯永定河。橫溢於清河門。清河水勢寬平。濁流漲入。尤易潰決。由清河分入此河。以殺其勢。河首起任邱縣西北五十六里。趙北口之西。分清河一支南出。東流二里。逕趙北口。出徐家橋下。穿大港淀。又東流三里。逕邢家溝。又東北流入雄縣之南境。清河分支南流入之。所以分清河門之水勢也。又東北流五里餘。逕孫家嘴。仍入於清河。雍正四年重濬。乾隆九年、十一年、二十八年，三次開濬。其正

支東流二里餘，逕趙北口，出廣惠橋，下分爲二。其分支爲岔河，今名馬道支河。謹按清河出廣惠橋下，正流爲馬道正河，乾隆二十八年濬，其分支爲馬道支河，乾隆二十九年濬，往時清河出廣惠橋下，稍折而北，又折而東，流至史家口，復折而東南流，又折而東北流，別有一道，自廣惠橋東，分支至史家口，仍合流，俗名岔河。自乾隆二十九年濬後，忽名清河爲馬道河，岔河爲馬道支河，又因支河復於馬道河加一正字，皆俗稱也。東流四里，逕史家口，仍入於本河。其正支東流屈北，又折而東流十里，入雄縣東南境，是爲清河門。白溝河自雄縣城南東南流入焉。謹按陳儀蘭雪齋集，白溝故道自新城之王祥灣東行至王槐而南，經涑河村而東，至望駕臺，迤邐東南，過胡各莊神機營，而入茅兒灣，河形宛在，橋座猶存者。若於水涸時挑濬深通，則白溝全流必改由東注，而西來之清水，遙行東注，則濁水受刷，亦補救之一奇也。關雪此說，通志取之，然白溝之水本清，自永定河決入故濁，今永定河改口，久不與白溝通流，所入者，惟金門關以下減水河之水耳，而西淀之淤如故，蓋唐滋沙之水，自西南來，府河之水，由西而下，亦多夾擁沙泥，若僅以爲塞白溝，俾循故道，而淀水可清，河流得暢，恐屬一偏之見。然其所言故道歷歷，足爲講水利者考鏡焉。又東流一里餘，則有龍灣河，自瓦濟門東南流入之。謹按龍灣河，白溝河支流也，長八里，其入清河之處，有村名龍灣，其名舊矣。乾隆二十九年挑濬後，忽名響河，俗稱不知何取也。又有鄭州五官淀之水，北流出里長閘入焉。謹按五官淀，卽五盞淀，在任邱縣東北三十五里，鐵燈竿口，二水由此而東，入於柴火淀，自萬壽橋起，至王村口隄岸，約長三十里，任邱與雄縣南北中分，在任邱曰五官淀，在雄縣曰蒲淀，饒陽、安平、河間、獻

縣、肅寧一帶之水，與柴火淀相爲接連，後以積淤，居民墾種，遂致涸廢。里長闡引河，在任邱縣北三十里，首起鄭州橋，一出城南雙關橋下，一出東城橋下，一出北城橋下，三支會流於鄭州城北，又北流出里長闡，又北流逕柴火淀，入清河。乾隆二十八年開，又東北流五里，逕孫家嘴，與大港引河合。又東北流四里，逕冰窖，則有盧僧河，會王克橋引河，東南流入之。謹按盧僧河，涑水支流也。拒馬河，會胡良、琉璃、廣陽、道關諸河，及中北二易水，南流逕新城縣東，分支南流而成是河。東南流逕百家池頭，入雄縣東北境，又東南流逕王槐村、涑河村、大步村、葛各莊，會王克橋引河，又東南流逕道家務，又東南流至茅兒灣，入清河，長八十一里有奇。乾隆二十七年濬，王克橋引河，白溝河支流也。白溝入雄縣東北境，分支東流出橋下，又東流入盧僧河，長二十里有奇。乾隆十年開，又東流三里，逕茅兒灣，是爲神機營淀，則有史各莊溝，自古藏糧河分支流入焉。謹按神機營淀，在茅兒灣北，與相接連，前明神機營也。史各莊溝，卽藏糧河支流，首起雄縣東南六十里之史各莊，西北流二里，又折而東北流八里，入於茅兒灣，又東流二里，入順天府保定縣西北境，又名玉帶河，其分支爲月河，下流仍入於本河。其正支東流五里，逕張青口，則有維柳河之水出焉。下流仍入於本河。謹按維柳河，首起保定縣張青口南岸之馬家莊，屈南流逕小聖廟，又東流逕潘家莊，又東流折北逕何家道，與古藏糧河合，入於玉帶河，長四里。乾隆十年，因古河道，重開張青口引河，名月河，卽清河支流。在保定縣西北十二里，自玉帶河北岸，分支東流逕喬家灣，又東流逕張青口北，又折而東南流逕王各莊，合於十望河。乾隆十年開，又東流三里，逕何家道口，則有古藏糧河，自任邱縣西南來注之。又東

北流二里。逕王各莊。則有王各莊引河出焉。卽古十望河也。下流仍入於本河。又東流三里。逕擺渡口。又東流二里。逕張莊。直縣城北十里。又東流南轉。折而北流三里。逕于家莊。又北流四里。逕盧各莊。其分支爲中亭河。東北流入霸州西南境。下流仍入於本河。謹按十望河。今名王各莊引河。卽清河支流。在保定縣東北六里。王各莊之北。上接張青口引河。自王各莊東流十里。至霸州。入於中亭河。乾隆十一年。因舊河重濬。二十九年再濬。中亭河。一名新挑河。卽玉帶河分支。在霸州南。首起保定縣東北六里。分玉帶河之水。東北流六里。逕六郎隄。入霸縣西南境之老隄村。則有蜈蚣河。自固安縣東南流入之。蜈蚣河。在霸州西。永定河支流也。自固安縣西北金門關流出。南流分支入霸州西北境。逕葉家莊。高家莊。凡八里。復入固安縣西南境。又東南流五里。復入霸州東南境。又東南流逕杜各莊。中各莊。穿六郎隄。入於中亭河。乾隆十七年。於固安縣分流處。橫接攔水壩一道。後遂絕流。今存舊槽而已。又東北流三里許。則有牯牛河。自固安縣南流入之。牯牛河。本名溱流河。又名莽牛河。在霸州東。亦永定河之支流。自固安縣金門關流出。逕縣西南之牛坨河。又分支東南流入霸州北境。又東南流逕北溝村。又東南流逕埕上村。南孟鎮。金各莊。范家莊。關王堂。凡三十三里。至西栲栳圈。入於中亭河。大清會典。以爲白溝支津。由瓦鄉。涿州。固安。壩州。濬治。以洩白溝暴漲。至高橋而下。後因淤廢。乾隆十年。開永定河金門關。用其舊槽。洩永定河之盛漲。河流既改。河名亦訛。今永定之流。分注時濬河槽而已。又東北流三里。逕栲栳圈。又名栲栳圈河。又東北四里。逕魚廠村。又東北流二里。逕高各莊。又東北流八里。逕臺山村。又名臺山河。入於清河北支。雍正三年。因古河重

漕乾隆十年二十九年三漕其正支東流三里逕口頭村又東流二里逕太保莊又東流二里穿魚津窪又東流三里逕善來營又東南流三里逕苑家口俗又名夾河又東流是名通濟河西北流入於霸州城濠又東流五里逕蘇家橋入文安縣西北境舊與渾河合流名曰會通河又曰會同河陳儀蘭雪齋集會同河出自西淀之茅兒灣三十餘河之所會也逕保定曰玉帶河至苑家口曰會同河闊者二十丈狹者十五六丈每秋濤西漲怒浪東來一川不足以容萬派之流則挑濬之工誠有不可緩者查中亭河隄上下六工係舊里甲民夫修補伏修防汛動逾兩月亦與文安大隄之例同然上六工隄並無衝阻且支河平穩無汛可防不若於水涸時令隄夫挖河底免防汛以速易久民必樂從但令河成與正河齊平則分水愈多不惟玉帶安流而下六工隄內之田皆可引灌也分南中北三派亦曰三岔口其北接自三岔口東北流逕皇恩亭東又北流逕孫家房復入霸州東南境又名通濟河又東北流四里逕賈家莊分支東流入於中支河又東北流一里逕臺山村與中亭河合則有韓家溝之水出焉謹按韓家溝首起臺山東南自劉南莊東流六里許逕辛家鋪又折而東流入於中支河又東北流逕花達墓又東北流五里逕十間房分支南流入於中支河又東流五里逕王家莊其分支爲劉家河東北流入於舊永定河東支河其正支折而東南流復入文安縣東北境逕王家泊其分支爲王家泊河東北流入於舊永定河東支河其正支又南流三里穿郭家窪又東南流五里穿磨磨淀分爲二其一南流逕大寺東與南中二支合其一東流穿落波淀又東流五里逕勝滂鎮又名勝滂河今按勝滂畿輔通志作勝滂安瀾志作勝芳查滂字出山海經今據畿輔



志作滂，亦名運鹽河，則有舊永定河東支河，自霸州高橋村東南流入之。謹按郭家窪，在紀家窪東南半里許，磨磨淀，在文安縣東北石溝村之西北，西南爲新麥淀，東南爲慈姆淀，西北爲郭家窪，東北爲扣浪泊，清河中支北支之所會，直勝滂西南二十里，洛波淀，卽扣浪泊，在勝滂西，勝滂引河，在文安縣北七十里之勝滂村，南清河北支分流，起村西，至村東，仍入於北支河，長五里有奇，乾隆二十九年開，又東流逕勝滂東二里，分爲二：一東南流穿蓮花淀、紫草泊，入大城縣北境，合於南支入於臺頭河；一東流十二里，逕大城縣之辛張村，又名辛張河，謹按辛張河一名照直河，以逕大城縣辛張村而名，又東北流入霸州境，又東北流逕策城，舊作折城，又東北流逕寨上，又東北流入靜海縣境，又東北流入楊芬港，長三十一里有奇，乾隆十年濬，二十九年重濬，又東三里餘，復入霸州極東境，又東北流穿小淀、鴨鴻淀，入靜海縣西北境，合於揚芬港，其中支自三岔口分流，東南流五里許，逕趙家房，入霸州東南境之趙家莊，爲古運糧河，謹按運糧河在霸州東南二十里，相傳元漕河故道也，北接清河北支，首起王家房，東南流入文安縣境，逕趙家房入清河，中支長四里有奇，乾隆十年重濬，分支西北流入於北支河，又東流折南轉北，凡四里，逕崔家窩，又分支入於北支河，又東流三里許，仍入文安縣東北境，又東流十二里，穿托蓮淀、鴻鵠港、筆筒泊、沙尖淀，逕南灘，又分二支：一南流入於南支河，一北流入於北支河，又東流穿磨磨淀，逕大寺東，與南北二支會於石溝村，其南支自蘇家橋，沿千里長隄，東南流四里，逕下馬頭，分爲二：一東流穿蒼耳淀，逕任家莊，會張家嘴河，謹按下馬頭引河，分清河南支，首起蘇家橋，東下馬頭，東穿蒼耳淀，曹家泊，至石溝村，仍入於南

支河長十八里有奇。乾隆二十九年開濬。張家溝河在下馬頭東南。首起陳家營。分清河南支之水。東北穿張家窪。逕任家莊。東流長七里。有奇。乾隆十年開。又東流逕王家圪塔。又東流五里。穿曹家泊。逕左各莊。仍合於本河。謹按左各莊引河。首起左各莊。分清河南支之水。北流逕左各莊北。分爲二。一北流五里許。至南溝。入清河南支。一東流折南三里許。入清河南支。一東南流二里。逕崔家莊。又東南流四里。逕張家嘴。則有張家嘴河出焉。下流仍入於本河。又東南流逕西馬頭堂頭。折而東北流。逕石城淀。又東北流凡十八里。逕左各莊。又分爲二。一東北流爲左各莊河。下流仍入於本河。其正支又東北流八里。逕石溝村。亦曰石溝河。逕大寺下。入磨磨淀。與中二支合。謹按南派一支。逕下馬頭。穿蒼耳淀。由任家莊。王家圪塔。至左各莊者。此其正流也。其由下馬支頭。沿千里長隄東。而出自崔家莊。以至左各莊。仍與南派合者。乃其另支也。嗣因南派正流淤塞。遂以另支爲正流。乾隆二十九年重濬。始復舊迹。其正支又東南流四里。逕傅官營。則有子牙河。自大城之王家口西北流入之。今已斷流。營北又有支河出焉。北流入於中支河。又東流十里。入大城縣西北境。又東流四里。逕臺頭村。名臺頭河。往時子牙河自靜海縣之莊兒頭東北流入焉。今已斷流。其分支曲折南流。至於莊兒頭。逕隔淀隄而止。勝勞河東南流與正支會。謹按會同河爲東西兩淀之樞紐。西淀諸水。惟懸會同一河。傳送而至東淀。康熙中。永定河決於新城之九花臺。南里諸口。繞霸州城西而南入。濁流浩瀚。時或南潰。三十七年。改河由固安東流入淀。而會同河得以安流。但衆派合匯。每遇淫潦。苦難容納。雍正四年。又濬中亭河。分減其勢。正流始順。乾隆十年。子牙別爲一河。而會同入淀之經流。

至臺頭而下達者更無哽咽之虞。今自三岔口以下統名曰大清河。又爲東淀之經流。勝傍石溝二河。總歸臺頭一河。經揚芬港而出楊家河。至三流河。下流爲淀河。河身橫亘一州六縣。霸州保定文安東安武清靜海天津當南面之巨浸。自西迄東。納受諸河。而達之海。長隄巨防。障其潰決。清流急湍。資以轉輸。支幹雖移。會歸則一也。又東流折北一里餘。分爲二。一東北流穿蓮花淀紫草泊入大城縣西北境。穿西灰窩東西張窩泥鰍港入於臺頭河。一東北流穿車道泊東西叉子泊團泊麻地泊入大城縣西北境。逕臺頭又名臺頭河。則有子牙河支流。逕黃汛北流入焉。又東北流四里穿灰窩入靜海縣西北境之大水套。又東流折北穿蛤蜊泊。又北流折西逕揚芬港又名揚芬港河。與辛張河合。又分爲二。一北流逕癩柳樹。其下流直入武清縣之王慶坨。匯爲三角淀。今淀淤而河亦遂絕。東安縣志雍正三年興修水利。今引渾河別由一道於清河之郭家務改河東行。由冰窖武家莊逕東安之狼城宋流口東沽港至武清縣之王慶坨歸長淀河入三角淀。渾流容衍於淀。而大清河遂得湍駛歸津。十餘年來頭道二道等河。月城黃花等套。自南而北日漸淤平。三角淀盡成沃壤。葉淀亦淤其半。武清縣志雍正四年所挖青光引河五年所開長洵直河與三角淀俱爲渾泥淤噎。頭道河二道河盡成斷港絕流。謹按清水爲洵水之經流。自西淀東出雄縣茅兒灣逕保定縣張青口霸州三臺山過文安縣石溝逾大城縣臺頭入灰窩大水套。陳家坑蛤蜊泊第六鋪泊支流錯出所在不一。而總匯於揚芬港則靜海乃淀河並東處也。宋時與契丹分界。惟特塘深。所謂界河者。卽此矣。至獨流一帶當未築隄堰之時。南北水俱可通流。在金又謂之天津河。其照直河則勝傍舊

河在文大保直四州縣界。乾隆十年，以大清河流由勝勞抵臺河，達揚芬港，長七十里，而勝勞之東三里許，舊有廢河，在辛張之南，東行抵揚芬港，渠形逕直，達沽甚捷，與役開挑，迄今順流舟行甚便。其正支東北流八里，穿蒿浪泊，入天津縣西北境，是爲八里河口，又分爲二：東分支，東北流沿隔淀大隄，凡三十里，逕韓家樹，仍入於本河；其正支屈曲東流，凡二十一里，逕楊家莊，又名楊家河，則有線河，顛兒河入之，又有楊家引河出焉。又東北流四里，逕三河頭，又名淀河，謹按八里河、揚芬港河下流也。楊家河在天津縣西北四十里，卽清河正流，以經楊家村而名，是爲東淀下口。楊家引河，因楊家河形灣曲，水流不順，別開此河，以殺其勢，長二里有奇。乾隆八年開，下流仍入於楊家河。又楊家支河，在清河之南，沿隔淀隄而東，與清河南北分流，僅通小艇，民間取道近便，多由此河。水大可行巨艦，向無名稱，今因其與楊家引河並首起楊家村，故以楊家支河別之。又東流三里，逕青光，又東流五里，則有鳳河之水，自西北來入之，卽今永定河下尾出口之道也。謹按青光以村而名，引河，清河之支流水也，在青光之東北，西接顛兒河下流。雍正四年開，乾隆十年重濬。鳳河自南苑東流，逕武清縣，又南流入天津縣東北境，合永定河。四十二年，疏濬團河，水源旺盛，藉滌永定之濁。團河者，鳳河之源也。南苑亦名團泊，在黃村門內六里許。又按畿輔通志：一統志皆以淀河爲永定子牙合流，自乾隆十五年築隔淀大隄，子牙已不與清河會，而永定河遷徙不常，年來直至西沽，入鳳河，合清河，非復諸志所云之水道矣。迤南又東流五里，逕韓家樹，又東南流七里，則有王家河，自子牙河分支，穿隔淀隄北流入焉。又東南流八里，則有子家河，自子牙河分支，穿隔淀隄北流入焉。謹

據王家河。在天津縣西北八里。子家河。在王家口東三里。乾隆十年。建築隔淀大隄。改導子牙河。俾清渾各不相侵。復緣子牙河下流。建甌逼急。特於天津縣西北。王家地子家村。開設二口。建橋其上。汛大。則引子牙濁流入淀。以洩異漲。汛退。則導東淀清水入河。以刷泥沙。又東流二里。逕礮臺。又東流出。西沽浮橋。與北運河合流於天津府城東北隅。而入海河。畿輔安瀾志。

西淀。跨保定府之安州。新安。雄縣。高陽。河間府之任邱縣境。起自安州。高陽。新安。任邱四縣之白洋淀。東迄任邱縣之柴火淀。西北迄新安縣之燒車淀。自白洋淀東北爲端村。又東爲郝淀。在白洋淀東。新安縣東南二十里。直白洋淀東北。端村東南。又東爲小郝村淀。東南曰前潭淀。後潭淀。在任邱縣西北四十里。俱南北袤二里半。東西廣二里。前潭至後潭。水路半里。新安任邱兩屬。新四任六。又東南曰興隆淀。又東北曰范車淀。張家淀。又東北曰虎皮淀。南北袤一里。東西廣二里。水路二里。至平陽淀。南北袤四里。東西廣三里。水路二里。至池魚淀。南北袤二里。東西廣三里。水路二里。西北至絲窩淀。南北袤二里。東西廣二里半。水路一里。東至江水。南北袤一里半。東西廣二里。水路一里。東至王家港。南北袤二里。東西廣一里半。東北至趙北口二里。又東南爲十方院。又東北曰邢家溝大港淀。又東曰柴火淀。又東曰五官淀。蒲淀。掘鯉淀。柴火淀之北曰茅兒灣。又北曰神機營淀。又西曰清河門。又西曰黑洋淀。在雄縣東南。又西南曰趙北口。在任邱縣北六十里。北至雄縣十二里。跨西淀之中。南去十方院二里。又北曰高家港。在新安縣東四十里。距趙北口五里。又北曰窩蘿淀。一名絲羅淀。在高家港北。屬雄縣境。又西蓮花淀。勞家淀。蔡家淀。石臼淀。又西北曰梁大淀。直蔡家淀西。

北在新安縣東北三十里。又西北曰通流淀。一名流通淀。在雄縣西十里。方二十里。又西南曰燒車淀。匯於郭里口。聖祖仁皇帝水圍行宮在焉。郭里口之東曰雙淀。又南三里曰河洛淀。南北袤一里半。東西廣一里。新安任邱兩屬。新七任三水路一里。南至光淀。直郭里口。東南一十二里。在任邱縣西北五十三里。南北袤三里。東西廣二里。水路半里。南至龍王淀。新安任邱兩屬。新三任七。南北袤一里。東西廣二里。又西一里爲洛汪淀。新安任邱兩屬。新三任七。南北袤二里半。東西廣二里。匯於圈頭。聖祖仁皇帝水圍行宮在焉。圈頭之西曰大麥淀。在任邱縣西北四十里。南北袤一里。東西廣一里。小麥淀。在新安縣東南三十里。中麥淀。又在小麥淀西北。皆相連接。又大麥淀西。小麥淀東。曰夔子淀。夔子淀東爲石猴淀。又東卽郝淀。又鴨圈淀。俗訛爲雅圍淀。直燒車淀南。在新安縣東八里。其東南爲光華淀。西南爲楊家淀。楊家淀北爲王家淀。匯於端村。聖祖仁皇帝水圍行宮在焉。計東西袤一百二十里。南北廣二三十里。至六七十里。周圍三百三十里。中爲趙北口。西自安州來者曰依城河。府河下流也。凡會十三水。曰滿城縣之淪水。魚水。完縣之濡水。蘇水。蒲水。五雲水。流九水。唐水。望都縣之博水。九龍泉水。清苑縣之沈水。安肅縣之曹河。易州之徐河。西北自安肅縣來者曰雹河。卽南易水。凡會五水。曰易州之孔水。滌水。安肅縣之曲水河。雞爪河。萍泉河。合之本河。共六河。西南自高陽來者。豬龍河。滌滋沙三水。下流也。凡會二十三水。曰廣昌縣之倒馬關水。溫泉水。亦名湯河。曲陽縣之恒水。漱玉泉水。三會河。靈河。唐山縣之唐河。一名逆涿河。雹水河。灣里河。定州之荻水。盧奴水。清水。阜城之北流河。鶴子河。班峪河。臙脂河。平陽河。當城河。唐縣之曲河。郟河。汶河。新樂縣

之木刀溝、水浴河、合之澠滋沙、共二十六河。北自雄縣來者曰白溝河、拒馬河下流也。凡會二十七水。曰涑水縣之涑水、范水、檀山水、石泉水、白澗溪水、清水、清水河、適蘭河、易州之易水、中易水也。濡水、一名北濡、卽北易水。源泉水、子莊溪水、白楊水、軍士川水、灌河、五里河、宛平縣之丹陵泔水、房山縣之防水、良鄉縣之琉璃河、廣陽河、鹽溝河、涿州之桃水、胡良河、挾河、涼水河、新城縣之斗門河、紫泉河、共爲七十二河。故曰七十二清河總匯也。東淀跨順天府之保定、霸州、文安、大城、東安、武清、天津府之靜海、天津八州縣境。西自茅兒灣、過張青口、至保定縣。曰玉帶河。至苑家口。曰會同河。過蘇家橋。曰三岔河。凡西淀之水悉匯焉。西自蘇家橋、東抵楊家橋三河頭。東西袤一百四十餘里。往時子牙河由王家口入淀。永定河由柳岔口入淀。北自東安之東沽港、南至靜海之獨流坑。南北廣一百餘里。後永定改由三角淀入河頭。子牙另爲一河。築隄分隔。淀水所至。南北相距僅五六十里。周圍四百餘里。地雖廣而淀多淤。其名亦不可悉數矣。今其可考者。在保定縣曰張青口、荷花淀、糧料淀。在霸州者魚津窪、苑家口、田家套、楊家套、郝家套、長港窪、金水窪、高橋淀、堂二淀、佛堂淀、小淀、鴨鴻淀。在東安曰琅川淀。在縣南七十里。往時清河北派由之入磨泔港。在文安縣曰蒼耳淀、文潭縣東北七十里爲勝滂淀。古武平亭也。蒼耳淀東南爲張家窪。縣東北四十里爲石城淀。又東北爲曹家泊。東二里許爲秋麥淀。北爲托蓮淀。托蓮淀北爲鴻鵠港。又東爲筆筒泊。又東爲沙尖淀。縣東北石溝村之東南爲黑母淀。黑母淀東爲蓮花淀。亦名蓮花泊。蓮花泊南爲車道泊。東爲西叉子泊。又東爲團泊。又東爲東叉子泊。與麻地泊相接。東北爲紫草泊。石溝村之西北爲磨磨淀。磨磨淀東

北爲洛波淀。一名扣浪泊。東南爲慈姆淀。西北爲郭家窪。又西北爲紀家窪。紀家窪東北爲小淀。又東爲蔡家淀。與霸州之長港相接。石溝之西南爲小東泊。又西南爲大港。大港東南爲丁字淀。東北爲汪家淀。汪家淀南十里許爲荷葉淀。縣東北之宋口里南爲趙家泊。卽趙淀也。縣東南五六里許爲牛臺淀。東北七八里許爲火燒淀。今淤。縣北三十里爲白龍淀。在朱雀房南。西北直蘇家橋三里許。謹按白龍。火燒。牛臺。荷葉四淀。今皆在千里長隄內。不與東隄相通。在大城縣曰李子淀。在縣北稍東五十里。東距子牙河東隄數里。縣北四十里爲麻窪淀。與文安接壤。其西數里卽牛臺淀。又臺頭村西南三里許爲韓家泊。黃叉村東爲大槽子泊。大槽北里許爲傅家莊泊。又北爲泥畝港。泥畝東接蓮花泊。又東半里許爲東蓮花泊。東蓮花北三里許爲灰窩。西灰窩在麻地泊北。西灰東爲西張窩。又東爲東張窩。西灰東北爲小清泊。東灰西南爲台蒲淀。又三家淀。在縣東北。今湮。在東安縣東南曰褚河港。往時清河北支。由高橋信安。下入褚河港。東沽港。歸三角淀。今淤。在武清縣東南曰東沽港。今淤。縣南八十里曰三角淀。古雖奴水也。一名筍溝。亦曰葦淀。東西袤六七里。南北廣十餘里。往時永定河。子牙河。大清河咸入之。今皆改流。惟清河經此。在靜海縣西北曰大水套。與大城之東蓮花泊相接。大水套東里許爲陳家坑。陳家坑東北四里許爲四角淀。又東北四里許爲閻家坑。又東北爲揚芬港。又縣西北爲蛤蜊泊。蛤蜊泊東北里許爲第六鋪泊。後泊東北里許爲烏龍泊。又東北爲蒲泊。在天津西北爲蒿浪泊。俗名郝浪泊。縣東北五里爲丁字沽。卽西沽也。上納三角淀之水。會南北二運河入於海。卽清河入運之處。在青縣西南曰蛤蜊泊。又名蛤蜊河。與靜海之蛤



蜊泊、同名異處。謹按許氏說文不載淀字。廣韻淀、泊屬韻會。淀、洩泉也。劉淵林魏都賦注。淀者如淵而淺也。水經注鮑水篇南至泉州東極於海會之雍奴藪。其澤野有九十九澱。新唐書地理志瀛州鄭縣九十九澱皆不詳其目。一以爲雍奴。今武陵縣也。一以爲鄭縣。今任邱境也。大抵由東迄西與今東西淀不相懸殊。宋史河渠志載塘灤緣邊諸水自清苑迄於滄州。特以爲險。要限制契丹。元時亦嘗濬治。元史河渠志大定三年都水監言河間水患在險河。自北門外依舊疏通至大城縣界以洩上源水。引入鹽河。即漚沱入淀之路。今已斷流。古陳玉帶河。自軍司口濬至雄州。歸信安縣。以導淀灤積潦。注之易河。黃龍港。自瑣井口開鑿至文安縣玳瑁口。以導灤水。經火燒淀轉流入海。尋以歲旱罷。明人以爲渾河所決入。故西北則開中亭十望等河。而東南則築長隄。竭力捍禦。迄今吞納畿西巨川。有翁受含蓄淤衍積宣之功。當其潦時千頃無涯。民居高阜。宛在水中。若至大旱。各淀分區。如盆如釜。星列棊布。僅通細渠。相爲纏絡。然而菱芡蒲葦魚蜃蛤之屬。仰食其利者不可勝計。淀以四角河爲翁受。以清河爲統率。趙北口橋其門戶也。大港引河其輔導也。玉帶河其總歸也。茅兒灣張青口則其尾閘也。總號曰西。以對東而言也。西淀爲七十二清河之所歸。諸志之言皆然。而究無所考實。文安縣志據明統志順天水匯會通河者十五。保定水匯瓦濟河者三十。河間水匯易水者四。正定水匯漚沱者十四。匯瓦濟易水者。經縣之西北。匯漚沱者。經縣之東南。俱達於武平。即勝勞淀。雍奴。即三角淀。下直沽入海。水自霸州注者。霸州已非復西淀所經矣。爲廣陽水。涿水。范水。盧溝河。拒馬河。胡良河。挾河。琉璃河。沙河。龍泉河。玉帶河。滋河。汶河。霸水。霸水。乃涑陽。涑滋諸水。

行至霸州因名。無別列爲一水。共十五水。惟桑乾最大。自雄縣安州注者。爲白溝河。卽拒馬下流。梁河。卽清苑下流。土尾河。卽澧水支流。徐河。方順河。卽蘇水下流。長流河。卽清苑下流。溫義河。高村河。紫泉河。五里河。拒馬河。白澗河。唐河。沙河。滋河。溹沱河。雄河。卽易水。雅兒河。適闌河。祁水。卽方順河上源。易水。女思谷水。濡水。涑水。卽拒馬河。雷溪。子莊溪。清苑河。卽長流河上源。石橋河。卽方順河下流。一畝泉。雞距泉。二泉。卽清苑河上源。共三十河。惟白溝最大。自河間任邱注者。爲溹沱河。澧水。卽唐河。西韓河。甘洵河。綿蔓河。松楊河。衛河。澱河。派河。臙脂河。當城河。郜河。濁漳河。清漳河。夾河。恒水。倒馬關水。曹河。高陽河。長豐渠。五官淀。共二十一河。惟溹沱最大。志成於康熙四十二年。迄今百餘年矣。然其中水道多有不合。所數諸水。或一河而分爲二。或二河而並爲一。又或卽泉源所起以爲名。或因支流所在以指數。未能一一悉當。明時又有南六水。北九水。共十五水之說。南六水。謂黑洋淀。一畝泉。方順河。唐河。滋河。沙河。北九水。謂盧溝。拒馬。挾活。琉璃。胡良。桑乾。烏流。白澗。白溝。蓋指其大者而言。然南六水不舉徐。曹。雹。而指黑洋。一畝。北九水不舉易水。而稱白澗。皆爲失倫。至白溝。爲拒馬之下流。烏流河。今已不能指其處。亦非確論。今皆略爲考定。詳著於篇。又會雹河者。尙有安肅縣之梁門陂水。會豬龍河者。尙有高陽縣之高河。會白溝河者。尙有易州之擔石水。紫石。溪水。女思谷水。柳亭溝水。礮石水。涿州之范陽陂水。督亢陂水。雖志乘羅列其名。而源泉久廢。亦不復列。東淀爲西北羣川之下游。而天津又爲東淀之委輸。子牙永定二水。至此亦復通流逆注。達於海河。天津府志。東淀卽清河子牙河之會流。永定河本歸東淀。今歸三角淀。伏秋時強潮抵牾。俗有勃海經白

露乃納衆水之說。各道汛漲。爭趨駢會於三岔河。不至倒漾橫決者。既賴南北各減河分洩。而東淀以寬綽鍾受。俾七十二清河。長津巨派。順流無患。皆其力也。淀中支津交錯。隨地易名。潦水瀰漫。則南以格淀隄爲限。北以永定河老隄爲限。而鳳河會入所在。迤東以北一帶。則又以韓家樹橫限。丁字沽疊道爲限。永定河舊由臺頭勝滂等處入淀。自雍正五年。改流王慶坨勝滂以東。始無哽咽。乾隆十年。子牙河挾南北泊之水。逕出獨流村。而臺頭以西。益無阻滯。惟大清河統匯淀中支渠。安流東赴。合南北運河至三岔口。歸於海河。迄今文安大城以東。南北縷河隄堰。免於決突。皆濁流不入之功也。然歲久淤淺。而蘆葦叢生。大汛轉礙河流。夏秋之交。霪雨擁沙。積墊水底。非開展河身。修固隄防。不能永保無患。堊船淺夫之設。在當日有深意焉。陳儀蘭雪齋集。淀民以船爲業。船一隻。長一丈二尺五寸者。可業三人之力。撈取堊泥。日可三方。一月之內。十日撈泥。二十日營業。盡可度日。每一船。月撈泥三十方。自三月至九月。每一船撈泥可二百一十方。十船二千一百方。船五千隻。可撈泥一萬五千方。計淀河一百四十里內。淤淺者未必及半。可設船五十隻。每船募役夫三人。共一百五十人。卽以船與之爲營業。不必復給工食。一船每月責令撈泥三十方。應撈之處。官爲測量。計其丈尺。釘椿標記。既撈之後。核數收工。所撈之泥。運送附近村莊。或墊作房基。或堆壘園圃。任從其便。不許阻礙河流。所募之夫。必淀內居住之人。入水取堊。素所習慣。取具互保。免其雜徭。給以腰牌。登之冊籍。雖分工段。務令各近其家。所用之船。不必制造。隄內積水新濶。民船盡皆陸置。每隻不過三四金。稍加修捨。卽可乘駕。若將拏獲私鹽船隻。毋令變價。揀擇取用。亦省採買。如此措置。人不勞而

帑不費。淀河日深。清流倍暢。所謂日計不足。月計有餘也。然須添設專官一員督理。或縣丞。或主簿。駐淀池適中之處。往來稽察。仍令廳員兼轄。河道統轄。儻有淀河淤塞。悉照隄工漫溢例。分別參處。庶上下不敢玩忽。隄河兩有神益矣。東西兩淀河渠圖說。東西兩淀。廣袤數百里。爲衆水所會歸。淀必有河。以爲水道。河必有支流。以暢疏消。但支流河身淺狹易淤。今詳查分疏要道。急宜挑濬者。如藥王廟之前引河。因西淀豬龍河諸水畢趨趙北口。東注柴火淀。淀當白溝之衝。每遇泛漲。夾帶泥沙。阻截上游諸水。倒漾而西。爲患近淀各村。乾隆二年。在任邱雄縣兩縣境內。專闢此河。以行西淀之水。不與白溝爭路。今用方夫汊夫。分別疏濬。以除淤填。保定縣之張青口。爲東淀咽喉。因約束太緊。傳送多阻。南岸舊有維柳河。茅兒灣。並民人自開。村北小溝。皆以分洩。張青口漲勢。又於支河下口王各莊挑挖支河。歸入中亭河。上口長十里。維柳河長四里。茅兒灣下口淤處長三里。均展深寬。以資分洩。其下中亭河。自下河門上口起。至三臺山村止。長二十九里。與玉帶南北相對。約五里許。每遇汛發。則二河合一。上口近復淤塞二十里。愈無分洩之路。附近村莊。每被淹浸。今將穿處展寬。河底抽挑引河。均深七尺。以資暢達。西北之六郎隄。長十餘里。今增卑培薄。淀水不北漫。爲霸州新城田廬保障。又河北岸栲栳圈魚廠村。高各莊。三臺山四處。地勢平衍瘠薄。今於隄內。各建涵洞一座。引水內灌。四村田畝。均收其利。臺山趙家房。兩河之中。有古運糧河。長四里許。河口淤斷三百餘丈。今挑通。以分兩河水勢。且兩河引灌文霸民田多頃。臨河圍地。多成沃壤。玉帶迤東。會同河之支流。有張家嘴河。長十八里。自河口至王家圪塔七里許。河面僅寬一二丈。深一二尺。今挑展寬深。

分減沿隄水勢。又免堂頭上馬頭。千里長隄之險。又文安縣之蒼耳淀。舊築圍堰營田。日久湮廢。今於圍內南北渠。長五里餘。添建南北涵洞二座。以資宣洩灌注。又霸州十間房圍堰內。共地五十餘頃。建有水閘。引水灌漑內稻田十餘頃。雜糧地二十餘頃。葺藕地八頃餘。現在民種官分租利。而圍內溝渠尙未周修。今於稻田四面。再挑小溝。以便高下節次引灌。並開蓄水渠一道。卽以挑渠之土。幫築東隄。以資捍禦。自臺頭以下七十里。至揚芬港。入大清河。由楊家河青光。並鳳河下口。以入於西沽。而臺頭河水。受子牙濁水壅淤。歲需挑濬。以行漕艘。河身旣因淤益狹。河流更迂曲不順。傍淀各村。每有水患。查勝傍舊河。上承臺山趙家房二河之委。逕辛張策城之南。入揚芬港。長四十里。較臺頭達揚芬港之路。近三十里。東北直注。形勢逕截。故土人名爲照直河。河身僅窄二十四里餘。今開濬寬深。使東淀全局之水。悉得迅注。其下楊家河莊西。至下河頭。長三里許。展寬挑深。自莊東北至中河頭。裁灣取直三里許。以順其勢。又於宋家河分支之頭道河淤斷處。開挑四里許。接入楊家河。並將下淤青光之西至蛤喇河口。開拓約長四里許。俾匯入大清河。一路皆順流無阻。而兩淀之尾閘爲暢適矣。謹按東西兩淀之中。支渠汊港。互相纏絡。不可悉數。然而旋開旋塞。直隸諸水。惟此爲甚。皆由永定子牙兩河。悉歸東淀。以濁流入止水。隨卽淤塞故也。遠不具論。卽自康熙四十年以來。迄今諸河。已有淤爲平陸。不可濬治者。今皆附錄於左。邊家河。清河北支下流也。往時清河北支。逕霸州東無梁閣。入文安縣東田家口。又名邊家河。入於文爾淀。今淤。信安河。邊家河分支也。清河自無梁閣分支。逕霸州東信安鎮。又名信安河。下入於永清縣界。今淤。呂公河。邊家河下

流也。邊家河穿文爾淀，入東安縣南境，又名呂公河，今淤。褚河港，呂公河下流也。在武清縣境，下入王慶坨，今淤。長子河，褚河港下流也。清河北支，自信安穿文爾淀，分爲二支，一支東流爲長子河，東北流三十里，合於王慶坨河，今淤。東沽港河，亦褚河下流也。褚河港分流東出者，爲長子河，東北出者，爲是河，又曲折東北流八里，亦入於王慶坨河，今淤。王慶坨河，褚龍港下流也。褚河港合東沽港河，逕武清縣之王慶坨，又得是名，又東流與長子河合入楊家河，今淤。頭道河，二道河，三道河，皆清河北支之支流，在霸州境，今淤。長洵河，在武清縣界，雍正五年開，今淤。陳儀蘭營齋集，三汊河者，東淀之上口也。玉帶河全納西淀之水，至此分而爲三，一汊自臺山村北流，逕高橋淀，入信安鎮，爲信安河，一汊自趙家房，東北流入勝勞淀，爲勝勞河，逕辛張策城，至褚河港，分爲二支，一東流爲長子河，一東北流曲折入爲東沽港河，又東十餘里，爲王慶坨河，與長子河合，而信安河亦自西來會焉。一汊自下馬頭，東南流逕崔家房東，入張家嘴河，北流逕任家莊，東流入左家莊。又東北逕石溝，分二支，一北流與勝勞河會，一東北流至臺頭，而子牙河自東南來會焉，合流至揚芬港，又爲二支，一北流逕癩柳樹頭，與長子河合，一東北流逕蒿浪泊，出楊家泊抵河頭，而臺山趙家房二汊出三角淀而東來會焉，此三汊之大概也。其沿隄東去，逕西馬頭堂頭，入左家莊泊，逕傅官營，入石溝河者，則鹽河之故道，非三岔之正派矣。自永定河入淀以來，高橋淀淤，而信安河絕，勝勞淀淤，而辛張河絕，楊家河者，東淀之下口也，三角淀淤，而長子河絕，王慶坨淤，而東沽港河絕。謹按此乃敘康熙間之三派，與今三派河流上源則同，而下流已異矣。畿輔安瀾志。

# 續行水金鑑卷第六十六

運河水白河 原委二

唐河故道支流。皆在三河合流之後。因滋沙二河俱入唐河。故皆從唐河。其一支自安平縣西北二十五里之院西口。爲院西口河。俗名古滋河。亦曰岔河。東南流入饒陽縣北境。南流與漳沱河會。按唐滋沙三河。自祁州合流。逕安平縣北之院西口。今河徙而北。其在院西口者。河形雖存。河流已失。其入饒陽北境。南會漳沱者。河形湮沒。不可尋矣。自饒陽縣之岐河村。東行十里。逕河頭村。又東行十六里。逕劉家莊。折而南。又折而東北。流十二里。分爲二支。一支東行十里。入河間府獻縣西北境。俗名古唐河。東北行八里。入肅寧縣東南境。又東北行八里。復入獻縣西北境。又東北行十餘里。入河間府西南境。又北行十里。逕河間府城西。遶城而東。爲儉河。河間縣志。爲澗河。云卽徐河。此從元史。北流十里。逕徐家口。古洋河自獻縣北來會。又北流十餘里。逕雙塔村。又名半截河。謹按古洋河不見他書。河間縣志。鐵燈竿水。源出漳水。自冀南逕博野。踰漳沱。過洪沙港。入河間城南。通濟橋。東北流至百姓橋。北行數百里。入直沽。達海。其支流一自蘇家口。一自徐家口。並入澱。今河間縣南乾河二道。自饒陽東北。流獻縣西北。又逕肅寧東南。入河間縣西南。轉城北者。爲古唐河。繞城南者。爲古洋河。洋唐音近。或卽古唐河支流。抑或自上游洋東五千二淀流出。遂以洋名之。皆不可考矣。又北流十里。逕左家灣。入任邱縣南境。又北流十餘里。逕相子口。分爲二。一西北流十餘里。逕縣城。

南爲鏡河。亦曰玉帶河。謹按保定河間二府舊志。滋沙澧之水。舊自蠡縣引流而東。歷肅寧之五千淀。而達於雄縣之瓦濟河。中堡玉帶二河。皆其經流處也。後自蠡縣北入高陽。歷新安雄縣而出。任邱之趙北口。於是故道多湮。而玉帶之名。亦移於順天府之保定縣矣。考鏡河之名。於大學士李時記。據通志所云。其上游當是肅寧縣中堡河。分爲白龍河。下爲趙王河。與鏡河無涉。蓋水道變遷。無從悉考矣。相傳明嘉靖間。漳沱泛漲爲害。遂南塞相子口。北塞順子口。水不旁分。故道就湮。本朝雍正四年。修建順子閘。以洩邢家泊積水。村民利之。近亦漸淤。至玉帶河之展轉遷移。尤無確據。固不獨移於保定縣而已。又任邱縣玉帶河。當卽肅寧縣之玉帶河。特中間淤斷。遂兩地共此一名。志乃以環城如帶爲言。則城濠孰不如帶。獨此云然耶。又東北流十五里。逕邢家泊。仍合於古唐河。一東北流二十里。逕東莊爲東莊河。折而西北流十里。合於鏡河。又北流八里。入於五官淀。一支北流十里。入肅寧東南境。合馬窪洋。東淀五千淀。流爲中堡河。東北行五里。逕肅寧縣城南十五里。又名玉帶河。謹按中堡河。上接饒陽東北境之王聖口。由縣南子由口稍北。東行十五里。逕古增城之南。卽舊肅寧縣治也。一統志以唐河下流爲中堡河。中堡下流爲玉帶河。玉帶河下流爲鏡河。今中堡如故。而玉帶河之名已隱。其下流爲趙王河。入河間縣境。河身淤廢不可識。入任邱縣境。河形復著。却在今鏡河之西。鏡河上源。則爲古唐河洋河合流而入任邱縣者。一東一西。與中堡截然爲兩。水道遷徙。源流固難悉辨也。又東北行八里。逕百道口。謹按百道口。在肅寧縣東南十里餘。畿輔通志。謂在府城西。今肅寧縣白龍河。爲中堡河分支。其南爲百道口。往時以百道屬之府城者。以肅寧營廢



爲鎮。屬河間也。又分爲二。一北流爲白龍河。逕豐樂堡。折西轉東。又北行凡二十里。逕朱家窪。在肅寧縣北二十里。入河間縣西北境。又北行五里。逕大城縣境。又北行五里。入高陽縣東南境。是爲廢瀦龍河。河流已失。微有河形而已。謹按廢瀦龍河。卽古高河也。其上游卽肅寧之白龍河。自河間縣流入境。北至高家莊。又北行至瀦龍河東岸隄而止。高河未詳其源。漢書地理志。涿郡高陽。應邵曰。在高河之陽。水經注。引春秋杜預注。濡水出高陽縣東北。至河間鄆縣入易水。是濡水與滹沱澗易互舉通稱矣。方輿紀要。高河在河間府西南。郡在高河滹沱之間。故曰河間。今源流斷續。非復故迹也。考高陽故城。在今高陽縣東二十五里。廢瀦龍河在東南。正與應氏縣在高河之陽合。明洪武三年。高河溢。遷治於今農家口。自縣遷而高河漸淤廢。瀦龍河亦不可尋求矣。又山海經郭景純注。澧水過博陵入易。蓋至此與濡水同入之也。而方輿紀要。於高河下云。澧水在城西。卽易水支流。隨豈源於易水耶。且云亦自安州高陽縣境分流逕北。又北流入任邱縣界。仍合於易水。澧又何嘗出於易而復入於易耶。考河間府獻縣西北之古唐河。卽是澧水。古唐河一分至任邱爲鏡河。還復合於古唐河。紀要或因此而誤也。一東北行二十里。逕中堡村。又曲折東北行十五里。入河間縣西北境。下入高陽縣東南境。爲趙王河。謹按趙王運糧河。保定一帶。是處有之。皆宋時轉漕之河。俗名相沿。實則古陳玉帶河下流也。又北行約二十餘里。入任邱縣西南境。又北行二十里。逕蟲王廟。又折而東北行三十里。逕鄭州南。文獻通考。鄭有易水。澧水。熙寧間。省入任邱。又東北行三十里。逕王村口。合古洋河入於柴火淀。謹按安平縣西口河。本滋河故道。合唐河。舊入肅寧縣境。名玉帶河。入河間

縣境。名儉河。二河皆見元史。但志未言其源所自。玉帶河。或以形似得名。儉河。則溇沱泛自饒陽縣。鐵燈竿口。與唐滋沙合者也。以水味鹹爲鹽河。儉則疑爲擲聲之轉也。河渠志。謂引儉河入鹽河。是以下游之稱被之。上游也。河間縣志。更名澗河。或以現爲澗。又或因舊志。誤爲徐河。而水經注。有徐水三源。齊瀉一澗之文。遂誤爲澗耳。至鏡河。則以邑令王鏡堂得名。中堡河。東莊河。則以村得名。白龍河。則以會伏龍河得名。趙王河。則以漕運得名。古洋河。則以唐洋聲近而訛。其實皆唐河也。又院西口河。一統志。在安平縣北。上流。謂卽派水。自祁州三岔口。與唐滋二水合流。入縣界。又爲沙河故道矣。今以三水合流。皆以唐河概之。以省繁複。一支自祁州西境之韓村東行。逕辛安村。名辛安渠。東逕祁州城南。又東逕祁州東境。合東澗渠。又東入博野縣西南境之南陽村。名南陽村河。東北行入蠡縣西南境之王家店。名王家莊河。飲牛池水入焉。池在蠡縣東南梁家莊。東逕縣城南折而北。逕縣城東。又北至楊家莊。合小陳村河。又北逕古靈山。名古靈山河。又北入清苑縣東南境。名土尾河。下流入於保定府河。一支起祁州西北之西照村。名西照渠。東合黃臺渠。東南入博野縣西境之大西章村。名大西章河。東北入清苑縣南境之段家莊溝。亦名舊唐河。其下流入於府河。一支起蠡縣東南之齊家莊。名齊家莊河。河身在蠡縣境者。淤廢不可復識。東北入高陽縣西南境。名楊村河。瀦爲延福淀。又東北逕高陽城南。遶城而東。又名馬家河。瀦爲蟹子窪。牛蹄窪。小澇淀。大澇淀。又北行入安州東南境。又名邱家道口河。又北行逕馬家棚淀。又東北行逕相口村。入於白洋河。謹按高陽縣志。唐滋沙三河水合流。逕博野縣東。入河間。明正德十二年。藺家口北決。遂出玉田。緒口北。

入邑。逕延福村。瀦爲淀。又北逕圈頭。更今名。方輿紀要。馬家河。漳沱支流也。自晉州饒陽縣鐵燈竿口。導流而北。逕蠡縣境。又東北至高陽縣南延福村。楊村河。土尾河。俱流合焉。瀦爲馬家河。淀。復東北流入安州界。注於易。與高陽縣志不合。一統志。東南三岔口。沙滋二河合入博野縣界。名蟾河。自此而折北流。逕縣東南二十里。入蠡縣界。又名楊村河。舊入河間府境。明正德十二年。北決。逕縣東入高陽縣界。馬家河。逕縣東三里。東北入安州界。爲邱家道口河。至州東南三十里。灑於白洋淀。此蓋河間古唐河之徙於此者。而以爲漳沱支流。或馬家河本有漳沱分支。而上源久斷。自唐河徙入。遂又以爲縣水下流也。今則自三岔口而下。統以瀦龍河名之。復徙而東。馬家河故道亦淤矣。馬家河。自康熙四年瀦龍河決。入布裏河而流淤。至三十七年斷流。今河形雖存。河流多涸。前此暢流。居民引以灌溉。天津百貨。俱由淀達於城南。且由明以來。科第不絕。李文勤父子相繼。時稱極盛。故民間謂之爲富貴河。自斷流以後。大非昔時矣。邑民紳士。嘗思開濬。而馬棚一淀。久成陸地。水廢無所受。邑之舊城。安州之相口兩村。地勢窪下。復恐淀水倒灌。河水建瓴。卽蠡縣之齊家莊。上承瀦龍河。故瀦久淤。亦慮衝決。由是議格不行。蓋河之通塞。係俗之盛衰。皆時爲之也。又按漢書。澧水入河水。經謂入易。山海經謂入河。郭璞注謂入易。明史地理志謂下流合南易。是入易之水。已非復入河故瀦矣。河間以東。大河故瀦。渺不可考。澧水入河之道。又烏從識之。畿輔通志。謂澧水故瀦。多在河間任邱二縣界者。乃入易舊流也。今可考者。任邱縣東北之古唐河。西北之趙王河。高陽縣西南廢瀦龍河。縣東馬家河。皆入淀故瀦。其自祁州。博野。高陽。獻縣。河間。任邱入淀者。始流也。自祁州。博野。

肅寧河間。高陽任邱入淀者。初遷也。其分支東爲趙王河。西爲白龍河。下流爲滌龍河。自祁州博野。蠡縣。高陽。安州入淀者。再遷也。今則不由馬家河。而由布裏河矣。自明正德中決。由馬家河入淀。肅寧之流遂廢。本朝康熙四年決。由布裏河入淀。馬家河上流亦淤。雖同一遷安州入淀。而一徙於馬家河。則由相口村。再徙於布裏河。則由馮村。與逕任邱入淀之故蹟。凡三遷矣。禹貢雖指以今輿地言之。渾源。靈邱。廣昌。曲陽。唐縣。定州。望都。祁州。博野。蠡縣。高陽。安州。新安。任邱。文安。諸州縣界中。皆古澠水所行也。宋初猶未改。自咸平中。何承矩興塘梁。以限契丹戎馬之足。於是始引水歸北。而文安之潰遂空。考文安爲漢時澠水入河之道。至郭景純。酈道元時。已改而入易。蓋河自東漢王景治汴之後。改由千乘入海。不復北流。故郭酈皆以澠爲入易。與漢志入河之文異也。畿輔安瀾志。滹沱河。源出山西代州繁峙縣太戲山。流經太原孟縣北。始入直隸平山縣北。又東逕靈壽縣南。入正定縣界。按滹沱水急流濁。所至填淤。自入寧晉泊。溢澧水道。俱受其壅塞。雍正三年。東徙決周頭村。直衝束鹿。環城而流。彌漫四野。四年。怡賢親王奉命查勘。束邑官民籲請障歸故道。仍入寧晉泊。賢王以泊爲三郡河流匯歸之地。有翕受節宣之功。豈可復聽濁流淤塞。致衆水無歸。乃親行相度。得舊河一道。由木邱南至焦岡。入滄河。委員自第四溝開挖一路。疏通於周頭築壩。障其東下。而導之南流。自是束深無虞。衝潰泊水免患。淤塞矣。按滹沱之在山西。本非鉅川。至平山合冶河而始大。冶河一名甘洵河。源自山西平定州之松嶺。流至平山。初不與滹水相通。元初鑿而合之。其勢遂猛。延祐間。引關冶河。害已減半。後冶河下流漸塞。復入滹沱。歲有潰決。皇慶中。議復之而未果。怡賢親

王於敬陳畿輔西南水利情形疏內。奏請塞治河入潯之路。循其故流。加以挑濬。引入洩河。誠爲一勞永逸之計。子牙河在大城縣東。亦名沿河。大城縣志沿河自河間縣之龍華橋。轉入縣西南二十五里之馬村。東北流徑十里灣。自南而東。徑白洋渡。四里口。至縣東二十五里。匯黑龍港河。亦名交河。從而北折。繞縣東十二里趙扶村。又北逕子牙村。故名子牙河。亦名鹽河。冊說鹽河在縣南十里。自河間流入。分二支。一西北流入文安縣石城淀。一北流。又分三支。西一支入文安黑母淀。東一支入大小窩口中。一支入霸州文爾淀。匯於武清縣三角淀。入白河。按子牙河總會南北二泊。滄溥諸水。終以潯沱爲經流。其湍悍迅激。渾濁衝墊。性與餘河異。水經所云。右出爲澱。北爲澱口者是也。伏秋汛發。奔騰河間以北。靜海以南。皆被其害。康熙三十九年。聖祖仁皇帝親閱河工。特授方略。發帑於獻縣河間。東西兩岸。高築長隄。西接大城。東接青縣。靜海。各二百餘里。又於廣福樓之焦家口。開新河一道。東北至賈口入淀。特設分司一員。董其事。令河間府同知分轄。增置縣丞主簿等官。專汛防修。自是河大青靜之民。始獲安居矣。嗣後雍正三年。分司不得其人。河員怠於其職。隄多潰決。怡賢親王奏准動帑修築。又奏請撤回分司。歸天津河道管轄。按子牙河。至王家口入淀之處。分爲二派。一派西流。徑文安土橋村。至趙家莊。又分二支。西支抵文安大隄而北。至龍塘灣。北支徑三灘里。至張官營。抵石溝河。往往橫截清流。兼害隄防。一派東北流。徑瓦子頭。斷隄村。岳莊。莊頭村。過王家泊。抵臺頭。會清河而東。雍正三年。經怡賢親王奏請。障其西流。約束歸一。四年。令清河道王紘相度工費。及汛水過後。西支自淤。正流俱由瓦子頭一支。而莊頭村南。舊有私河一道。東由陳家泊。

歸獨流大坑。急溜衝刷。遂通舟楫。此亦水自遂其東下之性。非人力所爲。然順而導之。再加疏濬。俾全河勢歸大坑。則臺頭一河。無渾濁之擾。清水可暢流矣。再子牙河新河入淀之處。東西相距二十餘里。兩河之隄。南連而北缺。兩隄之間。村落數十。地皆肥美。但北面無隄。每遇二河漲溢。淀水倒漾。則數十村落。皆在水中。而河員猶謹守兩隄。幸獲無虞。則自以爲功。此如防盜者。守牆垣而開後戶。盜入牖已去。垣牆守者。猶巡警徹夜。此何爲也。故北面之隄。斷宜接築。查王家口村南東岸有古河一道。名三家淀河。緣東隄出瓦子頭橋下。迤邐東北。與新河合而入淀。雖已淤淺。河形宛然。若挑挖深通。亦可分正流之漲。挑土卽以築隄。補缺成圍。圍內之地。分別高下。疏列溝塍。於西南建閘引溉。東北洩而出之。一舉而河隄兩成。營田亦就矣。再查新河形勢。由西南而趨東北。從高就下。直注獨流大坑。甚爲徑捷。但河身淺狹。隄岸殘缺。若深濬堅築。於焦家口分流之處。建挑水壩。逼子牙之溜。移入新河。衝刷愈深。則王家口以上。無羨溢之虞。則臺頭一帶。亦免墊淤之患矣。畿輔通志

溥沱河。卽惡池也。源出山西代州繁峙縣東北之秦戲山品字泉。西南流合玉斗泉。又西合老泉。又西合華巖嶺水。逕縣城南。又西入代州。則有三里河。七里河。西峩河。東關河。羊頭神河。九龍河。諸水入焉。又西南流逕崞縣東南。則有龍泉。南橋河。陽武河。銅河。北橋河。板橋河。諸水入焉。又西南流逕忻州北之忻口。逕蝦蟆石折而東。逕定襄縣北。忻川水。合沙河。南河。金水河。一滴泉。前山泉。海滿泉。注之。牧馬川。合石代橋溝。嵐水。綠水泉。三會泉。諸水入焉。又東南流逕代州五臺縣西南。合聖阜水。又華嚴河。東峪河。野馬溝。注之。又清水河。合射虎川。盧虜水。虜陽河。入焉。又東南流逕平定州孟縣。

北。則有烏河、溫泉，注之。又有龍化河，匯興道村泉，注之。又東流至直隸正定府平山縣西北境惡石口，一名臥石口，細水河，自孟縣來注之。又有泐泐水，自西來注之。又東流五十里，則有兩小水出自縣北山，南流注之。又東流八十里，則有冶河，自井陘縣合甘洵河、綿蔓水，東北流注之。謂之合河口。又東流十里，逕平山縣城北。又東流四十里，逕王角村。又東流入靈壽縣西南境。又東流二十里，逕忽凍村。則有嵩陽河，合溫泉水，東南流注之。又東流七里，逕木佛村，有衛水自縣東北南流入焉。又東流逕縣東南界。又東流逕白莊村，入正定縣西北境。又東流四十里，逕其城南，有冶河舊渠，西南自獲鹿縣界入。今已不通。又東流十里，逕縣東南，則有周泉、韓泉、大小鳴泉、白雀泉，自西北東南流爲相棠河，南分爲清水河。又東繞城東出爲東大道河。又東逕林濟村，爲林濟河，南流入焉。城北有旺泉河，合閻家溝水，東流折而南轉，分流與林濟河合注之。又東流十里，逕張家莊，入藁城北境之故營村，歷隄裏社九門，南又東流十八里，逕只照村。旺泉自正定縣東南流爲只照河，注之。又東流十四里，逕縣治。又東流二十二里，逕縣東南。又東流五里，入晉州西南境。又東流三十里，入東鹿縣西境。又東南流逕衡水縣安濟橋。又東北流逕深州南，自武強縣之東南境，東北流五十里，逕完固口，至獻縣臧家橋以下，爲子牙河。謹按乾隆五十年，漳沱河決廣陽隄，河流南徙，自趙州、寧晉，與滏陽河合，計程一百里，向由晉州東鹿、深州、衡水，入滏陽河，計程一百六十餘里。又按河流善徙，不但與唐宋以來云在正定縣北十三里者懸殊，卽順治十二年南徙自州頭村，經釣魚臺，東南流入東鹿縣百尺橋，與清水河並行之道亦殊。雍正乾隆年間，自晉州西界之西趙莊、韓莊之道，亦不符合。

乾隆二十四年，改由河頭村，下入東鹿曹家莊，逕寧晉好古村，曹谷莊，段家莊，四芝蘭，紀家莊，分東西兩股，由冀州營，圪塔村，歸舊道入滏陽河，長四十里，河身已淤爲平陸矣。蓋或南或北，迄無定所，千支百派，任其所如。歲月遷移，大勢總趨於清水河，約略固可得而言也。又按廣陽隄廢，難以修復，滹沱漸向南趨。嘉慶四年，將寧晉縣渡口衝決，大營上村等河槽，俱被淤塞，雖經挑濬，旋即淤阻。近年來因冀州新河，寧晉隄工，俱有漫口，通連寧晉泊，商艘民船，皆由冀州之柏牙莊，新河縣之大田莊，寧晉縣之侯家口等村，挽入寧晉泊，河泊相連，積潦難涸，改道之議，所由來已。滹沱故道，滹沱未徙之前，其故道自藁城縣東南入晉州，流涇州城南，爲新河道。又東流三十里，入東鹿縣西境之東岔口，二派分流，而合於縣東南之石千村，回生村，凡二十里出境。謹按滹沱遷徙衝突晉州，東鹿，當其下流，被患尤切。一由晉州州頭村之西，張岔口東，接縣境之東張岔口，繞城南而東抵深州之西南界，入衡水縣。此即晉州志所謂新河道也。一自東岔口分流，東逕鄉井回生村，下流與新河道合。此雍正四年所決之河也。改由西曹家莊，則仍康熙五年由彭六莊，東抵東曹家莊，入冀州隄北村，歸滏陽之舊道也。新河道之北，昔有支流二道，交纏入正河，或漫入深州，亦皆涸。視明代以前言之，水道迥不侔合矣。又東南流自東鹿縣舊道入深州衡水，與滏陽河合。其自東鹿舊道之南境，入寧晉縣東北之白木村，合滏陽河者，南流東轉西北境，入冀州，爲滹滏合流河。滹沱故道，在正定縣南者，爲元明時所開濬，今已湮。南泛於藁城，晉州，入趙州之寧晉縣，曰驪河，又南入寧晉胡盧河。其北自晉州流入東鹿縣，以達於冀州衡水縣之清水河，卽滏陽河。曰新河道，近復南移，此道遂淤。



謹按東鹿縣隄沱乾河。上自晉州之東南西張岔口村起。由縣之西南東張岔口村。木邱村。傾井村。西城村。孟觀村。棗營村。歷縣正南趙古營。回生村。下入深州西南徐家屯村。長四十二里。歸滄陽河。自乾隆二十四年七月間淤斷。水勢南徙。又有引河一道。自晉州東南之石碑莊起。至縣西南東張岔口村。木邱村。彭六莊。劉家莊。新興村。東城村。耿虔寺。張光村。至縣正南之花里村。三樹村。溫朗口。孟家莊。入冀州之隄北村。雍正九年。河流北徙。枯斷矣。乾河溝一道。上自晉州東南河溝村起。由縣之正西八里莊。傅家莊。田家莊。張家莊。新截。歷縣之西北劉奴營。月營。殿士營。通士營。寶家莊。蔓延至縣之東北里順井村。下入深州西北之馬蘭井村。如遇水勢大漲。由此溝流注武邑之龍治河。又自網子村。岔流東北。逕迢家莊。又北逕墩台。白龍邱。貓兒營。屈東與八里莊之支流。合於田家莊。乾隆二十三年六月。水勢漫決。乃築三壩禦之。其水又北屈近城西關外。遶城西南隅之南莊。歷城東南合於新河道。又晉州城北滄沱河故道。微有河形。自藁城縣兩河村。入州屬之北辛莊起。至東曹村止。長四十三里。其越河而東南出者爲鹽河。則有枯降水。舊自南宮縣流入之。其自藁城縣東泛於晉州。暨東鹿縣境。又東流衡水之西。又東流南轉。逕張家圈。分大小二支。大支南逕焦旺村。小支東北至河溝村。逕石橋上下。沿注於滄陽河。謹按隄沱自二十三年南徙入冀州。遠去深州百餘里。至是乃復北出。而衡水上下並當衝道。起州之徐家屯。東流逕丁家屯。李家屯。孫老人屯。朱老人屯。復屯。陳家口。逕花里村出境。南入衡水縣之橋頭村。又南逕柳林村。趙家圈。張家圈。而分大小二支。大支東南流逕野頭。又折而南流境三溝。又南逕焦旺村。在衡水縣之東南境。小支亦自張家圈北。

逕李家鋪折而東轉逕胡家堂至河溝村下入石橋在縣之東北境並漚流於滏陽河北起平山靈壽縣而東匯滋水出於行唐無極新樂深澤四縣之境爲石白河危渡口神渚水下入保定府博野縣境與唐沙滋三河會其自晉州北泛於深州河間天津之境曰鴉兒河或東北逕深州安平饒陽二縣界或東北逕冀州衡水武邑二縣界或東北入武強縣之清水河曰白馬河曰交津口又有龍冶河門家溝駱駝灣謹按龍冶河係漳沱岔支上接深州三龍堂自武邑縣屬柳家莊後入境起至羅家莊後出境止長三十八里寬八丈入武強縣城西南鄭家林大村廠岔河村歸入漳沱漚流河長三十五里又有牛村溝在武邑縣長十里入龍冶河乾隆四年開又東流入深州西南境自深州南溢下入冀州之清水河謹按深州漳沱正河由束鹿縣回生村流入州境之西南由孫老人屯朱老人屯至陳家口出境入衡水縣之橋頭村長三十里乾隆二十四年秋汛水發時由上游束鹿界南遷州屬無水又故河一道自束鹿縣木店村流入州境之西南由孤城村吐露口出境入衡水縣西之浪子橋長四十八里久經淤平間有徽跡百姓布種禾苗又岔河一道由束鹿縣理順井流入州境之西南由馬欄井村至趙劉高張圈即行分股南股由州屬郭錢屯大屯王寧北股由州屬陳二莊護駕池同至三龍堂出境會入武邑縣之西北崔家龍堂久經乾涸其北逕安平縣南境又北逕饒陽縣南境又東自饒陽縣分支入肅寧縣東南境下逕獻縣河間二縣境曰饒河呂漢河岔河乾河崖又東北逕任邱雄縣文安保定縣境歸五官淀匯流入海曰洋河即唐河故道也謹按饒陽縣志饒陽水北去縣四十五里寰宇記舊在縣南光武所渡處魏武帝因饒河故瀆決令北注新溝

所以在於縣北。後刺史楊真改爲清寧河是也。通志於安平院西口河下云。西通祁州沙滋。隨三水。分流入饒陽界。注於漳沱。今考舊志所云。滋河距魯口故城正西十五里。院西口河。卽滋河下流。而通志直云。注於漳沱。則是河爲魏武決後之漳沱故道的矣。其名爲滋河者。或因漳沱南徙。故受三水下流。因據其旁一水而名之耳。至舊志云。黃河故道。在縣南八里。今絕流。其故道闊十里。兩崖俱有古隄。見水經今考。水經及注並闕此文。而古之黃河不入縣境。意亦漳沱徒流之故瀆也。又據魏武因饒陽河故瀆。決令北注新溝。是饒河在漳沱以北。漢縣以南。今縣境南自白馬河以北。別無河形。或黃河故道。卽古饒河故瀆。後爲漳沱所徙。遂沒其實。舊志於饒河云。在縣西南三十里。豈亦得於傳聞。而非別有考證歟。又饒河下接獻縣古洋河。流經河間縣城。東與古唐河合。此卽鐵燈竿口之水道也。其乾河一道。卽寰宇記下博縣之傅家池。今獻縣西北有傅家屯。明史地理志。深州。漳沱河在東北。有傅家池。畿輔通志。傅家池。舊受漳沱河水。自河北徙。池久淤。今名乾河崖。蓋其地界相接也。乾溝。上承安平縣來。西起耿家莊。則安平縣西南正西之所會也。逕劉家莊。又分爲二支。一逕田家莊。東流爲李家池。白家池。朱家池。一逕東西支窩。圈子裏。傅村。羅家屯。東流爲張家池。復合爲一。東流至縣北之梁村。與安平縣之西北一支會。自後毛營起。入縣境。俗呼爲半截河。卽岔河。又東流與西南正西二支。總爲一派。東流逕大小草廬。小劉家莊。小李家莊。范安莊。逕呂漢村。名曰呂漢河。又東流屈西。則有小屯溝水入之。小屯溝。起自縣西南之聖水村。俗呼爲古黃河。東逕橫頭影林村。小屯村。合房。又南有古饒河。下合乾溝。而同入於河間縣之古洋河。長三十二里。東北流至縣城。

東與古唐河會。又按安平縣乾溝三道，皆漳沱之支流。西南一支，上接東鹿界，入縣境東河驢角邱村，劉家店，劉驢村，其南岸爲大轉村，杏貢村，野營村，新莊店，下接深州刁家馬禪院村，復東入本境之莊窠頭，南廟頭，徐家驢，敬思村，正西一支，上接深澤縣界，入縣境之崔安鋪，白駝羅，林家鋪子，文店，平頭，北黃城，東黃城，別駕村，郭西村，路家莊，王家莊，天齊廟，二支合流於縣城西南隅，又東逕槐林店，王官屯，寶家莊，而東北折，逕西南邊家莊，北張家隅，南護家村，曲家莊，薛哥莊，王哥莊，東呈千，毛家莊，東廟頭，而入於饒陽之西境，西北一支，亦接深澤縣界，入縣境香官莊，羽林莊，何家莊，崔會村，劉吉口，新營村，辛店村，南蘇村，傅哥莊，欽石村，東西牛具村，油子村，石家莊，夏里村，寶家口，侯家口，前中後毛家營，入於饒陽縣境，又洋河爲漳沱分流，亦曰洋河，以上游有洋東五千二淀之目，故以洋名之，實卽唐滋沙三水競由之道也。今唐河之流，既非故道，而漳沱復南徙，其別支之下，由單家橋，歸青縣鮑家嘴，入運者，不復與此合矣。乾河，今曰新開溝，自饒陽寶店東北，入獻縣之傅家屯，百道溝，逕橫頭，留鉢，小河屯，閻家莊，耿家莊，馮家橋，而流絕。謹按饒陽新開溝，共有七溝，俱乾隆五年知縣侯廷新開，以洩各村雨後積水。獻縣古乾河，自縣西鄉稍南，接武強東北境入，又東北行經元昌樓之北，過馮家橋之東，長五十六里，以下湮沒，不可尋求，河身寬廣，尙堪疏引，瀝水，土人呼爲古乾河，上游在武強縣者，則有漳沱乾河之稱，當卽漳沱故道也。其東南一支，入交河縣，曰交河，俗名高河，謹按交河縣有高河一道，上自獻縣呂家莊東，入縣屬姜家莊境，由吳家潘村，入獻縣境，與古漳沱河交，因下流宣洩，瀝水不暢，乾隆年間，於紅廟潘村北，開許家溝，長十里，至西柏舟市村。

引入清河。高河本非大水，即高陽之高河，亦非漳水可比。交河似應以漳河、漳沱二水相交而得名。不當舍大水而取小水也。其稍西北出，逕獻縣河間，二縣曰鐵燈竿河口。謹按鐵燈竿口，舊號四水。大約以唐滋沙與漳沱並稱者。至唐滋沙三河之水，自祁州合流，經博野縣爲楊村河，引而東南流，入河間府境。漳沱之水，魏武因饒河故瀆，決令北注河間。此四水之由饒陽入獻縣者也。今漳沱別徙，唐河由蠡縣遷流，自饒陽以下，皆成枯渠矣。其自河間縣迤東，流入任邱、文安，二縣之境，曰黃龍港河，即古長豐渠也。謹按河間縣志：黃龍港河，在縣東北，上流平漫，已枯斷矣。自當境臥佛堂，流逕柴家莊中樂村，入任邱縣之汪家莊、杜家莊、長豐鎮、邵家屯、楊子屯、閻家務、韓家莊，插莊約長七十里。下入文安之大窪，今涸。今河在長豐鎮之東，淤塞既久，通流形跡無從確考。寰宇記：漳沱在縣西北三十里，又東溢爲趙淀。今川原改易，漳沱經縣東，未嘗經縣西也。又黑龍港，在河間東，又有白龍河，在西，黃龍河在中，疑皆一時並流分洩之渠，而以類名者也。寰宇記：灤洲河間縣下云：大浦淀，又名大廉淀，在縣西南四十一里。水經注云：大浦下導，陂溝競奔，咸注漳沱，故人因決入之處，謂之百道口。畿輔通志：百道口在河間府城西南，今肅寧縣百龍河與中堡河分支之南，爲百道口。繫之府城者，以肅寧嘗廢爲鎮，屬河間也。其東起自獻縣，逕河間縣境，下入順天府之大城縣，而東北入天津府之青縣，曰黑龍港河。其斜出者曰王淋口支河，下流入於靜海縣之鹽河，爲子牙河。謹按黑龍港河有三支：曰東黑龍港河，曰中黑龍港河，曰西黑龍港河。係疏消上游獻縣河間一帶澀水，並無來源，會歸子牙新河北流，由靜海縣新河一帶，直達獨流老淀。三支惟西支最長，首起獻縣東南之

雙隄口。東北流逕小屯。楊家圈。拋莊。各莊。疊頭。沿莊。入河間縣之東柳村。苑各莊。邢各莊。孤莊頭。曹家務。留堰。石佛寺。寶店。牙兒莊。則有王湫口支河。自縣東北引注。流入大城縣。長六里有奇。又東北逕孔家務。白塔務。下入大城縣東南之遠南頭。其東岸則青縣之邢家務。自此犬牙相錯矣。又東北逕長蘆灘。周家莊。大木橋。紀莊。任前莊。前流莊。蓋益莊。下抵空城村。與中南二支會。中支首起河間縣之崔莊。東北流逕賈村。古家庵。向新屯。與東支合。又從向新屯分支。東北逕馬家墳。入青縣程村。吳趙下。分流十里。仍歸本河。逕辛莊。曹家寺。白廟。胡家店。抵空城村。與西支會。東支起至河間縣西河頭。逕向新屯。與中支合。又東北流逕本門店。金家堂。下有涵洞二。又東北逕李豹家莊。王鎮莊。西爲空城村。與西中二支合。其下名岔河村。合流而入子牙河。西支長一百四十餘里。東支長七十餘里。中支長六十里。又青縣東支黑龍港河一道。南由獻縣盧家莊。流入本境之西南。由西河頭。萬良寺。木門店。馬家橋。至東空城會。又總支出境。入大城縣界之西北段家莊。子牙新河。長七十一里有奇。又中支黑龍港河一道。南由獻縣向新屯。流入本境之西南。由程村。大曲頭。趙官。東白廟。均家店。至東空城會。入總支出境。入大城縣西北之段家莊。子牙新河。長五十九里有奇。西支黑龍港河一道。與大城縣管理。犬牙相錯。青邑所屬四段。第一段。由西南河間遠南頭。流入本境。東入大城縣界。長三百四十三丈。第二段。由大城縣界。流入本境。白塔務。至邢家廟出境。入大城縣。長六百二十丈。第三段。自大城縣界。流入本境。至長蘆灘出境。入大城縣界之北大木橋。長七百五十丈。第四段。自大城縣界之西南蓋益莊。流入本境。由西空城至東空城出境。會入總支。流入大城縣界之東北段。

家莊。子牙新河長四百二十四丈。四段共長十一里有奇。大城縣黑龍港河一道。自青縣潘家窰。遠南頭起。至青縣界新河口止。長五十一里有奇。辛張村前運河一道。上接文安縣界崔家窰起。下接霸州界豬頭地止。長八里有奇。北大隄。自河間交界起。至縣屬三岔口止。接文安縣柴溝村界。長八十一里有奇。又按臧家橋迤西爲漳沱河。迤東爲子牙河。自楊家口分支。繞蔡家窪。至西子牙橋。歸入正河。嗣因支河流暢。以支作正。又因歸入正河處形勢不順。乾隆二十九年。水利案內。於東子牙村。接挑新河二十里。至瓦子頭。匯入舊河。以挑河之土。築爲東隄。水大之年。新舊合爲一河。東北自天津府靜海縣之王家口。西北入順天府文安縣之東南境。繞縣北流。與霸州永清武清二縣分界。會大清河入淀。其自獻縣完固口東流。逕交河縣界。至青縣杜林木村。與漳河匯流。入衛。卽漢志所謂別水也。又東至靜海縣。下入滄州。天津縣。合衛河。此卽漢志之別河也。謹按漳沱遷徙無常。跡其所行。南趨晉冀。北擾深瀛。其流自北而南。趨清河水。奪滏陽河之道。而北河別水。依舊下合漳御。上合潮白。以海爲歸宿也。其故道支流。自正定以下。不獨川瀆改移。卽名稱亦亂。而瀛莫之間。其東南中間相距數百里。所有乾河。以漳河爲總支。西北中間亦相距數百里。頗多湮廢。而以唐河爲古瀆。以是推尋。則昔時水道。尙可約略其大概也。畿輔安瀾志。

按子牙河故道。其上流從獻縣西之完固口。出單家橋。經杜林鎮。至青縣鮑家嘴。入南運河。嗣以濁流淤運。且運河當盛漲時。水不能下。於雍正四年。塞完固口。使由獻縣之臧家橋。循張家莊。至王家口入淀。淀又被淤。於乾隆十年。築格淀隄。隔別清渾。使子牙別由一道。循隄東下。至天津紅橋。匯運

河及大清河入海。其張家莊以下分爲正支二河。支河繞蔡家窪。至西子牙橋。歸入正河。旣而支河流暢。其歸入正河處形勢稍有未順。二十九年興修水利。皇上命改支爲正。並於東子牙村別濬新河二十里。至窪子頭。匯入舊河。合流至莊兒頭而東。三十二年聖駕巡幸天津。臨視河工。復命接築格淀隄。自莊兒頭西至三灘里。屬於千里長隄。俾清淀濁河永無浸溢之患。大清一統志

中堡河。澠水故瀆也。首起深州饒陽縣。東流十里。逕五聖口。入河間府肅寧縣西南境。之子由口。又東流逕肅寧縣城南十五里。又名玉帶河。又東流五里。逕垣城。分爲二。其分支爲白龍河。由河間縣西北境入高陽縣東南境。又名趙正河。又由高陽東境入任邱縣西南境。逕王村口。會古洋河。入於柴火淀。白龍河中堡河分支也。中堡河逕肅寧縣南十五里。分支北流。凡二十里。入河間縣西北境。又北流五里。逕大城縣境。又北流五里。入高陽縣東南境。微有河形。自下河流久失。故瀆無存矣。趙王河。卽中堡河下流也。古唐河。澠水故瀆也。首起深州饒陽北之劉家莊。東北流入河間府獻縣西北境。又東北流入肅寧縣東南境。又東北流復入獻縣西北境。又東北流入河間縣西南境。又東北流逕河間府城西。繞城而東。又名儉河。又東北流會古洋河。下入於五官淀。儉河卽古唐河下流。畿輔安瀾志。今按障沱澠水相通。舊道頗多。今大半難考。摘其略可見者錄之。非稽古實存今也。

大陸澤。一名廣阿澤。在任縣。土人謂之張家泊。元和志。大陸澤一名鉅鹿。在縣西北五里。東西二十里。南北三十里。葭蘆菱蓮魚蟹之類。充牣其中。卽南泊也。百泉。牛尾。野澧。沙洛。劉累。程二寨。聖水。順



水、蔡馬、柳林等河，咸入焉。北有穆家口，洩之於北泊。東有雞爪、張滋等五溝，洩之於滏河。本朝順治十八年，重濬。日久湮塞，而五溝亦淤。其三，祇有雞爪、張滋，不絕如縷。有所受而無所洩，伏秋漲溢，爲瀕澤居民田廬害。雍正四年，怡賢親王奉命查勘，委員開穆家口河，長四十里，挑河之土，卽以夾築長隄，導澤水而注之北泊。其雞爪等溝，亦加疏濬。於是水患旣除，水利亦興。邢家灣南邊家莊北，引流種稻，營田數百頃。按南北二泊，正定、廣平、順德三府之水會也。西帶重山，二十餘河之水，建瓴而下。每遇伏秋，急流飛雨，若無二泊爲之翕受節宣，其奔衝橫溢，爲何如哉？故南之有南北二泊，猶北之有東西兩淀，皆治水者所當加意也。滹水嘗入北泊，塞河口，而環泊州縣，受漲溢之害者多年。漳河合滏，溷入南泊，而穆家、雞爪等河塞，遂至中滿旁溢，任縣、隆平坐受其浸。今幸滹漳遠徙，然二水故漬尙存，濁流遷徙靡定，旣可不祛而去，詎難不引而來。且前明之世，有障滹沱而歸寧晉以爲故道者，有請濬穆家口，俾漳滏會流者，或暫免一方之害，或微規目前之利，而不知統計全局之利害，其貽患不僅在一時也。故僅著之。又按入泊諸水，自洩、灋、牛尾、百泉、聖水等河，恒流不竭外，其餘春夏每多枯涸。然前人載之圖誌，設有橋座，蓋以攝水歸泊也。雨集山漲，由此脈分縷晰，而注之大泊，田無宿潦，其爲功也大矣。有司不知浚治，反聽民佔種。一旦山水暴來，奔騰四野，大爲田害。雍正四年，怡賢親生奏明，委員查勘，酌量疏通。五年，復檄地方官隨宜濬治，毋任湮塞。而有司不知奉行。八年秋，雨多水溢，環泊十餘州縣，皆罹其災。上廬聖懷，發帑賑濟。過後官民晏然，不以爲事。昔陸隴其爲靈壽令，令民挖濬衛河，其始頗有怨言，以爲開無水之河，徒勞民力。隴其不顧，卒成之。已而

霖雨。水大至。賴此河宣洩。至今民猶懷之。此賢達之遠見也。畿輔通志。

大陸澤。在順德府任縣東北二十里。卽禹貢所謂大陸。旣作者也。古廣阿澤。亦作廣河澤。一名泰陸水。一名鉅鹿澤。一名大麓澤。亦作大鹿澤。一名大阿澤。一名沃洲。俗名張家泊。又對寧晉泊而言。則名南泊。以其在縣之東。又名小東湖。南北袤三十五里。東西廣十三里。洛河。源出山西遼州太行山中。東西流。逕河南武安縣。入邯鄲西北境。二川雙導。遶紫山之北。一名易水。一名南易水。一名漳水。一名千步水。蓋古饒水也。二川合而東北入永年縣西北境。又東北流。逕狗山北。又東流十里。逕臨洛關北。又東流十四里。逕龍泉村。又東流二十里。逕茹佐村。又東北流二十里。逕辛莊堡。入雞澤縣西南界。又東北流。逕浮屠店。得沙河故津。折而北流。逕雞澤縣西小韓固。入南和縣東南界。又北流十里。逕善友村。又北流二十里。逕高村。入任縣東南界。又西北流三十二里。逕尼家莊。入於大陸澤。劉累河。以逕劉累村得名。滏陽河支流也。一名小漳河。一名舊滏河。一名牛尾河。滏陽河。東北流。至廣平府治西南。其北岸爲闢九。九闢之水。渙流散積。灑爲大川。東北流。繞府城而東。折而北流。逕下堡店。入雞澤縣南境。又北流。逕雞澤縣城西。又北流。逕馬坊營。入南和縣東南境。折而東北流。二里。入平鄉縣西境。又折而西北流。二里。逕辛塞村。復入南和縣東境。又折而東北流。二十里。逕史家村。入任縣東南境。又東北流五里。逕劉累村。又折而西北流。二十二里。逕尼家莊。合於沙洛河。入大陸澤。沙河。源出山西遼州境。一名瀾水。自遼州分流。入直隸順德府沙河縣西北。一自大嶺口東南流十里。一自黃背口東北流十里。會於縣西。曲折東流於山谷中。凡六十里。逕廣陽山下之渡口。

村。又東流二十里。逕左村。邢臺之野河來會。合流而東。凡三十里。遇大沙磧。分爲二。其一繞磧東南。流二十里。逕縣城南。又東流十五里。逕段家莊。狼溝河入焉。又東南流十五里。逕宋村。入南和縣西南境。爲澧河。其一繞磧東南。流三十里。逕普通鋪。俗名普通河。又東流二十里。逕田村。入永年縣西北境。又東流逕鄭歷村。入雞澤縣西南境。風而北流。逕浮屠店。分爲二支。左支名岔河。右一支名小裏河。俱北流入焉。東北流逕韓固營。入南和縣東南境。俗名乾河。一名沙沼河。又名新沙河。又名程寨河。東北流十里。逕宋家莊。又北流二十里。逕郝橋鎮東。又入任縣東南境。又屈而西北流六里。逕駱莊。又北流十里。逕東盟臺。入於大陸澤。澧河其上流沙河也。在南和縣西南。東北流二十里。逕縣城南。又東流十五里。逕大趙鎮。屈而北流二十五里。逕郝橋西。入任縣東南境。又北流十里。逕臺南村。殷陳溝水東流入焉。支流又北流二十里。逕東盟臺。入於大陸澤。按近古之勢。滏陽河爲大陸澤。灌注通衢。澧河爲大陸澤節宣要道。本朝順治中。任縣知縣吳懷忠。尋得河身。再爲開濬。雍正中。怡賢親王大加修治。濬北澧河。以達寧晉泊。民咸賴之。今滏河淤高。水反倒灌。奪澤去路。澧河亦日淤塞。在南者不足容諸河之水。在北者不足洩大澤之水。旱則成陸。潦則汪洋。卽不旱不潦。而民不獲利。常被水患。任民耕植。難以豐收。今欲復其故。非治溢澧不可。而其功甚鉅。蓋難言之。百泉河。源出郡城東南十二里之百泉村。從地涌出。不可數記。故以百泉名。卽古澗水。或云便水。一名鴛鴦水。匯而爲淵。廣周十餘畝。其清可鑑。分流爲二。其一北流數百步。折而東流二里。又分爲二。俗名葫蘆套。自套而北者。北流一里。又分爲二。一北流過沫耳關。入於七里河。一東流逕孔橋。又屈而南。

流。逕王快東市。入於七里河。自套而南者。折而東流。又屈而北流。逕西樓下村。又折而東南流。逕北屋村。又分爲二。入沙河縣界。一南流逕潘莊。合於狼溝河。一東南流六里。逕下善村。亦入狼溝河。其一東流一里。逕小廠村。又東流七里。逕前樓下村。過石橋。亦分爲二。自橋而東者。折而北流三里。入於七里河。以下百泉七里。互受通稱矣。又折而南流七里。逕河會村。又屈而東流一里。入南河縣西境。又折而東北流八里。逕河郭村。又北流五里。逕小胡村。又折流七里。逕賈家村。又東北流七里。逕王家村。入任縣南境。又東北流十五里。逕臺南村。又北流十五里。至王路村。入於大陸澤。順水河。百泉支流也。源出邢臺縣之東汪。大賢。廣闊。永濟。重興等十八閘。閘中散水積以成川。東流自邢臺以及南和。河身散漫。不復可考。自南和縣北之賈宋村。北入任縣西北之南甘寨村。河流始顯。東北流三十里。逕大宋村。達活河。支流自河頭村東入焉。是名河頭溝。又東北十五里。逕齊村。又北流二十里。逕路村。入於大陸澤。達活河。源出順德府治西北五里之達活泉。一名蓼水。西一泉曰瓦甕。東流二百餘武。滙爲池。廣周數百步。深可一丈。澄泓鑑澈。東南逕郡城北上。俗又名牛尾河。又東流逕海會橋。野狐泉水注之。又東流逕高莊橋。沙底河入焉。一名響泉河。以下互受通稱矣。又東流四里。逕張村。又東流十八里。逕小呂村。百泉河水北流入焉。一爲關家灣閘渠。一爲永濟閘渠。又東北流十二里。逕河頭村。入任縣西南境。又東流十八里。逕任縣城西。其支流東流二十里。抵縣城。環城爲濠。又自西水關入縣城。東流逕縣治。又東流逕縣文廟。又北流出北水關。又於城濠滙入正支。其正支東北流逕縣城北。又曲折東北流二十里。逕南留寨。入於大陸澤。蔡河。其上流有二。皆無

泉源。在邢臺縣境者。首起縣北三十里之蘭陽岡。東流岡下。有小橋跨其上。卽往來驛路也。東北流五里。入內邱縣界。逕下屯村。而東南流五里。復入邢臺縣境。又東南流五里。逕龐馬村。復折而東北流十里。逕陳家屯。又東北流三里。逕東時村之後。有小泉二。滙流入焉。又東北流與內邱縣之蔡村河合。其在內邱者。首起縣西南十里之狐狸村。常時無水。爲西南山水及各村瀝水之總道。東行一里。逕馬村。又東行八里。逕縣南二十五里之梁原店。店與邢臺縣蘭陽岡對。相去五里而近。又東南二十里。逕太平村。入邢臺縣境。又東流十里。與邢臺縣之蔡河合。又東北流入任縣西北境。逕張霍村。又東流河形漸微。又東流二里。河形復顯。又東流合於聖水河。又東流八里。小馬河自唐山縣東南流入焉。又東流十里。逕馬河橋。入於大陸澤。李陽河。源出內邱縣西北五十里之且停山。兩源並發。合而東流三十里。逕石河村。分爲二。雙導並屈而北流二十里。逕內邱縣城西。復合爲一。折而東南流五里。逕李陽村。又東流十三里。逕河渠鋪。入唐山縣西境。又名馬河。又東南流五里。逕高村。又東南流二十里。逕景福村。入任縣東北境。又東南流逕牛村。羊村。入於大陸澤。雞爪河。在大陸澤東北。源出大陸澤中之環水村。東流七里。在邢家灣歸滏陽河。其北有溝。名小雞爪。皆洩水之路。穆家口河。雞爪河下流也。雞爪河逕穆家口分二支。一東流逕邢家灣入滏陽河。一東流入新澧河。新澧河卽澧河下流也。一名北澧河。在大陸澤北。起自穆家口。亦名穆家口河。北流五里。逕崔家莊。入隆平縣東南境。又北流四十里。入寧晉泊。全澤之水。所由以歸此泊者也。謹按新澧河卽舊滏陽河所行之道也。往時澧河至穆家口。會滏陽河。北入寧晉泊。直下天津。明嘉靖間。發夫修濬。

自萬歷二十六年漳溢入滏。滏亦東徙。此河遂淤。於是全澤之水。惟憑雞爪一河。瀉入新徙之滏。而新滏又日淤。爲害滋甚。雍正四年。乃復修浚。蓋自元郭守敬至此。澤河凡四治矣。夫治滏不入澤。入澤之水。惟澤爲大。澤治而大陸澤無不治者。今新澤之入隆平界者。農人多爲開蓄。水以灌田。河身日窄。其流不暢。隆民復築長隄於穆家口北。水發無去路。大陸澤遂長爲任患云。又按北澤河。乾隆二十八年估挑。因勘入緩工而止。原奏略云。北澤河長四十七里。爲兩泊轉輸要道。間段淤淺。各加濬治。以暢下注。估挑面寬六丈。底寬三丈。深八九尺不等。約需銀五千六百五十一兩零。謹按大陸澤。舊時所謂九河八水者。蔡馬二河合聖水。以歸滏陽。百泉合達活。以歸滏陽。滏合百泉。以歸滏陽。洛沙俱由石家渠。以歸滏陽。涉河入滏。涉河入馬河。牛尾河入順水河。順水河入達活。程二寨。殷陳溝。俱入滏。牛家口河入滏。是則十七水者。罔不歸滏陽河。故滏陽河又爲大陸澤之尾閘也。

畿輔安瀾志。

寧晉泊。一名胡盧河。在寧晉縣東南。自隆平縣流入。又東北入冀州界。舊志在縣東南二十里。東西徑三十里。其上流卽漳水與滏水合流。會大小羣川注此。土人稱爲寧晉泊。卽北泊也。洩河。冶河。沙河。涉河。槐河。午河。李陽河。七里河。滏陽河。咸入焉。自滹沱河南徙。由賈口而入。淤塞滏河。故道三十餘里。水無所洩。遂衝決洩口。營上等村。而東注水口。河身亦多淺溢。雍正三年。滹沱東徙。不復入泊。四年。怡賢親王奏請開挖。自黃兒營。至營上村。一路展寬濬深。泊水始得暢洩。畿輔通志。

寧晉泊。在寧晉東南二十五里。亦卽大陸澤也。一名胡盧河。一名北泊。新澤河。出順德府邢臺縣之

百泉河，卽南澧河北澧河也。其名新澧，由明嘉靖中，重爲濬治故也。自大陸澤北流五里，逕崔家橋，入隆平縣東南境。又北流五里，逕奮城村東。又北二十二里，逕羊毛坑塔，入於寧晉泊。氐河，其源有二，一出臨縣西七十里之敦輿山下，東流二十里，逕三峽村，與臨城之水會。二水合而東流三里，逕東堅村，則有天臺寨水入焉。又東南流四里，逕柏暢村，是名三斷綠楊河，則有乞了山水入焉。又東南流，逕臨城西。又東南，逕城南五里，則有八里溝水入焉。又東南流，逕鈎盤山。又東南流，逕西尹村，仍入於內邱縣東南境。逕東尹村，俗名尹村河。又東北二十二里，入唐山縣西北境，俗名脂溝。又名沙河。又東北流，逕小千言村。又東流，逕唐山縣城北。又東流，逕宣務山。又東流，逕官莊，入隆平縣西境。又東北流五里，逕隆平縣城北。又東北流二十里，逕王家莊，入寧晉泊。午河，源出臨城縣北五里，泥河村之北岡，亦太行支山也。東流二十四里，逕鎮內村，入柏鄉縣西南境。東南流五里，逕柏鄉縣故城南。又東南流十里，逕柏鄉縣城南。又折而北流一里，環城爲濠。又折而東流十二里，逕南滑，北滑，入隆平縣西北境。又東流二十里，逕黃家莊，入寧晉縣東南境。入於寧晉泊。涉河，出贊皇縣西六十里之小石門，贊皇山別阜之麓也。一名石濟水。一名白溝水。一名沙河。北流十五里，逕胡家庵。又東南流二十五里，逕贊皇縣南十里。又東流四十里，逕王俄府，入高邑縣西南境。又東流四里，逕房子故城北。又東流四里，逕千秋臺北。又東流三里，逕高邑城南。又東南流十二里，逕莊頭村，入柏鄉縣西北境。俗謂之槐河。其分支自莊頭村東，逕光武廟，白社村，營兒村，中黃泥，入於隆平縣之西南境。其正支又南流十二里，逕柏鄉縣城西北。其分支南流，會於城濠。其正支，又東流，逕柏鄉

縣城北。又東流十二里。逕共滑村。入隆平縣西北境。又東流二十里。逕黃家莊。入寧晉縣西南境。則有新挑河。自高邑縣西北。東南流入焉。又東流至北魚村。入寧晉泊。槐河。古沮水也。源出贊皇縣西北七十里黃沙嶺。亦名渡水。亦名濟水。亦名黑水。亦名白溝河。亦名野河。亦名槐武河。亦名沙河。亦名氾河。自黃沙嶺下至黃沙嶺口。東流至堵戶村。河形湮廢。幾不可識。自堵戶而下。合野狐泉。泥橙口。段嶺口諸水。河流始顯。東流逕贊皇縣城北五里。又東流十里。逕東高村。入元氏縣西南境。又東流逕紙屯村。氾水自封龍山東南流來會。自下槐水。坻水。俱得通稱矣。又東流逕元氏縣城南。逕大陳村。入高邑縣西北境。又東南流逕高邑縣城南十四里西北。南流逕河頭村。入趙州西南境。土俗名之沙河。又東南流逕野雞鋪。又東南流逕南封村。入寧晉縣西北境。是名槐武河。又東流逕寧晉縣城南。又東流至大曹莊。入寧晉泊。洩河。源出正定府獲鹿縣西南五十里井陘山。一名童水。東流逕封龍山北。則有金河會新渠水。東南流入焉。又東流逕高遷村。北沙河東流入焉。又東南流逕牛家莊。入欒城縣西北境。又東南流逕趙莊。元氏縣之南沙河東南流入焉。又東南流逕新莊。元氏縣之金河。泥溝河。東流入焉。又東南逕龍門村。入趙州西北境。又東南流四里。元氏縣之豬龍河東南流入焉。又東南流二十里。逕邢村。井陘縣之冶河東南流來會。又東南流二十里。逕趙州城南五里。又東流三十里。逕浹洋村。入寧晉縣西南境。又東流十二里。逕寧晉縣城南。其分流寧晉渠。古名新渠。又東南流十四里。逕東汪村。入於寧晉泊。七里河。在寧晉縣南二十五里。河身在寧晉泊內。上下源流不可考。志以爲槐午諸河之下流。蓋洩泊水而注之。滎陽河者。自滎陽河東徙。七里河



與泊混而爲一。僅有其名矣。新挑河。雍正五年起。自寧晉泊南泊口。爲灃河出泊之路。亦浚河入泊之路也。引泊水達於滏河。東北流十二里。逕東侯高村。入於滏陽河。乾隆二十八年估浚後。勘爲緩工而止。謹按寧晉泊。在滏陽河之西岸下游。由七里河新挑河入滏。自乾隆五十三年。廣陽隄廢。漳水南來。挾沙而行。將滏河下游正身淤塞。連年南徙。遂將北泊淤爲平地。嘉慶六年大水。愈淤愈高。泊水漫溢入滏。滏河下稍不通。無路宣洩。遂將東岸隄堰衝決。水趨東岸民田。自六年以後。連年汕刷。已成河形。總督溫承惠奏請。將已成河路之處。就其深淺。分別挑挖。使水有歸宿。民業乃安。

畿輔安瀾志。

滏陽河亦名滏水。源出磁州神麋山。東北流經邯鄲縣東三里。會渚沁二水。一統志。舊滏河在雞澤縣西。自永年通水閘。北流逕此。又北達平鄉縣。入寧晉泊。舊道紆曲不能容。常潰決爲民患。本朝康熙七年。知縣姜照挑濬新河。以導其海。自馮鄭村。至亭泊頭。長二里許。六方等村。永無水害。按滏陽河。舊合漳流。故多衝溢。今漳水東徙。經魏縣。元城。抵館陶。入衛。遂不與滏合。滏水獨行。貫寧晉泊而出。至衡水縣界。漳沱河出焦岡合流。徑冀州。武強。獻縣。河間。青縣。大城。入淀。名子牙河。其支流自完固口。徑杜林鎮。抵青縣之鮑家嘴。入南運河。近已淤淺。唯子牙一支爲巨津焉。自寧晉泊以上。滏水所經州縣。引流種稻。沿河閘座甚多。而磁民欲專水別。以致下流稻田多廢。爭訟不休。雍正四年。怡賢親王奏稱。查廣平府舊志。磁州屬廣平路。領成安。今成安現隸廣平。則磁州本非豫屬明矣。請將磁州改歸廣平府。則滏陽一河。全由直隸統轄。均水息爭。同安樂利矣。奉旨。怡親王奏請將磁州改

歸廣平府管轄。以收滏陽水利。稽考志書。相度地勢。援古證今。俱爲符協。似於廣郡一帶民田。大有裨益。著九卿會議具奏。嗣經戶部議覆。應如所請。行自是廣平以下。均沾河潤。各州縣營田多至二千餘頃。從前斥鹵。盡爲稻鄉矣。按滏河隄岸。例係灤河村莊修築。工多力寡。難免潰決。應照千里長隄之例。將該州縣隄工丈尺查明。按通邑里甲攤派均修。造冊存案。永著爲令。工少人多。自成鞏固矣。出泊以下。水勢倍增。會以滹沱悍流。民堰難資捍禦。雍正八年。衡水隄決。溢流直犯青縣。應將臧家橋以上。直至衡冀一帶民堰。令地方官查估動帑增修。工竣。仍照千里長隄例。令民間常年修補。畿輔通志。

滏陽河。本名滏水。在磁州境。其源有二。一出州西南四十里之神麇山。一出州西北四十五里之鼓山。其出神麇山者。東北流二里。逕臨水村。與鼓山之水會。其出鼓山者。東南流三里半。則有八字澗。在州西北七十里。自山西分流東南流入焉。亦至臨水村。與神麇之水會。流合一。有廣盛泉水東流入焉。又東南十五里至九龍口。則羊渠河水入焉。又東南流十八里。則泥河水入焉。又東南流四里。逕西開。播爲五爪渠。玉泉之水入焉。又東南流十六里。逕州城南五里。遶而東。折而北流。逕州城東。又北流凡三十六里。逕東開。分支爲西東北三渠。又北流二里。逕屯莊。則有牯牛河合賀蘭河水。自州西北東流入焉。又北流五里。則有澗河。自州西北東流合波水溝入焉。又北流四里。逕張家莊。入邯鄲縣南。又北流東轉十四里。又屈而西北流十二里。又北流東轉十六里。逕羅城頭。則有渚河。自縣西東流入焉。又北流十六里。逕邯鄲縣故城東。又北六里。逕蘇曹村。則有沁河。自縣西合牛照河。

東流入焉。又北流東轉十六里。又屈而西北流十里。又折而東北流十里。逕馮村。則有輸龍河。自縣西北東流入焉。又北流三里。則有柳楊河。自縣西北三十里之雨岡村。東南流二十里。逕蘇里。闌入焉。又東北流十二里。逕唐家屯。入永年縣西南境。又名柳林河。又東流十二里。逕永年縣西境。其分支爲小滄河。一名舊滄河。一名牛尾河。一名劉累河。又東流十五里。逕廣平府城南。其分支環城爲濠。又折而北流。逕郡城東。凡十里。又折而東北流二十里。逕于家寨。入曲周縣西南境。又東流八里。逕滄陽集。得漳河支流故跡。又東北流二十里。逕曲周縣城南。折而北流。繞城東八里。又北流十八里。逕舊城營。入雞澤縣東南境。又北流十六里。繞雞澤縣城。分爲二支。南爲文明河。北爲興隆河。皆東流入於城隍。其正流又北流十里。逕東於自口。入順德府平鄉縣東南境。又北流十二里。逕平鄉縣城東七里。又東流十四里。逕油臺閘。折而東北流十二里。逕豆店橋。又屈而西北流十八里。逕龐家莊。入任縣東南境。逕新店橋。又北流三十里。逕邢家灣。則有縣東北大陸澤之水。自雞爪河東流入焉。其東岸入鉅鹿西北境者。長一百里。又北流三十里。迄范家莊。入隆平縣東南境。又名清水河。又北流五十三里。逕耿家莊。入寧晉縣東南境。又北流三十五里。逕洩口村。則有縣東寧晉泊之水。自新挑河東流入焉。又北流十里。逕小河莊。則有鹹河。自正定府藁城縣東南流入焉。又折而東北流十五里。入冀州西北境。舊自保定府東鹿縣南之百尺口。合滹沱河。入冀州西營坨塔村。爲滹沱會流河。乾隆二十四年。滹沱改流。由晉州魯家莊入寧晉縣東北境。分東西二支。東由冀州營坨塔村入滄。西由縣境營上村東入滄。自冀州而北。皆爲滹沱所奪。不復名滄矣。嘉慶六年以後。冀州新

河寧晉隄工俱有漫口。河泊相連。民船商艘。徑由冀州之柏牙莊。新河縣之大田莊。寧晉縣之侯家口等村入泊。連年汕刷。河形已成。則又非曩時故道矣。畿輔安瀾志。

千里長隄。起清苑縣界。訖獻縣之臧家橋。周回於順天保定河間三府之境。長千有餘里。沿河繞淀。爲數十州縣生民之保障。康熙三十五年大水。多漫決坍塌。我聖祖軫念郊圻。頒發帑金。命河臣王新命徧行查勘。一例加修。增設縣丞主簿等官管理。隄固河平。民享樂利者二十餘載。雍正三年大水。漫決尤甚。存者亦大半殘缺。四年。上命怡賢親王委員領帑。畫地修築。加厚增高。統於是秋告竣。奏隸河道統轄。董理責成。工程日以堅固。迄今六十載。高下豐稔。瀕河近淀。州縣井閭。皆歌樂土焉。畿輔通志。

又東南運河合漳水。漳沱河水來會。詳下衛河。又東南至大沽北。入於海。皇朝通志。

又東南運河自南合漳水。漳沱。東北流來會。經府城北。又東南至大沽北。新河南。入於海。府東北有大河。由西南流入直沽。自天津而東百餘里。水經斬家窰。鄭塘莊。雙港。新莊。南陽。馬頭。鹹水沽。葛沽。郭家沽之北。其東即大沽海神廟也。水道提綱。

謹按海河受直隸全省之水。輸之於海。南流逕大直沽。則有陳家口引河入於賈家沽。道引河南流入焉。又東南流逕賀家口。則有賀家口引河。逕何家圈。則有何家圈引河。逕雙港。則有雙港引河。南逕白塘口。則有白塘口引河。又東流北折。又屈曲東南流。又折而東流。逕鹽水沽。則有鹽水沽引河。俱東流入焉。又東流折北。逕泥沽。則有泥沽之水入焉。又東流折北。屈而南流。逕盤沽。則有盤沽之

水入焉。又東南流逕葛沽，則有葛沽之水入焉。又東流逕盧家莊沽，則有盧家莊沽之水入焉。又東南流逕黃家園沽，則有黃家園沽之水入焉。又屈曲東南流逕鄧善沽，則有鄧善沽之水入焉。又東流折南，薊運河西南來會。又東南流逕大沽，又東南流逕東沽，入於海。畿輔安瀾志。

薊運河古鮑邱水合洳、庚、灑、藍、巨梁諸水以成者也。自西迤東，水源不一。明嘉靖二十四年，遏潮河不使入順義縣境，由密雲縣合白河爲北運河，其下自白河支分，循其故道，以入於海，亦謂之潮河。鮑邱河在三河縣西南，上接順義縣境，上無來源，至縣東青陽屯，始有河形。東南流逕陽店鎮，東泥窩鋪西，又東南流逕料馬莊出境，又東南流入寶坻縣北境，又東南流逕王甫營，則有窩頭河之水自西來注之。又東南流逕龍虎莊，又東南流逕張司馬莊，又東南流逕林齊口，又東南流逕王山莊，又東南流逕郭家莊，又東南流抵寬江村南，八門城北，則抽針河之水自西來入之。東南流合於洳河，洳河發源薊州黃崖口外，名黃崖川，古廣漠川也，俗名頭道河，南流入黃崖關，又西南逕平谷縣南，舊有獨樂河，合馬莊河，逆流河，盤山水入之。又南流逕三河縣東北境，則有周村河、合石河、顧現河、芮家營之水自西來注之，卽洳河也，名之曰洳口，俗又謂之錯河。又南流逕鞅城東，謹按一統志云：鞅城在三河縣，舊志云：今有英城，在城西北三十里，此卽鞅城之訛，又謹按鞅城，水經注誤作鞅，又誤爲英。三河縣志遂以爲元耶律英公之城，更誤矣。則有五百溝水、靈山泉水，東流注之。又南流逕縣城東，又南流逕石牌鋪，直縣治東南隅，有水注之，蓋錯河之分支，俗稱七渡河水，非也。又東南流逕四河村，又東南流逕料馬房，入寶坻縣白龍港，則有沽河水自北來合之。沽河古庚水，亦謂

之溲水。一名雲溲水。亦曰梨河。以下流入沽。故名沽河。或以爲林河音訛而爲梨。或以爲唐水。庚水。俗又謂之還鄉河。皆非也。源出遷安縣界之鹿兒嶺。西流入遵化州東境。則有大水峪。小水峪之水。自北來注之。又西流則有松棚河水。自北來注之。又西流則有三小泉。南北夾注之。又西流則有雙泉寺水。自東南來注之。又西流逕龍潭。又西流逕牛門口。又西流逕蔣家莊。迤西南流則有南岡之水。自北來注之。折西流逕李家莊。又西流逕賈家莊。又西流逕水門口。而西曰合河。則有沙河。合諸水。自水門口注之。沙河在遵化州西。古灑水也。以其出自口外諸山谷中。衆水所匯。故名十河。折東流。又屈西。逕藥王廟西。又西南流逕州城南關。環城爲濠。又西南流逕十里鋪。又西南流出水門口。河則有湯河。馬蘭峪河。大安口河。冷嘴口河。清水河。五里河入之。口外爲石門峽。灑水所從出也。又西南流折南。逕柳貫莊西南。下合於梨河。曰合河。又西流逕蒼山鎮。又西流逕孫家樓。又西流逕張子村。曰張子河。則興龍口河入焉。有淋河之水。自馬伸橋北來注之。自發源至此。長一百一十里。西南與玉田縣分水。又西流入薊州東南境之南三岔口。則有黑泉水注之。又西流逕六百戶莊。于家橋。楊各莊。十百戶莊。則有老廟泉。下莊泉。高家窪泉。桃花山泉。神仙泉水注之。又西流逕館驛前。直薊城南五里。名之曰沽河。則有陽河。合白馬泉。西來注之。折南流逕五里橋下。又南流逕西河套。又南流逕蔡家莊。又南流逕激流店。又南流逕窩頭。又南流逕周各莊。又南流逕上倉店。東直別山。又南流逕程子口。又南流逕王家淺。又南流逕堰頭莊。則有隅頭泉。合黑泉。黃泉。大駝泉。排源泉。天心泉。景家泉。龍泉。定福泉。龍王泉水入之。又南流逕消流店。又南流逕老曲莊。又南流逕楊各莊。西對

白塔鋪。又南流逕康各莊。又南流逕下蒼。又南流逕嘴頭莊。則限渠泉。合盤山泉。龍口泉。瀑水泉。白澗泉。沙河溝諸水入之。與洵河會於白龍港。計自南三岔口至嘴頭莊長一百三十里。沽河洵河既會於白龍港。東流逕柳林口。又東流逕北潭。又東流逕龐家場。又東流逕新安鎮。又東流逕高家莊。又東流逕樓家莊。折南流逕小河口。入玉田縣境。則有紫金泔水。合螺山水。采薺橋河水。自東北來注之。又東流逕丈二窩。則有小泉河水。自東北來注之。又屈曲南流逕楊家套。又南流逕大沽。又南流逕畢家莊。又南流逕灘沽莊。又南流逕凌眼莊。又南流逕魯沽莊。又南流逕石白窩。西長亭莊。東又東南逕芝赫窩。又南流逕寬江村。則有鮑邱河。窩頭河水。合流自西來注之。又南流逕八門城。又南流逕託床沽。又南流逕楊家莊。又南流逕走線莊。又南流逕張窩頭。迤東南流逕盛家莊。則有還鄉河西岔支入焉。又東南流逕寶坻縣屬之豐臺。則有還鄉河東岔支入焉。又東南流逕寧河縣江潢口。爲潮河。潮河卽洵河。梨河。還鄉河。諸水所匯。古鮑邱河入海之故道。自寶坻縣之白龍港。抵寧河縣之江潢口。屈曲南流逕落波亭。又南流逕幫道沽。又南流逕清泥沽。又南流逕岳旂莊。又南流逕江石沽。又南流逕小楊莊。又南流逕田家莊。又南流直縣北之板橋莊。遶城東流逕東窩莊。又南流逕南窩莊。迤西流逕西園。又南流逕果園。又南流逕米廠。又南流逕木頭窩。又南流逕大挺莊。又南流逕蘆臺鎮。又南流逕北澗沽。則有七里海之引河。西來入之。又南流逕田家莊。又南流逕漢沽莊。又南流逕寨上莊。又南流逕南澗沽。又南流逕營城莊。又南流逕場洵莊。又南流逕避風嘴。則有曲里海之水。自寧車沽西北來注之。又南流逕北塘口。計自江潢口起。至此長一百五十里。有新引

河之水自天津西來橫入之。又南流入於海。謹按新河在寧河縣北。明天順二年開。西起天津直沽。東至北塘口。與薊運河合。以通漕艘。長四十里。後廢。本朝康熙三十四年重開。寶坻縣志。康熙三十四年。重開新河一道。長二千一百八丈。底寬二丈。面寬二丈五尺。深五尺。每歲檄鄰邑協修。雍正十年。分設寧河縣。其河則寶邑承挑一千一百丈。寧河承挑一千八丈。乾隆元年。發帑歲修。專歸寧河。謹按一統志。新河故道。自寶坻縣東流。逕豐潤縣南。又東逕灤州南。又東至樂亭縣入濡水。舊志。有潮河在灤州南一百三十里。海水蕩滂。流延百餘里。乃黑洋海口東派。北運會家灣。流至濟民場東。距蠶沙口二十里。亦名林裏。疑卽新河餘流。畿輔通志。渤海在寶坻縣東南二百里。西南接天津。東卽豐潤界。豐潤縣志。海在縣東南二百里。東際遼海。西抵直沽。南達登萊。浩瀚千有餘里。爲還鄉河。陡河。歸宿之所。魚鹽蜃蛤。居民利之。樂亭縣志。新河在縣西三十里。夾於清灤之間。卽古新河也。自雍奴而達海。會灤水。雍奴卽武清鮑邱水。卽潞河也。蓋新河橫亙於南北。而灤潞得以交通。故饋運相接。自此渠廢。而東餉遂由海道。風帆浪泊。時日靡定矣。水經注濡水篇。濡水東南流。逕樂安亭南。東與新河故瀆合。自雍奴縣。承鮑邱水東出。謂之鹽關口。魏太祖征場頓。與洶口皆導也。世謂之新河矣。陳壽魏志。以通河海也。新河又東北出。逕右北平。絕洶渠之水。又東北逕昌城縣故城。南至新河。又東分爲二水支瀆。東南入新河。至支渠。東出合村大水。謂之交流合。又東出海陽縣。與緩虛水會。又東與素河會。謂之白水口。又東至九過水口。又東逕海陽故城南。又東與清水會。又東木究水出焉。又東左迤爲孔陽孤淀。又東會於濡。詳其水道。蓋西起天津。東盡灤河以達海。古新河橫



互道里之長如此。明時所開僅四十里。起武清迄寶坻。未及古水道十分之三。猶仍舊名。而謂之新河。非謂至此新開也。樂亭縣志之言。爲得其實矣。畿輔安瀾志。

此  
页  
空  
白

# 續行水金鑑卷第六十七

運河水 衛河 原委三

衛河源出山西潞安府南經澤州東南入河南懷慶府北入于沁水皇朝通志

衛河以地名本出百泉水及淇泉也其源遠而水盛有小丹河與五峪口水爲百泉之上源有浙壑盈盈三水爲淇泉之上源小丹河卽丹水分支也由山西潞安府南山發源南流東合陵川西合高平諸小水經澤州東南入河南懷慶府北境之方山南流入沁水者此經流也俗曰大丹河水道提綱

其分一支經溫縣北武陟縣北修武縣東南皇朝通志

其分一支自方山東南流經清化鎮南折而東流經溫縣北武陟縣北又折東北流經修武縣城東南又東北有一水合二泉水自西來會靈泉水出修武縣西東流經縣城北合二泉水一曰馬方泉一曰五里泉自縣西北山東南流注之水道提綱

按丹水之名見於水經今考自九道堰北東分水入河東徑清化鎮南又東徑太師莊二十五泉水入焉又東至薛莊村交武陟縣界計四十九里兩岸子堰自太師莊至薛莊各長二十九里武陟接界東逕寧郭城南至南謝橋交修武界計三十五里兩岸子堰各長同修武接界東逕馬廠又東至司家橋交獲嘉境新河水入焉計六十二里半有零兩岸子堰各長同小丹河丹河水分支在九道

堰之北。東一水。東出設石斗門。以分水入衛河。濟漕者也。徑清化鎮。又東逕太師莊。二十五泉水左右入焉。薛家泉。在太師莊北。長三里。王家磨。東入河。王家泉。在太師莊東北。長二里。入河。史家泉。在薛家屯。入楊家泉。楊家泉。在薛家村北。三里。入河。沙泉。在甄井村。五里。入河。以上俱在小丹河北。四府泉。在界溝東北。匯杜家泉入河。朱家泉。在東界溝村東南。匯杜家泉入河。老牛泉。在白馬寺西。五里。入河。杜家泉。在王保村南。六里。入河。斜泉。在老牛泉東。匯杜家泉入河。周家泉。在斜泉東之東。張趕村三里。匯楊家泉入河。白馬泉。在白馬寺前。長里許。入河。孫家泉。在蘇莊東。三里。入河。岳家泉。在煙粉莊。匯白馬泉入河。又楊家泉。匯岳家泉入河。新泉。匯楊家泉入河。李家泉。匯新泉入河。葦園泉。在東張趕村四里。匯吳家泉入河。吳家泉。在東張趕村三里。入河。官泉。在東張趕村二里。入河。蘇家泉。在蘇家屯北。三里。入河。騷狐泉。在蘇莊三里。入河。漂布泉。在諸葛莊二里。入河。又孫家泉。匯吳家泉入河。以上俱在小丹河南。按小丹河爲九道堰之一。取口在諸渠之上。邑民設渠溉田。故亦曰小丹民河。後以小丹河濟漕。運外。餘水聽民灌用。康熙二十九年四月。於大丹河口。橫河築壩。阻水南流。致十八渠不沾餘瀝。知府劉維世。知縣李樞。爲民請命。於是巡撫閻公興。邦飛。咨總河王公新。命相繼親勘。題定每歲三月初。用竹絡裝石。橫塞諸渠。使水歸小丹河。入衛濟漕。留涓滴之水。以灌地。至五月盡。重運過完。則開諸渠。用竹絡裝石。塞小丹河口。以防山水漫溢。士民稱便。其小丹河。徑修武。獲嘉。以達合河鎮之處。若有淺阻。責令印河各官。量爲疏濬焉。懷慶府志。

又東北經獲嘉縣北會一水。曰竹林泉。出西北山。東南流注之。又北五峪水。自西北來會。五峪水。源出山西陵川縣東南馬武山。南流曰平田水。有小水二。西南自黃圍山來會。又東流入河南輝縣西界之五峪口。又東南百餘里。會小丹河。水道提綱。

又東北有百泉水來會。皇朝通志。

又東北至合河鎮之北。有百泉水自北來會。始名衛河。百泉水。北出輝縣北蘇門山。南流經仁義二關。至縣城西。分而復合。有卓水泉自西北來會。又西南經禮智信三關。又南與小丹河會。古百泉在北。淇水在南。此百泉水在淇水南。非詩所謂百泉也。水道提綱。

衛河源出河南輝縣蘇門山之百門泉。亦名拗刀泉。方池二十畝許。泉出其中。不可數計。南流至新鄉境。漸深廣。通舟楫。蜿蜒而東。經汲縣。淇縣。湯陰。安陽。直隸濬縣。滑縣。內黃。大名。元城。至山東館陶縣北。入臨清州。與汶水會。自發源至汝河合流處。共計九百二十三里零。山東運河備覽。

衛河古清淇二水所導也。漢爲白溝。亦曰宿胥瀆。隋爲永濟渠。宋元曰御河。明曰衛河。其源導自河南輝縣城北蘇門山之百泉。衆源所匯。亦謂之北門陂。亦曰百門泉。亦謂之拗刀泉。距城西北隅五里。南流枝津右出爲三渡河。則有蓮花泉入之。又南流入新鄉縣之合河鎮西北。則有卓水陂。於輝縣城西十里。東南流注之。西則清水。小丹水。合流注之。又有峪河。合天門山諸泉。亦自獲嘉縣流入之。畿輔安瀾志。

又經新鄉縣北。衛輝府西南。至淇縣東南。有淇水來會。皇朝通志。

又東南流經新鄉縣北。又東北至衛輝府城之西南。折而北流抱城西。及北折而東流至淇縣東南境。淇水自北來會。淇水上源出山西平順縣南陵川。縣東之高山。浙山。二澗。合曰浙水。東北流有花鈺山水。自南來會。又東北有壅水。西北自抱犢三壑。柴園三山來會。又東至玉峽關之南合澗口。有盈盈水。西北自平順東南來會。遂東流入河南林縣南境。又東南經六嶺山北。又東南經淇縣西北。有淇泉。自西南來注之。又東流至高村北。折而南流經淇縣東境。又東南與衛河會。水道提綱。按衛河經新鄉。汲縣。而東抵臨清。與汝河會。流行九百二十三里。其間水之入者六。曰小丹河。靳脛河。淇河。湯河。安陽河。漳河。自臨清州板閘以北。賴衛水濟運。康熙二十九年。河臣王新命。以衛河在輝縣境內。民間設立仁義禮智信五閘。蓄水灌田。例於五月朔封板。以水濟運。有妨農務。請用竹絡裝石。量渠口高下堵塞。使各渠之水自盈。而所餘水得長流濟運。自此漕民兩便。乾隆二年。隄岸衝缺數處。三年動帑修築。自曲里封至雙河頭。計一百四十五里。大清一統志。

又東流逕汲縣城北。卽衛輝府治也。右得沁水決入故津。又東流入濬縣境。則淇水自林縣西南流注之。卽宿胥瀆也。其西岸爲淇縣。又有陽河之水。陽河。靳脛河。一水異名。會馬溝水。美溝水合焉。畿輔安瀾志。

沁河故道。自懷慶府武陟縣。流入獲嘉縣南。又東南經新鄉南。又東北經汲縣北。入清河。按沁河支流。自懷慶府武陟縣紅荊口。經衛輝。入衛河。隋大業中。開永濟渠。嘗引以通涿郡。元郭守敬言。沁餘水引至武陟。北流合御河灌田。此沁入衛之故迹也。明初。河逕入淮。不與沁合。乃鑿渠引之。令河

仍合沁後沁全注黃河而入衛故道盡湮萬歷十五年沁決武陟東岸新鄉獲嘉被淹時議引沁入衛因沁河多沙不可漕遂止大清一統志

流經滑縣西南濬縣西又經湯陰縣東有湯河來會皇朝通志

衛河既會淇水東流經滑縣西南界又東北經縣城西道口又北流經濬縣城西大伾山在濬縣東一名黎陽山又名清潭山衛河至此名黎河又名濬河又東北經湯陰縣東界有湯河自西來注之湯河即羗里河出湯陰縣西山中東流經縣城北又東入衛河又東北經彰德府治安陽縣東南界有洹河自西北來會其南岸即直隸內黃縣西境也洹水出府西南山中北流合珍珠泉水折而東南流經府城北又折而南流東入衛河水道提綱

河備覽  
按乾隆三十九年總河姚公奏引洹濟運令四月初一日啓板濟運五月十五日封板灌田山東運

又東北流逕滑縣界又東北流逕內黃縣北湯陰縣西則有蕩水受羗水防水長沙溝永通河洹水受黃水葦泉水雙泉陵陽河合流注之謹按運河以濟東南之漕關係尤重有衛河以爲輸糧始無阻礙左會漳河右納汶水上游則清淇蕩洹諸水佐之其水千渠萬澮交流合注尙有淺濶之處從事北河者必加之意焉惟沁水濁而湍悍與黃河等間嘗泛濫入衛於是築隄置壩以堵塞之隋紀有開永濟渠引沁水事元明以來屢有引沁入衛之說通知水道者所不許惟丹河亦然故爲詳列諸水以見衛河之或當引以資其利或當禦以杜其害且濬滑內黃本屬直隸大名府今割入彰德

衛輝二府土壤毗連利害共之。湖厥源流尤不得而略也。畿輔安瀾志。

按明代諸臣於引漳之外復有籌及引沁入衛者。嘉靖間左都御史胡世寧言沁水至武陟縣紅荊口分流一派通衛宜遣官踏視北達衛水萬歷間參政范守己言沁水自山西穿太行而南至武陟縣東南入河乃自木蘭店東決奔流入衛守土諸臣塞其決口仍導入河而隄外遺有河形直抵衛許宜於原決築隄處建一石閘分沁一派東流入衛爲力甚易又楊一魁張國維先後皆有此說而潘季馴河議辨惑則曰黃可殺也衛不可益也移此與彼不可也漳衛暴漲魏元二縣田每被淹民已不堪况可益以沁乎且衛水固濁而沁水尤甚以濁益濁臨德一帶必至堙塞秦昌中侍郎王佐亦言沁水之關新汲一帶地方郵署相連廬舍鱗次必開渠以受沁此地不爲邱墟乎迨國朝乾隆二年安徽布政使晏斯盛復請作滾水壩於武陟境內分洩沁漲以殺黃河水勢總河白莊恪公議曰臣等將沁衛兩河細加丈量沁河寬一二百丈不等衛河寬八九丈至四五丈不等衛小沁大勢難容納武陟境內沁河長一百九十餘丈沙底虛鬆不能簽椿下石難以建壩懷慶以下俱有大隄障護今建壩分沁必挖開大隄另開河道但大隄一開自徹屏障沁水穿隄奔注黃水隨之而入一往無阻不惟分沁而且引黃其可慮者一衛河淺隘不能容沁又必開關寬深兩岸民田廬舍不可勝計兼汲新濬三縣城垣遷徙爲難濬邑境內兼有一十八里山根石底人力難施其可慮者二衛沁合流水勢浩瀚又必堅築高厚隄岸且新淇等縣依近太行山水長發全賴歸宿若因束心築隄則阻山水歸路橫流爲害其可慮者三沁水歸黃衛水歸運其來已久卽導沁入衛之議元明以來



屢議屢止。亦非一次。如元世祖至元十四年。衛輝路總管董文用。因漕司議通沁入衛。文用言衛郡浮屠最高者。僅與沁水平。若引之使來。豈惟無衛。將無大名長蘆矣。又明萬歷十六年。漕臣楊一魁。請引沁通衛。科臣常居敬言。衛輝府治地窪河窄。狂流灌注。容受爲難。獲嘉已成巨浸。新鄉亦若浮孟。府城不遠。衝決可患。我朝康熙六十年。尙書張鵬翮查勘黃沁兩河。奏稱武陟沁河西北高而東南窪。沁隄內平地較沁河涯低一丈。從此而東。地勢愈低。且此處沙底虛鬆。將來建閘築壩。難以堅固。若引水時從高直下。建瓴之勢。牽動全沁。灌入內地。黃水隨躡其後。又云引沁必由小丹河入衛。此二河身皆極淺窄。勢難容受。奉旨張鵬翮等查河回奏。甚明極好。卽令照依所奏。不得稍有更改。欽此。歷觀從前諸臣奏議利害較然。如董文用言。沁水高於衛輝浮屠。則害在衛輝。且及直隸之大名長蘆。如常居敬言。沁水沙多善淤。入漕淤閘。昔有左驗。考明嘉靖三十五年。沁決入衛。致臨清逆流上擁。運河七十餘里。泥沙沈積。輒板二閘。淤塞二千餘丈。則害又在漕運。如張鵬翮言。牽動全沁。黃河躡其後。則黃河之水勢分溜緩下。流勢必淤墊。泛濫四出。其患又在黃河。而懷衛一帶。爲害更不可勝言矣。抑臣等聞之。明河臣潘季馴有言曰。黃河防禦爲難。而中州爲尤甚。自漢以來。東衝西決。未有不始自河南。明河臣萬恭亦言。河南沙鬆土疎。大穿則全河由渠。而正河必淤。小穿則水性不趨。過則平陸。夫水專則急。分則緩。河急則通。緩則淤。由是觀之。以原歸黃河之沁水。改歸衛河。穿渠則土疎之地。難保無奪河之患。而順其水性。仍歸黃河。則力全流急。不無收以水攻沙之功。臣等詳察地勢。博詢耆老。歷考前人論說。分沁入衛之議。有害無利。斷不可行。則張清恪公引沁入衛之

議其可嘗試乎哉。山東運河備覽。

衛河在縣西北七十里草坡上自湯陰縣河界起下至內黃縣河界止。舊河道計長九里。中隔湯陰河道四段。乾隆四年雨水過多。河流稍溢。將河身東西衝直。舊河淤塞。新河計長五里。滑縣志。

又東北經安陽縣東南。內黃縣北。入大名縣南。南樂縣北。又經元城縣東北境。入山東冠縣西界。有漳河支流來會。皇朝通志。

又東北經內黃北之楚望集。又東北經大名縣城南。南樂縣北。正當北張鋪之北。又東北經大名府治元城縣東北境。入山東冠縣西界。又北流有漳河支流自西來會。水勢益盛。水道提綱。

又東北流自內黃縣之菜園村。入直隸大名府大名縣西南境之龍王廟。又東北流逕小張二莊。則有留固溝之水入焉。其上流卽澗河也。東流西轉。折而北流。又東流南轉。折而西流。凡二十餘里。其形若環。又折而東北流。逕西長興、東長興。則有長興溝之水入焉。又東北流。逕東樓底、西樓底。則有樓底溝之水入焉。又東北流。逕南巨疇、白水灣。又折而東流。逕舊大名縣城南之五里鋪。謹按大名縣在府城東南十里。乾隆二十二年。因漳水泛魏縣城。并及大名縣。經直隸總督方觀承。奏請廢魏

縣。而移大名縣治於府城內。爲首屬。又東折而東南流。逕岔河口。則有岔河溝之水入焉。南流東轉。又折而北流。逕花二莊。入元城縣西境之大小王莊。又東北流。逕胡家莊。爲胡家灣。其東岸入山東冠縣。又東北流。逕房家莊。又東北折而西流。又南流西轉。而東北流。凡十六里。逕橫隄村。又東北逕大小常家莊。其西岸則有廣福溝之水入焉。又東北流。則有漳河溝之水自西入焉。卽三里引河。

漳河故道也。又東北逕樂善營。其西岸則有漳河故道。行善溝之支流入焉。又東北入山東東昌府館陶縣境。與漳河合流。至臨清州。與汶水會。又東北入於運。畿輔安瀾志。

漳河有二源。曰清漳。曰濁漳。清漳又有東西二源。東源出山西樂平縣西沾嶺之大隄谷。南流至和順縣西北。有小水自西北來會。又南經縣城西。又南折而西南流。至南安驛。有清河自東北來會。又西南至遼州東北。有小水自東來注之。又西南至州南。與西源會。西源出西北賦嶺。東南流。一小水自東來會。南流經橫嶺鎮。西義成鎮。東又東南經長城鎮。西過松樹坪。有武鄉嶺水自西來會。又東南經州城西南。又東南會東源。而東南流。有箕山水自東北來會。又東南有水自東來注之。又南至桐谷鎮。有千畝泉水。自西北來注之。入河南涉縣西界之遼城村。又東南經縣城西南。折而南而東。而西而南。至林縣之交漳口。濁漳水自西來會。漳濁又有西北二源。西源出山西長子縣西南發鳩山。一名鹿谷山。東北流。折而東南流。有小水自南來會。東流逕縣城南。折而東北流。有梁水自南來會。有藍水自西北來會。又東北至潞安府北境漳溝鎮。府西水及石子河自南來會。又東北經屯留縣東。潞城縣西有欽水。自西來會。又北有絳河。自西來會。又東北有潞水。自東南來注之。濁漳亦名潞水。又北至襄垣縣城南。與北源會。北源出沁州西北伏牛山北麓。東南流。有聖鼓山水。自東北來會。又南經州城西。又東南左右俱會一水。又東南有銅鞮水。自西南來會。又東南經虜亭驛西。有水自東北來注之。南至襄垣縣西。一小水自北來注之。又東與西源會。二水既合。東北流經縣城東南。有水自西北來注之。又東北至黎城縣西北。有榆社水。自西北來會。又南流至洛河鎮。北折而東流。

經黎城南境。有水北自縣城來注之。又東入河南林縣西北界壺關口之南。又東經牛魯村南。又東至交漳口與清漳會也。二漳既合。東流經彰德府治安陽縣北。磁州南。又東至臨漳縣城之西。折而東北流。經城西北。北入直隸成安縣西南界。又東北經縣東南。又東至廣平縣西南境。分爲二派。東流者經魏縣北。大名府治元城縣北。又東北入山東冠縣西界。與南來之衛河合。而東北經館陶西北。又東北至臨清州入運河。水道提綱。

漳河有清濁二源。清漳。周職方之漳水也。濁漳。周職方之潞水也。清漳出山西平定州樂平縣西北二十里之少山。東流入遼州和順縣。逕州東南。梁榆水入之。轄水入之。又逕潞安府黎城縣東北。又東逕河南彰德府涉縣境。亦名沙河。與濁漳水合。濁漳出山西潞安府長子縣五十里之發鳩山。與陽泉水散蓋水合流而東。過其縣南。則有堯水。梁水。陶水。注之。又東北流逕長子縣西。則藍水入之。又東北流逕壺關縣。黎水石子河水入之。疑卽陳水也。又東北流逕襄垣縣北。則銅鞮水合專池水。葦池水。公主水。榆交水。皇后水入焉。一名西漳河。又東北流逕潞城縣北。又名潞水。又東北至黎城縣西南。則黃須水入之。又東北流。則涅水合武鄉水入之。又東逕河南林縣北。則蒼石溪之水注之。又東左合清漳水於涉縣東南之交漳口。又東南至田家嘴。而入直隸廣平府磁州西界。又東流逕羊城。爲吳家河。又東流逕冶子村。又東流逕漳村。又東流逕柿園。又東流逕岳城。又東流逕屯頭。又東流逕武吉村。又東流逕講武城南。南與安陽縣之豐樂鎮中分。是爲官道渡口。又東流出州界。入河南彰德府臨漳縣北界之務本村。又東自臨漳縣東界之羊羔村。分爲二。一曰南漳。

河由臨漳縣之鄺家莊、賀兒集至李家岡，入直隸大名府魏縣之中三家村，亦名魏河，由中三家村而東，又東流逕漳神廟，又東流逕羅兒莊出境，入元城縣西境之段家莊，至東西店，合於北漳，其長四十七里，一曰北漳河，由臨漳縣之杜油房，入廣平府成安縣南境之鄭家莊，廣平府志成安南鄰於鄺，故於漳爲近。元致和二年，河決，自臨漳入縣，明成安間，輒泛濫爲患。至正德中，徙入魏縣，萬歷十六年復來，始由李彪郭坊寺、經洛固、東河等村，達肥鄉，遷徙不一。本朝順治十一年大雨，水注城，漂公私廬舍殆盡。康熙七年復然，自是每年水發，輒淹漫，去則淤停，城外愈高，內愈下。四十三年以後，河漸定，復徙而南。六十一年，自臨清羊羔村，入縣東南重村，雍正五年，自臨漳汕村，入縣西林疇，自范疇下，起趙三家村，分爲二支：一由魏縣南，一由魏縣北，均至館陶入衛。乾隆五年大水，盡趨南支，北支遂涸。其趨而南者，當元城之上流，慮衝決爲城郭患，嘗議於趙三家村築壩，引使歸北支，故道水至衝壩不成而罷。近更南遷，惟由魏縣一支，府屬諸邑，舊爲漳河所經者，大抵皆與糧沃產略辨河形而已。謹按南北二支，本由明宏治二年羊羔村決口而成：一南入魏縣南，一北入成安縣南。逕魏縣北，今府志云：自趙三家村分支，殆非也。又東流入魏縣西北境之馬豐頭，又東流逕劉河下，又東流逕梁河下，又東流逕朱河下，又東流逕羅兒莊出境，入元城縣西境之邵村，其南岸爲元城縣之西店，共長四十里。乾隆二十二年，漳水浸魏縣城，居民遷徙避害十之七八。直隸總督方觀承，乃採賈讓，不與水爭地之說，奏請分并入大名、元城二縣，又請將大名縣治移入郡城，改大名爲首縣，得旨允行。謹按康熙三十八年，巡撫李光地奏開支河一道，西起廣平縣之李家莊，東至元城。

縣之楊兒莊長二十里。今湮。乾隆九年分南漳河水勢開行善村支河。自本村。逕王辛寨之北。歷五龍廟。至高兒寨出境。入元城縣之申家橋。長四十里。亦漸淤廢。二十二年。又於北漳河之朱河下對岸。別開支河。歷廣平縣趙兒寨。西南入魏河之町上村。至元城縣相公莊出境。歸老漳河故道。長十二里。又有南支溝。在舊魏縣西南。今縣之正西。上自臨漳縣羊羔村南分流。東北流逕李家岡入境。首由中三家行善村入於南漳。今行善村淤塞。卽南趨六座樓。李大磨。仕望集。西家莊。蔡小莊。四劉屯。亦至李家口合流。東北行八里許。復分兩支。北支經大屯村。北拐村。南支逕大屯村前。亦入北拐村。漚流而東。逕前屯村出境。接元武縣萬家隄。其長八十餘里。又李家口南分岔支。直趨南柏村。東大韓道。入府城濠。乾隆二十三年。於南柏村築壩。今斷流。二十四年。直隸總督方觀承。因漳水河道改流。奏請濬治。南北漳既合於元城縣之西店。東流逕楊家橋。至趙鴨寨。入山東東昌府館陶縣西界之李鴨寨。長三十六里。抵秤鉤灣。全漳入衛。其行善村支河。自申家橋入元城縣境。由南馬頭。西馬頭。至鄒兒莊。仍穿大名縣境。後入元城縣西北境之馬寨。又東流逕迤兒莊。南支溝之水。由萬家隄繞三岔河口。合爲一流。至齊固村。出元城縣境。逕館陶縣西之鑪隄村。徐家倉。入衛。又縣東三里引河。上接金家潭。漳河故道之流。逕王家莊。何家莊。入漳。漳衛合流。至山東臨清州。則有會通河水自東南來注之。其經流則是。而名稱則非也。畿輔安瀾志。

漳河舊分三支。其由磁州。邯鄲。永年。曲周。北趨河間。入漳。沱河者。爲北支。由肥鄉。廣平。東光者。爲中支。由魏縣。大名。至山東館陶。入衛者。爲南支。康熙之末。北中兩支漸絕。而南支獨受全漳。至乾隆中。

魏縣、大名、兩城俱被衝廢。後遂自河南臨漳之三台地方南決過安陽、內黃、兩縣地。挾洹水入衛。而漳衛交匯之迤上北竇公莊正河受淤。衛力本弱。又以竇公莊淤墊。溜更不暢。每從內黃之袁村壩向南旁洩。漫行經直省之南樂、清豐、大名、三縣境百餘里。乃有新開引河。過潭坑。至大名之岔河嘴入衛。岔河嘴在大名郡城直南十五里。大南清三州縣民田積年被袁村壩漫水浸沒。又以竇公莊淤墊十餘里。漕鹽兩運俱行阻滯。議以鹽六漕四。每年合攤銀八千兩於水落後撈淺。至嘉慶十九年二十年間。程前道奉文議復漳河南支故道。會同山東河南道員勘得故道共長二百一十里。其山東之三十餘里。河形尚好。直省之百餘里。亦有河形。惟河南臨漳之五十餘里。地勢北高南下。遍地沙埂。難以施工。議仍聽其南流合衛。至竇公莊一帶淤墊之處。亦未議疏濬深通。仍由該商等自行挑挖。較前量增銀數。會稟在案。大名道稟稿。今按漳河自道光三年北徙。已不與垣合流。竇公莊一帶亦無淤墊之患矣。

又經館陶縣、臨清州、入運河。皇朝通志。

又東折而北。經館陶縣城西。又東北百餘里。至臨清州城。與南來之運河會。運河自是不復用開。水道提綱。

山東通志。會通一律。全以各閘節蓄。而臨清以北。則環曲而行。不復置閘。世遂有三灣抵一閘之說。而不知前人用曲之意。全爲漳水而設。漳水之濁。雖減於黃。而易淤與黃等。然治漳之法。與治河又有不同。黃河來源甚高。建瓴而下。澈底翻掀。順其所趨。則沙隨水去。絕無壅阻。遇曲則勢逆。勢逆則

脈滯水過之處。餘沙易流。漸留漸長。路愈曲而勢愈逆。脈愈滯。迫之使怒。橫決隨之。故以逢灣取直。爲上策。蓋循其性而行。所無事也。漳水濁滓稍輕。而來源平坦。無奔激振盪之力。若津道徑直行。緩則水浮沙沈。隨路澱積。疏之不勝疏矣。今多用灣曲。使之左撞右擊。自生波瀾。鼓動其水。而不使之少停。則沙亦挾之而去。是紆折之。正以排淪之耳。豈僅以此爲節蓄之方哉。若知其防淤。而概以黃河逢灣取直之議施之。則求通反滯。大失曩賢規畫之精意矣。山東運河備覽。

北流經夏津縣西、直隸清河縣東、東北流經武城縣西南。皇朝通志。

運河。卽衛河。一名御河。一名永濟渠。亦曰南運河。亦曰北河。亦曰漕河。又名衛漕。又名清河。漳河之水自西南來合流注之。又名漳御河。又東北至臨清州西境。合於會通河。又北流逕臨清州北渡口。直隸山東兩省交會之區也。又東北流入直隸廣平府清河縣東南境。循縣東北流。復入山東夏津、武城二縣境。謹按運河自清河縣東南二十五里。接山東臨清州鹽店村界。循縣南二哥營起。東北行二十里。至孫家園油房集。復入山東夏津縣界。至郭家屯。亦二十里。下入武城縣界。古淺四處。曰半壁店。曰何家墳。曰沙窩裏。曰土龍頭。此爲運河入直境之始。自板開以北。東接會通河之派。西合衛河之水。匯流順下。水性較北運爲稍平。康熙五十四年。因運河水弱。盡逼全漳於館陶。以濟運。逢汛頗虞暴溢。復於四女寺哨馬營。增建減水壩各一座。約令運道水深七尺。過此則減之。嗣是瀕河州縣無患。河道屬清河者。自北宋時。旣與夏津分水。長四十里。相因日久。南自臨清州界鹽店村起。北至孫家園止。又自油房集起。北至夏津縣界郭家屯止。均長二十里。其合井東西。截分南北。爲二



十里不知始自何時。康熙三十一年。總河靳輔奏請以清豐縣丞爲清河縣丞。又以清河故城二汛河道與山東錯雜。奏請歸山東道廳考察。催償疏濬事宜。悉由東省職掌。而河道更屬。所以與昔時里數異也。雍正四年。以事關隔省。一官兩屬。究非體制。奉文改歸直省。屬河間府同知管轄焉。清河縣舊有黃盧河、疏水渠、蔡河、一字河。東接武城縣界。今湮。又東北流復入直省河間府故城縣南。漢爲廣川縣。謹按此東直二省河道最夾錯處也。水勢屈曲回環。多所衝刷。故里數較長於舊。河面寬三十三丈至四十丈。深二丈二尺至二丈八尺。東岸屬山東。西岸自武城縣界冷家墳十四里有奇。舊長十二里。至白馬廟。交德州衛恩縣兩汛。又東北二十六里。至焦姑寺。復交故城縣汛。經南關外。東至孟家灣。凡六里有奇。舊長四里。畿輔安瀾志。

### 又東北經直隸景州東境。皇朝通志。

又東北流復入山東恩縣、德州境。又東北流。復入直隸河間府吳橋縣西、景州東。又東北流七十里。爲吳橋縣連窩驛。俗呼連兒窩也。謹按景州運河。東岸屬吳橋。西岸自羅家淺。至徐家莊之對岸。凡三十九里。其河廣二十八丈至三十丈。深二丈一二尺。吳橋縣運河。東岸自半截碑。至連窩鎮之對岸。凡二十七里。其河廣十三四丈。縣西南三十里。曰白羊窪。運河全入直隸省。自吳橋縣始。東岸接德州衛交界。西岸接景州交界。入縣境。屈曲東北入東光縣。其西岸之白草窪。高馬圈。東岸之羅家口。於乾隆八年。總河白鍾山奏。以兩汛隄工錯雜。歸并德州衛自開。四女寺。哨馬營。兩減水壩。引河。分洩有資。吳橋一縣。首獲其利。景州河道。南至清河。入直隸境。後與山東邊界交錯。逕德州西。迤北。

至德衛第七屯河之西岸。交景州屬。屈曲而北。東行交吳橋縣。安陵把總汛。二十四年。總督方觀承奏請歸并東省。柘圍鎮迤北河道隄工分歸州判管理。舊與東省以河心爲界者。亦統歸景屬矣。  
畿輔安瀾志。

按南運向苦淺滯。故額設淺夫。以供挑挖。兩岸隄工。隨時補苴而已。自漳河南徙。於館陶入運。湍急浩瀚。每羨溢爲災。雍正四年。經怡賢親王奏請分道耑轄。增汛員。設歲修。始以隄防爲務。乃隄日增高。而水亦隨長。伏秋汛漲。各州縣往往於隄上加堰。以防漫溢。蓋以漳水泥濁。河形曲折。墊淤於下。則泛溢於上。勢固然也。計惟於德州上流與古黃河相近之處。度地建壩。廣三四十丈。引而注之。古黃河不惟直隸河隄。永免漲溢。卽德州一帶工程。亦獲謐安矣。但地隸山東。在此則爲切己。在彼未免視爲秦越。雍正八年七月。德州第九屯隄決。直隸景州以下十餘州縣。禾稼盡沒。水利衙門。屢行咨會。而決口未築。蓋其地處上游。水過正堪藝麥。而此間形如仰釜。有受無洩。縱竭力修防。隄工鞏固。亦何救於田廬之湮沒耶。若將臨清以北河道。并歸直隸總河管轄。則一河首尾。修濬自如。上下不致阻隔矣。畿輔通志。

四女寺滾水壩。舊爲減水閘。明嘉靖十四年建。按雍正三年。閣學何國宗奏請改建滾水壩。計寬八丈。壩身高出河底一丈七尺。自恩縣至德州。引河共五百四十八丈。於雍正七年挑濬。又自德州至老鹽河口。引河計一千八百七十六丈。於雍正九年挑濬。是年大學士朱文端公軾請將四女寺之壩口河身。一概落低二丈。口門開寬三十丈。引河開寬三十四丈。總河朱藻議以運河口面止寬

十九丈五尺。若將引河開寬三十四丈。遂成本小支大。恐有奪河之患。十一年。山東巡撫岳濬奏。德州境內衛河漲發。漫開哨馬營。老虎倉。第三店。桑園鎮等口。次第堵築完固。第念衛河溢水。雖在德州。而州北灌入直隸之吳橋。寧津。東光。南皮。滄州等處。前此雍正八年。有第九屯漫開。淹及吳橋等縣。今次泛溢更甚。漫口在於東省。而災害及於鄰封。臣雖竭力堵塞。然止可爲一時捍災之計。而非經久銷患之圖。因查衛河發源於河南輝縣之百泉。東流旁納滄。淇。垣。漳等水。入東省之館陶縣。達於臨清州。歷程九百餘里。並無支河旁洩。至臨清輒板。又與汶水合流。折而北行。計二百六十餘里。至恩縣之四女寺東岸。始有減水閘一座。由引河及老黃河歸海。又行二百四十餘里。至直隸滄州之輓河。有減水壩一座。又行七十餘里。至青縣之興濟。有減水壩一座。俱由引河東流入海。有此三壩。衛河小有漲滿。足以宣洩無虞。一遇衛輝上源積雨橫溢。河水陡發丈餘。千里洪濤。大溜直注。雖有四女寺之滾水壩。而建瓴之勢。一時疏洩不及。在輓河興濟二壩口。相隔尙遠。又有滹沱橫擁。下流不能迅達。惟德州一區。距四女寺三十五里。河流至此。奮湧欲洩。而運道紆折。正當回流頂衝。兼之東北一帶。地漸低窪。更遂其趨下之性。於是前衝後激。直潰東隄。罅漏偶開。全河側瀉。實非尋丈土隄所能抵禦。查德州上游衆流所匯。總以老黃河爲要津。河在德州城南二十里。自西南而環於東北。經吳橋。寧津。東光。南皮。以至海豐。大沽口入海。其河之北岸。有陳公隄。橫障河濱。縣互數縣。凡溢水穿過此隄。卽能循路以達老黃河。若不及穿過。而隄繞以行。則轉爲高阜所阻。不得不灌入吳橋以北之東光等縣。直至滄州入海。則是德州之隄岸。揆之地形水勢。斷不能使之不衝不溢。若因

其漫決之路。開挖成渠。與老黃河相通。俾水至有歸。免致橫泛。此則人力當爲。而急宜酌議者也。但事關河道。又地係兩省接壤。容移會兩省總河。並直隸督臣。公同會勘。將德州各漫口水道。逐一查驗。但有可以引過陳公隄。導入老黃河之處。卽應於此建壩開渠。分路宣洩。實於灑州縣有益。命下直東兩省勘議。于哨馬營另開支河。穿陳公隄。經鉤盤河故道。入老黃河歸海。二十七年。大學士劉文正公統勳等。奏請將口門展寬四丈。共寬一十二丈。壩面準哨馬營尺寸。落低一尺六寸。一切修防事宜。交德州糧道就近督率。二十八年。復加展寬十二丈。共寬二十四丈。添礮心五座。哨馬營滾水壩。在德州城北雍正十一年。衛漲漫溢。哨馬營。老虎倉等處。巡撫岳濬。請因漫決之勢。開挖新渠。以資分洩。經直東兩省會勘。卽於哨馬營開挖新河。東至陳公隄。由曹家決口放水。通鉤盤河故道。東北流至吳橋縣之玉泉莊。入老黃河歸海。壩寬三十丈。頂高一丈六寸。中建礮心十二座。兩岸遙隄相距百丈。動帑至九萬九千餘兩。山東運河備覽。

又經東光縣西。又北經南皮縣西。又東北經滄州西北。皇朝通志。

又東北流逕東光縣界。又東北流逕下口。亦曰夏口。又東北流逕交河縣。又東北逕天津府南皮縣西界泊頭鎮。又東北流逕馮家口。入滄州南境。謹按東光運河。自縣南鄉少西。接吳橋縣縣丞汛入境。向北屈曲行。大小龍灣。過縣城西關外。距關廂三里。逕北直行三十里。東岸入南皮十二里口。西岸入交河楊家圈。河身寬二十六丈至二十八丈不等。河底均深二丈。長六十里。自大小龍灣外。舊名直河。大汛順流安赴。縣丞所屬。東岸迤北入南皮縣界。灑河高阜十餘里。有老土嶺之目。交河運

河。南自楊家圈。北至黃古隄。東北行二十里。舊云八十二里。今大半入南皮滄州分轄矣。白洋橋之北。下爲好漢墳。此交河與滄州交界處也。又東北流。逕南皮縣西北境。又東北流。逕滄州南境之甄河驛。又東北逕捷地。則有南減河之水出焉。又北流。逕州城西。謹按南皮縣運河。自縣西二十二里黃古隄。接交河縣界入境。東北流六十六里。閻家墳。接滄州南界。逕甄河大寺。屈曲東北流。踰捷地。逕州城西。接青縣界。諸官屯。長六十里有奇。河身均寬二十丈。深二丈有餘。縣志有南路甄河堡。西路甄河鎮。甄河舖。在捷地之南。地向名絕隄。今改嘉慶九年。減河淤淺。興工挑挖。卽此。又北流。逕千屯。入青縣東南境。又東北流。逕興濟鎮。則有北減河水出焉。謹按興濟故縣。本朝順治六年。并入青縣。興濟鎮在青縣東南三十里。卽故縣也。嘉慶九年。河流淤淺。與捷地減河並濬。畿輔安瀾志。衛河卽南運河也。出河南衛輝府。自山東武城縣。流入直隸故城縣界。又逕東山東德州界。復入直隸。逕景州東。吳橋縣西。又東北逕東光縣西。又東北逕交河縣東南七里口。又東北逕泊頭鎮。入南皮縣界。又東北逕滄州城西。又東北逕青縣城東。靜海縣城西。天津府城北。至三岔口。與白河會入海。計長八百餘里。皆漕運所經也。有減水河二。一在滄州南十五里絕隄。一在故興濟縣。皆明宏治中開。以備衛河泛濫。久而堙塞。插石猶有存者。雍正三年大水。衛河溢。決十三口。怡賢親王奉命查修水利。奏開減水二河。建滾水石壩一座。挑濬舊河。分達海港。滄青水勢藉以消洩。居民賴之。

畿輔通志

又東北滹沱河。合漳河來會。皇朝通志。

又北流逕縣城南。舊有漳沱河。合老漳河。自西南來注之。今已斷流。東北流者。經廣平縣東南。東北經肥鄉縣東。東北入山東界。經邱縣南。又分爲二派。一自邱縣城。東北流入直隸威縣南境。又東北經清河縣城北。又東北經故城縣西。棗強縣東。又東北經衡水西南。景州西。武邑西。阜城縣西北。交河縣城東南。又東北逕南皮北。又東北至滄州西之杜林鎮。東漳沱東派。自西來會。又東北至青縣城。南運河自東南來會。又北達直沽。一自邱縣城。西北流至直隸界龍堂。折而北流。經廣宗縣城。西。又北經鉅鹿縣東。又北至新河縣西南。北流入北泊。自泊東北流會漳沱。經冀州衡水。武邑之北。武強之南。交河之西。至獻縣。復分爲二。至天津。俱會而入東海。漳河入直隸界。移徙分合。自昔不常。舊名葫蘆河。爲滏沼諸水之委。所經州縣。今與前明不同。此水之最益漕河者。則魏縣東至臨清一派耳。水道提綱。

漳河故道。一支自磁州東南二祖村分爲二。一自州西入邯鄲東境之南大屯。東北流逕沙河堡西。張萊入永年縣西南境之裴家堡。又東北流逕孩兒寨。關兒寨。吳良寨。與東一支合。一自州東入邯鄲縣東境之史家莊。東里堡。西里堡。又東北流逕北漳村。又東北流逕賀家東里堡。李家東里堡。邢家東里堡。小賈莊。高里堡。辛安鎮。入肥鄉縣西境之呂家堡。又東北流逕毛演堡。謝家店。入永年縣東南境之吳良寨。與西一支合。又東北流逕西關寨出境。又屈逕肥鄉縣境之西北隅。復入永年縣東境之王呂寨。甄家莊。入曲周縣西南境之白灘店。逕滏陽集橋入於滏。謹按此二支雖云支流。然地逼西南。與磁州切近。三壘口決。患首及之。敍於諸故道支河之前。循是而東。成安其次矣。一支自

廣平府成安縣亦村，首受河南臨漳縣東北之水，東流逕柏寺營，又東流逕西抹疇，又東流逕艾東村，入廣平縣西南境之南溫村，又東河逕北高曲，李家高曲，又東北流逕紫荆山，入大名府魏縣北之義井村，則有朱家河下之支水入焉，又東流五里，入廣平縣西南境之西堡，又東流逕四寺莊，又東流入大名府元城縣西南境之李寧村，又東流復入廣平縣西南境之杜村，又東流四里，逕婆留村，又東流入元城縣西境之沙圪塔，而入山東館陶縣西境之孟兒寨，又東北流，至南館陶鎮，俗名秤鉤灣，入於衛，謹按此一支，乃漳河之決而東流者，非北流正派也，成安縣志漳河在縣南，卽此是也，今故道猶存，又寰宇記，所稱潞陽縣，卽今磁州，隋書地理志，後周置一統志，明洪武初省，一支自成安縣亦村，折而東北流，逕縣城東馬頭，又東北流，歷吳家灘，固子村，而入肥鄉西南境之吳家堡，又東北流，逕城南伏邱山，折而東北流，逕三里隄，又東北流，逕西張寨，東張寨，入曲周縣東南之北高村，又東北流，逕老營村，河固村，安兒寨，分爲二，一支自河固村西之李莊，逕四夫人寨，北馬遂，新陽莊，第四疇，蔡上寨，五間房，而西北入雞澤縣東境之羅官營，經韓甯村，復入縣境，於口之北，以達於平鄉西南境之長河鎮，下入鉅鹿縣南之賈莊，而絕流，謹按此河，明成化十八年東決，自麟家莊，至蘇家莊，入廣宗界，而舊漳河無水，廣平縣志，馬鹿村，在縣北十五里，久不行水，古岸猶存，平鄉縣志，順治九年，鉅邑於賈莊前築橫隄一道，平邑受害，則知其流已斷矣，一支自河固村東北流，逕小新寨，小連寨，小第，入北龍堂，又東北流，逕張遠村，則有自山東館陶縣北出，至縣東北王固村之支河流入焉，又北流入順德府平鄉縣南境，逕麟兒橋，是爲小漳河，謹按方輿紀要，漳河在南和縣東北，

自平鄉縣合沙沼諸流入縣境。又西北會於澧河。而入任縣。澧河上源。卽百泉水。自邢臺縣流入任縣境。漳水及沙沼諸川俱流合焉。又東北入隆平縣之大陸澤。明實錄。武宗正德元年。濬滏陽河。景泰間。漳水并入漫流。衝曲周等縣地方。沿河各築隄以防泛濫。成化間。舊河淤塞。於村之西南。衝決爲新河。合沙沼等河入穆家口。兩岸亦築隄備之。宏治切。漳水徙入御河。民棄隄不修理。近年漳水復入新河。西岸地皆淹沒。任縣人高暘等以爲言。下巡撫官勘處。至是具奏。言穆家口乃衆河之口。請從此先濬。乃并濬舊河新河。分流以殺其勢。隄岸亦漸加修築。一統志。漳水舊在平鄉鉅鹿之東。廣宗之西。有大小二河。亦謂之新舊二河。新河爲大河。在舊小河東。小漳河亦名劉累河。皆注大陸澤。明天順中。漳河徙入運河。北流之道幾絕。萬歷三十年。漳河徙入滏陽。自是折而西北入任縣界。二河漸成平陸。本朝康熙中。又東徙。自邱縣北逕廣宗之西。鉅鹿之東。注寧晉泊。所謂新漳河也。近年上游逕由館陶入魏。不入滏陽矣。劉累河。首起永年縣。滏陽河八閘之水。往時漳河決入滏陽。故土俗亦號斯河爲小漳。其與廣宗鉅鹿之小漳河。判然二水。大小不侔。又北逕麟兒村。董固村。蘇家莊。入廣宗縣南境。其東岸上自曲周陳家莊。北入廣宗縣之南三周村。又北流逕鋪上小莊。霍城寨。五里莊。陳村。洗馬村。青村。觀村。又西北流逕尹板臺村。其西岸自平鄉閻家莊正北。入廣宗縣之燒窰莊。折而東北流。逕太平臺。小柏社。東臺村。又折而西北流四里。逕尹板臺村。北入鉅鹿縣南境之花窩村。又北逕張王町。王六村。馮家寨。蘇家營。又曲而西北逕臺頭。紫城。北屋。伏君廟。謹按方輿紀要引舊志云。縣北十里。有鉅鹿城。縣本治此。唐垂拱初。因漳水爲患。徙縣於東南隅。卽今縣治。劉煦



志貞觀初。鉅鹿縣治東府亭城。嗣聖初。徙今治。垂拱卽嗣聖之明年。舊城當在東府亭城。宋國史云。元豐以後。大河益徙而北。大觀二年。河決陷鉅鹿。遷縣於高地。而志不載。今城蓋大觀中所徙矣。考宋史河渠志。大觀二年五月丙申。邢州言河決陷鉅鹿。詔遷縣治於高地。又以趙州隆平下濕。亦遷之。宋志未嘗失載也。入冀州南宮縣南境之杜家常路。又東北流。逕小周家村。大周家村。入新河縣境。又北至隆平縣。與滏陽河會。入於寧津泊。其下流則今新漳河。胡盧河。所行之道也。川渠旣斷。非復纏絡矣。謹按漳河分支。起自磁州東北。歷廣平府之邯鄲。永年。成安。廣平等縣。下至冀州新河縣止。自元泰定帝致和二年。卽明宗之天歷元年。己巳入境。迄本朝康熙五十五年丙申。而流絕。凡三百八十九年。明實錄。英宗正統三年。直隸廣平順德二府。奏漳河決。蓋三府之境相連屬也。水經。漳水又東北過曲周縣東。又東北過鉅鹿東。酈注以衡漳故瀆。東北逕南曲縣故城西。地理志。廣平有南曲縣。應劭曰。平恩縣北四十里。有南曲縣亭。故縣也。又逕曲周縣故城東。衡水又北逕鉅鹿縣故城東。鄭元注尙書。引地說云。大河東北流過滏水千里。至大陸爲地腹。如志之言。大陸在鉅鹿。地理志曰。水在安平信都。此漳水與大陸澤相關之明驗也。但今大陸澤在鉅鹿縣之西南。小漳河之東北。注者則寧晉泊耳。泊澤本相連。通典。元和志。皆云邢趙深三州。爲大陸澤地是也。今取諸邑志。被水故迹。并記於下。成安縣志。元致和二年。夏六月。漳水決自臨漳。入成安境內。始自鄭家莊北。重村南。呂彪東。郭坊西。甘羅東。漳河西。野莊西。嚮義東。路固東。東河東小隄。入肥鄉境。明成化。安治間。其餘派入陽寺。北陽。連送等溝。正德間。始入魏縣成安。惟故道存焉。萬歷十六年。水復北徙。入本縣。

境隄外辛塞。宋南竇公等村。二十三年。由隄東呂彪故道。甘羅。吳家疇。東河小隄等村。入肥鄉境。二十八年。決王林隄。由金山。陽寺。西馬頭。化兒店。隄西等村。入肥鄉境。三十年。決竇公隄。由辛義。霍村。南魚口。說法臺。城南郭分流。東一支。由郭轉小門北。道東堡。王固村。入肥鄉境。西一支。由西關。范兒莊。曲村。姚家堡。西南莊諸村。入肥鄉境。四十二年。連送。陽寺諸村。夜半河決。水薄城下。至十月。兩支始涸。大河由徐村。連送。彭留。北漳。姚家堡。入肥鄉境。崇禎十四年秋。由連送口。至城下。抵南隄而東。由水門。浸入城。學宮水深丈許。逾年始涸。本朝順治九年。由連送。徙南魚口。經說法臺。抵南門而東。至馬頭隄。小隄。西沙窩村。龐村。閻村店。小隄諸村。入肥鄉境。十年冬十二月。稍徙而南。去城里許。十一年夏霖雨。水湧入城。康熙元年八月。雨五晝夜。由馬頭隄。徙道東堡大隄。西入肥鄉。七年七月。自說法臺。衝南鄉。潰西隄。由南門入城。決城西北隅而出。十年八月。十一年六月。大水。較往年入城者高數丈。知縣王楷。始峻其隄。迄今完固。廣平縣志。肥鄉縣自唐以來。頻苦漳溢。縣令章景駿。築隄障之。其故道已不可考。明成化間。由成安東北流入境。距城東六里。嘉靖十七年。徙入於衛。隆慶三年。決鄆米隄。浸城。數年復南徙。萬歷間。又徙縣西。本朝順治九年。徙縣東。康熙四年秋七月。水注城。遂僑治郡城。皇華館後移舊店營。水既久。據縣境。惟西北余公河洩水。得無恙。舊有護城隄。盡圯。雍正九年。知縣王建中。營城浚隄。築隄其上。漳去無患。蓋自乙巳後。垂七十年。至是始復舊業。曲周縣志。漳水自肥鄉縣界。由趙固。安兒寨。公城堡。馬蘭。相公莊。胡近口。韓家莊。流上寨。入滏河。同流。明熹靖甲子七月。潰城西門。天啓丙寅。水至城下深丈餘。崇禎庚午夏。決南隄。浸城。後歲以爲常。平鄉

民築橫隄於下流，水怒無所洩，輒溢。本朝順治間，會勘，毀隄立石。康熙十年後，漸徙而南。二十九年，由廣平之平固店，入本縣三塔下，流至邱縣與滏分，而城東之河遂濶。今距縣百有餘里，衝嚙不及，略辨河形。平鄉縣志：萬歷壬寅，漳河入滏，禎崇乙亥，東徙，水尤散漫靡常。知縣江衍汶，就舊漳河之右，濬小漳，以分水勢於鉅鹿。本朝順治九年，漳河水漲，陞任傅令，在賈村前築東西橫隄一道，西自大宋岡，地勢高阜，迤西相隔三百九十步，又有南北斜隄一道，往南半里許止，西北至府君廟，其賈莊前橫隄，北係鉅鹿地，南係平鄉地，每遇漳水泛漲，北有賈莊之橫隄壅塞，西有大宋岡，地勢高阜，故水有來源，無洩路，至平民田產淹沒，故士民私築橫隄，以洩水勢。儻鉅鹿復築橫隄，則平鄉必致受淹。廣宗縣志：漳河故道，由平鄉東魏家莊來，縣西北十五里馬鹿村，入鉅鹿界，是爲老漳河，久不行水。古岸猶存，小漳河由平鄉縣東董沽村來，縣境南五里，繞城西折而北，至板臺，入鉅鹿境。謹按自鉅鹿下至新河，志皆不記漳水。明實錄：宣宗宣德五年九月壬子，直隸鉅鹿縣奏，六月苦雨，漳河泛溢，瀕河被災，命復勸除其租。鉅鹿縣志：天順間，城東二漳河上流決，趨入運，二河遂湮。又隆慶三年大水，遶城，自任縣至鉅鹿，舟楫相通。又萬歷二十五年水漲，田舍漂沒，今絕不聞有水，蓋其流久斷也。又有漳河故道，或云南枝溝漫水也，上無河形，由四劉屯、雙井集、逕中橋村、前馬河，後歸元城縣之三里引河。老漳河，漳河正流故瀆也，自成安亦村，東流至沙圪塔，入山東館陶縣，西河寨，折而北，復入直隸廣平府廣平縣東，上無河形，蓋其流久斷矣。自廣平縣東蘇兒莊，逕張凍村，平固倉，而入曲周縣之東西三塔村東，與館陶之小沙窩接界，又北逕西陽固、蔣莊、土路村，分爲二。

一出山東邱縣之東北。一出邱縣之北。其北流入曲周縣東境。由陳家莊與張遂村之流合。下流即平鄉縣之小漳河也。其東北流者入曲周縣之黃河套。逕香城固。又分爲二。一支東北流逕威縣南之蔡家寨。司新莊。小油房。入山東冠縣之梨園頭。復入縣境之東堂村第三口。而絕流。謹按舊時漳河由此合。其入衛之道。必經清河縣之南。而志略之威縣之第三口。下至邵固集。卽接縣隄。今河流已斷者。明宏治中。清河民宗安等。請築堰水隄。以障衛河。在新集洪河南。去縣三十里。東自御河厓西至縣隄。長五十里。漳河之流。惟由西北一支。所謂洛河故道者是。一支西北出。曰洛河故道。亦曰黃河枯槽。實漳水支流也。土俗稱之曰趙旺河。上起曲周縣之北劉村。斜入冠縣西南之梨園頭。北逕威縣之河窪村。又北逕廣宗縣之油布村。丁家莊。復入威縣之小高廟。又逕鹿臺村。于隄村。宋家寨。徐家莊。至趙村而下。入冀州南宮縣之河溝村。其下曰開河渠。始有黃盧河之名。亦曰清陽江。其在清河縣者。自山東臨清州之牛家寨。西接廣宗縣界。東北入縣。西之梨坑村。逕漢信成縣故城南。又東流逕王家莊。又東逕疏水渠之石碑口。又東北折而北入冀州南宮縣之亭上村。東派別出一支。曰蔡河。下入山東武城縣。又東北流至張寬村。入南宮縣界。今澗。謹按冀州志。漳河渾濁。所過輒淤。舊河旣難復循。而性又濇悍奔激。不就約束。故或南或北。遷徙時月之間。便已改易。安能與現在形勢相合。自此而下。亦姑舉其大略而已。其正流自南宮縣東南之馬村北。謹按古漳河在南宮縣東南七十里之和生社。自清和北界流入。縣志云。濁漳貫南宮入冀州海子。葉恆嵩曰。南宮夷曠。無高山大河。故老稱澤瀆。濁漳下流。必達信都。今皆壅闕。治作田禾。水無所出。旣已沈溺故城。壘爲大

陂。恆雨即平陸化爲巨浸。南宮交困。嘗觀地形。自高家莊。孟家莊。抵冀州王村。左折新河窰。上村東入鹽河一帶。七十餘里。皆順流卑陷。故道依然。有善爲籌策者。度工用。準高下。索遺蹟。而穿之。不特免害。利亦興矣。巡棗強縣之東北。與河間府故城縣接界。北入武邑縣之東南。又北巡景州西。謹按一統志。張甲故瀆。在故城縣及景州界。舊志。在景州西七十里。東北入阜城界。考此即老漳河所行之道也。又云漳河。李家河。樊家河。俱在城東北。導水入窪之路。考張甲河。由棗強縣東南來。至州東北順政鄉。合於漳河。今棗強縣志。無張甲河。有黃盧河。是即古黃河之所遷。河去而漳循其故道。景州則猶存張甲之名。一統志所云。漳河爲導水入窪之路。則其岔支也。又北巡吳橋縣東。又北巡東光縣西。又東北巡阜城縣西北。則有土平河之水。自西南來注之。又東巡交河縣南。謹按此即古漳河所行之道。縣志謂之潞水。漳澤本同稱也。志又云。潞陽唐名。未知何據。一統志。此漳河自邱縣分流。獨行。歷故城。景州。阜城。交河諸境。與武邑縣西之胡盧河。絕不相涉。舊志謂即胡盧河。誤。又漳河未入交河之先。別有岔支一道。自阜城蔣家莊。入縣之常家庵。由田家廟。至夾河村東。歸正河。正河至佟家莊。分出一支。迤邐東南。即志載沙河。而正河至三岔河。又分一支。迤邐東北。即志載倒流河。考漳河現在形勢。自阜城分支入境。行六七里。合流東行。可二里許。復分二支。其一稍南。東行與東光縣西北接界。亦名沙河。自縣東南歸於漫河。長三十里。其正支稍北。經縣城南。東北行。逕城東之八尺高村。張大窪之水入焉。復東北行至西濟橋。倒流河之水入焉。復東行。里許。曰三岔口。漫河之水入焉。又東北七八里。小營河之水入焉。又東行四里許。青縣之東北隅。新挑溝之水入焉。自此與

漳沱河脈絡相通。又並東北行至高家莊。入青縣。長一百餘里。今涸。又東北至天津府青縣之杜林木村。與漳沱河合。謹按李光地勘漳河覆疏。老漳河至青縣之林木鎮與完固口之支流合。支流卽漳沱別河也。新漳水自衡水縣下合漳沱。會流於獻縣。其下爲子牙河。雍正四年。怡賢親王慮運河水漲。堵塞完固口。而漳沱支流。不與老漳河合矣。又東北至鮑家嘴。入於運河。其合處曰岔河口。亦曰汝河口。此漳水之經流也。謹按地理志。清池縣西四十里。有衡水隄二。顯慶元年築。寰宇記。衡水漳水在慶乾符縣西六十里。皆在今滄州界內。舊志謂今漳水自支河東北入青縣。不經州界。以州西至衛河青縣界。僅一百步。故屬青縣。非水道有改也。考唐書循吏傳。薛大鼎爲滄州刺史。疏長蘆衛漳三渠。蓋卽胡盧河。一也。衛卽漢志澤水。二也。漳卽濁漳。三也。新漳河。漳河之支流也。一名小漳河。自山東邱縣北出。入直隸廣宗平鄉鉅鹿縣境。又北至趙州隆平縣。爲清水河。入寧晉縣之寧晉泊。謹按新河縣志。清水河在縣四十里。由鉅鹿出寧晉縣界。遶舊城西北。又東北流至衡水縣。達獻縣單家橋。入青縣與御河合。又名小漳河。亦曰溢水。考漳溢合流於寧晉泊。故或以漳爲溢也。然諸水多名漳。爲清水河。不與新河志同者。以昔年新漳挾溢北出。後爲漳沱所奪。名之曰漳沱。會流河貫泊而出。南宮縣南。又東北逕東鹿縣南。深州西。又東逕冀州王家莊。與漳沱河合。又東北逕冀州隄。謹按冀州志。漳河在州西北二十五里。此新漳河也。又云胡盧河。此漳溢之會流也。在州西北二十五里。志所云二河。其方隅道里皆同。強列爲二。非也。畿輔通志。漳溢貫泊而出。達於冀州。自冀州而下。漳溢之名。爲漳沱所掩。而漳沱之目。亦與胡盧互舉。此言得之。今考冀州境內。城西南有乾河一

道。上接南宮縣之韓家窪。自州境內南王村起。出新河縣之饒上村。又入州境。下至衡水縣止。長七十里。俗名小漳河。卽濁漳分流也。又東北逕衡水縣之浪子橋。與胡蘆河、長蘆水、互受通稱矣。又東北逕衡水縣之石橋。又東北流逕武邑縣之圈頭。又東北流逕武邑之趙橋。又東北流逕武強縣之小范店。又東北逕獻縣完固口。分爲二。以下皆漳沱別支所行之道。蓋挾漳而東北出者。一由單家橋至淮鎮。經高川。至青縣之杜梨木。與老漳河會。又至青縣南鮑家嘴歸運。一由臧家橋。至河間縣之沙河橋。又逕龍花橋。至大城縣。爲子牙河。出王家口。歸三角淀。雍正九年。怡賢親王奏請堵築完固口。新漳二流皆絕。今所有者。惟漳沱下尾耳。謹按新漳河所行之道。其來已久。自冀州以下爲漳沱所亂。然在武邑武強二縣間。酈道元已歷歷言之。水經。漳水又東北至昌亭。與漳沱河會。注經敘阜城於下博之下。昌亭之上。考地非比。於事爲同。渤海阜城。又在東昌之東。非也。漳水又東北逕武邑郡。北魏所置也。又東逕武強縣北。而東逕武隧縣故城南。白馬河注之。水承漳沱。東逕樂鄉城北。饒陽縣南。又東北逕武邑縣北。而東入衡水。謂之交津口。衡水又東逕武邑縣故城北。又東北右會張平口故溝。上承武強淵。淵之西南有武強縣故治。故淵得其名焉。淵水又東南結而爲淵。又謂之鄖君淵。淵水北通。謂之石虎口。又東北爲張平津。澤水所泛。北決隄口。謂之張刀溝。北注衡河。謂之張平口。亦曰張平溝。水溢則南注。水耗則輟流。衡水又逕東昌故城北。經所謂昌亭也。俗名之曰東相。蓋昌相韻合。故致誤矣。西有昌城。故目是城爲東昌矣。又東北左會漳沱故瀆。謂之合口。又東北分爲二。當其水決處。名之李聰澳。此衡水之在深冀間者。約略如此。今以漳沱會流。而完固口又斷。

不復有漳之目矣。又按漳河自明萬歷二年北溢由魏縣肥鄉入曲周之滏陽河而館陶之流絕。迄本朝順治九年又自廣平縣之杜村經元城賈家莊復達廣平之平固店直注山東邱縣分爲二支一折而西北由廣宗平鄉鉅鹿抵寧晉會滏陽河至冀州合滹沱俗曰新漳河一折而東北由威縣清河南宮棗強故城武邑景州阜城交河至青縣出鮑家嘴入於運河俗曰老漳河康熙三十六年漳水復至館陶與衛河合此後北流浸微四十七年入邱縣上流盡塞而全漳歸衛五十年復於館陶築隄以逼之而邱縣之東支遂涸上游日就湮廢惟故城以下形蹟尙顯猶有滌水匯洩也。

畿輔安瀾志

### 北流經青縣東靜海縣西

皇朝通志

又北流五里逕縣城東又北流逕流河鎮東。謹按青縣運河東岸南自滄州積官屯擺渡口起入縣境于官屯周家屯馬廠止北入靜海縣之唐官屯長五十九里西岸南至滄州積官屯擺渡口起入縣境戴家莊胡家嘴少西過鮑家嘴齊家圈流河鎮林家莊翟家圈北入靜海縣之趙家窪長一百二十一里河面寬二十三丈至二十七丈深一丈四尺至一丈九尺不等又滹沱河自河間府獻縣分流逕交河縣抵青縣南七十里杜林鎮復合康熙三十六年漳水自大名府元城縣流逕山東東昌府館陶縣西南入衛五十四年築隄遏之全漳入運惟在館陶而鮑家嘴之流遂涸雍正九年堵完固口而滹沱之流已斷漳河自河間府交河縣界來至杜林鎮與滹沱河合又北至青縣南二里鮑家嘴合於衛河其合處曰汭河口水勢洶湧闊數十丈子牙河卽滹沱河下流自青縣西南來合



漳河者，乃樂成之漳沱別河。舊志以子牙爲支水，而入漳者謂之正流，非也。又東流逕唐官屯，靜入海縣境。又北流逕縣城西。又北流逕當城寨。又北流逕碾坨嘴。謹按靜海河故道，東岸南至唐官屯，接青縣界。屈呂官屯，東釣臺，陳官屯，長屯，雙堂，增福堂，南閣，北閣，五里莊，李家院，白楊橋，善義庵，于家鋪，良王莊，木廠，西岸南自趙家窪，接青縣界。歷古城窪，西釣臺，花園，河灘，劉家營，王家營，與賈口橫隄接連，獨流下圈，胡家村，當城村，辛口，並轉東至碾坨嘴，北入天津縣界，計長一百一十六里，河身寬十丈，至十六丈，深二尺。畿輔安瀾志。

又東北至天津府城北白河，與桑乾諸水來會。皇朝通志。

北至天津，會白河諸水東入海，俗稱運河自臨清以北。總曰衛河水道提綱。

又北流迤而西，入天津縣境。又東北流逕大小稍直口。又東流屈逕其縣北，是爲天津關。又折而東北，逕縣東北，會白河同入於海河。土俗名之曰三岔河口。通典所謂三會海口者也。畿輔通志。三岔河，本名三岔口，亦名三汊沽。衛河西南自靜海縣來，逕縣北而東，其流濁。白河西北自順天府武清縣來，亦逕縣北而東，其流清。各流自縣東北二百步許，而合流，謂之三岔河。海河南北，運淀河之會流也。自天津東北三岔口，迄大沽口，長一百二十里，禹貢所謂逆河者也。每伏秋之交，二運并漲，淀水爭趨，駢注三岔一口，而強潮洄旋不下，倒漾橫流，上游隄岸田廬，皆受其浸。所謂尾閘不暢，胸腹俱病者也。故欲治直隸之水者，莫如擴達海之口，而欲擴達海之口，莫如減入口之水。雍正三年，命怡賢親王與修水利，親授方略於南北運河，各建壩開河，減水分流，別途歸海，豈僅爲運河計哉。入

口之水減，則達海之口寬，而北來之永定河，南來之子牙河，中間七十二清河，乃得綽然入三岔口，而東注。朱子云：治水先從低處下手，正此意也。 畿輔安瀾志。

又東南至大沽入海。 皇朝通志。

# 續行水金鑑卷第六十八

運河水汶河北 原委四

臣等謹按運河以汶水南旺爲上源。北至天津。南至黃淮。近地水泉無數。無不引爲便漕之用。茲謹

敍載河道經由之州縣。及所引之諸水。用誌大略。皇朝通志。

汶水源出萊蕪縣東北。西流經縣城西北。有牟汶水來會。又西有會河諸水來會。又西遶泰山支麓。經泰安府南。有泮河水自濟南府來會。折南流。有小汶河自新泰、蒙陰、經泰安縣來會。經寧陽縣北。又經汶上縣北。有淨泉水自東平州來會。又西南至汶上西南境之南旺。分流南北。置二閘。南並蜀山湖。北貫馬踏湖。爲運河水脊。皇朝通志。

運河以汶水爲上源。汶水源出萊蕪縣東北之原山。亦名馬耳山。又名岳陽山。在萊蕪東山七十

里。東接章邱。北接淄川縣界。西南流經縣城西北。又南而西。有牟汶水。合羸汶水。自東來注之。牟汶

出萊蕪東南海眼泉。合諸泉水於盤龍莊。又西合孝義河水。又西羸汶自南來會。羸汶出宮山。卽古

新甫山也。北流會牟汶水。又西受司馬河水。水出縣東北大廬山。西南流注汶水。又西至董家集南。

有方下河。合會河諸水自東北來。南注之。會河源出縣東北分水嶺。西麓其東卽青石關。淄河之源。

其北卽顏神鎮。長山孝婦河之源也。西南流至士子口。有小水自北山來會。折而西流爲方下河。又

西有。小水自西北來會。折而南流。經董家集西。又南注汶水。又西有董家河北。自泰山來會。董家河

源出泰山東南麓，東南流五十餘里，南入汶水，卽古柴汶。又西繞泰山支麓，流經泰安府南境。又西南有泮河水自北來會，卽北汶水。源出岳西北桃花谷，亦曰濼河。泮河源出泰山之北，濟南府南山，南流繞泰山西麓，折而東南經泰安府城之西。又西南屈曲南入汶水，始折南流。有小汶河自東南來會。小汶河出新泰縣東北四十里龍堂山下，大小二龍池，會諸泉水南流入蒙陰界。復西流入新泰界，合平陽河、杏山澗、西周河、廣寧河、廣明河諸水。又西流羊流河自北來會。又西經泰安縣界，受濁河泉，經徠山南故梁父城，又西南至大汶口，與大汶水會。水勢始盛，俗稱大汶河，折而西流，經寧陽縣北境。又西南至汶上縣北之戴村壩，有淨泉水自北山來會。汶水舊自寧陽西流至東平州東六十里之戴村，又西經州城南，至安也湖，合濟水。自戴村築壩，過其入濟，遂西南流八十里至南旺。又西南有小水自東來會。又西南經汶上西南境之南旺，分流南北。南置閘曰柳林，並蜀山湖。北曰北閘，貫馬踏湖。當汶水口之西，爲分水龍王廟。汶水本西會濟水，東北入海。明永樂九年，尙書宋禮用白英策，以南旺當水脊，於戴村壩過汶西注，建閘分流，至今猶享其利。水道提綱。

泰安府志：汶水有數源，其經流曰大汶。一自萊蕪縣東北原山之陽發源，西南流逕普通莊、麻塔莊，又西逕危石莊、雪野莊，折而南流。又逕大舟山，東合長城嶺，南匯夾溝水，河芹泉，逕新興堡，會新興諸泉。又西南逕舊寨堡，合魚池等泉，至板橋灣，入泰安縣界。又西南至故縣鎮，又一自泰安縣泰山之北仙臺嶺發源，東南流逕祝陽集山口集，至故縣鎮。二水合流，是爲大汶河，一名塹汶。又西南逕焦家店，與萊蕪之牟嬴二汶會。牟汶有二：一自縣東南塞子村海眼泉發源，合湖眼蓮花等泉，西流

逕顏莊，至盤龍莊。一自縣東古牟城東響水灣發源，會鵬山趙家諸泉，西南流至盤龍莊，二水合流。又西有孝義河水入之，又西至瀘馬河，合於羸汶。羸汶有二：一自萊蕪縣南宮山之陰石漏河發源，北流逕安仙寺，至瀘馬河，會牟汶。又西逕縣城南坡草窪，至嘶馬河。一自縣東北大小龍潭發源，南流逕垂楊堡，受垂楊烏江等泉，逕鎮里堡，受鎮里諸泉，至方下集，爲嘶馬河。又南流會牟汶，並南羸汶水，合爲一流。又西逕新莊堡，南宮堡，魯西集，半壁店，復會南北諸泉，入泰安縣界。至集家店，合於大汶。自此北納范家灣諸泉，南受北滾順河諸泉，逕無鹽山西，與北汶會。北汶本名泮水，自秦山西桃花峪發源，水經注云：汶水又南右合北汶水，出分水溪。又云：溪一源兩分，半水出由荏縣西北流，半水南出泰山入汶，卽此水也。東南流逕石拉村、新莊、火樓莊、粥店，至高里山南，又逕舊鎮南，又東至郡城南，有漆河水入之，又東南至郡城東，有環水入之，又東南流有石汶水入之，又東南至無鹽山西，合於大汶。自此又西南流，循徂徠山西麓，南逕龍堂村、香城村，至大汶口東，與小汶水會。小汶水自新泰縣東北龍堂山南麓發源，會諸澗水，南流逕整陽店，由蒙陰縣之汶南莊，至南鮑莊西，復入新泰界，有龍池河水入之，又西流逕大峪莊，有平陽河水入之，有西流逕西都莊右，受杏山澗水。又西至古河堡，有西周河水入之，又西流逕劉官莊，又西有廣寧河水入之，又西有廣明河水入之，又西有羊流河水入之，又西流逕靈查堡，至安家莊，新泰縣境內，行一百二十里，入泰安縣界。右受濁河泉，爲淄水，逕徂徠山南故梁父城，又西南逕故柴城北，世謂之柴汶也。又西南逕韓家莊，又西至大汶口，卽古靜封鎮，合於大汶。汶河自大小二水合流，又西南逕大汶口橋，輒舍集，又西有濁河

水入之。又西逕沙河，有沙河水入之。又西至道溝，入東平州界。又西流逕楊郭口，至東西出水口，有衡魚河水入之。又西逕坎河之戴村壩，溢水北出，與大清河會。戴村壩所以遏汝南流濟運，制甚堅。乾隆十四年，以大學士高斌議，落低三尺，溢出者倍於前。東平患之，其經流屈而西南逕劉家口，東平州境內，共行四十八里，至孫家村，入汝上縣界。西南流逕四汝口、新河口、草橋鎮、白馬河、鵝河、黑馬溝，至南旺分水口，始南北分流入運河。其北流者歷三空橋、五空橋，仍分派東北流入大清河。

山東運河備覽

泰安府汝水，源出萊蕪縣東北八十里原山之陽，西南流經泰安縣東，左合牟汝、羸汝，西流。又北合柴汝水，經泰安縣東南，泮水河自北來注之，南流至大汝口，與小汝水會，合流而西入兗州府寧陽縣界。又西流經東平州南境，又西南流入兗州府汝上縣，俗呼爲大汝河。牟汝在萊蕪縣南，西流經泰安縣東，徂徠山北，南至靜封鎮，入汝水。新志：牟汝有二，一自萊蕪縣東南寨子村海眼泉發源，合諸泉水西流，一自縣東古牟城東響水灣發源，合諸泉水西南流，至盤龍莊而合。又西有孝義河水入之，又西至瀘馬河合羸汝。按舊志：孝義河在縣東北十二里，源出萬福山，南流入汝。新志：瀘馬河在縣東南三里，一名遠馬河。羸汝自萊蕪縣南三十里宮山之陰石漏河發源，北流至瀘馬河，合牟汝。新志：羸汝有二，宮山之陰其一也，又一自縣東北大小龍潭發源，南流合諸泉水，至方下集爲嘶馬河。又南流會牟汝，並南羸汝水，合流至泰安縣焦家店，注於大汝水。按舊志：萊蕪有司馬河，在縣西十里，源出大屋山，西南流至縣西南入汝，而圖表有嘶馬河，蓋司嘶音同而訛也。柴汝在

府治東北四十里。源出嶽旁仙臺嶺。南流經府治東北三十里入汝。按圖表。泰山東有董家河南流入汝。卽柴汝也。今按此。卽趙一清五汶考中之天津河。北汝。卽泮河。源出嶽頂西北桃花谷。流逕府城西二十里。轉東南。流經府城南。受濛河水。又東受環水。又東南受石汝水。又東南至無鹽山西合大汶。溜水。俗名濁河泉。源出府治東南泉河集。於平地石縫中湧出。齊乘。泰山南亦有溜水。按此。泰山之溜水入汝者也。今按此。卽趙一清五汶考中之柴汝。小汝水。源出新泰縣東北三十里龍池。西南流百里。經泰山縣東南。繞徂徠山南麓。西流合汝水。所謂大汝口也。新志。小汝水自新泰縣東北龍堂山南麓發源。會諸澗水。南流出蒙陰界。復西流入新泰界。合龍池河。平陽河。香山澗。西周河。廣明河諸水。又西流合羊流河水。又西逕泰安縣界。受濁河泉。經徂徠南故梁父城。又西南逕故柴城北。俗亦謂之柴汝。又西北大汝口。按新泰諸水。並會於小汝。平陽河。源出縣東北狐山。西南流逕縣東。亦曰東河。南流入小汝。廣明河。源出縣南關山。北流入小汝。廣寧河。在縣西三十里。源出周家泉。蘇莊河。在縣西北四十五里。羊流河。在縣西北六十里。亦名楊柳河。俱源出新甫山。疇里河。在縣西六十五里。俱南流入小汝河。舊志。謂廣明河以下五河俱入汝。誤。大清一統志。

萊蕪縣泉六十有四。其上泉曰朋山泉。縣東二十一里。今按泉河廳冊。作鵬山泉。湖眼泉。縣東三十里。上莊泉。縣東三十里。郭娘錦泉。縣西南十五里。牛王泉。縣西南二十八里。今按泉河廳冊。作牛王山泉。烏江岸泉。縣北二十六里。北海眼泉。縣北二十五里。中泉曰悠久泉。縣東二十里。連珠泉。縣東南六十里。海眼泉。縣東南六十里。寺前泉。縣西南十五里。靈泉。縣西南十五里。暢流泉。縣西南

十五里靈寺泉。縣西南十五里櫻桃園泉。縣西南十五里湧珠泉。縣西南十五里噴玉泉。縣西南十五里半壁店泉。縣西二十五里永通泉。縣西北四十里魚池泉。縣西北四十五里垂楊泉。縣北二十六里廣潤泉。縣北二十六里尼山泉。縣北二十六里瑞渠泉。縣北三十五里湍泉。縣北二十五里水河泉。縣北二十三里涼坡泉。縣北六十里涵碧泉。以上二十八泉。其曰盈蓄泉、玲瓏泉、朋山新泉、雙龍泉、斜里泉、蓮花泉。今按泉河廳冊化蓮花池泉。張家灣泉、朱家灣泉、清泥溝泉、坡里泉、坡草泉、東靈泉、西靈泉、芝泉、韓家港泉、盧家莊泉、清洋港泉。今按泉河廳冊作清陽港泉。有本泉、西夾溝泉、星坡泉、辛冷泉。今按泉河廳冊無此泉。有辛興泉、噴珠泉、青橋泉、鎮里泉、片家泉、龍興泉、沙灣泉、助沙泉、北夾溝泉、恩波泉、雪夜泉。今按泉河廳冊無此泉。有薛家莊泉、李家灣泉、靈源泉、老龍泉、大龍灣泉、小龍灣泉。則皆下泉也。今按泉河廳冊四十七年新浚出泉三。曰新涵碧、新上莊、新靈寺。共六十七泉。

新泰縣泉三十有五。其上泉曰南陳泉。縣東南十五里劉杜泉。縣西南四十里西都泉。縣南二十里柳溝泉。縣南二十里張家溝泉。縣南十里東柳泉。縣西南四十里。今按泉河廳冊作東劉泉。賢令泉。縣南三里位家泉。縣北十八里。今按泉河廳冊作魏家泉。舊西周泉。縣西北十五里黃水灣泉。縣西南四十里靈堂泉。縣西南七十里。今按泉河廳冊作靈查泉。紅河泉。縣西北五十里釣魚臺泉。縣西南五十里名灣泉。縣西南四十里中泉曰萬松泉。縣南三十里。今按泉河廳冊作萬歲泉。北流泉。縣西南二十五里孫村泉。縣西南十五里泉里泉。縣西三十里曹家泉。縣南三里名公泉。縣



東南三里。太公泉。縣東北三十里。南師泉。縣東北十五里。賈家泉。縣西十五里。今按泉河廳冊作賈周泉。古河泉。縣西南二十里。以上共二十四泉。其曰鳳凰泉。哨泉。路踏泉。周家泉。崖頭泉。金溝泉。新西周泉。公家莊泉。里橋泉。構溝泉。和莊泉。則皆下泉也。今按泉河廳冊三十八年新浚出一泉。曰東都。共三十六泉。

泰安縣泉六十有九。其上泉曰廣生泉。縣西北二里。鐵佛堂泉。縣東二十五里。匯泉。縣東六十里。今按泉河廳冊作會泉。風雨泉。縣東二十五里。狗跑泉。縣西南五十里。上泉。縣東南五十里。龍王泉。縣西南一百里。滄浪溝泉。縣東南四十五里。今按泉河廳冊作滄浪泉。羊舍泉。縣東南九十里。石縫泉。縣東南一百里。水泊泉。縣東南一百里。今按泉河廳冊作水坡泉。白土崖泉。縣東南七十里。明堂泉。縣東南十五里。神泉。縣東南一百里。泰應泉。縣東南二十五里。光化泉。縣東南九十里。新羊泉。縣東南九十里。中泉曰張家泉。縣南五里。梁子溝泉。縣南二十五里。鳳凰泉。縣東四十里。阜泥溝泉。縣東四十里。鯉魚溝泉。縣東五十里。范家灣泉。縣東六十里。搬倒井泉。縣東六十里。順河泉。縣東六十里。北滾泉。縣東六十里。雲臺泉。縣東五十里。今按泉河廳冊作雲潭泉。報恩泉。縣西南五十里。坤溫泉。縣西南一百里。龍灣泉。縣東南十八里。力溝泉。縣東南八十里。韓家莊泉。縣東南一百里。鄉城泉。縣東南七十里。皮狐泉。縣東南一百里。針鉤泉。縣東南一百里。今按泉河廳冊作針溝泉。嶽錫靈泉。縣東六十里。南梁泉。縣南三十里。白坡泉。縣南三十里。以上共三十八泉。其曰周家灣泉。陷灣泉。靈應泉。臭泉。水磨泉。馬黃泉。龍王泉。今按泉河廳冊無此泉。有海連。梁家泉。今按泉河廳冊。

作梁家莊泉。馬兒溝泉。木頭溝泉。龍堂泉。斜溝泉。濁河泉。二柳泉。今按泉河廳冊作東西二柳泉。大興橋泉。涼泉。新旺泉。今按泉河廳冊無此泉。有海旺。黑虎泉。興泉。水泉。清泉。坡里泉。湖港泉。今按泉河廳冊作湖港溝泉。新查出泉。梁父泉。今按泉河廳冊作良甫泉。鬪泉。小柳泉。海潤泉。利運泉。廣濟泉。王莊泉。則皆下泉也。今按泉河廳冊同。

蒙陰縣泉五。其上泉曰官橋泉。縣北一百里。卞家泉。縣北一百五里。海眼泉。縣北一百十里。其中泉葛溝泉。縣北一百十五里。卞西泉。縣北一百五里。今按泉河廳冊同。按舊圖說蒙陰五泉相距不遠。皆流入萊蕪大汶河。以達南旺。惟官橋一泉。入新泰小汶。

肥城縣泉十有六。其上泉鹽河泉。縣西南四十里。董家泉。縣西南四十里。臧家泉。縣西南四十五里。吳家泉。縣西南四十五里。王家泉。縣西南四十五里。托車泉。縣西南五十里。馬房泉。縣西南六十里。清泉。縣南四十里。以上凡八泉。曰開河泉。清安泉。福川泉。聖惠泉。震澤泉。引兌泉。書城泉。衡魚泉。皆下泉也。今按泉河廳冊同。

平陰縣泉二。太液泉。縣南四十里。爲上泉。柳溝泉。距太液泉六十九步。爲中泉。今按泉河廳冊同。

東平州泉四十有七。其上泉曰大黃泉。二黃泉。州東五十二里。北蓆泉。蓆橋泉。州東五十五里。吳家泉。徐家泉。州東南五十二里。浮文泉。三眼泉。安圈泉。單眼泉。州東五十八里。坎河泉。州東六十里。其中泉曰神漢泉。州東五十二里。源遠泉。半畝泉。勝水泉。大成泉。張貨郎泉。口頭泉。以上共泉一十有八。其曰小王泉。有本泉。靜深泉。淨泉。扒頭泉。今按泉河廳冊作芭頭泉。源泉。都家泉。今按泉河廳冊。

作郝家泉。獨山泉。烈泉。大黃北泉。大黃東泉。新旺泉。永旺泉。東蓆泉。冷河泉。近匯泉。王老溝泉。孫泉。遊龍泉。湧泉。饒饒泉。南饒饒泉。安宅泉。卷耳泉。河邊泉。雙鳴泉。高莊泉。今按泉河廳冊作高家泉。鐵鉤嘴泉。高泉。今按泉河廳冊作高嘉泉。皆下泉也。今按泉河廳冊四十六年新澗出泉三。曰新永旺。新西蓆。新近匯。共五十泉。按東平諸泉以蓆河爲總領。有東西二出水口。自肥城衡魚河。經本州官橋。蓆橋。蓆河。又經坎河戴村壩。南流入會通河。

汶上縣泉十有一。其上泉曰龍鬪泉。白沙泉。中泉曰老源頭泉。雞爪泉。灤濼泉。西灤泉。以上共六泉。曰西龍泉。趙家泉。薛家溝泉。新灤濼泉。皆下泉也。並在縣東北四十五里。又南馬莊泉。凡二十四眼。涓流微細。抑下之下者。山東運河備覽。今按泉河廳冊。司馬莊泉。由蜀山湖入運。又按廳冊。寧陽之龍魚。魯姑。龍港。溝濼濼左。從龍六泉。皆由汶河入運。

戴村壩。在運河之北。距靳口關五十里。安山關八十里。受汶河下注之水。入於大清河。大清河即古濟水。一名鹽河。禹貢導沈水東流爲濟。溢爲滎。東出於陶邱北。又東北會於汶者是也。汶水自陶秦而來。就鹽河博興車瀆入海。明永樂間。尙書宋禮。在坎河口西築戴村壩。截汶南流至分水口。南北濟運。山東運河備覽。

泰安府沙河。東平州城南。明永樂時築戴村壩。以道汶水。其逸而西出。從州南折而北流者。謂之沙河。宋禮言。東境有沙河一道。本汶河支流。比年流沙淤塞河口。請及時開濬。從之。今引爲城池。大隄環之。方三十里。州志。沙水之源有二。南沙河即汶水故道。由戴村西出。至州城東。謂之鹽河。雨水大

發潰而旁出。皆成巨浸。民不得田。又西至州城南。循隄而西。繞城北。流至城西北。與北沙河會。北沙河亦乘汝水西北。流經州東三里。亦曰鹽河。又西北流至州西北。與南沙河會。又西北經東阿東南。入大清河。按沙河。卽大清河之上流。非二河也。坎河在東平州東北五十里。有坎河泉。南流六里入汝河。舊志。坎河卽汝水下流。洩入鹽河處。自戴村壩築。而汝水不復由此入濟。明萬曆七年。築滾水石壩於此。以時蓄洩。而汝水無泛溢之患。大清河卽古濟水。今曰大清河。自東平州東南戴村壩。分洩汝河之水。西北流經州城西北。至盧家村。與七里河會。古濟汝合流處也。又北流經東阿縣西。東北流經平陰。肥城。二縣西北。又東北流入濟南府長清縣界。俗亦呼爲鹽河。按濟水故道。自曹州府鄆城縣流入東平。與汝合。自元人開會通河。爲之引汝絕濟。使不得東。而清河之流中斷。舊志。大清河上源。與會通河合流。至東平安山閘。漸分流。而西北會東平州之沙河。及張秋黑龍潭。與小鹽河之水。北流經魚山下。又北過縣城西。東阿諸泉之水入焉。又東北經艾山滑口鎮。入平陰境。明成化九年。以大清河壅塞。自張秋濬至滑口鎮。本朝乾隆十四年。河臣因汝河下流。爲汝上縣患。請以戴村壩坎河口。落低三尺。五十二年。復修隄堰數十處。於城東馮家口。李家樓。各建迎水壩。以資捍禦。又於城西大清河支流東岸馬家口。建減水閘一。以洩陂水。而東平始無水患。濟南府大清河。自泰安府肥城縣流入。逕長清縣西。東北流逕齊河縣東。又東北逕歷城縣北。又東北逕濟陽縣南。又東北逕齊東縣北。一里。與武定府惠民縣分界。又東流武定府青城縣界。自長清至歷城。皆濟水故道。其在濟陽齊東者。漯水故道也。今謂之鹽河。小清河源出歷城縣西。東經章邱。鄒平。長山。

新城入青州府高苑縣。至博興。合時水入海。歷城縣志云。明永樂以後漸堙塞。成化九年參政唐源潔嘗濬治之。嘉靖十二年。又塞。乃復濬博興以西。達於歷城。幾三百里。久復淤。蓋小清河惟恃灤水爲源。堰東有阻。則灤水仍自華不注山東北入大清河。屢濬屢塞。職是故也。今小清河之在章邱者。已經堙淤。而鄒平以下。高苑以上。兼受諸山壑之水。會於駕鴨灣。青州府小清河自濟南府青城縣流入府境。逕高苑縣南五里。又東逕博興縣南。會時水。又東逕樂安縣北十八里。又東北由馬車瀆入海。卽古濟水故道。本逕高苑博興之北。金皇統中。改由縣南。自博興以東。皆時水經流也。府志小清河。河身狹小。不能容受鄰縣諸山之水。而河岸復低。尤易衝決。本朝康熙五十七年。開支脈溝分其勢。乾隆六年。以年久淤塞。復發帑疏濬焉。時水一名沁水。一名如水。俗名烏河。源出臨淄縣西南平地。西北流逕濟南府新城縣界。又西北至博興縣南。合小清河東入海。大清一統志。

何家壩。在上游汶河西岸。一由開河閘下劉老口入運。一由袁口閘下石頭口入運。明萬曆十四年築。乾隆三年改建涵洞。口寬一丈。高一丈八尺。十七年。仍改爲滾水壩。脊高一丈。寬二十丈。二十五年。總河張懋敬公師載。以汶水漲發。無處分洩。奏請落低壩脊一尺。奉旨竟應以二尺爲度。欽遵施行。二十八年。汛水衝塌。復經拆修。添築雁翅。山東運河備覽。

何家壩。在分水口內。上游洩汶河異漲。一由開河閘下劉家口支河入運。一由袁口閘下石頭口入運。此支河今已淤廢。該壩原長二十丈。除兩頭各長五丈外。中間十丈。壩脊高三尺二寸。乾隆四十七年。因南行湖水盛漲。未便使汶水多往南注。以助其勢。奏明落低一尺。壩脊現高二尺二寸。今濟

寧以南。湖河開壩。概復舊制。此壩亟應加高。以符蓄洩舊制。東河事宜冊。

運河自山東汶上縣南旺北流。經鄆城縣東北。東平州西南境。西北流有魏河。自直隸開州。經清豐縣。入山東濮州。經范縣。壽張縣。來會。皇朝通志。

運河自南旺北流爲十里閘。又北流下開河閘。袁家口閘。西望見梁山。卽古梁山滌也。其西南卽鄆城。又北流過張八老口。爲靳家口閘。安山閘。其東北爲東平州境。折而西北流。有魏河自西南來會。魏河源出直隸開州東境。東流逕清豐縣南境。東入山東界。經濮州城南。東北流經范縣東南境。壽張縣南境。又東至東平州西境。入運河。又西北爲戴家廟閘。其西卽壽張東境。水道提綱。

按歷來治河諸書。皆就水大之年。及有水之年而論。故曰淺於南。則令汶南流。淺於北。則令汶北流。又曰南邊淺阻。則多放水往南。北邊淺阻。則多放水往北。不知水小之年。天時亢旱。汶河幾欲斷流。南北開河。塘塘有船。處處皆淺。當如之何。此非江南水車斷不濟事。昔主事王寵。嘗謂旱乾之甚。則當行水車之法。試以百船論。每船漕卒十人。至南旺盤剝。當費百也。此法行。則每船止用一人。給車二十輛。什二守船。什八踏車。以挽湖水。每車用四人。二十車用八十人。一車加水七寸。二十車則加水一丈四尺。逮五十里之湖水乾。則天雨必至矣。又嘉靖中。都御史王廷奏。臣近親歷各湖。河高於湖。殆六七尺。春夏水涸。每借各湖之水。以濟漕河。况各湖原設水車各三百五十輛。若遇盛旱。亦令車水以濟。是則水車之法。自昔行之。不知何時竟廢。無論每湖各三百五十輛。爲數太多。卽通省運河。豫備百輛。亦可以用之不盡矣。乾隆三十九年。汶河水小。江南邵宿一帶。需水尤急。余請於河憲。

嘗試行於獨山微山兩湖。後之司事河干者。幸毋忽諸。乾隆二年。直隸總督朱公藻奏分水口南。北柳林二閘基。南高北低。水分北六南四。嗣後修建閘底。以漸鑿低加高。今北柳林高於南柳林三尺。南下水多。北下水少。竟成南七北三之勢。應請速復舊規。山東總河白莊恪公鍾山議曰。明永樂間。尙書宋禮用老人白英計。築戴村壩。遏諸泉水。由此入運。汝水南北分流之勢已定。成化間。郎中楊恭始於南旺之南五里。建一閘曰柳林。北五里。建一閘曰十里。此又楊恭爲南北分流之水。增一關鍵。非宋禮分水初制也。康熙四十八年。修過十里閘。六十年。修過柳林閘。不過照舊增修。並無鑿低加高案據。今用較準水平細心測量。自分水口水脊起。按筮量至柳林閘閘底。低於水脊一尺一寸五分。自分水口水脊起。量至北十里閘閘底。低於水脊二尺二寸。現係南高北低。並非南低北高。朱藻所奏。或係傳聞之誤。毋庸另行改建。逮乾隆二十二年。運河道李公清時。始以汝水分流南多北少。議將分水口南岸東沙壩轉灣處。接築雞嘴壩工。挑水北行。俾減南流。北岸東沙壩轉灣處。挑切沙山。收進壩口丈餘。展寬河口。以益北注。然每年南仍有餘。北仍不足。汝流分數。究不分明。因思春初開壩鋪水。向來兼啓馬場之十里安居。以助南流。無由分別汝水幾何。今應於開壩之時。堅閉以南各湖。專令汝水分注。計自南旺。北至臨清。三百四十四里。南至韓莊。三百三十九里。遠近相等。先看水頭。何處先到。次看逐塘鋪灌。六尺。何處先足。則南北分數可明矣。三十八年正月。稟院試行。當於正月二十五日。開放大壩。水頭於二月朔日。南抵韓莊。二日。北抵臨清。南先於北一日。逐塘鋪灌。自下而上。挨次閉板。二月十五日。南行者先至柳林。十九日。北行者方至十里閘。南先於北四日。

蓋以地勢高下論。自會元開北至臨清。四百十四里。元揭傒斯記云。地降九十尺。南至沾頭二百六十六里。地降百十六尺。今自南旺分水口起。北至臨清。僅三百四十四里。則所降之數。已不及九十九尺。南至韓莊三百三十九里。則又不止一百十六尺矣。水性就下。故宜南疾於北。而以一月三十日計算。是爲南行多得四日之水也。然地勢雖有一定。調劑要在得人。故居濟一得。亦謂利運閘。相傳以爲濟南運而不濟北運。予亦信以爲然。後乃堅閉寺前閘。啓柳林十里開河各閘板。開利運閘北注。而從前停泊之船。過行無阻。是誠南北兼濟之術也。况今金線一閘。復移建於柳林之上。何患北水之不足乎。山東運河備覽。

馬踏湖。周圍三十四里。由徐建李家二口。收蓄汶水。重運經臨。出新河頭洪仁橋三閘。宣洩濟運。定誌收水六尺七寸。山東運河圖說。

安山湖。按雍正三年。內閣學士何公國宗查勘運河。議將安山湖復設水櫃。重築臨河並圈湖等隄。修通湖似蛇溝二閘。并建一石閘。名曰安濟閘。又請開柳長湖。奏准動帑興修。嗣因柳長湖內隔金線嶺不能通。巡撫塞公楞額請從金線嶺北開河下注。又從金線嶺南開河東出兼濟閘入運。十三年。巡撫岳公濬以湖水無源。不堪復作水櫃。遂給民墾種。於乾隆十四年。陸科納糧。而湖內無隙地矣。山東運河備覽。

東岸三空橋。明景泰五年建。洩運河異漲之水。三十里至東阿縣之鬪雞山。又五里至斑鳩店。入鹽河。歸大清河。國朝乾隆三十二年。總河李公清時奏明。改爲五空橋。落低三尺。西岸老黃河口。今



廢。東岸曹家單薄雞心壩。長八十一丈。又沙灣子壩。貼心埽壩。長六十一丈。又接連雞嘴壩。長十九丈。康熙六十一年。河南武陟縣黃水漫溢。建築斷流。該壩頂衝迎溜。兼以沙趙二河。汎水異漲。危險堪虞。歷年加鑲。高厚不一。又平水三閘。乾隆二十年建。按是時山東巡撫楊公應琚請於運河東岸添建閘座。並酌開水口。分洩西岸積水。經總河白鍾山議請添建減水閘三座。相機啓閉。以資暢洩。每座出水金門。各寬二丈。閘底高運河底一丈。高鹽河底五尺。利浚涵洞一。在南閘之北。中間之南。八里廟滾水壩。乾隆二十三年。以五空橋底高。宣洩不暢。創建此壩。寬十二丈。上設木橋以通行人。五空橋。明宏治十年建。面寬十一丈五尺。底高一丈二尺。國朝乾隆二十七年。總河張懋敬公奏明落低。現在底高七尺。趙王河。自積水閘起。至曹縣紙房集止。長三百七十八里。上通鄆城曹州等八州縣。坡水合流匯聚。由積水閘入運。伏秋坡河並漲。沙灣埽壩。俱屬頂衝。甚爲險要。沙河。自沙灣大壩起。至東明縣之李連莊止。計長三百五里。通范濮等五州縣諸窪之水。合流匯聚。由引河入運。每遇伏秋水勢浩大。山東通志。沙河大壩。明之廣濟渠口也。景泰中。徐有貞治沙灣決口。先爲疏水之渠。起張秋金隄。通壽張之沙河。西南至於竹口。又西南至大瀦潭。踰范暨濮。上接河沁之水。出通源閘濟運。蓋導上流有源之水。以瀦之爲渠也。自築黃陵塞斷河流。祇藉各坡水灌注。運長則長。運消則消。水所經由。類皆沙石。下無滋灌之益。而有淤墊之虞。成化中。於沙河建築土壩。引入支河。由道人橋入運。今循厥舊。修築勿墜。張秋志。安平以西諸州邑水利。其源自黑羊山。澶淵等坡。而入濮者。爲魏河。其源自澶淵青龍等坡。而入濮之董家橋者。爲洪河。其源自曹州而入

濮者爲小流河。三河合流於濮之東南。出楊二莊橋。入范縣竹口。又東逕張秋城南。過道人橋。達月河。其溢出者。則由通源閘。俱入運河。又有源自曹濮。逕范縣回龍廟而來者。爲清河。亦名水保河。有源自定陶新集而來者。爲天鵝坡之水。有源自鄆城出五岔口而來者。爲壤邱坡之水。俱入西裏河。逕黑虎廟。楊家橋。至沙灣小閘。入運河。方張秋之未決也。津流逕通。直抵運道。及張秋屢決。高築隄岸。扼其下流。而故渠亦往往湮廢。故開濮曹濟之間。遂苦水患。溢之於東。則范縣。壽張。陽穀。爲壑。溢之於北。則清豐。南樂。觀城。朝城。莘縣。聊城。爲壑。溢之於南。則鄆城。定陶。曹縣。鉅野。爲壑。蓋譬之身乎。曹濮諸州邑。其腹也。張秋其尾閭也。下壅而欲腹無中滿得乎。先是司河者。執拘攣重。爲運道慮。而不敢量爲疏通諸州邑之患。遂計畫無復之矣。愚謂前此之決河爲患耳。自黃陵岡一築。則河害永絕。而運河之東。又設有諸減水閘壩。可恃節宣。即使鄆濮諸水溢而東出。由鹽河入海。豈遂有妨於運乎。余初承乏安平。值大澇後。鎮西諸水不得外瀉。率鍾爲汙澤。余謂盡啓沙灣諸堰。聽其常流。諸邑沮洳。得見土可藝。卽漕河亦稍資其灌輸。此已事之一驗矣。今州邑長吏。若能就故道。準高下。開濬成渠。上下通利無阻。旱則遏流。股引資其灌溉。潦則疏湮。導滯任其東趨。下不病民。上不妨運。斯亦兩利之術也。山東運河備覽。

趙王河卽古灑水。在運河之西。上源爲賈魯河。本黃河決口故道。自築黃陵岡之後。止有鄆城濮州等八州縣坡水。起自曹縣紙房集。至壽張縣積水閘入運。計長三百七十餘里。此河原自儀封。入東省曹縣境。至荷澤之雙河口分流。一由鄆城入牛頭河。一由濮州。鄆城。汶上。入壽張。爲趙王河。又經

陽穀復入壽張。至積水閘。乾隆五十二年。疏濬曹濟水利。挑挖封邱縣境之陶北河。引至紙房集上源。又挑鄆城之南清河。直入牛頭河。於雙口河築柴土壩。遏絕北行之路。夏秋水勢盛漲。仍令漫壩而北入趙王河。東河事宜冊。

西北流經壽張縣東。陽穀縣西。北流逕聊城縣南。皇朝通志。

又西北過安平鎮。折而北流爲荆門閘。爲阿城閘。阿城在東。東阿縣又在其東。閘自荆門阿城至七級皆陽穀縣東北境。又北爲七級。周家店。李海務。三閘。周家店爲聊城縣南境。水道提綱。

泰安府運河。自兗州府汶上縣北界流入。逕東平州西南。汶濟二水合流處也。有閘一。曰安山。西北流入兗州府壽張縣界。又北逕東阿縣西。又北流入兗州府陽穀縣界。元史至元二十六年。開河以通運道。起須城安山渠西南。由壽張西北至東昌。又西北至臨清。引汶水以達御河。長二百五十餘里。中建閘二十有一。以時蓄洩。河成。河渠官張禮孫言。開魏博之渠。通江淮之運。古所未聞。賜名會通。漕河考。由南旺至臨清。亘四百里。惟藉安山一湖以濟漕河。府志。東平州。自靳家口汶上縣界起。北至戴家廟閘下。三空橋。壽張縣界止。河道長六十里。東阿縣。自沙灣鋪。壽張縣界起。北至五里鋪。陽穀縣界止。河道長一十五里。共長七十五里。其閘六。在東平者曰靳家口。安山。戴家廟。在東阿者曰通源。減水。平水。其壩不在運道。而關於運者甚鉅。曰戴村。坎河次之。今皆設有河員兵弁。以時啓閉。利漕運焉。大清一統志。

張秋跨河爲城。周世宗時。遣宰相李穀治隄。自陽穀至張秋口是也。宋改爲景德鎮。元有景德鎮都

水分監。明劉大夏治沙灣，功成，賜名安平鎮。按自黃陵岡築壩之後，東省運河，藉爲外蔽。張秋一帶民田廬舍，庶幾可以無憂。然當順治七年，河決荊隴口，衝潰隄岸。由大清河入海，東竟濟北，皆罹其害。九年，又決大王廟口，沙灣復潰，阻絕運道。總河楊公方興修築隄岸，又至西岸河邊起，至八里廟河邊止，開引河五百丈，至順治十三年，工始告成。康熙六十年，又決武陟縣之詹家口，馬營口，魏家口，合流直注沙灣，泛溢四出，漕運幾梗，費帑百萬，僅能塞之。六十一年，又決於釘船幫，出李先鋒莊，逼馬營口，隄裂二十餘丈，水深溜急，不可塞。六月，又決於秦家廠釘船幫大壩，又陷四十五丈，乃倍費帑金，廣派人夫，於廣武山下王家溝，官莊峪，開挑引河，水勢稍平。雍正元年正月，築塞方峻，是年武陟縣姚其營、梁家營、二鋪營，及詹家店、馬營口，又漫坍八處，駸駸有下注沙灣之勢。近數十年，雖號安瀾，但金鄉、魚臺、徐州沛縣等處，地勢下流，恃有太行隄，隔絕昭陽、微山等湖，可免黃水淤墊，而張秋沙灣地居上游，荊隴上下，適當黃河南折之初，隄防疎懈，至易生事。保運之道，又在豫工廳汛加意綢繆矣。山東運河備覽。

東岸減水閘二，一爲明景泰年建，國朝乾隆四年修，一爲明成化年建，國朝乾隆十七年修。龍灣滾水壩，明正統六年建，本係減水閘，國朝雍正六年，改爲滾水壩。乾隆二十三年，改鋪石底，俱洩異漲入徒駭河。山東通志：龍灣減水壩，明徐有貞所作，有五空等橋，今用第一空橋爲滾水壩，第二空橋爲減水閘。徒駭河在運河之東，由聊城東岸龍灣減水閘，滾水壩，洩汝水，並陽穀莘縣積水入之。東北逕博平、高唐、茌平、禹城、齊河、臨邑、濟陽、商河、惠民、濱州，至霑化之久山，口入海。按此河雖

在運河東岸。而於西岸東昌曹州一帶州縣最關緊要。蓋聊城運河之西。上受陽穀魯家隄之急流。並接濮范觀朝等州縣之坡水。每遇伏秋大汛。水勢日增。運河頂阻。疏洩無路。必俟運河水落。方能開西岸之閘。放之入運。使由運入河。歸海。若運河消落稍遲。則數州縣之淹浸不免矣。乾隆十九年。河道水利工程案內。曾自聊城至臨邑等八州縣。挑濬淤墊河身。凡三萬六百一十三丈。使水由減水閘。滾水壩。暢流入海。山東運河備覽。

又東經東昌府城東。又北經堂邑縣東北。又經博平縣西北。清平縣西。皇朝通志。

又北經東昌府城東。稍北爲通濟閘。又西北爲永通閘。又北爲梁家淺閘。堂邑縣東北境。又北爲土橋閘。博平縣西北六十里。過清陽驛西。折而西北爲戴家廟。清平縣西境。水道提綱。

魏灣滾水壩。山東通志。徐有貞作減水閘於魏灣。舊有六閘。今用第四空爲減水閘。第五空爲滾水壩。又石涵洞一。按減水閘。一卽土橋上三教堂。一卽魏壩上。馬頰河在魏灣。由博平東岸減水閘。滾水壩。洩汶水。並馬頰上源之水入之。東北逕清平。高唐。夏津。恩縣。平原。德州。德平。樂陵。慶雲。海豐之沙河。口入海。按乾隆三十八年。以馬頰河淤淺已久。運河橫梗中間。每年伏秋運水盈滿。洩放不及。以致莘冠堂三邑被災。議將馬頰河挑挖寬深。使各處坡水有容。俟運水稍落。糧艘過完。開閘洩放。經上河通判洪世儀覆勘議稟。馬頰河來自直隸開州。清豐。南樂。元城。經曹州之觀城。朝城等。綿亘數百里。至莘冠堂三邑境內。復一百三十餘里。積淤年久。有僅存河形者。有竟成平陸者。每伏秋水溢。寬至十餘里。深至數尺。至霜降後。由中閘口。及迤南迤北里許。二閘通啓。洩放尙未及時。

乾涸有妨播種。若照議開挑。則河歸一泓。水勢全注中閘。口出運。伏秋水發。建瓴而下。源遠流長。彼時運水盈槽。涓滴難消。兩水夾隄。衝激堪虞。卽運水消耗。可望宣洩。顧欲以丈餘之閘口。疏導數百里之積水。勢必擁擠。閘座油刷隄岸。關係運河匪淺。查西岸中閘口。係馬頰河上游歸運之所。現在該閘石底。高運河底五尺。馬頰河底。較運河底高九尺五寸。應將中閘口一帶舊隄。加倍幫築。以備攔禦。再將馬頰河上游長河通挑深。與運河底平。口底加倍寬闊。所挑之土。堆積兩涯。順築隄堰。俾水有歸宿。或該閘兩旁。接建兩空。或左近添設閘座。各開金門。深開板槽。照例清明後。通下閘板。裏面靠板。堅築高厚土壩。至伏秋時。視運河水勢強弱。爲起閉板片之多寡。以酌量節宣。縱水潦不時。無虞倒灌。亦不至積水久停。淹浸逾時。至馬頰河下游。在東岸魏家灣水壩入口。逕博平。清平。高唐。夏津。恩縣等。共一百六十餘里。現在河身寬窄深淺不齊。向來只能洩運河異漲之水。若西岸上游開通。添閘宣洩。運河必加漲滿。苟不導其去路。水滿堪虞。東岸亦應添設減水閘數座。接挑引渠。導達馬頰故道。併將博清等馬頰下游。疏濬寬深。以暢全流。則承受有門。消納有路。隄岸莊田。各無妨礙矣。至接恩縣界爲平原。禹城。陵縣。慶雲。海豐等地。居該河之尾閭。尤須通會。一律挑挖深寬。俾入海之道。不至湮塞。方爲萬全之策也。山東運河備覽。

東昌府運河。自兗州府陽穀縣流入聊城縣界。又北逕堂邑縣東北四十五里。博平縣西南二十五里。又北逕清平縣西南三十里。入臨清州境。大清一統志。

又北逕臨清州城。有衛河來會。河勢始盛。自此以下。不復置閘。皇朝通志。

爲板閘。輒閘。又北貫臨清州城。城左右如斷環。西會衛河水。如丁字。河勢始盛。順流而北。遂不復置閘矣。衛河西自衛輝大名東北。流經冠縣北。與西來漳水會。又東北至臨清州入運。右自南旺至臨清。凡十九閘。水道提綱。今按運河不復貫城。以西城廢。

臨清州運河。自東昌府清平縣境。北流至臨清州城南。貫城而北。衛河自西來會爲一。又東北逕夏津。武城。恩縣之西。入濟南府德州界。自陽穀縣官窪口鋪。入府境北。至臨清州鹽店。自兗州府陽穀縣。至此長一百七十七里。卽元明以來會通河舊道。皆汝水也。是爲上河。閘凡九。自臨清州鹽店北。至直隸吳橋縣降民口。長二百二十七里。皆衛水也。是爲下河。不設閘。今皆謂之運河。本朝康熙六十年。黃沁並決。修東昌各屬隄岸。以衛運河。乾隆三年。修建聊城縣防家口進水閘。以洩白家窪匯聚之水入運。又修博平三教堂減水閘。洩運河之水。由引河入馬頰河。十八年。重修聊城縣十里鋪進水閘。以洩曹州府鄆城縣西南諸邑之水入運。三十二年。增建臨清月河單閘。以洩運河之水入衛。凡皆先事綢繆。相機防護。而歲修之工不與焉。此運道所以深通無滯也。大清一統志。

此  
页  
空  
白



# 續行水金鑑卷第六十九

運河水汶 河南 泗河 沭河 原委五

運河自南旺南流。自蜀山湖隄。經嘉祥縣東北境。又南至濟寧州。西北有府河。卽泗水支流。自兗州府合汶上縣之洸河來會。皇朝通志。

運河自南旺分流爲柳林閘。其東隔岸卽蜀山湖也。諸閘中此爲啓閉最要。又東南流。並蜀山湖隄。爲寺前鋪閘。又東南爲廣濟閘。嘉祥縣之東北境。閘東當蜀山湖之尾湖。自柳林至此。長五十餘里。北爲汶上。南爲濟寧。又南經蜀山。西麓至濟寧州西南境。折而東流。爲天井閘。在州城西南。經州城南。有府河會諸水。自東北繞城來會。南爲在城閘。又南爲趙村閘。爲石佛閘。府河卽泗水支流也。自兗州城東穿城西出。俗曰府河。西南流六十餘里。至濟寧州。東有洸河。會寧陽諸水。自東北來。有馬廠湖水。自西繞城北而東來會。經城之東。而南入運河。洸水出汶上縣東北。曰龍鬬泉。東南流至寧陽南。滋陽北。有灤河會諸泉水。又東合一水。自東北來會。又折西南流百餘里。至濟寧東北。與府河合。寧陽諸水在縣城東北者。曰蛇眼泉。曰張家泉。合而南流。經城東有井泉。自東南來會。在縣城西者曰古泉。曰五里泉。合而南。與井泉會。東南流。有一水。自東自九項山西南流。經曲阜北境來會。又西南至滋陽北境。與西北來之洸水合。俗總曰洸河。水道提綱。

南旺湖東岸臨運。洩運河異漲之水入湖。按南旺湖圈隄之築。舊案無存。萬曆十九年。幫築西北

南三面湖隄長一萬二千餘丈。國朝康熙四十年間。汶上縣知縣重修。雍正九年補修。悉資民力。至乾隆十一年伏秋汛漲。水與隄平。發帑搶護。得保平穩。十二年動帑補修。三十七年復奏明借動司庫銀兩修築。自汶上縣甘公碑界起。至嘉祥縣天仙廟止。實共長九千一百八十三丈。西南有芒生閘。洩水入牛頭河。今廢。山東運河備覽。

南旺湖周圍九十三里。定誌收水五尺。遇伏秋盛漲。開放臨運各斗門。分洩收蓄。以保運限。重運經臨。出鉅嘉汛各單閘。宣洩濟運湖水。過大出芒生閘。由牛頭河入南陽湖。山東運河圖說。

南旺湖湖西南。舊有芒生閘一座。久廢。乾隆五十二年。奏明將芒生廢閘改修雙涵洞。并開挑引渠。通入牛頭河。伏秋盛漲。收水入湖。卽由涵洞分洩。遞達南陽。昭陽等湖。東河事宜冊。

蜀山湖由永定卽徐家壩永安卽田家樓永寧卽南月河三斗門收蓄汶水。出金綫利運二閘濟運。

按蜀山湖圈隄。坐落濟寧汶上嘉祥三州縣境。舊有隄長六千九百七十八丈。建築年月無考。乾隆二年。題請動帑幫修。而東面濟寧州境內蘇魯橋起。汶上縣北界顏珠隄止。向無隄岸。湖坡相連。四年。題請增築二千五百九丈。於汶上境內添建涵洞二。濟寧境內添建涵洞三。洩民田坡水入湖。又有楊家河。亦洩民田坡水。遇伏秋多雨。則汶上馬莊泉蒲灣泊水。由此河歸湖。四十年。以東南隄岸單薄。經河督姚公奏請。鑲砌石工。並碎石坦坡。共長二千三百四十一丈。山東運河備覽。

東岸金綫閘。本在寺前閘之南。創建年月無考。乾隆二十五年。運河道李公清。時議蜀山一湖。從前進水出水。止有臨汶三斗門。原屬簡便。其利運金綫二閘。相傳爲運河廳任璣重建。使湖水多向南。

流以防本境水勢不足利運。在寺前之北金綫。在寺前之南二閘齊開。水盡南行。南運苦多。北運苦少。而魚臺窪地亦因有水溢之患。康熙四十五年間。張公伯行在濟寧道任。閉寺前開利運。使水北走南旺。以濟北運。歷年行之有驗。但尙有金綫一閘。鉅嘉汛員年年開通。以濟本汛。重運既過。開放以洩湖水。蜀山湖水北去少而南行多。南旺馬場二湖之水。又爲此水頂阻。積年彌月。不得暢洩。既於運道無益。而徒爲瀕河民田之害。今議將金綫閘移上十餘里。建在柳林閘之北。重運到時。使寺前與利運此閘。與柳林互相啓閉。則水不南下。盡爲北用。一轉移間。其利有四。以蜀山湖補安山湖之涸。而北運有賴一也。蜀山旣不南灌。馬場可以出水。白嘴一帶。年年不淹。二也。重運來時。騰空馬場湖身。秋汛驟漲。府泲有所容納。而龍王口不衝濟寧運隄。南鄉不致被淹。三也。每歲尾幫。旣過暢放利運。封鎖寺前。差民船隻。守候甚苦。今令柳林上下啓閉。水不濡漏。船可通行。四也。總河張慤。敬公奏准。改建金門寬一丈五尺。高一丈一尺三寸。山東運河備覽。

馬場湖周圍四十里三分。濟寧州志。周圍六十里。舊承蜀山有餘之水。由馮家壩入湖。今堵築馮家壩。東承泗沂府泲之水入運。全河備考。濟寧之西湖曰馬場。又名任湖。在漕渠北岸。上受蜀山湖水。北岸爲減水閘三。卽五里營十里鋪安居閘是也。東岸爲隄一道。長一千六百餘丈。湖之西口爲馮家壩。按乾隆四年。自田宗智莊起。至火頭灣北運隄止。增築圈隄二千五百七十九丈。五里營舊閘已廢。山東運河備覽。

馬場湖周圍四十里三分。收蓄府泲之水。重運經臨。由十里安居二斗門宣洩濟運。定誌收水五尺。

五寸 山東運河圖說

牛頭河在州西南二十里。漕河南岸。卽耐牢坡。上有永通閘。洩出漕渠之水。至魚臺縣塌場口。入舊運河。蓋黃河之故道也。全河備考。牛頭河西自耐牢坡口。東至魚臺縣之塌場口。九十里。係明初徐達所開。不惟可以通運。而濟寧以南窪地之水。由之洩入昭陽。實濟寧以南之水道也。自穀亭淤而塌場口塞。濟寧南鄉。遂歲受水患。仍應浚牛頭河。使達昭陽諸湖。以通蓄洩。而濟寧南鄉一帶窪地。儻能築岸分圩。效江南插秧種稻之法。以獲水田之利。卽可轉荒瘠而變膏腴。亦存乎其人之興舉也。山東運河備覽。

牛頭河在州西南二十里。上源卽耐牢坡。洩漕河之水。至魚臺縣塌場口。入舊河。蓋黃河之故道也。由是洩入昭陽湖舊河。久廢。乾隆五十一年。於漕濟水利案內。將該河疏浚。上引南旺湖。宋家窪。趙王河諸水。入南陽湖。東河事宜冊。

府河係泗河分支。由兗郡黑風口。分流入馬場湖。山東運河備覽。

兗州府洸水。洩水支流也。自寧陽縣東北堽城壩分流。西南逕寧陽縣西三里。又南流逕滋陽縣西南。又西南流至濟寧州界天井閘。入運河。寧陽縣志。元初于堽城左作斗門。遏洩水入泗。於是洸流始盛。至元六年。以奔流衝激泥沙填淤。乃議濬之。自閘口至石刺。以通其源。又自石刺至高吳橋。南至王家道口。凡五十六里有奇。以達其流。而洸河復治。二十年。會通河開北。至奉符爲閘。以導洩水。盡入於洸。東會泗水。出於任城之會元閘。而始分明。永樂九年。又築堽城壩。以遏洩水。惟壩南官莊。

河入洗。洗流始微。成化十一年。主事張盛復爲壩城石閘。稍分汝水支流。以入於洗。逕寧陽西南兩崖之間。有東西兩崖。以備蓄洩。南匯蛇眼諸泉。流入滋陽。於是洗水入漕之流。滔滔不絕矣。大清一統志。

滋陽縣泉十有四。其上泉曰闕黨泉。惠泉。既濟泉。蔣翽上泉。俱在縣北一里。驛後泉。城西附郭。其中泉曰三義泉。縣東北附郭。照星泉。縣北一里。古溝泉。縣北一里。蔣翽下泉。縣北一里。今按。泉河廳冊作上蔣翽泉。下蔣翽泉。西南新泉。縣西北附郭。以上共十泉。曰東北新泉。元對泉。負瑕泉。紙房泉。則下泉也。今按。泉河廳冊同。又按。十四泉俱歸府河。由馬場湖入運。

寧陽縣十有三泉。其上泉曰龍港溝泉。縣東北五十里。魯姑泉。縣西北三十里。左從龍泉。縣東北五十六里。右從龍泉。縣東北五十五里。中泉曰三里泉。縣東北一里。張家泉。縣東八里。龍魚泉。縣東北六十里。濼濬泉。縣西北四十里。以上共八泉。曰蛇眼泉。古泉。日淵泉。井泉。古城泉。則下泉也。今按。泉河廳冊同。內龍港溝。左從龍。右從龍。龍魚四泉。魯姑。濼濬二泉。皆歸汝。餘歸洗。由馬場湖入運。

濟寧州泉六。曰托基泉。蘆溝泉。爲上泉。馬陵泉。南馬泉。兩城泉。爲中泉。浣筆泉。附會李白。無益於運。山東運河備覽。今按。泉河廳冊同。南馬。馬陵。兩城。蘆溝四泉。由新挑河入運。托基由泗河入運。浣筆徑入運河。

兗州府灤河。今按。灤河入運之流已涸。今山東河南全圖。尙行繪入。水道提綱。注作邈河。一統志亦載入。其下游皆府洗也。在寧陽縣東南五里。匯東北蛇眼諸泉。環城而流。卽今城河也。南流至滋陽。

入漕西流。同古城泉。由高吳橋南入洗。明統志。漕水源發寧陽縣治東蛇眼泉。北流至府城北三十里。入洗水。大清一統志。

楊家壩在濟寧州城東。全河備考。泗河之水。貫兗州府西流。合洗水同經此口。南入運道。原未嘗設壩。正德間。因劉寵之亂。築壩引水西繞。以爲濟城外護。始有壩基。然事平卽開。仍得通運。自崇禎十七年。流寇猖獗。東省震動。於是復築此壩。障水護城。此特一時固圍之計。至今未改。每遇伏秋水漲。不能洩瀉歸河。兩岸民田。大受淹沒之害。且泗洗之水。爲此壩所遏。由夏家橋入馬場湖。而後濟運。其道反迂。不若改壩爲閘。時啓時閉。急則借以濟運。緩則儲以待用。民田可無淹沒之虞矣。按楊家壩總河楊方與堵築。康熙三十四年。開通建減水閘。乾隆二十二年。改建雙槽石閘。伏秋水漲。啓板宣洩。由韋馱棚通心橋。觀瀾橋。西小門草橋。五股分洩。而其議實始於備考一書。蓋閱四十年而其策方行云。按楊家壩以上十里。爲吳泰閘。又東十里。爲宮村閘。皆元至元中建。又東十里。爲孫時閘。又東十里。爲杏林閘。俱廢。山東運河備覽。

又東南泗水來會。皇朝通志。

又東南爲新店閘。爲新閘。爲仲家淺閘。爲師家莊閘。又南爲魯橋。泗水東北自曲阜滋陽來會。河勢始盛。南爲棗林閘。自此置閘稍稀。自柳林至棗林。置閘如織。水道提綱。

泗水源出泗水縣東陪尾山。數源並發。俱西流。合靈寺泉北。東南有雷澤湖。水溢亦西北來會。又西有二小水。自南來會。又西有三小水。合自南來會。又西有二小水。自西南來會。以上小水。皆出南山。

又西經縣城。北折西南流六十餘里。至曲阜縣。東北有嶮河。自東北來注之。嶮河出泗水縣西北境之石門山。西南流與泗水合。西經孔林北。曲阜城西北。又西南至兗州府城東北。分爲二支。其西穿城爲府河。西南至濟寧入運者支津也。正派經城東。而南有雩河。自東來會。雩河卽浴沂之沂水。源出東南之尼山下。北流數十里。折而西北六十里。有新安泉自北來注之。又西流。經曲阜。而橫溝泉水及諸泉。皆自東北來會。又小水一。自縣城西南來會。又西南至府城。東南注泗水。折西南流六十餘里。又南流五十里。有白馬河東北自鄒縣來會。白馬河源出滋陽南境。鄒縣北境羣山。匯諸泉水。最東者曰黃港泉。曰馬山泉。其北曰白馬泉。南流而合西南流。合北來之鱸眼泉。又西南合西北來之新泉。又西南合東來泉水。始稱白馬河。經鄒縣西境。而南嶧山水自東來會。又西南注泗水。又西南至棗林。北入運河。水道提綱。

泗河源出泗水縣陪尾山。四泉并發。西流至兗州城東。又南流經橫河。與沂水合。元時於兗州東門外五里金口。作壩建閘。遏泗之南趨。每夏秋水長。則啓閘。放使南流。會沂水。由塔里河出師莊閘。冬春水微。則閉閘。令由黑風口東經兗城入濟。又南流會德水。至濟寧。出天井閘。山東運河備覽。洙水在曲阜縣北四里。泗水分流。按闕里志。今洙水與泗水不通。上源在聖林之東。止一溝瀆。似古魯城之隍也。穿聖林而橫流。過先聖墓前。出林。復西南流入於西沂。其故道不可考。按今洙水上源。旣不遠。而下流卽入西沂。與水經注故道迥殊。其分流之處。轉出泗水之南。亦與水經注南泗水注之說異。或以爲今之濟河。自府城東金口閘分流。貫城而西出。至濟寧州界。會洙水入運河。疑卽

洙水故瀆。又以府城北二十五里有沙河。三十里有漕河。九折而下。矯若游龍。亦名九龍灣。皆自寧陽縣流入。又西入洸。疑卽洙水枝津也。西沂水源出曲阜縣東南尼山之麓。西北流經曲阜縣南二里。又西流入滋陽縣境。至府城東合於泗。按此沂水齊乘謂爲西沂。其岱麓之沂山出者。別見沂州府。大清一統志。

白馬河自鄒縣九龍山下發源。會陳溝白馬馬山孟母四泉。合爲一渠。西南逕屯頭橋。復會諸泉水。至崇義橋南。有蓼水入之。又南逕平陽橋。至故夏社。有大沙河水入之。又西南逕徐鎮濟勝橋。又逕黃路橋永濟橋。至兩川橋。會泗水。由魯橋入運。今按東河事宜冊。今由孟家橋逕歸獨山湖。金口壩在兗州城東五里。泗河經由適中之地。此處地勢最高。每逢異漲。下游宣洩爲難。且沂河會入泗河之處。泗強沂弱。卽泛溢民田。下浸運河東岸。是以設閘箝束。自前五代北朝。至元延祐。明成化。嘉靖。屢次修築。凡爲閘門者五。北卽黑風口。爲閘門者二。冬閉。金口導水入黑風口。西流府河。至馬場湖收蓄。以濟天井等八閘之運。若下游水淺。仍開金口。閉黑風。使南出魯橋。以濟棗林等八閘之運。

山東運河備覽。

泗河源出魯橋。乾隆三十七年。奏將泗河內董家石壩拆除。展寬孟家橋石橋。俾泗水逕入獨山湖。并減濟寧新店東坡水患。東河事宜冊。

泗水縣泉八十有二。其上泉曰大鮑村泉。縣東八里。小鮑村泉。縣東八里。龍澤泉。縣東八里。東巖石縫泉。縣東十五里。趙家泉。縣東十五里。雙石縫泉。縣東五十里。瑀泉。縣東五十里。今按泉河廳冊。



作瑞泉。西巖石縫泉。縣西南二十里。珍珠泉。縣東五十里。鈞突泉。縣東五十里。黑虎泉。縣東五十里。濤廉泉。縣東五十里。響水泉。縣東五十里。其中泉曰蔭出。西小泉。縣東八里。城南珍珠泉。縣南五里。醴前泉。縣南五里。今按。泉河廳冊作醴橋泉。龜眼泉。縣東十五里。龜陰泉。縣東十五里。龜尾泉。縣東十五里。曹家泉。縣東十六里。溢津泉。縣東十六里。蔣家泉。縣東北十七里。里老泉。縣東北十八里。石井泉。縣東北十八里。小黃陰泉。縣東南四十里。大黃陰泉。縣東南四十里。石露新泉。縣東南四十里。激雪泉。縣東南四十里。石液泉。縣東五十里。石豆泉。縣東五十里。今按。泉河廳冊作石竇泉。石壑泉。縣東五十里。膏湧泉。縣東五十里。珠澤泉。縣西南十二里。豐潤泉。縣西北二十五里。馬跑泉。縣西北二十六里。雪花泉。縣東五十里。甘露泉。縣東五十里。甘露新泉。縣東五十里。西甘露泉。縣東五十里。淘米泉。縣東五十里。涓涓泉。縣東五十里。醴橋泉。縣東五十里。東奎聚泉。縣東五十里。三水泉。縣東五十里。湧珠泉。縣東五十里。以上共四十五泉。其曰蔭出。東小泉。醴泉。太來泉。今按。泉河廳冊作泰來泉。合德泉。四勝泉。今按。泉河廳冊作泗勝泉。天津泉。杜家泉。岳陵泉。吳家泉。今按。泉河廳冊作吳老泉。潘坡泉。變巧泉。大黃溝泉。小黃溝泉。三角灣泉。太玉溝泉。小玉溝泉。蘆城泉。壁溝泉。馬莊泉。位莊泉。今按。泉河廳冊作魏莊泉。石河泉。新開一泉。紅石泉。琵琶泉。新開二泉。天井泉。西奎聚泉。卞橋泉。卞莊泉。三台泉。石下泉。井邊泉。地震泉。近鮑泉。東窪泉。南玉泉。南壁泉。則皆下泉也。今按。泉河廳冊同。

曲阜縣泉二十有九。其上泉曰達泉。在縣東南三里。中泉曰兩觀泉。近達泉。車轡泉。橋上泉。俱在縣

東南三里。洙泗泉。新泉。曲水詠歸泉。浴沂泉。渥聲泉。今按泉河廳冊蒙上作浴沂潺聲泉。濯纓泉。俱在縣東南二里。城南新開泉。縣南半里。通沂泉。縣東南七里。溫泉。今按泉河廳冊作溫水泉。西陬泉。運珠泉。俱在縣東南十五里。映安泉。新安泉。在縣西北三十里。以上共十有八泉。其曰柳青泉。雙泉。茶泉。曲溝泉。文獻泉。近溫泉。黑虎泉。橫溝泉。城北新開泉。變巧泉。蜈蚣泉。則皆下泉也。今按泉河廳冊泉二十八浴沂潺聲井爲一泉。

鄒縣泉十有七。其上泉曰鱗眼泉。縣西北三十里。聯珠泉。縣南十八里。益運泉。縣西南十八里。淵源泉。縣西南七十里。三角灣泉。縣西南八十里。其中泉曰陳家溝泉。縣北二十里。孟母泉。縣北二十五里。程莊泉。縣西北三十里。崗山泉。縣北二十里。濟運泉。縣西南十八里。合璧泉。縣南七十里。以上共十一泉。其曰白馬泉。馬山泉。新泉。屯頭泉。倉山泉。稻屯泉。皆下泉也。山東運河備覽。今按泉河廳冊同。合璧一泉。自由獨山湖入運。餘十六泉。由白馬河會泗河入運。

經魚臺縣東北並昭陽湖隄。有界河自滕縣來會。經滕縣西。有荆溝河來會。又東南有灑河來會。又東南經江南沛縣東北界。又東經沛湖口。有玉花河來會。皇朝通志。

運河自棗林閘南行獨山湖中。兩岸皆隄。至魚臺東北境。爲南陽閘。折而東南。流過趙家口。南爲利建閘。又東爲邢莊閘。過石家口。有界河龍山河。自東北滕縣西入昭陽湖。界河出嶧山東南山中。西南流經界河驛。又西南入湖。龍山河出滕縣東北龍山。南流折而西南。經縣北境。又西南流至界河口之南。入湖。卽獨山湖。其西南曰昭陽湖。實一水。以運河貫其中。隄岸所隔。故爲二名耳。今按界

河即東龍泉聖母池泉等河。龍山河即東龍泉廉家潭泉等河也。又東南經徐家營南。北岸獨山湖至此而盡。自棗林迤而東南。計百餘里。東西廣處。在滕縣西四十餘里。又東南有荆溝河。自東北來注之。荆溝河出滕縣東北境。有荆水泉合柳泉及壽聖泉水。西南流經縣城東。而南而西南至徐家營。南入運河。今按荆溝河今如故。又東南爲珠梅閘。西岸昭陽湖至此而盡。自棗林迤而南。東百十餘里。珠梅南岸即江南沛縣界。又東南有郭河。自東北來注之。郭河即古灤水。出滕縣東南高山西流。有三水。自東北來會。折西南流經縣南境。又西至常家口。北入運河。今按郭河即鮎魚涎河。又東爲常家口閘。又東南爲江南沛縣東北界之楊莊閘。又東經沛湖口至夏鎮閘。有玉花河自東北來注。玉花河出澤縣西北。牛山西南。流五十餘里。分爲二派。北派西南經戚城。北注運河。沛湖在夏鎮西南。自沛縣西北境迤而東北。周圍百數十里。其支津南合縣城南之水。又東有支渠二。南流合而東南。通微山湖。水道提綱。今按玉花河北派由戚城北注運河。其故道卽三河口。

東岸水口二。曰新挑河。受黃良等泉之水入運。曰磨鑿溝。受白泗二河并魯橋東坡水入湖。在獨山湖上游。山東運河備覽。

南陽湖周圍九里五分。受金單曹武等縣坡水入湖。按南陽湖各閘門。只可於冬間開放。使獨山湖水穿運入湖。以資收蓄。春夏宜嚴行堵閉。運河之水。方不旁洩。獨山湖今亦低於運河二三尺不等。湖口若開。能入而不能出。是以春秋之間。亦俱墜閉。惟冬間運河乾塘。方能開放。使穿運入於南陽收蓄。山東運河備覽。

獨山湖在運河之東。周圍一百九十六里。水無定誌。承受泗河、白馬、灑河之水。並濟魚鄒滕等州縣。山泉坡水。雍正九年。設有臨湖水口十八處。該湖水面低於運河。每年春夏。堅閉水口。重運過完。開放。西岸十四單閘。俾獨山水串運歸入昭陽湖。霜清水落。即將水口陸續堵閉。並魯橋泗河截築橫壩。以資收蓄。山東運河圖說。

昭陽湖周圍一百八十里。上承南陽湖水。並濟魚金單曹定等州縣坡水。下達微山湖。山東運河圖說。

東岸水口十四。王家水口。今廢。傅家水口。徐家南水口。徐家北水口。滿家南水口。滿家中水口。滿家北水口。王家水口。張家水口。馬家北水口。孟家南水口。尤家北水口。石家水口。邱家水口。俱明隆慶年。建。山東運河備覽。

辛莊橋滾水壩。乾隆二十七年。建。長二十丈。高一丈四尺四寸。西岸單閘七。俱明隆慶元年。建。曰徐家下單閘。徐家上單閘。滿家單閘。王家單閘。邵家單閘。邱家單閘。乾隆二十三年。俱加高石面二層。山東運河備覽。

兗州府界河。在鄒縣南五十里。亦名白水河。出滕縣北。龍山西。流入鄒縣境。過界河驛。仍出滕縣界。徑染山前。又西南瀦爲郁郎淵。一名溫水湖。又西受聖母池水。入運河。大清一統志。

北沙河在滕縣北十五里。俗訛爲白沙河。源出鄒縣嶧山。南流逕龍山後。繞出其左。又逕龍山南流。至縣西。分爲二。一出休城南。至馬家口。入運河。一趨休城北。又西受北石橋水。又出會白水河。入運

明統志北沙河源出滕縣北龍山。西流逕魚臺縣界。入昭陽湖。按魚臺縣志有沙河在縣東南五十里。逕沙湖鎮。流入昭陽湖。蓋運河改道也。昔與滕縣沙河爲一。自夏鎮河改在昭陽東畔。此河不與滕通。明志所言舊道也。大清一統志。

郭水在滕縣南十五里。卽南沙河也。源出縣東北一百里。述山西南麓。南流會黃約山諸泉水。逕縣南。又西會南河入運河。按齊乘云。滕州南有薛水。卽古灑水。出州東高山。春秋魯取洙田。自灑水。杜注。水出東海合鄉縣西南。經魯國。至高平湖陸縣入泗。蓋北水也。縣志以爲水經注梁水南鄰於灑。卽今灑水也。薛水去南梁遠。中隔石橋。泉河安得鄰之。以薛水爲古灑水。誤矣。且縣東北述山前有分水嶺。直南至嶧山東。水皆東流。自崆峒山西至鳳凰嶺北。水皆北流。東海合鄉之水。何從而入。杜注亦謬。齊乘亦云。有沙水。河出鄒嶧山。皆西南至山陽湖。與南梁相合。同入於泗。名三河口。縣志亦辨其不然。以爲源自嶧山者。此北沙河也。西南流入泗者。則南沙河。乃灑水也。舊入三河口。初不與南梁會合。不復入三河口矣。大清一統志。

南梁水在滕縣東北十五里。源出趵突荆溝二泉。合而爲一。西會灑水入運河。按南梁河舊不與灑水合。而入徐州沛縣界。自明嘉靖間。運河東徙。又遏灑水。導之北出趙溝。與南梁會。而同入於漕。齊乘明統志所言。與今河流皆不合矣。大清一統志。

石橋河在滕縣南三十里。源出縣南官橋東北平地。西流過故薛城北。又繞其西。西南流至三河口。入運河。按石橋河本與灑薛爲三河。灑旣遏而北。薛又遏而南。今入口惟石橋河耳。大清一統志。

薛河在滕縣南四十里。源出寶峯山東諸泉。匯而爲淵。名西江水。又西逕薛山。名薛河。又南合東江水。東江水自湖陸山西流。至雲龍山入薛河。又西南入微山湖。大清一統志。

東岸三河口。發源馬蹄泉流水入運。鮎魚涎。又名鮎魚泉。發源滕縣玉花泉白家口涵洞。無來源。坡水入運。南河全考。三河口在滕縣西南五十里。以上源薛河沙河趕牛溝三處之水。俱由此會。故謂之三河口。本年三河淤。乃於薛河則築王家口豸裏溝等壩。開支河引水。由呂孟湖出地濱溝。於沙河則築皇甫等壩。開支河引水。會趙溝等泉。出滿家湖坡。入南陽湖。全河備考。薛河距縣南四十里。其西江出寶峯山。南過青蓮步將軍步。左過高山亭。而永豐鳳凰二泉。出薛河南岸山麓者。流入之。西至薛山。入悟真巖。茶泉南過雲龍山。其東江出胡陸山。西至吳山。伏不見。至鐵脚山。柳泉湧出。至觀山前。匯爲濯筆泉。亦至雲龍山入之。會西江兩江爲薛河。其地卽靴頭城處也。南至斬蛟臺。折而西。經昌虛城南陶山下。瀦爲刁潭。納玉花義河三山三泉。南經豐山。東過官橋。經薛城至東邵。爲壩。退入微山湖。舊逕山陽湖。從金溝入泗。自新河開漕東徙。恐沙爲漕害。故築石壩於東邵。退之又恐水爲壩害。開河於奚公山西。導入南明河。開泲河以後。仍由新河故道入運。又潑水卽沙河。距城十五里。出寶峯山南。經崆峒山鳳凰嶺。東過祝其城。會黃約山諸泉。過鹿山鳳凰山。而龜步水發連珠山。過歐家谷來入之。南至華蓋山。而石溝水自巉山瀑布東南至寶峯馬山。經石溝來入之。西至梁山村。南過滄浪淵。而明河水。馬山前繞樓山。過全義來入之。西至沙河店。爲皇甫壩所遏。稍北趨趙溝。由獨山湖入運。閻廷謨北河續記。南石橋河。卽俗稱趕牛溝水。南流與沙薛爲三河。

及沙遏而北。薛遏而南。惟此河改從佃戶屯入漕。而滕縣黃溝泉亦匯焉。南自沛縣之珠梅閘。北至魚臺之南陽閘。長八十里。皆新河也。而魚臺之泉。凡十有五。合流而至硯瓦溝。由南陽入於漕。全河備考。至鮎魚涎。又作弦濟運。山東運河備覽。

按韓莊閘起至珠梅閘上王家水口止。計一百十里。北高南下。遞卑六尺七寸。水勢平緩。近來夏鎮楊莊珠梅邢莊利建等閘。俱不下板。然水小之年。毫無關束。上游南陽棗林。每一啓板。洩瀉過多。致令迤北各閘。行走艱澀。而下游彭口暴漲。水過沙停。夏鎮迤上水頭平坦。不能衝刷新淤。反虞倒漾。乾隆三十九年。汶水微弱。專藉南旺蜀山南流。因議於邢莊夏鎮。下板擎蓄。運弁幫丁。卽有議其未便者。至獨山湖底。卑於運河底數尺。當運河水足浮運之時。河面高出湖面一二尺不等。張清恪公所言獨山湖水助之之說。非所施於今日。又云邢莊一啓板。放船五六百。或七八百。更非情理。所有蓋一塘之船。積至兩幫三幫而止。不過一二百隻而已。安能待十數幫。始一啓板耶。山東運河備覽。魚臺縣泉二十有二。其上泉曰青山泉。卽黃良泉。河頭泉。陳家泉。高家泉。今按泉河廳冊作高家東泉。高家西泉。俱在縣東北七十里。今按泉河廳冊。以上五泉。由新挑河入運。聖母池泉。今按泉河廳冊作聖母泉。西龍泉。俱在縣東北九十里。仿古泉。縣東北一百一十里。今按泉河廳冊。以上三泉。由獨山湖入運。其中泉曰廟前泉。縣東北七十里。勝水泉。縣東北七十里。滕家泉。新滕泉。中益泉。俱在縣東北七十里。今按泉河廳冊作中益泉。以上五泉。由新挑河入運。聖裔泉。六小泉。西六泉。俱在縣東北九十里。平山古泉。縣東北一百一十里。今按泉河廳冊。以上四泉。由獨山湖入運。以

上共十七泉。曰有本泉、小龍泉、東龍泉、何家源泉、廉家泉、皆下泉也。今按：泉河廳冊，以上五泉，由獨山湖入運，數同。

滕縣泉三十有三。其上泉曰玉花泉、鳳池泉、馬勝泉、魏莊泉、武興泉、西魏莊泉、趙溝泉。俱縣東南四十里。今按：泉河廳冊，以上七泉，運入運河。中泉曰荆溝泉、五花泉、大沸泉、小沸泉、伏玉泉、趵突泉。俱縣東十五里。北石橋泉、涼水泉、嶧莊泉。俱在縣北三十里。大烏泉、永清泉、西永清泉。俱在縣西北四十里。今按：泉河廳冊作西清泉。以上十二泉，由獨山湖入運。黃溝泉。縣南七十里。柏山泉、馬蹄泉。今按：泉河廳冊，以上三泉，運入運河。龍灣泉。俱縣南八十里。溫水泉。縣南九十里。仰珠泉、大勝泉、雙勝泉、東雙勝泉。今按：泉河廳冊作東勝泉。葦珠泉、三山泉。俱在縣東南四十里。今按：泉河廳冊，以上八泉，由十字河入運。以上共三十泉。南石橋泉、雙泉、三重泉。則下泉也。山東運河備覽。今按：泉河廳冊同。南石橋泉、雙泉。徑入運河。三里泉。由獨山湖入運。

又東經山東嶧縣西界。有盤龍河來會。又東南經微山湖口北。又東經嶧縣南境。有巨龍河自費縣來會。皇朝通志。

又東入山東嶧縣西界。北受玉花河南派水。今按：此河即修永開河。又東折而南。有盤龍河。自東北來注之。盤龍河出嶧縣北黃家泉。西流數十里。折而南。又西南經臨城驛西。至彭口西入運河。今按：此河即彭口山河。南至沙溝營西。折而東南。經微山湖口北。微山湖南自徐州府北境。北至運河。長百五十里。東西廣五十里。沛縣支渠。其上源單家集水。自東南西流。至魏家集北。折而西北流。爲



陶郎湖經石山驛西湖水廣闊又北湖心有龜山銅山黃山其西受沛縣水又北有微山皆江南界其北爲山東界湖心有呂孟山西北自沙溝東南至韓莊皆湖心也又東南爲韓莊閘又東經嶧縣南境爲得勝張莊萬年丁廟頓莊五閘有巨龍河北自縣城來南注之巨龍河東北出費縣西南境山中西南流六十里折而西而南經嶧縣城西南會諸小水又折東南流五十里至頓莊東大泛口西入運河嶧縣西北有石池泉十里泉滄浪泉皆合此河又東爲侯遷閘臺莊閘嶧縣南境自韓莊東南至此僅七十餘里置閘凡八其密如此水道提綱

北岸修永閘引山泉入運南岸雙減閘宜洩運河異漲冬令挑工於彭口西灣修永閘三處築壩引水歸閘收入微湖過減閘卽劉昌莊南爲沛縣境有民便閘寨子下涵洞上涵洞俱洩坡水入運北岸彭口山河發源費縣分水嶺距河二百餘里內有仰珠大勝雙勝葢珠三山龍灣等泉之水入河濟運本在種家渡南今謂之舊彭口雍正二年改挑於此南岸有三洞橋明萬歷年建今廢按今彭口對岸有引渠一道名十字河每遇山水驟發令其直衝引渠以備囊沙然山河口門斜衝引渠西岸沙岡隨水傾卸尤易淤高乾隆三十九年於口門兩岸加鑲草工水勢取直浮沙入引渠餘波屈曲可達微湖或謂亦宜取直與湖相通則山水挾沙而來直至湖中彭口上下可免歲歲加挑不知微山湖水下灌八閘邳宿必須上源水深乃敷滬注如令河沙洩至必至墊高湖底蓄水愈少濟運愈難歲挑雖有小費在所不免又彭口閘未建之先河水直抵韓莊每以水去沙停爲患乃自建閘以後又倒灌至夏鎮以上故近年彭口至夏鎮挑工較昔倍多按雍正四年總河齊勤恪公

以彭口噴沙爲害。宜在彭口南岸開運河三里餘。如月河形。借舊河以囊沙。運河始無淺阻。部議三里正河。囊沙有限。而數十處噴沙無窮。不一二年卽致盈滿。非惟糜帑。更恐礙運。竊謂部駁是矣。然開此月河。使盛漲之時。舟從月河行走。一面將舊河新淤。照例撈挖。不且彼此無礙乎。至回空又可令其全走月河。將正河大挑。改爲九月興工。十月竣事。如明萬恭之議。不更便乎。山東運河備覽。

又因彭口山河口門斜向北趨。每致倒漾北流。乾隆四十一年。奏彭口徐家橋以下。孟家莊後。改挑新河一道。直出口門入運。並堵築舊山河尾閘。藉作囊沙。以免淤墊。東河事宜冊。

微山湖周圍一百八十里。隸江南者十之七。隸山東者十之三。全河備考。在郟山之南者爲郟山湖。又東南爲呂孟湖。又東爲張莊湖。名雖不同。實無限隔。自東北南陽壩。至西南徐境利國監。彌漫幾二百里。俱隔運河。西岸運道。從韓莊閘至夏鎮閘。計七十里。皆逼臨諸湖。僅隔土壩一道。寬窄不齊。其韓莊之北。建有郟山減水閘。韓莊湖口閘。及護閘石壩一道。以障諸湖之水。並資蓄洩濟運。歲應修治。而微湖之西南。切近黃河。每慮有漫瀉之患。苟不堅禦。濁流一入。不特滕縣爲巨浸。而運道必至梗阻。保運者所宜加意也。按乾隆二十三年。總河張懋敬公師載。山東巡撫阿公爾泰奏。徐城逼近黃河。前入千里金湯。無不築隄防衛。何獨留此數十里無隄之處。蓋緣當日河低岸高。且有毛城鋪大壩。互相節制。苟遇盛漲。則分洩以保徐城。一至歸槽。則收束以刷河底。今河身日高。遇漲卽溢。卽衝刷溝槽。分洩正溜。不特徐邳民田廬舍。在在堪虞。卽東省微湖。被其挾沙倒灌。每多墊溢之患。請將孫家集一帶數十里。凡有溝槽未堵之處。逐一探量。照依花椿做法。一體堆砌亂石壩工。

不惟湖水免致盈溢。而河底日就衝刷。借水攻沙。無虞淤墊。於是一律築壩。永無黃水倒灌。乾隆三十九年。徵湖水弱。不能濟運。於江南潘家屯議建壩十丈。於秋冬水落沙輕之時。引水入湖。一屆桃汛。先期堵築。卽於是年冬間。開挖試行。湖中增水尺餘。於清明堵閉如常。湖河水勢。操縱由人。防險利漕。法制斯備。湖口舊閘。明萬曆三十二年建。國朝雍正七年修。乾隆十六年。拆修金門寬二丈一尺五寸。高一丈一尺七寸。乾隆十七年。議定閘口之水。以深一丈爲度。一丈以內。開壩挑河。一丈以外。民田有礙。毋庸堵閉。仍聽洩放。將應挑淤淺。改爲撈濬。湖口新閘。乾隆二十九年建。金門寬二丈二尺。高二丈四寸。在滾水壩以南。舊閘以北。仍照舊制。以水深一丈爲度。水大則雙閘俱啓。水小則雙閘俱閉。

滾水壩。乾隆二十四年建。長三十丈。兩頭各修裏頭五丈。共長四十丈。準湖口閘。金門水深一丈爲度。建高二丈四寸。寬一丈四尺四寸。中砌石垛十四座。上搭橋梁。以通繚挽。乾隆三十年。總漕楊錫紱。以徽山湖內之水。一丈爲度。不足濟運。請於石壩添設石槽閉板。多收水一尺。以水深一丈一尺爲度。按徽山湖。上承昭陽。南陽以及魚臺。金鄉。滕。沛各縣坡水。由湖口閘宣洩。以濟嶧縣八閘。並江南邳宿運道。每遇水大之年。湖水浩瀚。僅恃湖口二丈口門。不足以資暢流。是以乾隆二十二年。江南總督尹公繼善。請於湖口迤上。築滾水壩三十丈。又堵截下游邳州境內盧口入運之水。使徽山湖自小梁山茶城。經荆山橋河成閘。分洩入運。運河道李公清。時又請挖伊家河。使自江南之梁王城分洩入運。民田始能涸出。然二十四年。因江省太行隄外順隄耿家二河。開通入湖。而小梁山

茶城二處。原挑河頭。露出淤灘。相去八九百丈。至一千餘丈。河頭高仰。湖水不得東下。胡口閘。滾水壩。伊家河三處。仍屬宣洩不及。二十八年。運河道李公清。時復請大挑小梁山茶城內華山。以達荆山橋。山東巡撫崔公應階。准欽差大學士公兆公惠等。大加挑濬。計動帑金六七萬餘兩。而水流石罅。挾沙帶泥。不一二年。仍淤高。脫遇盛漲。仍恐淹浸民田。爲山東州縣之害。乃水小之年。湖無上源。惟恃雨水調勻。上游九州縣坡水。下注收蓄湖中。以濟新運。若天時稍旱。卽不能敷。總漕楊錫紱所言一丈一尺之水。卽江南運河如碼頭駱馬等湖。積年淤涸。無水濟運。專仰微山湖灌注。四百里之遠。途長流弱。難期淨送。自二十四年挑浚小梁山茶城伊家河等處洩水之路。湖水消退。漸恐不敷。濟運於湖口閘迤南。開挖引渠一道。使湖水三路入運。頗爲暢利。然當時滾壩之上。過水尙六七尺。則湖中存水尙在一丈之外。今三十八年天時久晴。湖水僅收一丈。自三十九年二月開壩。用至四月下旬。湖水僅存八尺餘寸。雖開挑引渠。仍慮不足。議於郝山馬蘭二處。引水入運。如湖河相平。不能出水。並用江南屏水之法。以資接濟。迨至五六月間。湖水止存七尺餘寸。復慮來歲水勢不敷。不得已而遂有潘家屯之議矣。按自臺莊至韓莊。計八十五里。地勢建瓴。高下相懸。計四丈二尺餘寸。乾隆二十七八年以前。湖水消至七八尺。濟運無多。閘開啓閉。尙虞水淺。三十年後。湖水皆至一丈三尺。每患水多。通漕暢放。習爲故常。三十九年水勢又小。酌議八閘啓閉。而運丁輒爲口實。不知水淺下板。自昔已然。否則閘座竟爲虛設矣。山東運河備覽。

乾隆五十二年。以湖水微弱。不敷濟運。欽命刑部右侍郎明興。督辦濟漕水利。挑濬牛頭趙王等河。

工完之後。奏明微湖應加收一丈二尺爲度。東河事宜冊。

兗州府永水在嶧縣西。一名承治河。本出縣北東車梢峪。源曰滄浪淵。南流會許池水。今滄浪淵水微細。獨許池爲正源矣。南逕縣城西門外。折東流。至縣南三十里。納金注水。又東納義河水。南合泲河入運河。元和郡縣志。承縣以西北永水得名。寰宇記云。承治水出縣西北方。王莽改承縣爲承治。故水有此名。又訛名承治水。大清一統志。

伊家河在嶧縣西南。微山湖引河也。微湖上承南旺蜀山諸湖之水。其尾閘有二。一由湖口闌入漕河。一舊由張谷口出荆山橋。而南其逕流也。乾隆二十一年。荆山橋淤塞。湖水暴漲。奉旨開伊家河以洩水勢。上起微山湖。下至邳州黃林莊入運。共長六十九里。由是諸湖匯流。無泛溢之虞。而有瀦蓄之利。大清一統志。

乾隆四十六年。豫省儀封曲家樓漫溢。黃水由南陽湖西之穀亭一帶。澄清下注微湖。水勢盈溢。入闌。宣洩不及。於四十七年重浚伊家河。以資分洩。東河事宜冊。

水口十二。德勝閘上。坡水入運。有石橋無來源。西山平水溝。坡水入運。濶牛山泉溝。距發源處四十里。寬三丈。微流入運。疊路口寬三丈。時有坡水。西岸雞心洲無來源。有石橋。濶雞爪溝。朱家溝。十一里。溝十里。溝俱寬四丈。坡水入運。今濶九里溝。八里溝。俱坡水入。無來源。東岸乾溝。坡水入運。按。舊牛山泉流入張莊閘者。卽此牛山泉之分流也。山東運河備覽。

水口三。六里溝寬一丈。坡水微流。四里溝濶。東岸二里溝寬二丈。坡水入運。山東運河備覽。

水口三。西岸張莊閘迤上鉅梁橋。源出鉅河二十餘里。今由伊家河歸黃林莊入運。橋下仍有坡水。微流四里溝。東岸一里溝俱涸。全河備考。侯孟泉距縣西南五十里。東北流至張莊入運。山東運河備覽。

六里石閘。按雍正二年。總河齊勤恪公蘇勒。以該閘河形甚直。兩涯陡峻。每遇水小之年。不能存蓄水勢。奏准建築石壩一座。中留金門。較比上下兩閘減矮六尺。至乾隆二年。總漕張公大有。以閘面太低。議令加高。經運河道王公鴻勳覆稱。加高閘墻。恐山河驟漲。宣洩不及。阻礙漕舟。請於壩面鑲草六尺。總河白鍾山據議奏准。原鑿雙槽下板實土糧船。由月河行走。近年幫丁貪由金門徑過。且上面鑲草。啓閉不便。閘板雖設而罕用矣。山東運河備覽。

欽差大學士公阿文成公桂。履勘較舊閘落低二尺四寸。加石四層。并將金門放寬六寸。節宣有制。益臻完備。東河事宜冊。

水口四。萬年閘上人家西岸水溝。無來源。有石橋。東岸舊牛山泉水溝。寬四丈。坡水微流入運。無來源。西岸張家林水溝。微水入運。有石橋。棗莊溝涸。張莊人家東頭水溝。坡水入運。不能長流。寬二丈。山東運河備覽。

水口六。西港溝無來源。涸。東岸賈家溝無來源。坡水細流入運。寬四丈。西岸花石廠溝涸。又龍王泉。從黃邱山下。由靳家莊。王家莊。伊家河。出黃林莊。濟運。東岸水口。一無來源。西岸水口。謂之對溝。亦無來源。山東運河備覽。

水口四。西岸鉞鉤口。向有潦泉。由橋下入運。金溝口寬四丈。微水不能長流。東岸黃家河寬四丈。縣西諸泉發源之水。冬日大挑。大泛口則於泥溝築壩。遏水西流。始由馬蘭屯折橫河頭。西向而出。黃家河。平時則微水細流。入運。榆樹溝一處。涸。山東運河備覽。

水口六。西岸朱家橋。微水長流。向有潦泉。由橋下入運。東岸大泛口。自縣西滄浪許池石室十里等泉。距河六十里。發源入運。現有水口二。寬七丈。噴河激溜。時有淤澀。又龍家溝。微水長流。西岸李家溝。寬二丈。孟家溝。寬三丈。俱有潦泉。微水長流。張家溝。寬二丈。涸。山東運河備覽。

水口三。東岸金家橋。無來源。有石橋。西岸花山溝。無來源。東岸巫山溝。發源巫山泉。距河六十里。由興福院迤北。微水入運。寬三丈。山東運河備覽。

東西兩岸水口四。俱有石橋。無來源。山東運河備覽。

嶧縣泉十有三。其上泉曰許池泉。縣西北十里。今按。泉河廳冊。此泉由大泛口入運。許由泉。縣西北四十里。今按。泉河廳冊。此泉由十字河入運。牛山泉。縣西南二十五里。今按。泉河廳冊。此泉

逕入運。石室泉。縣西北十里。今按。泉河廳冊。此泉由大泛口入運。其中泉曰滄浪泉。縣西北九里。

今按。泉河廳冊。此泉由大泛口入運。龍王泉。縣南五十里。巫山泉。縣東南四十五里。侯孟泉。縣西南五十里。今按。泉河廳冊。此三泉逕入運。南山泉。縣西北十里。十里泉。縣西北十里。今按。泉河

廳冊。此二泉由大泛口入運。陳郝泉。縣西北四十里。搬井泉。縣西北六十里。溫水泉。縣西北五十里。山東運河備覽。今按。泉河廳冊。此三泉由十字河入運。數同。

又東南入江南邳州西北境。有泲河自費縣來會。皇朝通志。

又東南入江南邳州西北界。折而南流。有引河北自山東來注之。卽西泲河也。西泲河源出費縣東南山兩源。合而南流百三十餘里。入江南邳州界。又南折而西南流五十餘里。入運河。此道自萬歷間始開以通運。由直河口西北至沛縣夏鎮。長二百六十餘里。避黃河之險者三百餘里。水道提綱。

直河在邳州南一百十里。卽古沫水也。自山東鄒城縣南流。入至宿遷縣司吾山。東南流入海州沭陽縣界。漢書地理志。東莞術水。南至下邳。入泗。水經注。沫水舊瀆。逕東海厚邱縣。西南出會新渠。逕宿豫縣。注泗水。舊志。直河在州東四十里。山東蒙沂諸山之水。匯爲沭。纓河分派。而南至州東南六十里。入於泗。謂之直河口。明萬歷十五年。濁流倒灌。河口遂塞。諸山水俱由駱馬湖出大河。二十九年。分黃開泲之議定。運艘皆由直河達於泲河。而直河之南遂淤。大清一統志。

黃道人橋支河。邳州志載。卽礮石河。在州治西北。源自山東沂州石城岡。由陶溝橋入趙村湖。歸道人橋入運。江南運河廳冊。

馬蹄崖邵家口劉家口水口三道。在河清閘之下。泲口之上。嘉慶二年。黃水入運。衝缺之口。至今每年伏秋。洩運河漲水入湖。冬間堵閉。江南運河廳冊。

汶河邳州志作引河。亦名營河。源自東省沂州抱犢岡諸山之水。下至泲口入運。江南運河廳冊。徐州府舊漕河。自靈壁縣之雙溝。又西北五里爲徐州之栲栳灣。又西北二十五里至呂梁洪。出州



城東北大浮橋。又西北至茶城。舊爲北接開河口。又北至留城。入沛縣界。又西北至金溝。開昭陽湖。及沙薛諸水。皆入於此。又十五里至沛縣。又西北三十里曰廟道口。開。又十八里曰胡陵城。開。入魚臺縣界。此明漕河舊道也。又有新河。西去舊河四十里。明嘉靖四十四年。黃河橫決。運道大阻。工部尙書朱衡。開新河。自留城北。至南陽關。凡百四十一里。有奇。又濬舊河。自留城。至境山之南。凡五十里有奇。凡新河之爲閘九。減水閘二十。壩十有三。薛河口石壩一。南湖口隄三十餘里。又開支河八。旱則資以濟漕。澇則洩之昭陽。而運道盡通。所謂夏鎮河也。萬歷九年。中河郎中陳瑛。以茶城逼近黃河。因移河口於茶城東八里。創建古洪內華二閘。十六年。科臣常居敬。復於古洪閘東南二里餘。增築鎮口閘。十七年。河臣潘季馴。又於搭山牛角灣。增築隄壩以衛之。黃河始無從逸入。於三十年。泲河成。漕道由直河西北至夏鎮。始合於正河。不復由徐沛東。大清一統志。

泲河以東西兩泲得名。泲源發費縣箕山。經沂山下莊而南。西泲出嶧縣抱犢山。東南流至三合村。與東泲合。又南合武河。至邳州入泗。謂之泲口。嶧之南有中心溝。受白茅山泉水。下流爲彭河。又東會承水入泲。山東運河備覽。

兗州府西泲水。在嶧縣北六十里。亦名泲河。卽粗水也。源出縣東北抱犢山。東南流至邳州界。會沂水入黃河。水經注。偃陽縣西北有粗水溝。去偃陽八十里。東南流逕偃陽。故城東北。南亂於沂。而注於洙。謂之粗口城。齊乘。東泲河出沂州西北之箕山。西泲河出嶧州東北抱犢山。東南流至三合村。與東泲合。又有魚溝水。出浮邱山。亦合於此。故名三合。南貫四湖。又合武河入泗。謂之泲口。按唐

書地理志。永縣有陂十三。蓄水溉田。皆貞觀以來築。齊乘言。今沂嶧二州。仰泲承二水溉田。青徐水利。莫與爲匹。皆十三坡之遺跡也。明萬歷三十二年。總河李化龍開泲口。自夏鎮李家港至黃林莊。名曰泲河。以此水得名。二年改泲河爲運道。大清一統志。

北岸沙家口。在河定閘之下。源自東省蒙沂諸山之水。入州境武河艾山燕子等河。經盧口壩。出新治南。西達沙家口入運。年久淤淺。嘉慶八年。間段挑浚。長一千二百三十丈。江南運河廳冊。

徐塘口河。上承盧口沂河。分派來源。由官河橋達徐塘口入運。年久淤淺。嘉慶八年。總河吳璣。總漕吉綸。奏請間段挑濬。長一千一百二十五丈。江南運河廳冊。

舊運河自徐塘口起。至東隄頭。迤上河尾止。河長三千六百丈。因山水噴注。浮沙停墊。康熙六十一年。總河齊蘇勒。題請另挑新河。長一千八百五十丈。留舊河爲囊沙之地。每逢春旱。堵截舊河。抵水由新河行走。江南運河廳冊。

二郎廟水口。洩隅頭湖水。濟運。坐落舊河內。康熙六十一年。改挑新河。於此築壩。每歲秋閉。春開。嘉慶十一年。淤閉。江南運河廳冊。

馬莊萬莊減水礮心石閘二座。康熙十九年建。備洩運河異漲之水。入隅頭湖。以達駱馬湖。此二閘。歷被山水衝刷。閘石礮心均經塌卸。江南運河廳冊。

貓兒窩馬莊萬莊三處。康熙二十七年。建竹絡壩三座。宣洩隅頭湖水。濟運。歷久衝廢無存。江南運河廳冊。

窰灣竹絡減水石壩一座。洩沂河之水。歸河濟運。江南運河廳冊。

乾車頭壩工一道。導駱馬湖之水濟運。江南運河廳冊。

南岸荆山口河。在銅山縣二十里。廣數百丈。有長橋跨其上。上流與微山昭陽相通。下合諸山溪房

亭河。流至邳州境。入漕河。本朝康熙中屢濬。乾隆二十三年濬。二十九年又濬。大清一統志。

靳家河上承荆山橋河。由汴塘迤下分流東北行。經王母山前入運。乾隆二十二年水利案內。侍郎

夢麟題請挑浚。歷久淤墊。二十九年復浚。四十二年。在河頭汴塘築壩攔截。俾水由潘家河入運。江南運河廳冊。

南運河廳冊。

潘家河上承荆山橋河。來源由汴塘集。下至張家土樓止。乾隆二十九年。大學士公兆惠。因彭家河

淤廢。題請接挑河長九千三十丈。引水由宿羊山北達河成閘下入運。如遇銅沛北岸蘇家山黃水

下注。亦由此河入運。江南運河廳冊。

房亭河在銅山縣東。洩河北諸山泉。積澇分二支。一通吳家窰荆山河口。一由王家林東西灘。過賀

家口入邳州境。歸貓兒窩濟漕。本朝乾隆二十三年濬。大清一統志。房亭河上接銅山縣境河道。

歸家河入運。年久淤淺。乾隆二十二年水利案內。間段挑濬。江南運河廳冊。

彭家河即黃墩河。在邳州運河西南。自微山湖下游。從荆山口至全河汴塘。入州境。蓮教社分城子

河。歸沙溝湖東流。至新河口入運。本朝乾隆二十二年濬。大清一統志。彭家河上承荆山橋河房

亭河來源。匯歸達運。久淤。江南運河廳冊。

蔡家水口爲舊城湖河水尾閭分支。江南運河廳冊。  
黃墩湖上通舊城湖。受銅山北岸邳州諸山匯注積潦之水。由安家民便二閘入運。江南運河廳冊。

# 續行水金鑑卷第七十

運河水沂河 分淮水 原委六

又南有沂河支津二來會。又東南沂河東派。匯駱馬湖來會。皇朝通志。

又南至徐塘口。東有沂河支津二道。俱東至州城之南。並西流來會。又南至貓兒窩。北有二水。自西南合而西流注之。水出河北岸山。東北流六十里。有小水出舊邳州西北者。自南來會。東入運。又東南經馬莊集西。又東南經窰灣口南。自馬莊集以下。南去黃河僅三十餘里。至窰灣。又不過二十里矣。逾南逾近。又東南經九龍廟南。又東爲十字河。卽沂河東派。匯駱馬湖南出之口也。水道提綱。沂河卽古沂水。源出沂水縣西北之東鎮。沂山西麓曰大弁山。與雕崖山。亦曰艾山。東南流有永福山。水自東北來會。又東南流有寶山水。自東北來注之。折而南。經縣城西。又折而西南流。經蘇村集。北又折而南。又西南流至葛溝集。西南有東汶河。自西北來會。水勢益盛。東汶河卽沂水西源也。亦名桑泉河。出蒙陰縣西南巨圍山。西曰五女山。東流經縣城南。又東折而東南流。經蒙山東麓。又東南百五十里。與沂水會。旣而南流。經太平集西折。稍西南至沂州府。東北有祊河。西自費縣東流來注之。稍南又有涑河支津。亦西自費縣東流來注之。經府城東而南。又折而東。又折而南。經李家莊驛西。又西南經郟城縣西之馬頭集西。又西南經西村集張家集西。入江南邳州東北界。有涑水支津。自北來會。又西南行數十里。派分爲三。其二皆西流。稍南經邳州城南。又西入運。其一南流數

十里。匯爲駱馬湖。於湖之南入運河。水道提綱。

沂州府沂水。源出蒙陰縣北。東南流。徑沂水縣西。又南流。徑蘭山縣東。又南流。徑郯城縣西。又南流。入江南徐州府邳州界。明知州何格議治沂有二難。一隘於石溝。一隘於廟山。自石溝以上。有坊口。通長溝。溫泉入沫之故道。廟山以下。有馬兒灣。通五丈溝。蘆塘諸湖。入邳之故道。實又沂之故跡也。長溝不可不開。以殺石溝之隘。馬兒灣不可不開。以疏廟山之隘。石溝在蘭山縣東北。廟山在縣南八十里。乾隆十三年。以河臣高斌言。沂河兼受諸水。夏秋盛漲。易致泛溢。命動帑修築兩岸長隄。又於江風口。建迎水滾水各壩。歷久漸圯。乾隆二十二年。特遣侍郎裘曰修。與河臣張師載。相度重修。江風口各壩。並增築隄一百八十丈。其壩外支河及淤泥河。又上流武河及其西之燕子芙蓉二河。並加濬治寬深。自是沂屬永無水患。徐州府沂河。在邳州東。自山東沂州南流入境。至州東分爲二支。西南流入運河。其正流南入駱馬湖。乾隆八年後。又修沂河西岸梅家道。缺口隄。十一年十二年。加築沂河兩岸長隄。三十二年。又修馮家等莊隄工。大清一統志。

沂州府小沂水。源出費縣西北聰山。東南至蘭山縣。入於沂。古名治水。亦名武水。又名沒河。漢書地理志。南武陽冠石山。治水所出。注應劭曰。武陽縣武水所出。水經注。洛水出南武陽冠石山。卽應邵所謂武水也。東流逕蒙山下。又東南。徑顯與城北。又東南。徑費縣故城。南俗亦謂之小沂水。又東南。徑訪城南。又東南。注於沂。齊乘。小沂水出蒙山西。東過費縣神山。納訪水。南至沂州西。又分爲涑水。涑水自州城西。小沂自城北。入沂。宋慶歷中。沂州修城碑云。大小二沂。環流外轉。而小沂尤湍於西。

十字河口門北通湖南通黃運河橫貫於其間故名十字河康熙二十八年在南岸臨黃縷隄建竹絡石壩一座爲湖黃出入之節宣後經衝塌修整雍正五年總河齊蘇勒因黃溜直逼竹絡壩口門灌入十字河淤墊駱馬湖將通湖隄口堵塞另於王家溝建造五孔石閘備洩湖水入運於臨黃口門築西撐隄長一百六十丈乾隆五年總河高斌重修竹絡壩留口門寬六丈東壩長三十一丈西壩長十二丈竹絡壩外臨黃向東挑支河長四百六十丈六年將支河臨黃臨運各築一壩內臨黃壩橫長三十丈臨運壩橫長二十八丈以後相機啓閉以利漕運迨二十二年以後未啓四十七年豫省青龍岡漫水入運復啓該壩宣洩後閉至今不復啓放每年止開王柳二閘引湖水以濟漕運

江南運河廳冊

又經宿遷縣東北其東分一派爲鹽河經沭陽縣入碩項湖至海州入於海皇朝通志

運河又東經宿遷縣城北折而南經城東順河集即東岸也又東南經仰化集西北其東分一派爲鹽河東北至沭陽縣東南境入碩項湖東至海州東南境入海水道提綱

鹽河有北有南北鹽河受運河水於宿遷東南之仰化集西東流經集北又東分爲二支一支東北流折而北而東一支東南流經王家集南折而北流經里仁集東又北復合折而東流入碩項湖經安東縣北境南鹽河受連河水於清河縣東曰大壩東北流經王家營北又東北經安東縣城西北又東北至新安鎮西與碩項湖水會東北分二口入海即出河港灌河口也水道提綱今按北鹽河即劉老澗分減之水下注六塘河蓋未開駱馬湖尾閘之先此河通名鹽河因以南北之名別

北平日波紋清淺可愛。及山水至。如百萬陣馬。摩壘而來。謂此水也。大清一統志。

徐州府武河在邳州南。自山東嶧縣流入。卽古治水也。由米湯湖會沂水。經艾山。繞城西南入運河。乾隆二十二年浚。昉河東入於小沂水。其支分曰涑水。皆沂州西入於沂水。涑水支分曰陳河。亦名元孝河。亦名池頭河。在郟城縣西四十里。南流至江南邳州。徐州府艾山河。卽柴溝河。在邳州北。自蘭山縣芙蓉河分流。而南至州境高塚社。西繞艾山。從城西入武河。乾隆二十二年浚。燕子河在州東北。源出蘭山縣。屈從郟城縣西。入州境高塚社。由米湯湖南流。至湯家樓。入武河。乾隆二十二年浚。沂州府白馬河。在郟城縣西五里。源出九龍山下。至縣西北。又南入於沂。沂州府皂河。在郟城縣東南。源出縣舊城。東北縣志。一名墨河。源出墨泉。舊河通舟楫。南至宿遷縣。今湮塞。徐州府皂河。在宿遷縣西北四十里。源出港頭社。南流入河。以土色黑。故名。康熙十九年。駱馬湖淤。嘗開此以通漕。乾隆二十九年浚。大清一統志。

駱馬湖在運河隄北。北受蒙沂之水。西受昭陽微山諸湖之水。匯爲巨浸。周二萬五千八百三十丈。南北長七十里。東西寬三四十里。南有王柳二閘。洩湖水以濟運。東有雍正八年創挑尾閘。引河五道。內順隄河。壩長二十六丈。南小壩長十六丈。正引河。壩長二十七丈。北小壩長三十丈。甯家河。壩長五十三丈。均有壩尾。土隄相連。南接縷隄。北抵馬陵山。乃雍正五年總河齊蘇勒所築。攔湖三合土壩。連兩頭土壩。共長六百丈。以上五壩。同王柳二閘。秋冬堵閉。收蓄湖水。重漕入境。開放王柳二閘。引河濟運。過竣之後。開放尾閘。預騰湖面水。由六塘河下注入海。江南運河廳冊。



之。今南鹽河徑名鹽河。而北鹽河改稱六塘河。

淮安府六塘河。上承駱馬湖。南通劉老澗。由桃源縣經清河安東。分爲南北兩股。並趨申場河。注北潮河入海。正流至板浦。趨漣河入海。乾隆八年。加築子堰。十一年。十三年。於南北兩岸。並築甌隄。挑浚河身。二十七年。皇上南巡。命疏河身下游。以通淤塞。海州六塘河。上自桃源縣經清河安東。泅陽。分爲南北兩股。沿泅至海州境。一洩泅河之水入鹽河。歸武障河入海。一洩陵溝十字橋諸河之水入鹽河。歸項家泅入海。乾隆八年。疏通淤塞。並修隄堰。二十二年。復加疏築。二十七年。南六塘河。修築北堰。北六塘河。修築南堰。三十年。復修北岸丁家溝等處隄工。三十八年。又修湯家道口等工。六塘河原以宣洩駱馬湖水。自宿遷永濟橋東行。逕桃源清河安東境內。至沭陽錢家集分支。南六塘河由高家溝東入場河。出武障河。歸海。北六塘河會湯家溝。丁家溝。亦東入場河。出龍溝河。歸海。當兩六塘河之中。有碩項湖。康熙中。靳文襄公築有屯隄。而六塘河未分支。以上皆有子堰。其後惟南股築堰。北股至乾隆初。州牧衛哲治。請亦築堰。專設六塘同知董其事。自二十二年後。水有統。東民樂安堵。三十一年。高文端公以六塘河綿亘六州縣地。雖設同知專管。而隄河修防。臨汛保護。須佐雜分司。移海州惠澤司巡檢。駐張家店。沭陽縣縣丞。駐錢家集。伏秋大汛。會同地方官。購料集夫。加謹搶護。迨四十六七年。黃水衝潰。隄岸傾圮。無可措手。於是六塘同知廢。仍歸中河通判兼理矣。

官河長一百三十里。闊八丈。鹽課所經官舫估泊。帆檣相望。故曰官河。卽今場河。上通清河之鹽河。

開下通板浦爲淮北三場鹽課通道。西受六塘河諸水。東有武障項沖義澤六里東門牛墩六河。以洩其泛漲。皆有石壩草壩。惟牛墩滾壩無關蓄洩。其五河壩脊皆低民田一尺。高河底五尺。水溢於石壩。則開草壩。使水平壩而出。舊有誌椿立龍溝河岸。卽項沖壩也。厥後河底淤高。石壩頽泐。秋冬運鹽築草堰以蓄水。非復誌椿舊式。西岸庫下爲水所浸。土民輒往奪壩。嘉慶九年轉運使出數萬金以濬之。無如六塘無隄。泛而易涸。引黃濟運。水退沙停。計今河身幾與壩脊相埒。苟非束六塘清水。藉其力以敵黃刷盪。雖歲歲挑河修壩無益也。海州志。

包家河在清河縣西。上自桃邑遙隄竹絡壩起。及清邑永豐金城等鎮。民田積水。由包家河開。趨注達海。乾隆二十三年濬。民便河在清河縣西。上承桃邑。民便河水趨安邑南股。六塘河達海。又西北小民便河。亦宜洩。清桃二邑民田積水。注響水河。歸包家河。下注南六塘河達海。俱於乾隆九年濬。二十三年又濬。屠家河在清河縣西。宜洩桃邑隴溝一帶民田積水。至響水河。入包家河。下注南六塘河達海。乾隆二十三年濬。周家河在清河縣西北。接洩桃邑民便河之水。至響水河。入包家河。匯注南六塘河達海。乾隆三十三年濬。大清一統志。

鮑營引河在清河縣南鮑家營。康熙四十二年。聖祖南巡。命於王家營。迤下鮑家營。疏引河。洩黃河漲水。由張家集范家河三岔口。歷石項湖入五丈河。今按石項湖卽碩項湖。又名碩濩湖。五丈河卽武障河。下潮河入海。兩岸築隄。於河口建壩。以時宣洩。乾隆八年二十七年屢濬。大清一統志。

六塘河之名。始於何時。永濟橋之建。又係何年。無可考證。按徐州府志。宿遷縣茅家河。在東南五十

里爲夏秋雨水匯歸處。上接西寧橋。卽駱馬湖尾闈之橋。下經仰化集。桃源。清河。安東。諸縣。分二支。一自安東入潮河達海。一自安東入海州達海。正與六塘河現在經由道路相合。又按前書載。康熙二十七年。總河王新命。覆奏攔馬河三壩。毋庸堵塞。張玉書等議於中河往東。蕭家渡等處。有黃河漫溢入海。舊河形之處。建減水壩三座等語。意者六塘河本係駱馬湖。東洩水民河。康熙已前。駱馬湖所受之水。足以濟運。是以聽其東洩。無須收蓄。故於西岸建設閘壩。用則啓。不用則閉。迨後湖漸淤淺。春不濟運。夏復泛濫。蓄洩之機。由此而起。徐州府志。宿遷縣茅家河。在縣東南五十里。爲夏秋雨水匯歸處。上接西寧橋。下逕仰化集。桃源。清河。安東。諸縣。分二支。一自安東入潮河達海。一自安東入海州。達板浦。大伊山入海。又云。劉老澗在縣東南四十里。洩中河水。下至仰化集。與茅家河水合。又云。宿遷縣連支河。在縣北。康熙中。總河靳輔。旣開中河。又於河之兩岸。別開六塘河。以洩黃河。駱馬湖之水。建橋其上。總名連支河。宿遷縣志。連支河卽十字河。在縣北六里。康熙中。總河靳輔。旣開中河。又別開六塘。設尾閘五壩。以洩駱馬湖之水。按府志言。於河之兩岸。別開六塘。以洩黃河。語有舛誤。縣志言連支河卽十字河。亦未確云。靳輔別開六塘河。亦非。靳輔於康熙三十一年。復任總河。未幾病篤。陳奏河工善後事宜。有言於運河之北。另開一河。建閘備減運漲。蓋有是議而未之行也。桃源縣志。六塘河在治北三十里。現今疏濬。內有香子莊一段。卑窪。歷年水浸。河北王家集一帶。田禾受淹。雍正十年。知縣陸文煥。詳奉河院勘准。會同桃源廳。胡紹芬。中河廳。王機。築堰。淮安府志。桃源縣六塘河。分洩駱馬湖。劉老澗泛漲之水。至清河界止。長一萬六千一百三十

五丈。又至朱家莊。分爲南北二股。經安東。南股由武障河入海。北股由龍溝口入海。河在縣北五十里。乾隆八年。築南岸子堰。長一萬二百九十三丈。北岸子堰。長一萬二千三十二丈。頂寬八尺。底寬三丈。高六尺。十一年。修築堰工。北岸自永濟橋起。至北股河止。工長三萬五千餘丈。南岸亦自橋下起。至南股河止。長二萬四千一百四十餘丈。頂寬一丈二尺。至一丈五尺。底寬四五丈。高八尺。至一丈二尺。建開壩涵洞數十處。以資宣洩。又清河縣六塘河。自宿遷經桃源。至清河。分南北二股。北股由沐邑之錢家集、沈家集、謝家莊、楊家莊。繞安東碩項湖北之湯家莊、丁家莊。由海州龍溝出。義澤河入潮河歸海。共長一萬八千七百四十二丈。南股河由清邑之劉家莊、韓家莊。歷安邑之古寨、華家口、蘇家蕩。至沐邑之孟家渡、武障河、潮河。入海。共長一萬六千四百五十八丈。雍正九年。挑濬兩河。淺狹。北股河間挑六千七百九十四丈。南股河間挑六千八百七十七丈。乾隆八年。奏請加築兩岸子堰。南股河北堰。長七千五百五十八丈。南堰。長七千四百八十七丈。北股河北堰。長三千九百七十二丈。南堰。長三千四百八十八丈。十一年。濬兩股河。培南堰。工長一萬九千二百餘丈。北股河北堰。長一萬八千二百餘丈。皆頂寬一丈二尺。至一丈五尺。底寬五六丈。高八丈。至一丈二尺。建開壩涵洞。以資宣洩。按南股河北堰。北股河南堰。久已無存。乾隆十一年。僅修南股南隄。北股北隄。已置南股北隄。北股南隄。於不顧矣。運河廳冊。宿遷縣境內六塘河隄。起永濟橋下。至桃源界止。北長一萬四百九十一丈五尺。南長九千一百九十三丈五尺。派宿遷中河縣丞管。每年由司庫發歲修防工銀三百兩。並按年僉報堰長。至今遵辦。桃源縣古城巡檢冊。六塘河。向無隄堰。俱係民間自築。

圩堰以禦汎水。乾隆八年，大興水利，准士民呈請，動帑將六塘河兩岸添築土堰二道。桃源自劉老澗交界起，至清邑甌井工交界止。南岸堰長一萬三百九十三丈，北岸堰長一萬二千三十二丈，寬三丈，高六七尺。十七年，北岸開築展隄，自因河面窄狹，故展寬北岸，另爲築隄一道，長八千七百四十二丈，寬六丈，高六七尺。每年遇有水溝浪窩殘缺之處，由縣撥民修築。十三年，奉行六塘河隄係動帑建築，無專員管理。每年在河工効力人員內遴選二員，派令巡防，並於兩岸居民內僉報堰長四十四名，每一名管堰二里半。內南岸二十一，北岸二十三。二十三年，奏定六塘河每年酌撥司庫銀數百兩，遇有險要工程，隨時購料搶護，事竣報銷。桃源汛歲請三百兩，二十七年，經欽差查勘，動帑將兩岸隄工加幫加高，於北岸張家莊、費家莊、徐家莊、盧家莊加築越隄四道，共長一千三百七十七丈。又添設六塘河同知，爲六塘河經由六州縣之總將。桃源境內之堰河，派令古城司巡檢專管。五十二年，裁汰六塘廳，後未奉續發歲修銀兩，亦未奉飭仍舊兼管。其每年僉派堰長，於嘉慶十一年，詳由桃源縣飭派。中河廳册清河縣境內六塘河，自桃清交界止。王家莊起，至小房子分岔止，河長四千九百七十二丈五尺。兩岸子堰，北長二千二百八十六丈，南長四千九百七十二丈五尺。內有王家莊、蔣家莊、于家莊、涵洞各一座。又包家河乾隆十二年建順隄石閘一座。包家河上自七孔橋起，下至南六塘河止，長五千八百丈。在桃邑境內，長一千一百十丈。在清邑境內，長四千六百九十丈。皆洩積水入六塘河。現均淤塞坍塌。南六塘河自分岔起，至清安界止，河長三千六百一十一丈五尺。堰同河身，北六塘河自分岔起，至清沫界錢家集止，河長四百七十丈。堰同河身，南北

兩河中間圈堰長四千八十一丈五尺。乾隆十二年民築。自清安交界起。至安海交界止。南六塘隄河各長九千四百九十四丈。內上段安沭兩境犬牙相錯。隄河各長三千三百四十丈。間段犬牙相錯。內安邑接清河界。至伊家莊止一段長一百丈。接下至鄭家莊止長一千九百八十丈。在沭邑境內。接下至朱家莊止長一千二百六十丈。在安邑境內。下段在安邑境內隄河各長六千一百五十四丈。內岔廟之上有張家河水自西南來會。接前入海州境。至運鹽場河止。隄河各長三千四百七十丈。南岸有朱家閘一座。年久損壞。又北六塘河自清沭交界起。至安邑界張家莊止。沭邑境內隄河各長三千九百八十丈。接前至沭邑界沈家集止。安邑境內隄河各長三千一百二十丈。接前至海州界丁家溝止。又屬沭邑境內隄河各長四千九百三十丈。接前至運鹽場河海州境內隄河各長三千六百二十一丈。兩岸河堰皆設堰長並未裁汰。清河縣境內隄河每年由司庫發歲修銀五百兩。給清汛主簿領辦。六塘河兩岸隄堰自宿遷縣永濟橋下起。至清河縣小房子分岔南北兩股止。爲總六塘河。南堰長二萬四千五百五十九丈。接下至海州場河止。爲南六塘河。堰長二萬六千五百七十五丈五尺五寸。北堰長二萬四千八百九丈五尺。接下至海州場河止。爲北六塘河。堰長一萬六千一百二十一丈。統計南堰長四萬一千一百三十四丈五尺。北堰長四萬九百三十丈五尺。六塘河考。

沭陽縣六塘河。雍正八年開。乾隆七年。因淮徐海三屬瀕臨黃運。兩河士民呈請浚河築隄。奏請次第興挑。八年。邑令袁枚領帑銀四千八百兩有奇。承挑前山河下游淤淺官溝口。嗣因東流下保居

民呈稱不便。即將此銀抵辦六塘河子堰工程。然十二年四月。總河檄稱。沭陽縣境內。八九兩年。承辦急緩水利工程。並上年續興補水利工程。皆有未領書工銀兩。照例給發。蓋八九十一年。均有濬築。特卷牘無存耳。又十一年。沭陽典史沈應蛟。承築官莊子堰缺口。是年安東縣民王瑀等。請開港河。以殺六塘河之水。而沭陽士民周謐等。呈稱港河一開。利於宿桃清安。大不利於沭。經邑令魏廷會申請。以業准部覆。何能停止。惟議以挑河之土。卽築河岸。可資抵禦。如開河而不築隄。則六塘河。沭河子堰。均爲虛設矣。民華呂懷等。復以節帑止疏爲請。十二年春。制府批飭妥議。然港河濬築冊卷。均無明文。而六塘。沭河子堰之工興焉。是年。沭邑委員承辦兩河堰工。共五十六分。宿沭二邑。總沭河子堰殘缺工段。別爲一分。前沭河龍王廟南北兩岸共二分。前沭河南岸子堰共十四分。前沭河北岸共十二分。後沭河南岸堰工共三分。後沭河北岸堰工共四分。六塘河南岸堰工。自第二十七分起。至三十七分止。共十一分。六塘河北岸堰工。自第二十六分起。至二十九分。又自三十四分。至三十九分。共十分。均派委佐貳。効力人員。於正二三月開工。四五六等月完竣。是年冬。制府檄淮徐海道。會同淮揚道。赴工履勘。將六沭兩河子堰受衝險要。及次衝與窪處。分別培厚加高。確估造冊。乘時興工。十三年春。續辦兩河加幫工程。又頒發善後事宜六條。此案冊卷煩多。略舉梗概。以備考核云。海州志。

大湖卽碩項湖。一名碩蘆湖。在州治南一百四十五里。其界安東。沭陽共得三分之一。海州得三分之一。南岡鎮居湖西。新安鎮居湖東南。湖坊鎮居湖北。惟西南一角。安東。沭陽共之。康熙十六七年。

黃河決湖地稍淤。二十四年。總河靳輔將湖地丈入興屯案內。增湖糧二百九十二頃。後又加一百五頃。派入各里。連歲地卑苦澇。民納空糧。貽累無窮。湖廣一萬五千餘頃。康熙中。靳文襄公於興屯案內。加地糧六百三十頃。又籌餉案內。加地糧二百四十頃。又踏勘案內。陸糧一百三十二頃。凡一千餘二頃。然湖底積水。淹沒靡常。四十七年。聖駕南巡。命總河張鵬翮察看得實。改爲下則。湖田每畝科銀二釐八毫。民累得寬矣。今按湖糧卽改下則。又改一麥。若遇麥熟秋晴。豈惟無累。靳文襄公興屯時。築有屯隄。故耕作無虞。兩稅可供。今湖隄與六塘隄皆廢。雖一麥亦不可恃也。海州志。洙河卽古洙水。亦曰術水。源出沂水縣西北之沂山。在大峴山之東。曰大弁山。百尺巖。沂山卽古東大山也。其北爲灑河源。其東南爲濰水二源。其西南爲沂水源。東南流繞寶山北。又東折而南。凡二百數十里。經莒州城東。又南折而西南流。有小水自東來注之。水出古墩山西。西流經朱陳村北。又西稍南入洙。又折而南。經大興鎮。西入江南贛榆縣西北界。又西南經鄒城縣東北境。馬陵山東。又西南經縣東南。南至紅花埠東南。入江南界。經邳州東境。沭陽縣西北境。至司吾驛。南折而東流。至縣西。分爲二派。東經城北。又分爲二支。一支東北注青伊湖。一支東注碩項湖。其南派東經城南。又東南入碩項湖。青伊湖自沭陽縣東北受洙水支津。匯爲湖。周圍四五十里。南有二渠。南注碩項湖。又西北受洙水二支津。西受鹽河北派水。東南六十里。襟安東縣北境。廣大倍青伊湖。其北流一支。渠東行。又受鹽河支渠。北流至大伊鎮東。折東經南山麓。又東受鹽河支渠。北匯爲出河港。入於海。碩項湖東南。會南來之鹽河於新安鎮西。又北分爲二派。北派見前。東北派流六十餘里。又分二支。



一支北流見前。一支東流入海。俗曰淮河口。水道提綱。今按淮河口當作灌河口。

沂州府沭水。源出沂水縣北。東南流徑莒州東。又西南逕蘭山縣東。又南徑郯城東。又東南流入江南。沭陽縣界。海州沭水自山東莒州南流。入經贛榆縣西北境。又南自郯城縣界流入。經沭陽西南。歧爲前後二支。一繞城北。一趨城南。俱東入碩蕩湖。城北又分一支。東北入桑墟湖。亦南與碩蕩湖會。自湖東北出。經州境東南入海。舊志水自郯城合馬脊固諸澗水。折而東入沭陽縣界。至縣西北分爲新挑河。又東至縣西五里張家溝。分爲後河。又東逕縣南曰前河。又東至上市鎮。分爲上市河。折而東南入大湖。乾隆八年修築南岸堰工。二十二年。前沭河加築南北兩岸堰工。後沭河加築東西兩岸堰工。大清一統志。

沭水自州西北來。行數百里。繞出西南。入沭陽境。爲總沭河。分爲分水沙河。北合青伊湖。其經流至沭陽城西。分爲二出城南者爲前沭河。出城北者爲後沭河。前沭東北流。宿遷之淩溝口。沙疆河注之。逕韓山東。後沭逕其西。合於州境之湖東口。入漣河歸海。與酈注所稱兩瀆及至胸入游水。千餘年猶如故也。惟漣河旋疏旋淤。夏秋雨漲。兩沭與青伊氾濫。大爲州境西南患。所當急謀宣洩者矣。後沭河自張家溝分流而北。至王家莊鎮。二里許爲陳村河。又北爲札下河。又東爲漢坊河。又東北入於海。爲邑之主河。前沭河卽馬坊河。自張家溝分流東下。由城南折入東南。會老鸛汀大湖。冬春則涸。於張家溝築堰。使支流不入後河。而舟楫可通。官民便之。右二河爲沭水經流。新挑河自太平橋分流廟頭鎮。逕儀鳳蕩。通漢坊湖。下桑墟湖入海。蔡家莊河自漢坊河分流。經桑墟

湖通海州。右二河分沫水之上流。上寺鎮河自沫湖分流而東。通下埠橋入大湖。冬春則涸。十字河。蒲溝河二河俱自南河分流。東入大湖。今塞。右三河分沫水之下流。海州志。

砂礪河由宿遷經桃源縣入沭陽縣張開河口。歸前沭河。達漣河入海。係分洩六塘河之幹河。乾隆二十二年浚。大清一統志。

青伊湖趙志州西南九十里。其源自馬嶺山西而來。沭河由桑墟湖流注此湖。夏日山水暴漲。爲西南諸鄉之害。近湖淤塞。水無所洩。爲害更甚。所望良有司疏通之。按舊志有桑墟湖。蓋由桑墟灌浸而成。勢更大於桑墟。且桑墟在沭陽境。故別繫之沭陽也。青伊之害。乾隆間司牧嘗請灑澆之。開漣河。疏薈薇河。皆爲洩青伊計。二河旋淤。青伊亦汎漣河。糜費累萬。竟成平陸。薈薇尙可修濬。薈薇治則西南水患。漸弭矣。海州志。

漣水卽沭水之下流也。舊志自沭陽縣北桑墟湖東北流。經州南二十里之石湫鎮。又經州東南三十里之黑土灣渡入海。按漣水卽游水也。水經注。淮水自淮浦縣枝分。北爲游水。歷朐縣與沭合。又經朐山西。又北逕利城東。又北逕羽山西。又北逕祝其城西。又左逕卽邱城西。又東北經贛榆縣北。又東北逕鄆城南入海。今漣止自海南入海。則古今異流矣。大清一統志。

水經注。游水爲淮支津。所經贛榆海州。類今所指漣河。然人不知有游水。而漣河亦爲潮所淤。海州志。

運河經桃源縣北。又經清河縣北。其東又分一派。經安東縣北。會碩項入於海。皇朝通志。

運河又南折而東。經集之西南及古城驛之北。又東南經桃源縣北境之衆興集南。又東南至清河縣城北。漁溝集南。又東分一派。東北經安東縣北。會碩項湖而東北入海者爲鹽河水道。提綱。

中河乾隆四年修築。中河隄岸八年大浚淤塞。並建涵洞十座。十一年修築竹絡壩口門。引黃入運。十六年疏浚閘下引河。二十三年修築清河縣鹽河石閘。以資蓄洩。舊志自清河縣楊莊運口起。至桃源縣交界三岔止。計一十七里。安清中河通判所轄。自桃清交界三岔起。至宿遷境內張莊運口止。計一百四十里有奇。宿桃中河通判所轄。大清一統志。

鹽河有二。一在清河縣中河北岸。康熙二十六年開浚。分中河水。東北歷山陽縣朱元莊。至安東縣界毗連海州。趨串場河。達葦蕩入海。每年六七月開放。建築大隄。以衛田疇。遇有阻塞。隨時疏浚。以濟鹽運。大清一統志。

海沭向不爲黃水所經。惟中河自駱馬湖入運河。至鹽河閘。爲王營減壩。與黃水相接。每歲漕運既竣。啓壩減黃水入鹽河。至州境之莞瀆入海。場鹽則由場河至武障河。沂鹽河而南至永豐壩登岸。其葦蕩營柴運。亦由鹽河而行。往時境內場河疏暢。六塘清水。足資浮運。黃水由莞瀆歸海。不入場河。近則清水不足。仰藉黃流。直達大伊以北。而場河易淤。鹽運維艱。年來黃河盛漲。清口淺阻。亦不待漕艘全行。已有減壩洩黃之舉矣。且聞雲梯關外。海道高仰。議者欲引全河由響水口入海。經兩河總督會勘。察其形勢不便。寢其議。海州志。

行水金鑑。鹽河自清河縣中河北岸鹽壩口起。歷山陽縣朱元莊。今按朱元莊舊屬山陽縣。自清河

縣移至清江浦，卽改屬清縣。至安東縣迤下平旺河止，長一萬三千四百五十丈。又載安東縣北岸遙隄一段，上自山陽縣交界起，下至平旺河止，長一萬三千五百五十丈。隄河丈尺止差百丈，惟河起清汛鹽壩，隄起安東汛界，自鹽壩至安汛交界，尙有河長七千餘丈。金鑑統謂起自中河鹽壩，或有錯誤。現在河長二萬六千一百五十四丈，則又以鹽河以下之平旺河至武障壩止七十餘丈，統作爲鹽河矣。該河遇有淤淺，皆用商捐銀兩疏濬。淮安府志：鹽河淤淺已久，康熙二十六年，河院靳題浚，並築兩岸束水隄，至平旺河，一洩中河盛漲之水，一以爲運鹽之渠。當時商人捐銀八萬餘兩，每年仍捐銀四千兩，交中河廳修補河隄，又行水金鑑。康熙六十一年，淮揚道傅澤洪詳請商人捐修鹽河隄埽銀四千兩，請解河庫，每年由道勸明應修工段，估請給發，敘有詳稿。至今因之。據此則鹽河止至平旺河，已無疑義，而現在平旺河下兩岸子隄，尙屬民修，則又可爲鹽河不抵武障之確據也。清汛鹽河，內新王營減壩迤下攔河格隄一道，南起外北越隄，北抵遙隄，長二百三十五丈。中留河泓八丈，以通鹽閘下注之水，如遇啓放減壩，黃水上漲，卽爲堵截。安汛鹽河南岸護城隄一道，自縣西大關山安縷隄起，至平旺河止，長九千四百五十九丈。康熙二十六年築。鹽河兩岸逢灣迎溜之處，現有南岸大關高家莊、徐家莊、蔡家莊、北岸老隄頭、周家莊、陶家馬頭、朱家灣、黃家灣、朱家莊等處埽工，每年酌量鑲修，並無一定長丈。嘉慶二十一年，備啓減壩兩岸隄埽，通行加培修整。平旺河兩岸子隄，均係民修民守。南隄自護城隄尾起，至武障壩止，長六千六百二丈。北隄自遙隄尾起，至南股河尾止，長六千二十丈。每年啓放鹽閘，由淮海道檄行該管州縣，飭民修守。

莞瀆壩爲鹽河下達莞瀆河至北潮河關鍵。每年啓放鹽閘。進水無多。必須緊守該壩。令鹽河之水。由武障義澤等壩河下達。如遇啓放減壩。始可拆展。暢達壩下。莞瀆河至三岔口止。長七千四百二十五丈。乾隆八年。水利案內疏通。二十八年。以舊河灣曲。在單家港取直挑河。長一千九百二十丈。莞瀆壩以北河勢。由南轉北。卽淮北引鹽出運場河。西岸無隄。乃六塘河及宿遷沭陽諸河下達。水口東岸有堰排列。曰武障。曰項沖。曰義澤。曰六里。曰東門。曰白蜆。曰牛墩。各石壩壩下。各有河道。旁各有草築越壩。越河分達北潮河歸海。每屆伏秋。諸水長發。匯注場河。西岸民田。防其漲浸。利早啓壩。而淮南又虞膠舟。乾隆二十九年。鹽政吉慶奏定水誌於武障壩。惟武障壩緊接鹽河尾閘。如每年西水下注不多。武障壩切宜緩啓。以蓄上游河水。而利鹽柴重船。場河啓閉各壩。乃海州分司經理。事屬淮海道所管。隨時查辦。志之以俟考證。今按項沖壩水誌。道光元年會定。六壩之北。又有車軸河。爲葦左營南北兩汛蕩柴出運要津。上承場河分流。下達五圖河尾入海。蕩尾入五圖河之處。築有底堰。以杜偷漏。江南中河廳冊。

運河卽於清河縣東南入黃河。其西南卽清口黃河淮水交會之處。東入於海。皇朝通志。今按清河縣治。今移黃河南清江浦。

運河卽於清河縣東南入黃河。其西南卽清口淮黃交會處也。運河西北自駱馬湖口。東南屈曲至清口之北。三百餘里。與黃河相隔僅八九里。一線之地。南北皆隄。宿遷縣城。舊清河縣城。實北臨漕運。南襟大河。自運河而北至宿遷十字河之西。始南與黃河稍遠。又北至邳州西北。入山東嶧縣。

之台莊始名上閘。又西北至南旺柳林，皆上水也。北至北閘，則又下水。出閘西北至臨清，而閘始畢。乃東北流至天津，以緯度直計，祇一千七百里。因水道紆曲，候閘啓閉，故數加增。其遲速不可以郵程定也。自汶而北，得巨川之助，曰衛河。曰漳水。潯沱自汶而南，曰泗水。曰沂水。山東一省運河貫其南北。東昌、泰安、兗州、沂州、五府之山泉、陂澤、支渠小水，悉引以利漕。運河水東合河、淮，東北至雲梯關，入於海。水道提綱。

運河分淮水一支東流，折東北，經清江浦前。東南流經淮安府城西，其東岸洩水支河口，爲濶河，爲射陽湖。又南流，東岸爲涇河，爲廣洋湖。又南經寶應湖口北，東岸又洩水支河入廣洋湖。皇朝通志。

自淮以南引支渠，因古邗溝南注大江，以通漕舟者，運河爲大運河。西岸卽寶應、高郵二湖。東岸洩水爲鹽運串場諸河。北至鹽城阜寧，南至通泰港，汶縱橫。今記其略。運河於清口黃淮交匯之南，分淮水一支東流，出御示閘，折東北流，分爲二支，以節水勢。經清江浦前，出龍王閘，折向南，而東南流出板閘，又南流經淮安府城西，稍南，東岸有洩水子河口。子河東爲濶河，東至廟灣，爲射陽湖。東入海。又南流，東岸有涇河閘。涇河東南至寶應東，匯諸水爲廣洋河。又東，西岸爲寶應湖。北口有黃浦閘。西北去洪澤湖之高家堰僅六十里。湖水漲，卽南下寶應湖。東岸有支河，以竹絡壩捍之。洩湖口水支河東南入廣洋湖。水道提綱。

淮安府運河，在府城西。自揚州府寶應縣北，至府城南六十里。黃浦入山陽縣。又北至府城西，清江浦折西北入清河縣界。達清口，踰黃河，由縣東入楊家莊口，爲中河。在府城南者，卽古邗溝，亦名山

陽瀆。明初以來之舊運河也。自清江浦達淮入黃河者。明永樂中。平江伯陳瑄所開名清江浦。卽宋沙河故道也。乾隆二年。於運河南岸天妃閣以下。開新河一千餘丈。中建正閘二座。迤南開月河一道。建月閘二座。將舊運河南隄。改作北岸。另開南隄。展寬地基三年。大浚運河。並築運口挑水壩。四年。加培桃源縣運河東西隄岸。七年。於山陽縣護城隄尾。接築遙隄。下建涵洞。以資蓄洩。十年。十一年。疏文華寺閘引河。又築清河桃源運河東西兩岸隄工。十六年。大修運河隄岸。自漂母祠迤北石馬頭。至北角樓。建石工四百五十丈。二十二年。皇上南巡。親示機宜。於運口頭壩外。建築攔黃壩一道。二十三年。挑濬桃源縣運河。二十七年。修築惠濟通濟福興正越六閘。以洩洪湖清水。河防志。運河自山陽縣黃浦起。北至甘露城。迤西山清外河交界清口止。九十六里有奇。自黃浦至季家淺八十一里有奇。係山陽縣境。自季家淺至甘露城。迤西十五里有奇。係清河縣境。其汛三。曰裏河下汛。裏河上汛。今按乾隆二十六年。清河縣移駐清江浦。以山陽西界臧家馬頭以上之地。屬清河。改裏河上汛。曰清江汛。裏河下汛。曰平橋汛。運口汛。屬淮安。裏河同知管轄。大清一統志。

清口大小清河。卽泗水之末流。源出泰安府。經徐邳。至縣西北三汊口分流。一由治東北入淮。爲大清河。今久淤塞。一由治東南入淮。爲小清河。卽今河道。但舊以泗流清於淮。故名清河。宏治初。黃河入小清河。其水遂濁。至今猶名清口。淮安府志。今按。此亦以清河縣舊治言之。

南壩上磨盤墩一座。乾隆四年。大學士鄂爾泰奏定。淮安府志。今按。裏河廳冊。乾隆二十六年。接築挑清蓋壩一道。五十五年。接長。嘉慶九年。又接長。十三年。全刷無存。十四年。補築蓋壩。十五十六

十七十八二十等年均經接長。

運口明平江伯鑿清江浦河通淮達黃以濟漕運其運口在三里溝百餘年後爲黃所淤乃別開三里新河移運口萬歷六年潘季馴爲總河遷運口於甘羅城南然距黃淮交會處不過二百餘丈阻塞時告康熙十年以天妃閘塞乃於清河縣東腰浦界內支河之達張福口者疏浚通舟十九年總河靳輔又移於爛泥淺之上淮安府志今按裏河廳冊乾隆二年總河高斌奏移運口於舊口之南建築鉗口草壩三道謂之頭二三壩擊托入運之水

北岸舊運河在惠濟正閘之下張王廟前乃雍正年間運道乾隆二年於舊河迤南開挑新河建造通濟福興正越四閘四年經大學士伯鄂爾泰總河高斌奏定春初水緩將新河各閘堅閉重運仍由舊河行走重運過竣將舊河堵閉船隻均由福興通濟二閘行走三十六年停走舊河築壩攔截三十九年於隄東建進水涵洞一座今廢按舊河南岸文華寺前康熙四十五年建有洩水石閘一座名曰永濟洩運河之水入護城河乾隆二年於南首建閘開河此閘遂隔絕湮沒裏河廳冊

南岸濟運壩原建於康熙四十一年引三岔河之水由文華寺河入運河迨後河水漸高皆由運口分入隨做輒工惟乾隆十五年奏開洩水濟運旋即堵閉裏河廳冊

護城河自文華寺閘下起至青蕩湖長一萬四千八百九十三丈五尺兩岸俱有隄工萬歷十年開天啓三年浚以通漕康熙三十八年建板工八百餘丈以障湖水雍正八年浚河四千餘丈培隄一萬六千餘丈乾隆十年又浚河頭淮安府志



護城河起山清交界文華寺。袤八十餘里。注入白馬湖。康熙年間開挑。分洩運河異漲。嗣緣民田數千頃。歲被淹沒。經河督高公斌改挑運河口時。於閘外築隄堵閉。民以爲便。乾隆九年。復建雙孔涵洞。遇異漲方開。惟是清水入運。建有四閘。重重關鎖。不致泛漲。况有竹絡等壩。足資宣洩。自有此洞。往往並非異漲。遽行開放。漂沒田禾。知縣金秉祚詳請遵循原議。非異漲不開。范公河。清江浦有古河。宋乾道時所挑。其跡湮矣。明末鳳泗流寇熾甚。淮安戒嚴。船政同知范鳴珂。循故跡挑河。劃守土人感之。因以名河。遠普應寺前。抵寺西南楊家廟。康熙十六年後。因河口水勢太盛。欲減水保隄。乃從文華寺下建五孔橋減水壩一座。壩內挑河二道。一達楊家廟。一抵清江浦船廠運河。范公隄皆范公河故跡。然運河底高。水不能出。又南阻永濟河。宜於永濟建閘。開浚洋信港。引水下白馬湖。以免泛溢。山陽縣志。

裏河南岸兵三堡上首。舊有文泉洞一座。分洩運河水。由文渠溝達玉帶河。裏河廳冊。

五孔橋石閘一座。康熙三十五年建。上自五孔橋起。下至雲曇壩。運隄止。名玉帶河。裏河廳冊。

五孔橋西石涵洞一座。康熙五十九年民建。引運河之水。灌溉民田。其水由護城河下達此洞。久經閉塞。裏河廳冊。

永濟河一名新河。治西南二里。自運河西岸楊家廟起。達武家墩。明萬歷九年。漕撫凌雲翼開挑。以備清江浦黃河嚙隄之虞。未幾。清江隄甃石運艘。仍由正河行。此河徒費民力。無用。而湖西民田。水不得出。終歲淹沒。經前邑令孫肇興建伏龍洞。以洩之。卽地洞口是也。久之亦湮。康熙二十五年。續

題河工善後事宜。復循故道增挑。以運高堰大工物料。此河既不可廢。宜於西南接洋信港故道。開浚建閘。以備蓄洩。蓄則閉閘。以運工料。洩則開閘放水。由洋信港入白馬湖。而引五孔橋新挑河之水。入於永濟河。亦建閘以備蓄洩。兩邊多設涵洞。以時啓閉。則百餘年之害可除。而此一隅之水利可興也。山陽縣志。

伏龍洞。明運河以西。田皆膏腴。自開永濟新河。由楊家廟達河口。東西築隄。積水無所洩。田沈釜底。邑令孫肇興乘挑河之隙。穿漕河底。使漕隄以西之水。從澗河東洩於海。遂爲木洞。中空高廣各三尺。長三十五丈。橫掘漕渠而瘞之。名曰伏龍洞。西出西隄。以吞。東出東隄。以吐。洞上磬石。石上皆土。穿漕渠底。浚隄東爲渠。引水入寶帶河。達澗河。於是湖西千頃之疇。復爲良田。山陽縣志。

運河西岸狀元墩草閘一座。嘉慶十五年春。總河吳焮副總河徐端奏建。備洩運漲。卽十四年漫工堵合大壩。改爲鉗口壩。以二壩改爲草閘。隨時啓閉。十九年。堵塞閘下挑河。築堰引草閘所洩之水。入護城河。下達白馬湖。裏河廳冊。

運河西岸涵洞五座。山陽縣志。今按。在沙家莊者程宅洞。在二舖者劉宅洞。在平橋者閻宅洞。在大溼河者劉宅洞。在戴家灣者楊宅洞。俱由溫山河出火。又開歸白馬湖。

白馬湖。治南六十五里。南河志略云。去寶應北十五里。與山陽接境。昔受洋信港之水。今高堰減壩。水下。若高郵車邏等壩。不多開放。入下河。則高寶湖逆漲。入白馬湖。而西鄉岔河一帶田畝。盡被淹沒。山陽縣志。

東岸永利閘鹽河。本名故沙河。今名烏沙河。起閘口。分運河水。運鹽由漁濱河入馬家蕩。淮安府志。故沙河。俗訛烏沙河。南河志略云。在郡城西。通智信二壩。以備車盤貨物入外河。久湮廢。蓋由東至北轉。西達於運河。其故迹也。今烏沙河在郡城西。引運河之水。從永利閘進水。北至利濟橋。西分一支西北去。達三壩。曰鹽河。一支東去。逕利濟橋石橋。抵三孔石涵洞。曰烏沙河。猶故沙河遺迹。此河之西岸。有山子湖。霪雨積潦。亦藉此河宣洩。乾隆八年。奉旨挑濬。起自永利閘。下至三孔石涵洞。長一千一百七十二丈。面闊六七八丈。底寬二丈五尺三丈不等。深一丈至一丈七八尺不等。閘座重拆建。用銀三千六百六十九兩零。鹽河治北大河故道也。明宏治後。河淮交會。下清江浦。衝相家灣。西橋。遠過新城北門外。逕仁義禮智信五壩。有嘴隄薄城之患。萬歷四年。兵備副使舒應龍建議。由草灣開河。以殺其勢。屢塞屢開。行三十里。復與正河會。厥後南灘水緩沙停。逼大流盡歸草灣。新河去城甚遠。於是故道悉淤。三城恃以無恐。河灘變爲鹽廠。尙存舊河形如溝。長二十餘里。自鉢池山後。抵新城北門外東壩止。爲今日鹽薪要道。土人呼爲鹽河。本來無壩。因蓄水運鹽而設。乾隆八年。因奉旨挑浚烏沙河魚濱河。灌溉民田。而鹽河底仰走水。鹽船難行。於是彙入水利工程。南自烏沙河分流處。西北至草灣三壩。曰鹽河。長二千五百丈。濬河面寬六丈。底寬三丈。深八九尺不等。用帑九千三百八十一兩零。魚變河。俗訛魚濱河。在郡北運河東岸。有永利閘。引運河之水。入烏沙河。東爲魚變河。經鳳谷村。達青溝夾河。注馬家蕩。長百里。前明兩岸皆稻田。號爲膏腴。自鹽分司移駐河北。掣鹽於是。從烏沙河尾西北鑿河一道。抵草灣三壩。名曰鹽河。以運鹽艘。緣鹽河底高於魚

變河三尺。難以蓄水。商人於魚變河頭。砌石涵洞三孔。鹽河無水。則將三孔堵塞。灌滿鹽河。開三孔放水。柰洞流微細。魚變河漸淤。填淺狹。兩岸無活水。乾隆八年。據士民浦之政等呈請。題准挑浚。自烏沙河三孔石涵洞起。至馬家蕩。長一萬八千三百二十五丈六尺。兩次用帑銀十二萬兩。零永利閘亦重拆建。十一年。三孔石涵洞建裕民閘一座。下板三層。蓄水入鹽河。餘水從板上滾下。入魚變河。灌漑民田。長川開放。十三年。府衛通詳長川開放。河院批山邑永利裕民二閘。每歲重運。經臨。即便堵閉。尾幫完竣。啓板放水。勒石閘旁。永定章程。不必預定期限。令裏河主簿專司啓閉。毋得後時。淮揚河道轉飭遵照。山陽縣志。

市河上承舊城西門與文下閘。今按與文下閘。今名文渠閘。分運河一線之水。貫文渠。經南市橋八字通便等橋。兼洩城南積潦。出北門。轉東繞夾城內。出阜城關。明代下澗河。通城外市河。蜿蜒東去七八十里。下注馬家蕩。入射陽湖。乾隆八年。知縣金秉祚詳請開挑。起東門阜城關。至馬家蕩。長一萬四千五百七十八丈。面寬四丈。至六丈。底寬一丈五尺。至二丈。深三尺五寸。至一丈五尺。建木橋三。跨河上用帑二萬二千八百七十七兩。零十年。又詳請於小河口建石閘一座。因澗河隄高。開放之時。水湧溜急。礙難啓閉。將南門外太平小石閘。修建開放。分洩澗河之水。由護城濠河會入阜城關市河。得以灌漑。山陽縣志。

寶帶河。明萬歷間。邑紳張世才。請開濬城南寶帶河。形如環帶。三折回抱。起自楊家廟與文閘。承運河分流之水。至巽方。轉北行。又往西過小弔橋馬福橋。北行轉東。過大弔橋龍王閘。抵龍光閣下。長

流北。鵞過韓家橋。至聯城東門外。接澗河。澗河相傳宋時所開。古名菊花溝。上承諸閘洞之水。由新城東關。至北澗南澗。經十塘。至黃浦之澗河。下接壽河。出涇口。歸射陽湖入海。此古澗河也。自淮黃衝決。故道堙淤。明嘉隆間。漕撫王公宗沐。環城築隄。甃石岸四十餘里。以防再決。而郡城內外積水。不能宣洩。乃另闢澗河。起聯城門外龍王廟。東盡於壽河寺。長三十里。闊六丈。深一丈。直下壽河。名曰大澗河。卽今澗河也。又建閘於郭家舍。以備蓄洩。後因范家口決。河復涇汨。萬歷二十一年。總漕李公戴。委知府馬化龍。濬治深闊如前。未數年。知府劉大文。重加挑浚。天啓四年。知府宋祖舜。復浚。國朝初年。深通如故。自黃流分入。澗河淤高。反閉水關。以防倒灌。康熙三十二年。漕督興永朝。大挑澗河。工甫半。公蒙召還。其中輟。三十九年。奉旨挑浚。六十年。起民夫挑濬。此河上承城南楊家廟。興文閘。引運河之水。經寶帶河。下接聯城東門外澗河。經車橋。至流均溝。下馬家蕩。蜿蜒百里。兩岸支渠無數。皆股引澗河之水。以溉田。舊有龍王閘。以洩三城積水。入澗河。乾隆八年。挑浚市河。深通澗河。身反仰龍王閘。洩澗河之水。十之七。乾隆十年。十一年。知府衛哲治。知縣金秉祚。力持堅閉。龍王閘之議。東鄉頻年大稔。故城河。古壽河也。唐楚州山陽境東。有壽河。景福初。楊行密遣將張訓。李德誠。敗徐州兵於壽河。遂取楚州。卽此。舊在治東南五十里。西南接黃浦。澗河之水。東射入陽湖。明宏治間。嘗挑濬。以達興鹽高寶等處。萬歷二十一年。漕撫李公戴。浚澗河。次年。復自壽河寺。下接車家橋。東至射陽湖。計長二十里。開浚深闊如前。今車家橋以南。有小澗河一道。分流溉田。以達於湖。亦壽河支派。昔涇口淤淺。澗河幾至斷流。水曾從小澗河而去。山陽縣志。

涵洞河運河東岸。舊有頭淺涵洞六座。二淺涵洞二座。三淺涵洞五座。今按淮安府志。三淺涵洞。閉塞已久。又風水涵洞二座。每洞下有渠一道。引運河之水。從溪河入射陽湖。但需水時。卽糧艘過盡。猶閉洞。聲言刷河。雨潦暴漲。開洞稱爲洩運漲。滄洲陳公爲河督。飭十三涵洞分上下截。五日開五日。上下遞互著爲例。洞下各渠。向例數年一浚。近數十年不浚。渠身淺窄。旱則水不足。溉潦則易溢。北溪河上承各涵洞之水。過高壩橋七孔橋。東驚下蕩。入於射陽湖。淤淺已久。一遇霖潦。水難驟洩。前知府朱奎揚。詳請起民夫挑浚。但七孔橋以上。田皆上腴。兩熟。利於浚溪河。七孔橋以下。多圩田。另有洩水河。不用此溪洩水。十一年。知府衛哲治。復加疏浚。詳請十年一大挑。五年一撈淺。爲例云。山陽縣志。

涇河運河東岸。有閘分運水。通塔兒頭金吾莊。趨射陽湖。東北入海。殺運。漲溉田畝。長八千二百五十丈。面寬五丈。底二丈五尺。深六尺。明正統五年。修涇河壩。以通舟楫。景泰初。知府邱陵建。插置倉。交兌鹽城諸縣漕糧。久之。倉廢。插存。厥後時塞。時開。萬歷二十二年。河漕都御史徒建雙插。南河郎中李之藻。重修。康熙初。同知王同春。改建一閘。其工極堅。後因運河淤墊。每閉插。蓄水濟運。及夏秋。運河泛漲。則開版。盡啓。水勢瀾漫。可患。二十八九年間。因閘圯。暫閉。水不行者十年。三十九年。總河張鵬翮。奉旨挑浚河。成閘。亦另建。乾隆五年。發帑興浚。山陽縣志。

南溪河卽黃浦溪。在涇河閘南十里。爲山陽寶應交界。原無溪。明時高家堰潰決。此地當其衝。屢塞屢壞。萬歷七年。總河潘季馴。旣築高堰。而壩黃浦。水竭根見。一夕雷雨。忽見穴。有首骨齒角。僉曰龍。

也。遂名其地爲蛻龍潭。後於隄上建雙閘。以洩運河異漲。屬寶應縣管。溪之下爲河。半屬寶應。半屬山陽。自黃流淤墊。河心日高。曲防加隄。爭訟不已。康熙三十六年。運河水漲。閘傾。溪河不能容。三十七年。將閘永閉。而溪河淺狹。難洩。田中積水。後復修閘。以備運河宣洩。近則閘圯。河淤。乾隆八年。估勘入緩。工未浚。運水漲。則開運河西岸竹絡壩。西鄉民田多付波臣。山陽縣志

此  
页  
空  
白



# 續行水金鑑卷第七十一

運河水分淮水 原委七

又經寶應縣西。西岸濱寶應湖。東岸皆有洩水支河。又南經高郵州城西。皇朝通志。

又東南流。西岸去寶應湖僅數里許。經寶應縣城西。有支河東入城。東入廣洋湖。又南流有支河。東入廣洋湖。又南流。西岸濱湖有朱馬灣。開支河口。又南有小九旬。開支河口。又南有狼兒。開支河口。即泥水鎮也。又南有越河。開支河口。又南有永安。開有七里。開俱有支河。又南東岸爲界首鎮。又南西岸濱高郵湖。東岸有支河。東出爲三王溝。以上諸支河。俱匯爲廣洋湖。北注澗河。又濱湖而南。經永安。工西有二開支河。又南有頭開支河。又兼合注興化。東北至鹽城入海。又南經高郵州城西。折而東。經城西南。稍與湖隔。相去半里一里。東岸有支河口二。俱自州南合流來。趨興化。又南爲火姚。開支河。以下河俱東匯爲綠洋湖。水道提綱。

揚州府運河。即古邗溝水。舊曰官河。北自淮安府山陽縣界南流。入經寶應縣高郵州西。康熙五十九年。修築高寶江都東西二隄石工。雍正五年。總河齊蘇勒。加築江都寶應東西二隄。九年。總河嵇曾筠。修築高寶江都東西二隄土工。各數千丈。乾隆三年。總河高斌。請帑疏濬。並築隄工。上自河口。下至瓜洲。開長三萬七千八百八十六丈。五年。重修東隄。自高寶至邵伯。計二百餘里。十年。大浚高郵官河。二十一年。東隄添建石壩。歷加修築。大清一統志。

運河西隄。自淮安裏河廳與揚河廳交界處。南爲葉雲洞。又南爲葉雲雙閘。又南爲竹絡壩。又南爲王鼎洞。今按揚河廳冊有梁淮洞通河閘。水通白馬湖。在縣北十五里。東西長十五里。南北闊三里。西連三角村。北接黃浦。北出有溫山溝。又西有河名護城河。北入鹽河。又西有魚籃閘。又稍西當湖之尾。有灣河水亦入鹽河。縣西五里。又有蒲塘溝。接白馬湖。三里溝在縣西三里。又接焉。今按揚河廳冊有北西中南四港。俱通青蕩湖。縣西北十里。有張大夫溝。白馬湖與青蕩湖匯爲一。今按揚河廳冊有龍亭閘南審閘。又東爲秤鈎灣運隄。又南爲北宏濟大閘。今按揚河廳冊無。又南爲南宏濟大閘。卽瓦甸閘。又南爲通湖小閘。又南爲減水壩。隄外爲清水湖。在縣之南。東西長十二里。南北闊十八里。南連汜光湖。湖在縣西十五里。東西長三十里。南北闊十里。東北連清水湖。南會津湖。西通曬火湖。湖在縣南四十里。西通衡陽湖。衡陽湖在縣西南六十里。西抵衡陽鎮。東入曬火湖。有金釵澗。由縣南七十里入焉。有忠心澗。自縣南八十里入焉。其南則高郵界矣。此澗南接安宜溪。東北入汜光湖。有赤水澗。自縣西南七十里入焉。有魚池澗。自縣西南八十里入焉。津湖在縣西南六十里。東通運河。西北會汜光湖。南接高郵界。此湖三國志作精湖。蔣濟傳黃初六年。車駕卽發。還到精湖。水稍盡。盡留船付濟。船本歷適數百里中。濟更鑿地作四五道。躡船令聚。豫作土脈。遏斷湖水。皆引後船。一時開。遏入淮中。卽此處也。凡此諸湖。統名寶應湖。今按汜光以南。今統名界首湖。由草子河西北接高堰。又迤南行。有南北束水隄。上承五壩。又通洪澤湖。蔣家壩河諸湖之西。有陰騭河。明萬歷十九年。知縣耿隨龍所開。以灌西北高家壩閘頭橋等處。高阜之田。并使舟行者。不復由湖。免風

濤之險。白水塘更在諸湖之西。顧祖禹方輿紀要云。在縣西北十五里。闊二百五十里。北接山陽。西南接泗州。盱眙縣界。亦曰白水陂。魏鄧艾所作。與盱眙破釜塘相連。開八水門。立屯。溉田萬二千頃。宋元嘉末。嘗決此塘。以灌北魏軍。大業末。破釜塘壞。水北入淮。於是塘亦涸。唐證聖中。始修。開置屯田。長慶中。復修。今縣西南有徐州涇。青州涇。西南五十里有大府涇。蓋是時發青。徐。揚三州民。鑿涇灌塘。因名大府。謂揚州也。又縣治西四里有竹子涇。亦長慶中所開。周廣順三年。南唐楚州刺史田敬洙。請修塘。溉田以實邊。不果成。宋嘉定六年。獻議於朝者。謂白水塘東至浮圖莊。南至褚廟岡。脊大堰。廢而不治。今脊猶在。若復之。寶應。高郵諸湖相接。游波所及。如衡陽。阜。三角村等處。皆浸淫。至城形勢日張。筭本州委官相度。司法尤煇。議未及行。寶應縣志云。元初置洪澤。屯田萬戶。府引塘水以溉屯田。又有羨塘。亦在縣西南。與白水塘合。唐會要證聖中。開置白水塘。羨塘。屯田是也。今按。揚河廳冊。永安汛西岸。南有子嬰西閘。運隄又南至界首西岸。入高郵州境。自山陽縣交界以來。五淺西隄。稱鉤灣。康熙三十八年。創石工一段。長二百二十八丈。四淺宋家尖。創建石工一段。長九十六丈。六淺五淺四淺一淺。西隄舊石工殘缺四十二段。康熙三十五年修築。又加高石二層。界首西隄石工。長一千七十五丈七尺。三十八年。興砌陸漫閘。西隄石工。長一千六百二十五丈。四十年。修建永安西隄石工。九百七十丈。四十一年築竣。又南爲通湖閘。又南爲通湖港。二十有二。其石港曰萬家塘。口門五丈五尺。曰杭家嘴。口門十二丈。曰通湖橋。口門十二丈。曰夏家橋。口門一丈六尺。曰姚港口。口門十六丈。其土港曰越河頭港。長六丈。曰施家港。長十三丈。曰思賢港。長十二丈。曰柳園港。

長三十四丈。曰賈家港。長十二丈。曰陳家港。長二十丈。曰何家港。長二十丈。曰四汊港。長二十五丈。曰孫家港。長六丈。曰車邏港。長三十丈。曰舊越河港。長十二丈。曰新越河港。長十七丈。曰水廟子港。長十三丈。曰南陳家港。長十一丈。曰南孫家港。長六丈。曰薛家港。長六丈。曰秋子港。長八丈。以上土石各港。平時俱用草土實閉。湖水漲發。始開放入運河。以資宣洩。隄西爲高郵諸湖北連汜光。白馬而通洪澤。凡天長以東諸水。盡匯此湖。長闊一百五十餘里。湖之名目繁多。然皆無畔岸。莫可主名。今據舊志。列其名目。方向言之。蓋當時猶未會爲一也。曰新開湖。在州治西北三里。曰暨社湖。在州治西三十里。通鵝兒白湖。曰平阿湖。在州治西八十里。通天長縣桐城河。曰珠湖。在州治西七十里。曰張良湖。在州治北二十里。通七里湖。曰石白湖。在州治西北五十里。通暨社湖。曰姜里湖。在州治西五十里。通塘下湖。曰七里湖。在州治北十七里。西通鵝兒白湖。鵝兒白湖在州治南二十里。通張良湖。武安湖在州治西南三十里。通露筋河。曰塘下湖。在州治西四十里。通暨社湖。一名赤岸湖。舊志有云。三湖者在州治西五里。蓋本繫年錄。有樊良等三湖。縣亘三百里。宋紹興初。張榮聚衆擊敵於此。大抵卽新開暨社。而樊良據其中耳。不得有方向的所也。又云有五湖在州治西六十里。蓋本蔣之奇詩。三十六湖水所躡。其有大者爲五湖。是五湖亦統別湖而成名。亦不得有方向的所也。其天長水道入湖之路。有秦蘭河。在州治西六十里。自冶山發源。入武安新開等湖。其河過天長縣。至秦蘭鎮。大橋以北屬高郵。有石梁山。河發源大雲山。過天長縣。入新開等湖。有三汊澗河。五汊澗河。皆自天長縣北入新開等湖。其由高郵諸湖北通寶應諸湖水道。有華家灘。又東有相家澗。又東有

菜花港。其諸湖附近溪灣溝蕩之可名者。曰石梁溪。在州治西北。自天長縣發源。入新開湖。曰平阿溪。在州治西。亦自天長縣發源。入湖。曰樊良溪。在州治北。自天長縣流入珠湖。卽古之樊良湖也。樊良湖見徐堅初學記云。山陽縣有樊良湖。射陽湖。津湖。今樊良在高郵。射陽半屬寶應。津湖在寶應。其初則俱屬山陽也。曰曹莊灣。在州治西南十五里。康熙六十一年曾濬之。曰父子灣。在州治西五十里。通珠湖。曰落帆灣。在州治北十五里。曰柳溝。在州治西北。通平阿溪。曰觀溝。在州治西北四十里。東接聶里。黃林諸蕩。曰拗溝。在州治西北十三里。南入新開湖。曰展溝。在州治西北九十里。南屬高郵。北屬寶應。曰新溝。在州治西十里。東南抵運河。西接塘下湖。曰夾溝。在州治西二十里。昔人開築以避武安湖曹莊嘴風浪之險者。又有北夾溝。在黃林中村鎮。西屬泗州衛。東屬高郵。曰馬灣蕩。在州治西北三十里。黃林村。東通新開湖。曰黃林蕩。在州治西北三十五里。東通馬家蕩。曰聶里蕩。在州治西三十里。沛城村。南通七里湖。東至新開湖。曰三里蕩。在城西七里。曰攸兒蕩。在城西七里。曰燒香港。在州治西北十里。通鵝兒白湖。蓋宋南渡後。晝淮爲守。燒香者不得之。泰山皆至高郵東嶽行宮。故名。曰茅塘港。在州治西十五里。雍正二年曾濬。曰羅家港。在城西二里。曰楊絲港。在州治西十七里。曰洋洋港。在州治西。曰四汊港。在州治西南五里。曰五汊港。在州治西南十里。曰王家港。在州治西南五里。引高郵各湖之水入邵伯湖。乾隆元年濬。揚州府新志。

運河東岸黃浦閘二座。在黃浦鎮南。金門各闊一丈二尺。水入黃浦溪。東入凌溪。又東入黃昏蕩。匯爲馬家。九里等蕩。由九里溝。李家溝。西建岡河。東至鹽城縣。北串場河。出范隄。由石礎天妃等閘入。

海運隄又南有徐家小閘。今廢。今按揚河廳冊無徐家小閘。有喬家洞。運隄又南有李家涵洞。今按揚河廳冊無。有儒學涵洞。運隄又南有孫家小閘。此閘明開暗洞。金門闊二尺四寸。運隄又南有七里溝。在縣北七里。首受運河水。東入黃昏蕩。今按揚河廳冊圖說俱無此溝。運隄又南有躍龍閘。原係木涵洞。改建石閘。金門闊一尺八寸。水入城南門。下望直港。入章思蕩。通蜆蟪火盆諸蕩。亦入九里蕩。出九里河。經鹽城北串場河。出范隄。天妃石礎等閘入海。今按揚河廳冊有湯問洞。運隄又南有朱馬灣閘。金門闊六尺六寸。水入章思火盆諸蕩。匯入大縱湖。出東塘西塘等河。經鹽城縣北串場河。出范隄。天妃石礎等閘入海。運隄又南有杜陽涵洞。今按揚河廳冊無。有從家洞。運隄又南有狼兒閘。金門闊六尺六寸。水入廣洋湖。有長沙溝。水亦入廣洋湖。經平望湖。入大縱湖。出西官河。經鹽城縣南串場河。出石礎閘入海。運隄又南有邱家涵洞。有范家涵洞。有從家涵洞。今按揚河廳冊。此三洞無。有張成洞。有汜水閘。今按揚河廳冊。此閘無。有胡成洞。金門闊六尺六寸。又南有永安閘。金門闊三尺五寸。水入郭正湖北匯廣洋湖。經平望湖。入大縱湖。出西官河。經鹽城縣南串場河。出石礎閘入海。運隄又南有成張涵洞。有成家涵洞。又南有減水石閘。內設礮心二座。計三門。每門闊二丈。有喬家涵洞。王家涵洞。軍河涵洞。張家涵洞。王家涵洞。今按揚河廳冊。以上一閘七涵洞俱無。有軍民洞。風水洞二座。又南有子嬰閘二座。今按揚河廳冊。此閘已改滾壩。今廢。在縣南六十里。子嬰鋪北。水入子嬰溝。經時堡鎮。入護金蕩。蜈蚣湖。出東官河。由紀家港歸串場河。出范隄。由青龍八竈大團等閘入海。河防志載。子嬰溝閘水六十里。至時堡入郭正湖。東北由西塘河建陽河至老鸛

尖亦會鰕鬚戛梁水矇瞞河與此不同。但下河歷次大水之後。水道自亦遷徙不常。茲乃就現在南河隄埽開壩全圖言之。護金蕩者在興化縣北。合蜈蚣湖大縱湖九里蕩等湖。匯爲一。其東北出鰕鬚溝。經阜寧縣。出射陽湖口入海。從鰕鬚溝迤南。如西建岡河。李家溝。九里河。東西塘河。東西官河。與鹽界河。海溝河。白塗河。皆其通串場河之水道。由串場河各按水道出范隄。自南至北。由丁溪。小海草堰。葦子。白駒。一里墩。青龍。八竈。大團等閘入海。其自丁溪閘出海者。由王家港海口。小海草堰閘出海者。由鬪龍港海口。葦子。白駒。一里墩。青龍。八竈。大團等閘出海者。由野潮洋海口。運隄又南。至高郵州界。有界首閘。在界首鎮。金門寬四尺六寸。水下馬覓河。亦入護金蕩。運隄又南。有看花涵洞。門寬一尺八寸。水下郭家大河。時家蕩等處。運隄又南。爲陸漫鎮閘。今按揚河廳冊作六滿閘。又南。爲慶豐涵洞。門寬高一尺八寸。又南。爲清水潭。又南。爲二淺閘。金門寬四尺八寸。水下洋馬蕩。東匯馬莊蕩。董家蕩。入護金蕩。出海溝河。白塗河。歸串場河。出范隄。由草堰閘入海。運隄又南。爲一淺閘。金門寬四尺八寸。水入北官河。下洋馬蕩。與二閘水道同運隄。又南。爲攔河金門閘。金門寬六丈五尺。今按揚河廳冊作二閘頭閘。又南。爲通湖橋涵洞。口門寬高一尺八寸。舊係通湖閘。改建。水下運鹽河。又南。爲南水關涵洞。口門寬高一尺八寸。水由南水關入市河。出北水關。流入通湖橋。引河匯入運鹽河。高郵運河爲南北孔道。西受湖水。東入開河。然治高郵河渠者。不得僅言高郵。須通籌全河。全河關鍵。北在清口。南在運河。清口爲淮水經流。會黃刷沙。以趨海。運河爲淮水支流。分淮水三分。濟運以入江。關係甚鉅。而高郵受全河灌注。地又最窪。運河繞城而行。城南四壩。鱗次櫛比。運

河不治則高郵先受重災。故高郵河渠首重運河。運河事宜前志詳矣。惟自乾隆二年大挑以後。歷今七十餘年未挑。加以黃水灌注。河日淤日淺。隄日高日危。近因上游東西隄屢有漫口。又寶應運河湍激。開白田鋪竹絡壩。洩水入湖。上流掣則下流緩。而沙愈停。故界首以南。訖郵之境。節節淤墊。澇則泛濫。旱先乾涸。關係運道民生者亟亟也。高郵州志。又南爲琵琶閘涵洞。口門寬高一尺二寸。水下城濠。入通湖橋引河。匯入運鹽河。又南爲南關舊大壩。長六十六丈。係草壩。康熙十九年建。乾隆二十年永閉。又南爲南關大壩。卽舊五里滾水壩。長六十六丈。係石壩。康熙四十一年建。乾隆十一年。加高底石一層。牆高石脊七尺五寸。水年南澄子河歸總澄子河。經棋盤蕩。出梓新車路諸河。歸串場河。出范隄。由丁溪閘入海。運隄又南。爲南關新壩。長六十六丈。係石壩。乾隆二十二年建。牆高石脊一丈一尺。水入南關大壩引河。此壩地勢最卑。壩底較諸壩亦爲獨深。尤不可輕易開放。其引河亦入澄子河。與南關大壩同。今按揚河廳冊。有五里中壩。卽舊八里鋪滾水壩。又南爲柏家墩舊大壩。長五十四丈。係草壩。康熙二十年建。乾隆二十年永閉。今按揚河廳冊。有八里鋪涵洞。又有車邏閘。又南爲車邏大壩。長六十四丈。係石壩。康熙四十一年建。乾隆十年。加高底石一層。牆高石脊七尺七寸。水下菱絲溝。由澄子河與南關大壩同。又南爲車邏耳閘。金門寬一丈二尺。乾隆五年建。水入車邏壩引河。今按揚河廳冊無。又南爲火姚閘。金門寬四尺八寸。水入淥洋湖。又南爲三十里鋪。揚州府新志。

又南經邵伯湖東。又南東岸并有洩水支河。皇朝通志。



又東南與湖連岸。爲露筋祠。開支河口。又南爲稽家閘支河口。其西邵伯湖也。又東南至金灣。東岸有支河口四。俱東匯淙洋湖。經邵伯鎮西。又南爲三閘。東派爲八字河。見後。又南至灣頭鎮。西北有支河口。又南有夏家溝口。皆洩水。東南爲芒稻河。皆入江。水道提綱。

運隄西岸。又南入甘泉縣界。有小河口。又有露筋閘。今按揚糧廳冊無有黃泥港。外爲邵伯湖。舊謂此湖東接艾陵。西接白茆。南通新城。北接甃社。自築運隄之後。邵伯湖在上河。艾陵乃在下河矣。邵伯湖與黃子等湖。通黃子湖。在府城北六十里。東通邵伯湖赤岸湖。又在黃子湖西朱家湖。在府城北五十里。其湖與邵伯湖相連之處。名湯家絆。新城湖在府城西北四十五里。白茆湖在府城東北四十五里。萬歷志云。此大湖皆在官河上。岸水相接連。邵伯湖西南有楊壽壩。大儀等處之水入焉。又西南庇豐庵有支河。甘泉山後老壩。橋諸處之水入焉。運隄又南爲荷花塘。今決口堵築處也。又南爲三溝閘。今按荷花塘三溝閘。均在東岸。此誤。又按揚糧廳冊。南有通湖港。又南爲鮒魚港。爲菜花港。爲廟港。爲陳家港。爲木排港。爲紅橋港。爲鐵牛港。爲梁家港。爲毋家港。自毋家港以次而北。諸港俱匯爲後河。北接邵伯湖後河。又西南匯爲董家湖。西北則入朱家湖。朱家湖之南口。南流爲王家河。西有梅家莊閘。家莊田溝。東有胥家莊田溝。王家河又南流至孔家橋。與董家湖水合。東南行爲尤家窪。引河流入尤家窪。王家河。又於尤家窪。引河稍西。分一支河。亦西南行。有錢家莊。葛家莊。謝家墳。卜家嘴。西卜家嘴。東田溝五處。與尤家窪俱入越河。越河在運河西北。對東岸金灣北閘起。田運河分出迤南。與東岸西灣壩相對止。歸入運河。縣境運河西隄石工。自露筋起。至三溝止。長二

千六百十五丈。康熙四十一年修補。南皆土隄。運隄又南有懷子河。匯小新塘。上下雷塘之水。達槐家河入焉。雷塘在府城西北十五里。上塘舊長廣六里餘。下塘長廣七里。卽雷坡。其名始見江都王傳。小新塘在上雷塘之東北。水注上雷塘。轉注下雷塘。舊長廣二里餘。南宋趙范殪巨賊李全處。此三塘與句城塘及儀徵縣境陳公塘。號爲揚州五塘。閱千餘年。修築疏濬。因時制宜。各有成效。逮明嘉靖中。五塘爲豪權佔廢。國朝雍正六年。議復。不可復成。止令將烏塔溝接句塘口。計長二千八百七丈。槐子河接小新上下雷塘口。計長一千八百四十五丈。挑浚其儀徵縣帶子溝至陳公塘。見今接連運河。毋庸挑浚。揚州府新志。

運隄東岸。南接甘泉界爲露筋鎮。又南爲荷花塘。又南爲昭關壩。今按舊三溝開在此。現傍輒工。設立誌。椿定揚糧廳水勢。爲昭關壩啓閉之節。在邵伯鎮北五里。乾隆二十二年。與高郵州南關新壩同時建。合南關大壩。五里中壩。車邏大壩。定爲運河五壩。上與高堰五壩較準尺寸。相爲表裏。此壩下開支河。流入苻絲湖。北入淶洋湖。經總澄子河。東入棋盤蕩。由梓新河歸入串場河。出范隄。由丁溪開入海。串場河者。南自泰州海安。首受運鹽河水。此卽灣頭壩下之運鹽河。東北至通遠橋。少折而西北。淤溪秦潼之水。上自泰州城北來。匯經東臺縣。北行直抵鹽城縣。爲南串場河。又北抵阜寧縣。爲北串場河。所受之水。自興化以南。如梓新、車路、白塗諸河。興化以北。大縱湖以東各支河。皆受焉。又南爲二閘三閘。今按揚糧廳冊作三閘二閘。俱有引河。歸入苻絲湖。又南爲邵伯鎮。又南爲毛家橋支河。閔家橋支河。匯入南塘。歸艾陵湖。艾陵湖在邵伯鎮東。阮昇之記云。齊高宗建武五年。遏

艾陵湖水立裘塘屯。卽此處也。其水正東出者。直至泰州。以北入淤溪泰潼。歸串場河。其東南出者。經仙女廟入運鹽河。此亦灣頭壩下之運鹽河。以下皆同。其東北出者。分爲二支。一爲宗村河。稍南入官河。一爲小紀河。經淥洋湖。東入總澄子河。運隄又南爲北閘。又南爲中閘。又南爲金灣新壩。與南中二閘水俱匯爲金灣新壩河。至人字河頭。分爲越河。俱穿運鹽河。南出江都縣境之芒稻河。東西閘歸江。運隄又南爲金灣舊壩。其水亦穿運鹽河。南出江都縣境之董家溝。會芒稻河歸江。運隄又南爲東灣壩。又南爲西灣壩。兩壩水匯爲東西灣壩河。穿運鹽河。南出江都縣境之石洋溝。會廖家溝入江。運隄又南爲鳳凰橋河。亦穿運鹽河。南出江都縣境之廖家溝。會石洋溝入江。運隄又南爲壁虎橋河。亦穿運鹽河。南出江都縣境之廖家溝。石洋溝入江。運隄又南爲灣頭閘。閘下水東行爲運鹽河。傳爲吳王濞所開。通海陵倉。自灣頭閘起。東行七十里。至斗門。入泰州境。又東過姜堰海安。入通州如臯境。東抵通屬各場。自灣頭閘下起。其北岸來水。壁虎橋水。鳳凰橋水。東西灣壩水。金灣新舊壩水。及江都境之高家壩。孔家涵。徐家涵。楊家渡。顧家圩。五里廟。景鐵溝。宜陵涵。龍耳河。以次而東諸水。皆通焉。其南岸則廖家溝。石洋溝。董家溝。芒稻河。秦塘河。白塔河。或分或合。皆入江之路。河防志。金灣三閘。并滾壩之水。十八里。至人字河。分小支。由蕭家口入艾陵湖。鳳凰壁虎二橋。及灣頭閘水。流至董家溝小支。下芒稻河。正流三里。會人字河。水勢七分入芒稻河。三分由運鹽河東流。經宜陵鎮。抵泰州城。又東流。經姜堰海安。由律法橋下海。揚州府新志。

折西南。經揚州府城東。分二派。一南流。又分支津。先後由瓜洲入江。一西南流。經儀徵縣東北。又經城南。

西南流入於江皇朝通志

稍折西南流。經揚州府城東。折而西南。於城南南流。分爲二派。曰三岔河。一南流。經頭閘。今按江防廳冊無。又分支津。東南經瓜洲城。南入江。其正派稍西南。經四閘。今按江防廳冊無。南入江。爲運河口。南對江南之京口。一西南流。數十里。有帶子溝。北自陳公塘來注之。又西南經儀徵縣城。東北爲響水閘。又南經城東。爲通濟閘。稍南爲羅口閘。經城南而西南入江。南對句容北境之炭渚驛。及河口鎮。當江近岸。有北新洲。水道提綱。

又南經府城東北。繞城而南至揚子橋三汊口。分爲二支。一支西南流。經儀徵縣東。又分爲二。一南流。至舊江口入江。一西南流。至下江口入江。爲上江運糧入河之口。一支南流。卽伊婁河。至瓜洲鎮。西南入江。爲江南糧運入河之口。大清一統志

運河西岸。又南至高橋。橋以外有壩橋。以內爲柴河。亦名草河。迤西南而南。出長春橋。合保障河。保障河北至蜀岡下。又南有廿四橋水來注之。又南出紅橋。經硯池口。至南門外二道溝。入運河。方輿紀要云。保障河在府西四里。城北三里。舊有柴河。東連官河。西接市河。入城。而城西一望平原。別無濠塹。崇禎十年。始自柴河口。引城東運河。繞西郭。復折而西南。接城南二里之寶帶河。仍合運河。延袤十六里。時又於近河東岸。緣壘爲城。上爲敵臺。因名保障焉。運隄又南。有黃金壩水。西行過卅溝廟。經迎恩橋。又南行至郡城北水關。與北門城濠水合流。亦入保障河。運隄又南至郡城東北隅。便益門。有城濠。首接運河。濠口亦有壩。壩內水西經便益門。又西經廣儲門。又西經拱宸門。卽天寧門。又

西經北門折而南過西門又折而東過南門入運河其穿城市河一自新城拱宸門水關入南經大東門弔橋又南經小東門弔橋至挹江門水門出鉞橋接運河此新城未建以前城東面之濠河也一自舊城北門水關入至南水關出響水橋入運河舊志云明嘉靖間巡鹽御史吳悌同知府劉宗仁開濬市河并闢水關歲久淤塞萬歷間知府吳秀重濬至國朝康熙十三年知府金鎮重濬後舊城市河全涸新城市河僅通而不能與運河相接雍正九年知府陳宏謀請將水利餘銀興工開濬十一年知府尹會一復濬深保障河一帶以隄內河之水不致外泄今保障河一帶俱屬深通新城市河亦可通舟楫惟舊城市河歷北門水關橋至開明橋過文昌樓下水洞南至通泗橋太平橋新橋出南門水關橋兩岸民居稠密河道淺窄當嘉慶二三年間郡中紳士醮金開濬不旋踵而復涸今止一線溝渠此河於本郡文運極有徵驗現在當事者籌議疏濬運隄又南至對岸文峯塔前北折而西名寶帶河明萬歷間濬以挽河直流運隄又西南爲新河亦明萬歷間浚自南門二里橋入西折而南又折而東運隄又西南至三汊河又西南至烏塔溝句城塘水從此出焉此溝與江都縣分界儀徵縣志云此外更有潮溝八曰張家溝成家圩湯家圩倉臺圩天寧莊鴉鵲莊徐家圩帶子溝八者皆通漕河以入於江運隄又西南行有戴子港陳公塘水從此出焉運隄又西南行至儀徵縣經四閘入於江揚州府新志

東岸運隄又南經郡城東關對岸有沙壩河入江運隄又稍折而西南有楊子橋水入江又西南至三岔河南行其對岸亦循高旻寺南行經頭閘此河遂分支津東南經瓜洲城南入江其正派稍西

南經四閘。今按此承水道隄綱之文。今無。有由開闢南入江。是爲瓜洲運河口。又三岔河西南行經儀徵縣響水閘等四閘。西南入江。是爲儀徵縣江口。揚州府新志。

史爽河防議曰。江都河渠。有關於河防水利者。惟運河爲大。北接高郵。南至大江。一線漕隄。與河俱長。而最險要者。則自邵伯金家灣起。北至露筋界牌止。計隄四十餘里。隄以西曰上河。自朱家湖黃子湖迤西。隄勢漸高。常憂旱隄。以東曰下河。自隄迤東。勢漸低。常憂澇。昔晉謝太傅始築邵伯隄。以界之。隄以西無旱憂。隄以東無澇患。民皆便之。至明季高堰失修。壩壩衝決。水勢直灌高江。此江都漕隄所以屢決。而民胥爲魚也。然患雖中於江都。而所以受惠之故。則有來源去路。不僅在江都也。試約而言之。須分三路治水之法。上流中流下流是也。上流不治。則來水無窮。雖日治中流無益也。中流不治。則蓄泄無方。雖日治下流無益也。下流不治。則水無去路。雖日治中流亦無益也。上流者高堰周橋壩壩是矣。高堰宜幫闊也。周橋不可開也。壩壩宜堅築也。則淮水不致旁泄。得以全力衝出清口。上而清口不淤。下而高江不溺矣。再高堰之上有歸仁隄。又宜照舊制實築也。歸仁堤築而洪澤湖來流減半。高堰壩壩俱爲易守。則來源既少。而上流治矣。中流者。自淮至揚運河漕隄是也。舊制十里設一小閘。旱則蓄澇。則泄以濟漕運。以衛民田也。又隄西諸河。霪雨非常。及清江浦之上。通濟閘水下注。與盱眙天長高良澗水陡發。運河不能容受。於是在山陽則開涇河黃浦二大閘。在寶應高郵則開子嬰溝大閘。在江都則開金灣三閘。及新河十四里芒稻河東西兩閘。自邵伯至江。不過三十二里。泄水則爲直捷。康熙年間。河院王光裕又於西閘之西開閘三門。亦因此地洩水最

易也。但金灣閘門尙窄。閘下新河孔家灣南北淤沙淺窄。宜開通廣闊也。再將陸漫溝以北。開一二大閘。使運河水勢南北分洩。則蓄洩有方。而中流治矣。下流者。則范隄各場之海口是也。雲梯關在昔。止爲淮水尾閘。故能容受。而無沙淤之患。自宋神宗熙寧間。黃河南徙。黃始入淮。濁流夾沙而行。稍一旁決。則勢緩沙停。沙停河塞。愈塞愈決。愈決愈塞。且黃家嘴七里溝。相繼旁決。而雲梯關大淤。正坐此病。是雲梯關爲黃淮兩水之尾閘。乃第一要緊海口。不必言矣。其外若山陽之廟灣海口。鹽城之石礎天妃廟海口。興化之劉莊青龍橋口。白駒之鬪龍港口。草堰之滷河口。小海之小海團口。泰州丁溪之龍開港口。河埭車兒埠之滔子壩口。皆以洩隄東七邑之水者也。年來非不開放。而田廬不免淹沒。人民不免漂溺。雖破格蠲賑。而仍不免於水患者。有二說焉。一則各海口離漕隄俱三四百里。而遙紆回曲折。不能直達也。一則下河七邑。四高中窪。地形如釜。沿隄減閘之水。譬之由釜邊而入。范公塘各場口地勢反高。譬之由釜邊而出。夫水由釜邊而出。則釜底之田廬已宛在深淵矣。昔輿志有云。沿隄三十餘減閘之水。滔滔東注。非民田受之。而焉往也。又王文通云。隄東下河之水。旣不通江。又難到海者。誠有見也。故運河之水。導之入江入海者。上策也。不得已而洩之下河。則當準漕隄閘口之水。與各場海口之數相等。庶來源去路。足以相當。而其中之行水河路。積年淤塞。尤不可不亟爲深浚者也。在涇河黃浦之下。則射陽湖一路。子嬰溝之下。則鹽城舊官河一路。清水潭之下。則泰山廟東河一路。以及興化之海溝河。白望河。車路河。邵伯之下。則顏家莊。楊家莊。以達樊汶。及泰州西溪河。并各場之串場河。與范隄東達海河路。俱開通深闊。則水有去路。而下流亦治。

矣。江都縣志。今按淮揚下河水利。與堰圩洩水各壩。相爲表裏。堰圩諸壩爲來源。范隄各閘爲尾閘。而下河高寶興泰東鹽境內各河。爲洪湖減漲趨海之要道。循軌則爲利。泛濫則爲害。前人所論。固已盡之矣。然古今形勢遷變不同。康熙年間。業已歷次濬治。節洪湖來源。闢歸江去路。民獲稍安。不數十年。淪胥仍告。蓋非治之未周。實守之未善也。山陽寶應地居上游。凡閘洞減下之水。入海較捷。泰州東臺。雖處下游。而地勢高亢。惟高郵西承各湖。並山圩洩下之水。由湖入運。由運以達州東。各河與化居高郵之東。范隄之西。泰州東臺之北。鹽城之南。不僅高郵各壩之水。須由縣以達范隄。卽泰州東臺之水。亦半由縣經行。故淪胥之患。與化獨甚。高郵次之。泰州無虞。而東臺又次之。鹽城則又次於東臺。大濬之後。地方鹽務有司。果能一守成規。歲加修治。雖未能益令寬深。亦可不致涇塞。乃地方七屬。各守一隅。鄉民惟利目前。罔顧鄰境。爲壑旋通。旋塞。實由於此。不獨此也。東臺縣志言。高郵泰州與化東臺下注之水。皆入串場河。分流各閘及小關。下射陽湖入海。如果各閘支河深通。原屬建瓴而下。何致終年積水爲患。實緣定例每逢三月。卽將各閘堵閉。不使洩水。以利鹽行。至九月方許起除。迨至伏秋盛漲。閘內田皆被淹。一遇洪湖水大。開放車邏南關諸壩。水全下注。該五州縣俱成澤國。閘外入海之各支河。在昔未嘗不通。無如自三月閉閘之後。旣無清水下注。又兼夏秋海潮盛漲。沙淤口門。及九月開閘後。清水下注。其勢已弱。不能刷深。日久積高。水無去路。能不泛濫乎。若再將串場河及上游各支汊較高之處。復加挑深。勢必倒漾。儻大爲開道入海之渠。不使三月閉閘。又恐有礙運鹽。凡治下河水利者。不能不籌畫於商與民也。雍正六七年間。開濬下河淤淺。



湖河設立涵洞開座。乾隆四年特派大理寺卿汪灃總辦淮揚水利。經營三四年而竣事。九年又命俞書訥親勘辦。復又浚治。二十二年又命侍郎積璜總辦其事。三四年。蓋自雍正七年至乾隆二十六年。三十餘年之間。於洪湖則改建五壩。酌定啓壩水誌。以節上源。於高甘則增改開壩。與山盱相應。大關歸江之路。不令多注下河。修建范陸十八閘。以暢去路。其疏浚七邑支幹入海各河。不啻至再至三。乃皆旋通旋塞。鹽務及地方有司。不知率由舊章。而下河七州縣。遂有水而無利矣。乾隆三十年後。雖小有補苴。未審全局。十八閘已多坍塌。鹽務歷久未修。惟石鵝天妃二閘。每當壩水下注之時。尚可通流。而自高郵至鹽城計六百餘里。以遠甌窰迅之來源。而紆回屈曲。始則自西而東。繼則由南而北。流行數州縣。而出十數丈之閘門。即使海口寬深。各屬河皆通利。而來多去少。壅漲之患。不待智者而始知矣。自雍正迄今。其間創建改易。或經宸斷。或採羣言。謹就徐景曾下河水利考。爲之臚列。首敘運隄開壩涵洞下注之水分達各河之路。次敘各州縣上承下達各河。終敘范陸各閘入海之道。其成案則編年以入章。廣焉。

淮安以下運河。東岸至灣頭閘。各閘壩洩下之水。歸海河道。山陽境內頭洞起。至李宅洞止。水達北溪河。入馬家蕩。由射陽湖入海。迤南寶應境內黃浦閘水。入黃浦溪。東入凌溪。黃昏蕩。達九里蕩。與馬家蕩相連。由九里溝。西建岡河。東至鹽城縣。北串場河。出范隄。由石礮天妃等閘入海。迤南喬家洞。學洞。孫家洞水。入蜆蠃蕩。達馬家蕩。同前入海。縣南躍龍閘水。下望直港。入獐獅蕩。由火盆蜆蠃蕩。達馬家蕩。同前入海。獐獅蕩之東。亦有河道。北通馬家蕩。迤南湯問洞。朱馬灣閘。從

家洞、郎兒閘各水下獐獅、火盆諸蕩，匯入大縱湖。出東塘西塘等河，由北串場河同前入海。迤南張成洞、胡成洞、永安閘、軍民洞水下廣洋湖，達平望湖。北入蜈蚣大縱湖，出西官河，經鹽城縣，南串場河，出石礎閘入海，亦可由大縱湖之東，達興鹽界河，以出范隄，青龍八竈二閘入海。迤南子嬰閘水下子嬰溝，經時堡鎮，達護金蕩、蜈蚣湖，出東官河，由紀家港歸南串場河，出范隄，青龍八竈大團等閘入海，亦可由護金蕩達北官河，分入越河與鹽界河，出范隄之前三閘入海。迤南高郵境內，界首閘、慶豐洞二閘頭，閘通湖橋諸水，下洋馬蕩、沙母蕩、馬奔莊蕩，入護金蕩，出海溝河、白塗河、歸串場河，出范隄，由草堰閘入海。迤南南水關、涵洞、琵琶洞水下運鹽河，達棋盤蕩，同下三壩之水，並入於海。又南南關大壩、南關新壩五里中壩水下南澄子河，歸總澄子河，經棋盤蕩，出梓新車路諸河，歸串場河，出范隄，由丁溪閘入海，亦可由棋盤蕩向北，通得勝湖，東經白塗河，出范隄，小海閘入海。又南車邏壩閘水下新泰興港，達棋盤蕩，同前入海。又南火姚閘水下淥洋湖，達棋盤蕩。又南甘泉縣境邵伯以北昭關壩三閘二閘諸水下苻絲湖，北入淥洋湖，經總澄子河，東入棋盤蕩，由梓新河同前入海。以上各閘壩下注之水，出范隄各閘入海者，照歷次奏圖所繪，敘列下河各州縣境內，上承下達河道。山陽縣境，涇河，淮安府志，乾隆五年，總辦水利大理寺卿汪澹，副都御史德齡題准疏浚，自開口至南簷，長八千八十一丈五尺，接南簷下分挑支河二道，一入安豐河，長一千六十六丈，寬三丈，一入太倉支河，長一千五十五丈，寬三丈，俱入馬家蕩。嘉慶二十一年，普律挑浚，自開口至南簷河，長八千一百四十五丈，在山陽縣境六千一百二十六丈，在寶應縣

境二千十九丈。又南鑿至梁社，浚支河長五百四十九丈。在寶應縣境。又北岔至礪子社，浚支河長二百七十四丈。在鹽城縣境。共用銀二萬五千六百四十五兩零。民捐官辦。涵洞河。見前。北溪河。見前。南溪河。見前。鹽城縣境。新官河。淮安府志治西七十五里。其水由大縱湖東北流出天妃關新河。洩水最捷。七邑民命攸關。康熙二十六年。侍郎孫在豐監修下河水利。挑浚海口。乃西由江官港至岡門東五十餘里。挑挖深闊。直達新洋港入海。東西界河。淮安府志治西南一百里。與興化縣分中流爲界。其水自大縱湖入口。東流七十里。至劉莊關。今名大團關。歸關龍港入海。又自海口北流。經岡溝入串場河。出石礮口入海。雍正七年。大學士陳元龍開浚下河。由五龍口挑至劉莊計五十里。乾隆三年。巡撫許容。奏准首開界河之未開者。俾興泰之水。注於大縱湖。未入新河。先入界河。興鹽之民賴之。九年再浚。嘉慶十八年。自窰灣起。估浚河長九千五百六十丈。南串場河。淮安府志治東南二里。其水自泰州海安壩至劉莊場。入鹽境。出石礮口。雍正七年浚。乾隆十年又浚。以上新官河。出天妃口。東界河南串場河。俱出石礮。而縣境內西南一帶之支河。又俱入此三河。東官河。淮安府志治西南六十里。其水南接興化。西接界河。由界首鋪入口。合西官河。至涇口入新官河。乾隆九年挑。紀家港河。淮安府志治東南自興鹽界起。迤東至串場河擡頭角。長二十八里。乾隆九年浚。西官河。淮安府志治西南五十里。其水接漭溝河。計十五里。合流於東官河。乾隆八年浚。射陽湖。淮安府志治西北一百四十里。西北抵山陽界。分中流爲界。由故晉至喻口入海。今分阜邑。康熙十三年。勘浚下河海口。特命按察司于成龍董其役。侍郎孫在豐繼之。自宋家舍至岡門。凡浚通

四十餘里。三十五年童營決口。並鄰湖之支口亦塞。三十八年。上諭下河現有積水。不得不引出歸海。將串場河射陽湖蝦鬚溝一帶挑通。引積水流。出歸海。四十五年。欽差督浚蝦鬚溝。由是射陽湖出路始闢。**北串場河**。淮安府志。治西北三里。其水由汶河分支。經新興場上岡鎮。復繞范公隄。東北流七十里。至阜寧縣。入射陽湖。舊串場河。劉端浦南有河不通。其北並無河道。乾隆三年。廷尉汪澹副憲德齡。總辦水利。挑浚深通。一以洩汶河之水。直達射陽湖。一以灌一百二十里。從古無河之高田。七邑窮黎漁樵於海。其利甚溥。嘉慶十八年。自皮岔口起。至阜寧境劉莊止。估浚河長一萬六千九百八丈五尺。商辦**東塘河**。淮安府志。治西北五十里。其水西南接西鹽河水。西北入射陽湖。西鹽河爲東塘河之上流。二河久淤。乾隆四年浚**西塘河**。淮安府志。治西北九十里。其水由沙溝北流一百十里。會東塘河。由油葫蘆港入射陽湖。**馬家蕩**。淮安府志。治西北一百里。山寶鹽三邑分界。東西三十里。南北五十里。水入射陽湖。**西鹽河**。淮安府志。治西北八十里。其水由西塘河黃土溝入口。東北至新河廟。轉北入東塘河。乾隆五年浚。以上三河一蕩。俱入射陽湖下海。而縣境內西北一帶之支河。又俱入此三河一蕩。**廖家港**。淮安府志。治西北六十里。其水自東塘河東流至上岡鎮。入北串場河。出范隄。乾隆五年浚。今改名上岡河。嘉慶十八年浚。河長四千五百四十丈。**草堰河**。舊名院道港。淮安府志。治西南七十五里。其水由東塘河東北流。至草堰口。入北串場河。出范隄。乾隆五年浚。**新洋港**。淮安府志。在縣北門外二里。承天妃石碓兩路之水。東會關龍港入海。港寬十五六丈。至二三十丈。深二三丈。自康熙二十六年大開新官河。暢流入海。此港不待疏浚。而深寬逾於舊

時三倍以上兩港一河皆在范隄之東爲入海之路。阜寧縣境。串場河。淮安府志在射陽湖南岸。南接鹽城北串場河。在阜境者長六十餘里。嘉慶十八年浚。此河北通射陽湖。按阜寧串場河之東有陳家衝開河。在北草堰開河之北。其東與鹽城之上岡草堰二河匯注野潮洋入海。並有分支。北入射陽湖。寶應縣境。黃浦溪。揚州府新志在縣北二十里。黃浦鎮南。西通運河。有閘。東入凌溪。會射陽湖。乾隆二十一年浚。此卽山陽境內之南溪河。按嘉慶十八年疏浚下河河道。奏圖黃浦開下注之水。達蜆蠓蕩。北入馬家蕩。以入射陽湖。並無凌溪之名。至馬家蕩。淮安府志言舊郡志載射陽湖在府治東南七十里。山寶鹽三邑分界。則馬家蕩卽射陽湖之一隅。止因湖日淤墊。歷次請開。但稱射陽湖。後遂以入海之河爲射陽湖。而湖身之猶存者。均名爲馬家蕩云。據此。則馬家蕩之與射陽湖。乃一而二者也。凡寶應境內運河東岸開洞東注之水。折而北趨。有稱入馬家蕩以達射陽湖者。有稱竟達射陽湖而不及馬家蕩者。皆無不可也。蜆蠓蕩。揚州府新志在縣東北四十里。南通火盆蕩。西北入馬家蕩。火盆蕩。揚州府新志在縣東三十五里。南通獐獅蕩。北達蜆蠓蕩。西北接黃浦溪。由東而北。入馬家蕩。獐獅蕩。揚州府新志一作章思蕩。在縣東南四十里。南通廣洋湖。北接火盆蕩。西接城子河。由東而北。入馬家蕩。廣洋湖。揚州府新志在縣東南五十里。東西十里。南北三里。南通子嬰河。北通獐獅蕩。西接潼河。承運河各開洞之水。東北會三王溝。入射陽湖。東南通沈梁港。三王溝。揚州府新志在縣東六十里。西南通廣洋湖。中貫箕山。東北入射陽湖。子嬰溝。在縣南六十里。西通運河。北通廣洋。南達洋馬蕩。東入海陵溪河。海陵西自泰州北界起。由南而北。以

至寶應。在縣東九十里。俗呼琵琶頭。高郵興化以此河中流爲界。嘉慶十八年浚。子嬰河尾長一千九百三十六丈。又自閘下起至海陵溪河止。兩岸築隄長七千六百三十一丈。民捐官辦。按子嬰閘在寶應境。其東注之河。則在高郵境內。高郵州境。洋馬蕩卽清水潭之上游。揚州府新志。作羊馬兒蕩。寬二里。長三里。在州東北十五里。南有仁字等支河二道。通運鹽河。北通子嬰河。西承界首。以南州城以北。運河閘洞下注之水。東達沙母蕩。馬奔蕩。入海陵溪。沙母蕩。府志。在州東北四十里。南有頭二三溝。通運鹽河。北通子嬰河。西通洋馬蕩。東達馬奔蕩。入海陵溪。馬奔蕩。揚州府新志。作馬踏港。在州東北七十里。南有支河三道。通運鹽河。北通子嬰河。西通沙母蕩。東達海陵溪。運鹽河。揚州府新志。名閘河。又名東河。在州北退觀橋下。南有寶帶等支河七道。通總澄子河。北通洋馬沙母蕩。馬奔三蕩。西連市河。東達海陵河。河之南爲南上河。河之北爲北下河。南北田地。以此而辨。宋元祐間。郡守毛澤民。於此置斗門石閘。以時蓄洩。隄之南北。皆爲良田。嘉慶十八年。間段浚河長三千八百丈。又培兩岸隄長一萬四千七百七十丈。民辦澄子河。揚州府新志。名城子河。西有南北二河。南承南關大壩新壩五里中壩三壩之水。北承運鹽河。由新河南注之水。匯爲一河。南有菱絲溝。南山陽河關河。以達泰興港。北通運鹽河。東達海陵河。嘉慶十八年。間段挑河長六千九百十丈。又培兩岸隄長一萬八千三百二十九丈。民辦菱絲溝。揚州府新志。在州東二十五里。南通泰興港。北通澄子河。泰興港。揚州府新志。無此河名。而嘉慶十八年奏浚下河河道圖內。繪有此河。在城子河之南。西承八里堡涵洞車邏閘壩火姚閘下注之水。東入海陵河。南通淶洋湖。迨遙河。北通澄子

河嘉慶十八年浚河長二千五百五十二丈又培兩岸隄長三千四百七十丈民辦。按泰興港府州志中皆未開載。惟嘉慶十八年奏圖之內有此名目。考府州志載輿圖八里堡洞車邇閘壩火姚關四處洩下之水皆入南澄子河。而奏圖則繪南北澄子爲二小河。其東匯爲一河名總澄子河。與府州地圖及舊有河圖互異。淥洋湖揚州府新志在州南三十里半屬甘泉縣。水經注作陸陽湖。西接運河隄蔡家潭東河形東通迨遙河紀家河南通菱絲湖北通泰興港海陵溪河揚州府新志在州東北七十里興化寶應二縣俱有海陵溪其實一也。江南通志載亦名橫京河。按海陵溪由泰州西北界尖接淤溪北尾起北流至寶應東南界折而東趨興化境內之蜈蚣蕩止河亘南北高寶興化以河之中流爲界自北而南首承子嬰河之水穿溪以達平望湖次承洋馬沙母馬奔三蕩之水穿溪以達護金蕩又次承運鹽河之水穿溪經興化縣南趨得勝湖東南入車路河又次承泰興港之水穿溪趨噲墩河達棋盤蕩東南入梓新河。甘泉縣境。葑塞湖揚州府新志在城東北五十里北通淥洋湖南接艾陵湖。按現在淥洋湖之南艾陵湖之北有湖名葑絲而府州志內並無葑絲之名以所處之地計之似卽葑塞近又呼爲恆子湖西承昭關壩下注之水南入艾陵北達淥洋。艾陵湖揚州府新志在城東北四十五里邵伯鎮東西接運河二三閘東南趨江都縣之孔家涵河入鹽河東北達山陽河山陽河江南通志載在府城東北六十里北經高郵州東四十五里又北自三梁橋入運鹽河。興化縣境。大縱湖揚州府新志在縣西北四十五里自湖心與鹽城分界。按圖載鹽城之南山寶兩縣之北有湖橫亘南北北曰馬家蕩南曰九里蕩再南曰大縱湖再南

曰蜈蚣湖。名目各殊。其實則一。蜈蚣湖。府志乃吳翁湖。昔有吳高尙隱於此。故名。在縣北二十三里。湖在興化境內者。西通獐獅蕩。廣洋湖。東通興鹽界河。南通平望湖。西南通海陵溪。平望湖。揚州府新志。在縣北二十里。南通護金蕩。北通平望湖。西通海陵溪。護金蕩。揚州府新志。名烏金。興化縣志作烏巾。在縣治西半里。西通海陵溪。東通北官河。府志又言。護金蕩合蜈蚣大縱九里。馬家等湖。匯爲一河。其東北出蝦鬚溝。經阜寧。出射陽湖入海。南官河。卽運鹽河。縣南四十五里。接泰州之寧鄉河。北流至縣南。轉東。又北流爲北官河。又北入鹽城。此河南北橫亘。凡高郵境內。西水之達范隄各河者。皆穿此河。東注。府志言。南接高郵州河口。鎮之豐樂橋。似有未確。河口鎮在高郵鹽河之尾。入海陵溪處。且在興化縣治之西也。得勝湖。揚州府新志。卽率頭湖。在縣東十里。廣袤皆二十里。西通運鹽河。東達車路河。南通棋盤蕩。棋盤蕩。揚州府新志。作旗干蕩。在縣東十三里。西接薊墩河。達鹽河。東南入梓新河。東塘港。西塘港。揚州府新志。在縣東六十里。南通泰州運河。北通鹽城。南北橫亘。按。東西塘港。南北橫亘。南抵東臺。蚌蜒河。北抵興鹽界河。凡西穿鹽河。東注范隄。各河之水。皆穿此河下達。南抵泰州鹽河。猶係未分。東臺以前之言。串場河。揚州府新志。在縣東一百二十里。舊志所名。換鹽河是也。河沿捍海堰。卽范公隄。經各場。北達鹽城境內之南串場河。按。興邑串場河。南自東臺界起。北至鹽城界止。河之東。卽范公隄。自北而南。有大圖八竈。青龍一里墩。並北中二閘。再南。有白駒葦子草堰各關。以上皆興化縣之經河。南北橫亘者。以下皆東西河。上承西來之水。東出范隄。以入於海者。興鹽界河。揚州府新志。在興化縣之東。北爲興鹽分界之處。水入場河。出范隄。



青龍八窰大團三關。海溝河。揚州府新志。在縣東北四十里。在界河之南。西達運鹽河。東入場河。出范隄自駒一里墩等四關。嘉慶十八年浚。河長八千五百五丈。前七關並迤南葦子開洩下之水。各有引河。匯入鬪龍港。東北趨入海。關下各引河。嘉慶十八年浚。共長二千一百九十一丈。商辦。白塗河。揚州府新志。在縣東十里。又在海溝之南。西達鹽河。東入東臺縣境。串場河。出范隄小海關。嘉慶十八年浚。河長八千五百二十七丈。民辦。關下引河。達王家港入海。十八年取直挑河。長四千二百四十丈。商辦。車路河。揚州府新志。在縣東三十里。在海溝河之南。西經得勝湖。以通運鹽河。東南入東臺縣境。串場河。北折出范隄丁溪關。嘉慶十八年浚。河長五千二百三十八丈。民辦。關下引河。達古河入海。十八年浚。最淺之戴家古淤河。長一萬一千六百八十丈。商辦。梓新河。揚州府新志。在縣東南十五里。在車路河之南。東通塘港。西達得勝湖。通志言。梓新河在興化縣東四十里。按。輿圖河在車路河之南。東達河梁合串場河。乾隆十一年。二十八年屢浚。河東南入東臺縣境。串場河。北流出范隄丁溪關入海。嘉慶十八年浚。河長六千三百十丈。民辦。蚌沿河。揚州府新志。河防各書作蚌蜒河。在縣南三十五里。在梓新河之南。西接亭陵鎮。與泰州分界。東下一百二十里入東臺境內。串場河。乾隆八年。二十八年屢浚。嘉慶十八年又浚。河長一萬六千二百五十丈。泰州境。運鹽河。揚州府新志。有西南北三河。西運河自江都灣頭鎮而東。經州西二十五里斗門鎮。入州境。卽漢吳王濞開以通運者。南運鹽河自州治南折而東。抵通州以及各鹽場。入於海。北運河在州治北。通十二鹽場。名串場河。一統志載。運鹽河自灣頭關洩邵伯運河之水。東流經泰州西三十里斗門

鎮。又東至城南北通城濠。貫城爲市河。中經運河壩。又東行一百二十里。至海安鎮。入如皋縣界。此府志所稱西北二運河也。自城南運河壩。分支南流。爲濟州河。三十里至廟灣。二十里至泰興縣之紫墟鎮。西南達揚子江。商舶多由此入。此鹽河之支河。又北運河自泰州城北一里之東西二壩。南接市河水。北至新城。分爲三。一自新城東北流十五里。至於祈河。府志一名淤溪河。在州東北三十里。又東四十里至秦潼鎮。又東六十里。至西溪鎮。卽晏溪河也。舊志謂之西溪。一自新城北行。經港口鎮。又北經寧鄉鎮。又北達興化縣之運鹽河。亦曰浦汀河。府志在州北。自魚行壩直抵興化高郵寶應。卽海陵溪也。一自新城西北行八十里。至樊汊鎮。亦曰運鹽河。西溪又分爲二。自西溪東出。歷梁垛安豐富安三場爲閩河。又南行四十里至海安鎮。鎮南卽運鹽河也。一自西溪東北出者。經東臺河。梁二場。謂之串場河。與興化縣之運河會。興化運鹽河自高郵州西接新開河。東流八十里。抵河口鎮。一名閩河。亦曰東河。匯下河。匯州東南白塔澄子山陽諸河水。入興化縣界。南通蚌蜒河。又東至縣城。南分流爲城河。經得勝湖。又東爲車路河。東流九十里。入泰州界。今屬東臺。匯串場河。歷丁溪草堰諸場。北流至縣。東十里之白駒劉莊二場。又北達鹽城縣界。石礎天妃二閘入海。通志。雍正九年。濬泰州鹽河及串場車路海溝諸河。築堰建閘。工程告竣。按輿圖府境。自運河以東。鹽河最大。泰州之鹽河。所以洩邵伯水。查泰州之西有江都芒稻石羊諸河。已在上游先爲分洩。不僅恃泰州入江。高郵之鹽河。所以洩新開湖。一南從泰興通州入海。一北從鹽城入海。二河支分派別。屈曲相通。而邊海之串場河。橫絡南北。其東入海之路有四。一曰天開河頭。在河梁場東西。承梓新河。

水。一曰苦水洋。在天開河頭北。丁溪場東。西承車路河水。一曰鬪龍港。在苦水洋草堰東北。西承白塗河及海溝河水。又北則爲劉莊海口。入鹽城縣界。雍正九年。濬泰州運鹽河二萬五千七百八十八丈。串場河一萬一千餘丈。又浚車路海溝等河。凡入海各處。建閘宣洩。乾隆九年。浚南北串場河。二十二年。河底開深五尺。二十八年。重浚。並各開外引河。嘉慶十八年。浚泰州斜豐河。此河西通甘泉之艾陵湖。東通興化蚌蜒河。長五千八百七十三丈。兩岸築堰長一萬一千七百四十六丈。又浚淤溪河。長一千二百六十丈。兩岸築堰長二千五百二十丈。民辦。東臺縣境。梓新河。蚌蜒河。揚州府新志。興化東臺兩縣。皆載有此二河。乃兩縣分屬之故。已詳興化縣下。連鹽河。揚州府新志。在縣西南。自海道口起。西南由時堰鎮。出青蒲角。經秦潼淤祈。抵泰州。一百二十里。又自秦潼西入思賢港。一經喬樹。抵邵伯。一百八十里。一出孔家涵。由六開抵郡城。二百七十里。上承上運河各壩減下之水。由綠洋艾陵等湖。經泰州小溪河。入運鹽河。歸串場河。出丁溪閘。下古河海口。入海。乃各場運鹽總匯。兼利民田灌溉。行水金鑑所謂下運河是也。又名北運河。雍正乾隆年間屢浚。嘉慶十八年。自秦潼起。經海道口。北連串場河。至草堰閘止。估浚河長一萬七千四百九十丈。又培築秦隄長九千九百丈。商辦。縣志載。本擬二十年夏興挑。會大雨不果。串場河。東臺縣志。衆水匯歸之河。故曰串。地繞鹽場東。以范公隄爲堰。故曰串場。自泰州海安徐家壩起。歷富安等十一場。至阜寧射陽湖出口。爲泰州串場鹽河。今自海安徐家壩西百子橋涵洞。至富安場通遠橋。五十里。北經安豐梁梁二場。至縣城。又五十里。自縣城南門。經河梁場入海道口。在縣治西門外。舊分海大口。未築范公隄以

前之海口也。今爲串場蚌蜒梓新河出入門戶。由丁溪草堰白駒劉莊伍佑各場。至鹽城縣一百六十里。自鹽城縣北由廟灣場至阜寧縣一百六十里。上承下運河蚌蜒梓新車路白塗海溝界河之水。由丁溪小海草堰白駒青龍八竈大團石礎天妃正越各關。入古河口王家港鬪龍港新洋港射陽湖等海口歸海。爲各場運鹽通津民竈田疇灌溉之資。且爲七州縣洩水下游要道。自河埭至富安。爲南串場河。自廟灣射陽湖南岸入口。歷鹽城縣。至河埭。爲北串場河。雍正乾隆年間。歷次疏浚。嘉慶十八年。浚北串場河。自海道口起。至草堰南關止。計長四千一百丈。二十年挑南串場河。自富安通遠橋起。至安豐南石橋止。計長三千三百九十丈餘。安豐梁埭東臺河埭四場。因雨暫停。至今未辦。原估東臺境內串場河。自秦潼起。至草堰北關止。應挑河長一萬七千四百九十丈。幫築秦隄九千九百丈。今鹽務止浚長四千一百丈。十八里河。東臺縣志。在治南十八里。自梁埭串場河迤西。至殷莊十八里。又自殷莊至縣城南門十八里。故名。嘉慶十八年。估挑連支河共長四千二百丈。鹽務未辦。大尖河。東臺縣志。名六十里河。又名三汊河。在縣治南二十五里。自安豐串場河之李家港迤西南六十里。出青蒲角。由秦潼抵泰州。嘉慶十八年。估挑至富安界止。河長九千九百三十丈。鹽務未辦。

范公隄卽捍海堰。起自阜寧縣之廟灣射陽湖南。經鹽城東臺。折向東南。沿如臯通州至呂四場。天后宮止。延袤六百一十一里有奇。內自廟灣至丁溪場。隄長一百九十二里八分。自丁溪至富安場。隄長九十九里二分。自富安至呂四場。隄長一百五十三里零。李世祿南河圖說。按行水金鑑引河

防志言。范公隄一名捍海堰。宋天聖間。范仲淹監西溪鹽倉時所築。從廟灣沙埠頭。歷鹽城興化泰州如皋。至通州界止。共長五百八十二里。比圖說所載六百一十一里之數。計少二十九里。沿隄墩臺四十三座。開洞八座。此隄束內水。不致傷鹽。隔外水。不致傷稼。乃濱海一帶之屏障也。淮安府志言。范公隄卽捍海堰。安東志名古淮隄。隄在鹽城。自東北直抵通泰海門。唐大歷中。黜陟使李承爲淮南節度判官。謂海潮漫爲鹽鹵。雖瓦田必廢。請自楚州鹽城南抵海陵。修築捍海隄。綿亘兩州。潮汐不得浸淫。宋天聖中。張綸刺泰州。專圖修復。時范仲淹監西溪鹽倉。悉力贊之。謂當移隄勢而西。稍避其衝。仍疊石以固其外。紆斜迤邐如坡形。不與水爭。天聖五年功成。因名范公隄。長一百四十三里有奇。脚闊三丈。面一丈。高一丈五尺。元詹士龍爲興化縣尹。請發九郡人夫併築。十有六月成。延亘三百餘里。明萬歷十年。總漕都御史凌雲翼。題准修築。建洩水涵洞水渠十七處。石閘一座。洩捍兩得。十五年。巡撫都御史楊一魁。以黃淮交漲。舊開洩水不及。山鹽六邑。田沈水底。挑浚廟灣射陽湖等處河道。水有所洩。范隄乃固。今考乾隆十二年。淮安府知府衛哲治所修府志載。鹽城捍海堰。治東一里許。宋史河渠志載。楚州沿海。舊有捍海堰。東距大海。北接鹽城。延袤一百四十二里。始自唐黜陟使李承所建。遮護民田。屏蔽鹽竈。其功甚偉。歷時既久。傾圯不存。至天聖改元。范仲淹爲泰州西溪鹽官。請於朝。調四萬餘夫。修築三旬。畢工。乾道八年。提舉趙伯昌。復請隨時修葺。從之。元詹士龍爲興化令。修築。明景泰三年。知府邱陵委千戶馮祥主簿袁敬重修。宏治間。都御史張敷華委官陸本修。嘉靖十七年。縣丞吳鼈修。萬歷十一年。漕河尙書凌雲翼。巡按御史姚士觀。巡鹽御史任

養心會題委知縣楊瑞雲運判宋子春修建洩水涵洞水渠十七座石閘一座十二年四十三年又修至國朝乾隆三年總理水利汪澹德齡暨諸河道同時鳩工修築趾三丈二尺面一丈二尺高一丈又考東臺縣志載范公隄一名捍海堰當縣治東西之中綿亘各場隄之東屬竈隄之西屬民街市閭閻多處其上隸縣境者二十里南接如臯北接興化鹽城晏溪志唐大歷元年黜陟使李承任淮南節度判官憂海潮漲漫田疇盡廢乃自楚之鹽城入揚之海陵綿亘百餘里築堰以捍海民獲奠居宋開寶中知泰州事王文祐增修之後漸圯頽天聖元年范仲淹監西溪鹽倉條其工役程度白運使張綸酌量移堰稍近西溪以避海潮衝擊仍疊土以固其外延袤迤邐如坡形不與水爭雖有洪濤不能爲患綸陳其事請以范仲淹任興化令二年遂與斯役起自海陵東新城至虎墩越小淘浦以南值隆冬雨雪連旬潮勢洶湧兵夫在泥淖中死者二百餘人會朝廷遣使按視將罷之後命胡令儀爲兩淮都轉運使以察可否令儀常宰海陵熟知其利害乃抗章請必成之時仲淹丁母憂去任猶遺書堅綸志綸自請兼知泰州以總其役自五年秋越六年春堰成長二萬五千六百九十六丈六尺計百四十三里趾厚三丈面三之一崇半之版築堅固輒繫周密潮不能侵自是流移復業者三千餘戶人呼爲范公隄以仲淹力贊之也虎墩卽今小海越小淘浦卽今安豐宣和中水勢奔衝淹沒田地周三百餘里乾道七年海潮復衝擊二千餘丈蓋堰雖跨三州而在通楚界者少故泰之損者獨多知州徐子寅興工修治因議請置鹽場官分治其境場大使之設始此淳熙元年諸司復料工役以知泰州事張子正請也就舊基形勢修築其鹽場竈所又別爲隄岸以避潮汐

而防廢壞。卽今馬路。二年冬。張子正以修繕勤勞。喪於河口。知州魏欽緒接任。竟其工。八年。揭舉趙伯昌奏請修葺。紹定七年。風潮逆猛。又損四百餘丈。逾年乃克修築。不能如天聖中鞏固矣。元至正二十七年。提舉朱冠卿。以堰損於潮。檄官同視。復集兵夫。節修五千餘丈。迨詹士龍令興化。請發九郡人夫並築。十有六月而成。時獲一方石。上刻逢詹再修。景祐二年八月仲淹記。十三字。人多異之。新舊鹽法志。明洪武二十三年。潮發。捍海堰壞。死者三萬人。朝命起蘇松淮揚四郡人夫修築。成化七年。潮發。死者二百餘人。又命起淮揚二郡人夫修築。十三年。巡鹽御史雍泰。正德七年。巡鹽御史劉士繹。嘉靖十九年。海門令汪有執。先後修築。萬歷十年。都御史凌雲翼。題准修築。建洩水涵洞。水渠十七座。石閘一座。十一年。分司蔡文範。十五年。巡撫楊一魁。四十三年。巡鹽御史謝正蒙。兵備道熊尙文。先後修築。至國朝康熙間。令臺使重修。雍正十一年。詔以范公隄爲沿海藩籬。鹽場屏障。急應修築。命總督魏廷珍勘修之。十二年。河督高斌奏准。於柘茶角斜等處。先後動支運庫銀。陸續築固。又隄頂修開車道埠口。每里設堡夫一名。計程三百五十六里。共設堡夫三百五十六名。每名每月給工食銀五錢。於運庫商捐項下支給。卽募沿隄附近居民充當。毋庸建造堡房。朝來暮返。每日挑積土牛。修補殘缺。責成該地方河員查核。乾隆五年。大理寺卿汪澹等疏。柘茶角斜二場。范隄殘缺。加築格隄。建設涵洞。十一年增修。二十二年還築。開洩河湖異漲缺口。二十四年。鹽政高恒。奏明通泰二州。范隄修築工程。歸於鹽務。分別緩急。分年商捐辦理。嘉慶四年。富安安豐等場。海潮倒灌。巡撫岳起。飭范隄各壩。加築堅固。毋許開放。十年。河湖異漲。十一。十二。十三年。漕隄屢決。照乾隆七

年十八年例開隄宣洩積水。後皆還築以防海溢。查范公隄起於廟灣。廟灣昔屬鹽城。雍正十年。析山陽鹽城兩縣之地。添設阜寧縣。廟灣遂屬阜寧。止於通州。延袤六百餘里。自唐迄明。接築起止。志乘所記亦復大同小異。卽府州縣志各敘本境。詳略不同。如揚州府新志敘興化泰州東臺。東臺本泰州地。乾隆三十六年。析泰州西北之地。添設東臺縣。故東臺縣志所敘遠年之事。皆稱州。而三州縣之范隄開壩。置而弗論。於此知文獻之無徵。康熙以後。以范隄爲山盱五壩尾閘。於是建開培隄。疏洩河道。疊煩睿慮。屢派重臣。創爲經久瓦礫。自乾隆二十七年以後。垂今六十年。雖因時補苴。大概規模。並無更易。至雍正乾隆年間。興辦下河水利。修治范隄。不過節修。故無段落長丈可記。今就志乘所載。有關蓄洩之沿隄開座。北起鹽城之北草堰開。南迄東臺之丁溪開。創建裁改。逐一臚列。以備參閱。一本淮安等府鹽城等縣志。並鹽城等縣丞天妃等閘官事宜冊。自丁溪開南至通州隄。閘亦有開壩。事屬水利鹽法。無關河工。故省不錄。

**鹽城縣境** **北草堰開**。在縣治北七十五里。草堰口。雍正七年建。乾隆五年。總理水利汪濬德齡。委官移建劉端浦。陡門一。按。開在范隄之東。草堰河內。草堰河本名院道港。乾隆五年改名。**上岡開**。在縣治北四十五里。上岡鎮。雍正七年。建於串場河西岸。乾隆五年。移建今處。陡門一。按。開在范隄之東。上岡河內。上岡河本名廖家港。乾隆五年改名。河北流與草堰河合。並入海。**天妃開**。在縣治北門外二里。舊河寬二十七丈。爲七邑洩水要口。每秋潮水越口而上。苦不可飲。鹵不可灌。甚則漫溢民田。土不可耕。屢議建開。率以河身甚寬。土患浮濡而止。乾隆三年。撫臣許容治河疏內。請於此建開。總理水利汪濬德齡。親往相度。其議



遂定。乃建立斗門五。磯心四。闊九丈。雖上流暴水驟至。不無阻束之虞。而鹽邑斥鹵之患。庶乎少免。開建於乾隆五年。五孔四磯。心高二丈四尺。砌石二十層。每孔金門寬一丈八尺。嘉慶六年修。天妃越閘。在縣治北門。距正閘百餘步。乾隆十二年。知縣黃垣詳建。閘三孔二磯。心高一丈九尺二寸。砌石十六層。每孔金門寬一丈九尺二寸。嘉慶六年修。石礎閘。在縣東門外一里。明萬歷四年。知縣杜善教。請浚河建閘。河通海潮擁至。壞閘傷田廬。八年。巡鹽御史張璧。奏請築塞。仍於石礎南。別置閘備潦。雍正七年。大學士陳元龍鄂爾泰。奉命閱視水利。仍請立閘。乃與上岡草堰二閘。先後建築。以禦鹹潮。閘二孔一磯。心高一丈六尺八寸。砌石十四層。每孔金門寬一丈六尺。該閘地勢較高。天妃閘七尺。洩水有限。乾隆六年。修嘉慶六年。又修。按天妃石礎二閘之水。皆由新洋港入海。查東臺縣志載。乾隆元年。總督趙宏恩題准。石礎口一閘。歸鹽城縣丞管理。廖家港草堰口二閘。歸新興場大使管理。新洋港海口。設犁船二隻。混江龍二具。每歲春秋二汛。拖刷二次。每次以十日爲率。實成鹽城縣丞。五年。吏部覆准。總辦水利汪澹德齡。以新建之天妃閘。並上岡北草堰二閘。距該場司寫遠。請於天妃石礎二閘。設閘官一員。上岡北草堰二閘。設閘官二員。十年。總督黃廷桂奏准。將鹽城上岡草堰兩閘官裁汰。改爲丁溪海堰閘官。又天妃閘官冊開。現管天妃正越石礎三閘。額設閘夫四十名。皂隸二名。每名每月工食銀四錢八分四釐二毫五忽。在鹽城縣庫支領。興化縣境。大團閘。距劉莊場北二十五里。在治東北。乾隆十二年建。兩孔一磯。心高一丈三尺二寸。砌石十一層。金門各寬一丈八尺。板皆雙槽。八竈閘。乾隆十二年建。兩孔一磯。心高一丈三尺二寸。砌石十一

層。金門各寬一丈七尺二寸。板皆雙槽。開距劉莊場署一里。又名一里墩開。青龍開。距劉莊場署南半里。雍正七年建。兩孔一磯。心高一丈三尺二寸。砌石十一層。金門各寬一丈八尺。乾隆二十三年拆修。板皆雙槽。向亦安豐巡檢經管。雍正十一年。改歸場大使管理。管范公隄南北長五千五百九十餘丈。計三十一里零。前三開。宣洩高郵各壩減下之水。由南北官河海溝河興鹽界河。歸串揚河。出開。由開下引河至鬪龍港。計程四十里。又自鬪龍港至大洋。計程一百五十里。該三開共設開夫二十名。每年除閘。類給工食銀一百二十兩。係於地丁項下。由縣分季支領。開係劉莊場大使專司啓閉。河係安豐巡檢兼理。各開金門。向設開板雙槽。禦潮蓄運。迄今年久失修。板繩朽爛。節詳請修。未蒙鹽務發辦。開下引河於嘉慶十八九年挑浚。現在深通。各開年久失修。開底形如釜底。開牆倒卸。磯心動搖。滲水。經劉莊場大使。於二十三年。在開下築土壩啓閉。該場南至白駒界十二里。北至大團開二十五里。開北三里。至鹽城伍佑場界。按大團八窰青龍三開。坐落劉家場。八窰青龍二開。向歸場大使經管。大團開係安豐巡檢經管。乾隆二十六年。總督高晉。以該開去巡檢駐劄處。相距九十餘里。難以遙制。將大團開歸併劉莊場。大使就近兼理。一里墩開。在治東南。距白駒北開一百十丈。北距青龍開十七里。乾隆十二年建。五孔四磯。心高一丈三尺。砌石十一層。每孔金門寬一丈八尺。磯心各寬一丈四尺。板皆雙槽。白駒北開。建於明季。雍正十三年重修。乾隆五年移建。開一孔。高一丈四尺二寸。砌石十二層。金門寬一丈八尺五寸。板雙槽。白駒中間。距南開二百六十丈。建於明季。雍正十三年重修。乾隆五年移建。開一孔。高一丈三尺五寸。砌石十二層。金門寬二丈。板

雙槽白駒南閘。南距東臺境草堰閘三十里。建於明季。雍正十三年重修。乾隆二十二年改建。兩孔一磯。心高一丈四尺五寸。砌石十二層。每孔金門寬一丈九尺五寸。磯心寬一丈五尺五寸。板皆雙槽。前四開東禦海潮。西洩上游海溝等河。並串揚河之水。由閘入引河。達馬港口牛灣河。經鬪龍港。歸海。計程一百八十里。各閘年久未修。已將損壞。閘下入海河道。亦間淤淺。乾隆五年。設立閘官一員。管理白駒三閘。二十二年。一里墩閘成。並令兼管白駒三閘。額設閘夫二十二名。一里墩閘。額設閘夫十四名。每名月給工食銀五錢。在興化地丁項下支領。四十七年。奉督漕撫三院刊立石碑。每年三月朔日。各閘下板。雙槽填土。蓄水運鹽。九月朔日。啓放洩水。

**東臺縣境 草堰越閘亦名葦子港閘。**在縣治北二十八里。葦子港。乾隆十二年改建。三孔兩磯。心高一丈三尺二寸。砌石十一層。每孔金門寬一丈六尺。磯心各寬一丈二尺四寸。板用六槽。分洩草堰正閘之水。亦入鬪龍港歸海。閘久未修。**草堰正閘。**在縣治北二十八里。雍正七年改建。兩孔一磯。心高一丈四尺七寸。砌石十四層。每孔金門寬一丈六尺。磯心寬一丈二尺五寸。板用四槽。東禦海潮。西洩高郵興化湖河之水。由閘入鬪龍港歸海。計程二百十里。**小海越閘。**在縣治北二十五里。乾隆十二年建。兩孔一磯。心高一丈四尺四寸。砌石十四層。每孔金門寬一丈六尺。磯心寬一丈二尺七寸。板皆雙槽。分洩正閘之水。亦入王家港海口歸海。年久未修。閘已塌壞。**小海正閘。**在縣治北二十五里。雍正七年改建。兩孔一磯。心高一丈二尺八寸。砌石十二層。每孔金門寬一丈六尺。磯心寬一丈二尺。板皆雙槽。東禦海潮。西洩泰州東臺串揚河。並興化車路河烏金蕩諸水。由閘入王家港歸海。計程一百二十里。閘久

未修。丁溪閘。在縣治北十八里。明萬歷十一年。巡按姚士觀疏。與小海閘同建。舊係二孔。雍正七年。修乾隆十二年改建。五孔四磯。心高一丈三尺二寸。砌石十一層。每孔金門寬一丈六尺。磯心寬一丈二尺五寸。板用十槽。東禦海潮。西洩泰州興化蚌蜒梓新等河蕩之水。南洩富安安豐串場河之水。由閘達古河口歸海。計程一百八十里。閘久未修。查東臺縣志載。乾隆元年。總督趙宏恩奏准。草堰小海丁溪三閘。各歸場大使管理。王家港海口。設犁船二隻。混江龍二具。每歲春秋二汛。拖刷二次。每次以十日爲率。責成泰州州同經管。十四年。總督黃廷桂奏准。將鹽城上岡北草堰兩閘官裁汰。改爲丁溪海堰閘官。三十九年。總督高晉奏准。裁丁溪閘官。改設富安司巡檢。所有閘務。歸併海堰閘官兼管。丁溪閘原設閘夫四名。改建五孔後。添設十一名。小海草堰正越四閘。原設閘夫二十七名。內裁十一名。爲富安巡檢弓兵。共計閘夫三十名。每名每季給工食銀一兩五錢。在地丁項下支給。又閘官冊開。乾隆四十七年。奉督撫鹽三院刊立石碑。每年三月朔日。下板填土。築壩蓄水。運鹽。九月朔日啓板。五十五年。泰分司東臺縣興化縣議。詳司道督撫鹽院批准。豎立石碑。草堰正閘正孔。援照鹽城石磯閘之例。仍留一孔。用雙槽閘板啓閉。以濟鹽運。再查舊圖所繪。下河范公隄閘河情形。如臯縣境界角斜場起。范隄之東。由北而西。止於古河東岸。有土隄一道。註稱馬路。此卽東臺縣志所謂其鹽場窻所別爲隄岸。以避潮汐而防廢壞。註稱卽今馬路者也。

# 續行水金鑑卷第七十二

運河水江以南七郡運河 原委八

運河自鎮江府丹徒縣西北之京口經府城西南有支港入於大江又東南經練湖東經丹陽縣西北分繞城之左右而南分一支入於大江又南有南運河自溧陽金壇合長蕩湖支津及太平河來會又南有丁義河白鶴溪自金壇縣來會皇朝通志

江南運河自鎮江府治丹徒縣西北之京口正北對揚州府之瓜洲西口江心有金山山之南卽渡舟所經也口西南岸卽銀山亦曰蒜山運河經其麓南經府城西稍南入閘折而東經城南又東十餘里經丹徒鎮南又東折而東南有支港北流至大江支港在丹徒鎮東其入江之口在府城東北十餘里又東南經新豐鎮西上下練湖之東練湖自北而南長數十里形如葫蘆腰細在運河西岸北曰上練湖當新豐鎮之西南南曰下練湖南至丹陽城西運河之西岸至丹陽縣城西北分絡城之左右而南其東經城北者東北分一支爲九曲河東北至包港鎮北入大江包港口在丹陽東稍北七十餘里口對岸正北爲泰州境正東爲泰興縣西境運河至城南有南運河南自溧陽金壇北流會長蕩湖支河及太平河來會南運河原出溧陽西南之胥河西北至舊縣上興河縣南之戴埠河者會於縣城實東南至宜興東入震澤爲荆溪之上源見後太湖卷運河自縣城北西連上興河東連徐舍河北流數十里會東北來之崑崙河卽長蕩湖西南支津也又會西南來上興支津之南

渡河。又北流三十里。會西南來上興支津之北渡河。又北流。有金壇西境之茅山水。自西北來會。而長蕩湖正西支津。亦自東南湖溪鎮來會焉。又北至金壇縣城西南。分經城西南二面。其東經城南者。於城東南有長蕩湖西南支津。亦曰運河。自東南來會折而北。經城東。有直塘河南通常州府城。稍北分一派。東北流。又分二派。西曰丁義河。東曰白鶴溪。其正支北經城西。又折經城北。會東支水。北流。爲南運河。經延陵東鎮之西。又北數十里。分爲二派。一東北流。正支西北流。至丹陽城南。有太平河西南自延陵西鎮東北流來會。又北入運河。長蕩湖亦曰洮湖。在金壇東南宜興西北。其水亦東南入震澤。見後太湖卷。又東南流。會南運河東北出之支津。又南數十里。會南來之丁義河。又東南會南來之白鶴溪。丁義河白鶴溪。卽金壇城東北分南運河一派東北流而又分爲二派者。水道提綱。

鎮江府運河。自常州府武進縣界西北流。入經丹陽縣城南。又西北流。經丹徒縣西。又北踰大江。入揚州府江都縣界。雍正三年。詔發帑修濬運河閘壩。自江口至奔牛閘一百六十里。其歲修則以江浙原編修河銀協濟。乾隆七年。撫臣陳大受奏請每歲撈淺。責之丹陽丹徒二縣縣丞。六年大挑。專責鎮糧廳承辦。以爲定例。大清一統志。今按乾隆五十四年。裁鎮江府水利通判。改歸江防同知兼管。隸淮揚道。嘉慶七年。奏明與揚糧廳改隸常鎮道。又按六年大挑後。改爲三年大挑。每年歲修。至今因之。

漕渠舊志不載渠所自始。今謹按王志而參考之。秦鑿丹徒曲阿。見吳錄輿地志。齊通吳會。齊志。丹

徒水道入通吳會。隋大業六年，敕穿江南河，自京口至餘杭，八百餘里，廣十餘丈，使可通龍舟。按舊志引唐孫處元所撰圖經云：雲陽西城有水道至東城而止。建康實錄：吳大帝赤烏八年，使校尉陳勳作屯田，發屯兵三萬，鑿句容中道至雲陽西城，以通吳會船艦，號破岡瀆。上下一十四埭，上七埭入延陵界，下七埭入江寧界。於是東郡船艦不復行京江矣。晉宋齊因之。梁以太子名綱，乃廢破岡瀆，而開上容溝。在句容縣東南五里，頂上分流，一源東南流三十里十六埭，入延陵界。一源西南流三十六里五埭。注句容界，西流入秦淮，至陳霸先，又湮上容瀆，而更修破岡瀆。隋既平陳，詔並廢之。則知六朝都建康，吳會漕輸自雲陽西城水道，徑至都下。故梁朝四時遣公卿行陵，乘舫艦自方山至雲陽。隋大業中，煬帝幸江都，遂東遊吳會，始自京口開河至餘杭。此說不然。京口有渠，肇自始皇，非始於隋也。蓋六朝漕輸由京口泛江，以達金陵，則有風濤之險。故開雲陽之瀆，以達句容，而京口固未嘗無漕渠也。詳諸實錄，所謂東郡漕艦不復行京江之語，可見輿地志。晉元帝子衷鎮廣陵，運糧出京口，爲水濶，奏請於丁卯港立埭，又齊志：丹徒水道入通吳會，皆六朝事。尤爲明驗。則是煬帝初非創置，不過開使寬廣耳。及觀京口詩集：宋乾道庚寅郡守蔡洸濬渠河成，郡人顧致堯作詩記之。有曰：兩岡相望山壁立，地形脊高勢回躡。練湖寸板雖得尺，虔亭泄去如尾閘。自從秦鑿興緒徒，大業廣此肆遨娛。歲久不治成厥廢，下視一線皆泥塗。觀此則渠始於秦明矣。宋天聖中，開新河，宋會要：天聖七年五月，兩浙轉運副使言潤州新河畢工，降詔獎之。慶歷中，疏蒜山河，慶歷中，鄭向爲兩浙轉運副使，疏潤州蒜山漕渠，抵於江。治平中，修夾岡河道。治平四年七月，都水監言兩浙相度。

到潤州。至常州界。開洶運河。廢置堰閘。乞候。今年住運。開修夾岡河道。從之。政和中。開西舊河。政和六年八月。敕鎮江府旁臨大江。舟楫往來。每遇風濤。無港可容泊。以故三年之間。溺舟船凡百餘艘。訪聞西有舊河。可以避急。歲久湮廢。宜令發運司計度。深行浚治。委官處畫。早令告功。乾道中。自丹陽。濬至夾岡。自利涉門。濬至江岸。乾道六年。郡守蔡洸。自丹陽之南。濬河至夾岡。八年。郡守宋自利涉門之北。濬至江岸。郡倅陶之真。有記。今不存。淳熙中。自京口。開濬至江口。淳熙二年。郡守張津。自京口。開以北。濬至江口。文惠錢良臣。記在府治。今亦不存。嘉定中。自江口。濬至城南門。嘉定志。嘉定癸酉時。史彌堅。領郡事。與運副吳鑑。總領錢仲彪。沿渠按視。通行打量。自江至南水門。共長一千八百六十九丈。約總用濬渠。修閘三十七萬六千五百九十二工。又慮農事將舉。役民非宜。官軍健捷。器用利便。宜委戎司。庀其役。規模先定。條列上聞。明年報可。乃決渠水。立表識程功。作越四月。連渠底績闊至十餘丈。深至丈餘。禮部侍郎李璫。及彌堅。皆有記文。多不載。元至。元大德間。屢募淘淺。泰定間。復加濬治。泰定元年正月十七日。庀役。三月四日。竣事。每夫日給官米三升。中統鈔一貫。凡費米三千一百一十八擔五斗。鈔一十萬三千九百五十貫。鎮江府志。明洪武初。京口閘廢。東南漕運轉新河。江陰二港。以出江。多爲風濤所阻。鎮江府劉辰。乃於京口至呂城百二十里。作壩修閘。運道乃通。永樂間。浚鎮江京口新港。及甘露三港。以達於江。漕舟自奔牛。溯京口。水涸。則改從孟瀆。右趨瓜洲。抵白塔。以爲常。永樂二年。浚丹徒通湖舊河。景泰元年。築丹陽。甘露等壩。天順中。重濬。復鑿社稷壇西隙地。以通濠。塹達於漕河。正德二年。復浚白塔河。及江口四閘。自鎮江裏河。開浚。漕舟出。



甘露新港。徑渡瓜洲。而白塔北新。皆以江路險遠。捨而不由矣。崇禎間。張國維巡撫江南。十一年築鎮江漕渠。報竣。崇禎初。知縣石確重浚漕河。極其寬廣。此後民得休息二十餘年。本朝順治九年開濬。康熙六年重濬。丹徒縣志。

漕渠在丹徒界者四十五里。在丹陽界者九十里。地勢如建瓴。上置京口閘。下置呂城閘。每冬閉閘蓄水。以濟漕艘。不足則以湖水助之。又去呂城十八里。設奔牛閘。水利官親臨閘上。俟漕艘畢入。先閉奔牛閘。後啓呂城閘。以防水洩。嘉靖之季。此制漸弛。冬運河水淺阻。輒驅百姓開濬。隨濬隨淤。歲以爲常。知府吳搆謙。曹一鵬。范世美。始修復舊制。鎮江府志。徒陽兩邑。民挑京口一帶運河。歲竭財力。至雍正二年。特諭督撫漕河四臣。悉心籌畫。或令地方官支用地丁錢糧。或令河員專司其事。於河帑內開銷。再浙省蘇松。向有協濟之例。或令六郡共襄工費。以濟運道。妥議以聞。是年會議大挑物料人工。動用國帑。其歲修仍令六郡協濟。而責之徒陽二邑。疏上。敕部議報可。其浚河人夫。比照淮河之例。官爲雇募。豁除徒陽民累。至每年撈浚。動支樂生洲租息。徒陽二縣河工。向係水利廳經管。雍正二年後。請發司庫匣費。動用報銷。乾隆二十三年。徒邑有樂生洲入官。田灘租息。經巡撫莊有恭奏准。抵充撈浚運河之用。五十四年。水利廳奉文裁汰河工。歸鎮江府管理。如租息不敷。仍請司庫撥項湊辦。丹徒縣志。

元天歷二年。重建漕河分渠。通江各建石閘。以引蓄江水。丹徒縣志。今按。此卽橫越二閘之始。練湖在縣北。周回四十里。新唐書地理志。水經注。元和郡縣圖志。里數多寡不同。輿地志。晉時陳敏

爲亂。據有江東。務修耕織。令弟詣遏馬林溪。以溉雲陽。號曲阿後湖。世說新語。謝中郎經曲阿後湖。曰。故當淵注停著。納而不流。卽此。一曰練湖。一曰練塘。在縣治北一百二十步。唐時近湖居民。築隄橫截一十四里。取湖下地作田。遂分上下二湖。永泰中。轉運使劉晏。刺史韋損狀請重開下湖。南唐昇元中。浚治之。復作陡門。以通灌溉。宋紹聖中。蘇京重浚。紹興七年。向子諤增二斗門。一石礎。淳熙中。增置陡門礎函。記略曰。自長山合八十四流而爲辰溪。自辰溪而爲湖。湖又自別爲重湖。隄環湖四十里。而築高於舊者六尺。加厚四十尺。而半殺其上。舊疏爲陡門者五。爲石礎者三。爲石函者十。有三皆以備蓄洩也。今加板於礎者十有二。加函之管數倍之。而易陡門之柱。以石者抵函之數。景定中。修築岸埭。元初居民占租爲田。至元三十一年。仍濬爲湖。大德九年重修。海陵陳齊記。秦定元年。復加修築。至治二年。總管毛莊言練湖淤淺。宜依灤山等湖農民取泥之法。用船十艘。以五千料爲率。每船用夫三名。以竹罾撈取淤泥。日可取泥三載。十船計三十載。三月通計二十七萬載。令附近田多上戶。驗纜出備船夫。每夫官給米三升鈔一兩。如此於民甚便。監工丹徒縣主簿馬榮祖言。上下二湖。別無上源。正藉高麗長山八十四岔山水入湖。近年湖底狹。蓄水不及一尺。若依灤山取泥之法。恐地利與彼不同。徒費工役。不若就湖取泥。修築隄埭。令其高闊。卽可澆水灌田。計料合修埭長四千七百八十二丈。計九千五百六十四步。下廣三丈六尺。上廣一丈二尺。加土不等。共一十七萬五千六百八十尺。每工挑土四十尺。計用二十五萬一千八百九十二工。并築打一萬八千工。共二十六萬九千八百九十二工。每日三千工。九十日可辦。自秦定元年正月十七日。至三月四日。

官給傭直。修築完具。知事翟思忠作記。明洪武辛巳。知府劉辰。知縣董復。重修堧閘。正統辛酉。知縣陳誼。令耆民督役。築堧植柳。及修東堧二陡門。景泰中。巡撫都御史周來學。又加修治。成化初。知縣蔡實。召民修築坍塌。加修陡門函管。宏治中。知縣高謙。復修築之。萬曆十三年。知府吳搗。謙重立湖禁。知府吳搗。謙。條議練湖受長山八十四岔之水。下通運河。周回四十餘里。分上下二湖。界以中堧。見有石閘三座。蓋引上湖之水。以漸達之下湖。更有石閘三座。石礎一座。則引下湖之水。以漸達之運河。又有涵洞十二處。則引上下湖以達之。田間涵洞。以時啓閉。則民間之旱澇無虞。閘座以時啓閉。則運河之蓄洩有備。行令該縣水利官。每年春初。督修湖隄。以防衝決。著爲令。其費取之湖中漁課。不足。則以修河米銀益之。本府水利通判。不時查閱。一應啓閉事宜。悉聽經理。若有勢豪侵業。撓法者。參呈究治。撫按會題。下部覆奏。依擬行外。仍議每年八月初旬。兵備道呈請撫按巡江。行委各府理刑官一員。到湖查勘。庶法在必行。利垂永久。鎮江府志。今按。順治九年。巡按秦世楨。開復康熙十三年。撫院馬祐。續修。十九年。前撫慕將上湖分撥一千餘畝。給京口投誠之人墾種。餘聽徒陽二縣民上價開墾。四十九年。前撫于題。請下湖。仍留蓄水。嘉慶十五年。知府黎世序。重修鎮江府人有練湖志。

九曲河在丹陽縣北。首起漕渠。尾距江口。委折七十餘里。鎮江府志。

又東南分一支曰孟河。入大江。至常州府西北分二支。曰橋河。曰新園河。入大江。有長蕩河支津。自宜興縣來會。分一支。經江陰縣。入於大江。又東分一支。曰曹港河。通江陰。常熟。崑山。太倉諸境。運河。經無錫縣。

西北分一支經江陰會諸水入大江。又南有湖隸鎮水自溧陽宜興金壇來會。經無錫縣城。又南分一支爲二派。通常熟崑山諸境。皇朝通志。

又東經呂城鎮。鎮在丹陽東南六十餘里。又東南經奔牛鎮。鎮在武進西北五十里。稍東南分一支。曰孟河。北流百餘里入大江。口在孟河城之西北。卽包港鎮之東南也。又東至常州府西北分一支。曰橋河。卽得勝港。東北流九十里入大江。口在孟河口城東南三十里。又東至府城西北隅分一支。曰新園河。東北流百里入大江。口在連江橋河口之東南十餘里。圩塘鎮之西北。其北岸卽泰興縣南河口也。運河分爲二派。其一經城西而南。有直塘河西自金壇城東來會。卽南運河支津。東西長百二十里。折而東。經城南。有長蕩湖東北出之支津。自南經舊塔鎮北流來會。卽宜興城北之運港也。自宜興城北北流。分數支港。東入太湖。其北流者爲運河。北數十里。又分支津。東南入太湖。其北流者。經鐘溪司西北。會長蕩湖東北出之支津。又東分一道。東通無錫。其北流者。經舊塔鎮西。又北曲。曲流五十餘里。至常州府城南。與運河會。其一東經府城北而東。分一支爲山塘河。通江陰縣南諸河。又分爲二。一北于君山入大江。口在江陰城西北之君山西。正北對隔江之靖江縣。一東曰橫河。東入大江。口在江陰東六十里。正東岸對隔江通州。西南黃泥山。其南經府城。東會城西南水。東南流。又東分一支。曰曹港河。東至四河壩。北達江陰。東通常熟。東南連崑山太倉者也。又東南經橫林鎮西。又東南至無錫縣西北境。東分一支北流。曰亭塘河。東北會諸渠於四河壩。以北達江陰。東流匯爲聞莊崇村西坪三蕩。北會黃泥港泰和塘二河及嚴塘河。東北至楊舍鎮東入大江。口在江

陸東南百里。東北岸卽通州狼山。而東南支渠曰長涇白湖。直接常熟。見前。運河又南。有湖埭鎮北一水。自西接溧陽。西南接宜興。西北接金壇。東流來會。湖埭在宜興東北百里。其水西北分長蕩湖支津。西南分宜興東北下邳鎮諸水。東流至無錫西北。入運河。又東南至無錫縣城。分絡左右。而南有太湖北口。於城西南相會。太湖在無錫城西南十餘里。凡支渠分洩湖水者。皆見後。運河自城之東南。東南流經蕩口鎮。西南東分一支。爲二派。北曰蕩口河。東北會白湖水。東南曰白濱河。東北會昆城湖於常熟之南。東會元和塘水及新河塘湖於崑山之北者也。水道提綱。

常州府運河。自蘇州府吳縣界西北流入。經無錫縣城東。又西北流。逕武進縣城南。又西北流。入鎮江府丹陽縣界。通志。運河在府南。自望亭入無錫縣界。流經郡治。西北抵奔牛鎮。達於孟河。行百七十餘里。吳夫差所鑿。隋大業中。自京口穿河至餘杭。擬通龍舟。此其故道也。自唐武德後累濬。遂爲江南之水驛。云河渠志。望亭北爲常州府無錫縣境。又北二十里曰新安。又北三十里經縣城南。引而西北十里至高橋。合江陰縣運河。又北二十里經洛社。又北二十里經橫林。爲武進縣境。又引而東北十里。經戚墅堰。十里經丁堰。二十里達常州府城。大清一統志。

江陰運河。自邑南迎無錫五瀉之水。過青陽峯市。而會於九里河。從九里河屈曲而北。抵朝宗門南水關入城。宜興荆溪運河。由慶源門抵鍾溪。六十里爲武進界。常州府志。

剩銀河在縣西北六十里。南通得勝新河。北流十八里。入揚子江。明洪武二十五年疏鑿。臨江置閘。永樂九年堙塞。閘官傅文達以聞。命廷臣按視。謂非要道。閘與官俱廢。常州府志。

洞子河在縣西十里。南枕運河。北入澡子港。常州府志。

得勝新河。舊名烈塘。在縣西十八里。連江橋。南枕運河。北行四十三里。入揚子江。宋紹熙間。郡守李

嘉言嘗浚臨江置閘。卽魏村閘。明洪武二十四年重浚。深二丈。廣十二丈。改今名。常州府志。

孟瀆河卽古孟瀆。在縣西三十里。奔牛鎮東南。枕運河。北流六十里。入揚子江。風土記云。七里井有

孟瀆。漢光武初嘗潛宿井旁。民爲指途。達江滸卽位。命開此瀆。唐元和中。刺史孟簡浚。延袤四十一

里。溉田四千餘頃。南唐保大初。修水門。宋慶歷三年。令楊輿諭民疏治。復通江流。祥符圖經引巴州

刺史羊士諤記云。此瀆以近孟城山得名。或云孟嘉僑寓之地。又云孟簡初浚。未詳孰是。明洪武二

十七年重浚。止通輕舟。閘官裴讓。陳江南漕運之利。永樂四年。命通政趙居任等。率常蘇松三府丁

夫濬導。僅十晝夜。訖工。比舊倍加深廣。宏治八年。復淤。命工部侍郎徐貫疏濬。泱月告成。嘉靖初。跨

孟瀆築城。備倭。河復淤。二十五年。知縣楊巍丞。吳文泮重濬。萬歷五年。御史林應訓。募夫再濬深廣。

併及支河。國朝順治十六年。議沿江列戍。凡通江支河。悉閉塞。西北諸鄉。屢告旱災。康熙二十年。巡

撫慕天顏疏請重浚。募夫挑堰。三月復故道。江潮灌輸。水利之大益也。常州府志。

又南經滸墅關。有光福河。自太湖來會。又東南至蘇州府城。分絡左右。而南有木瀆河。自太湖合石湖諸

渠來會。城東南北三面支港。縱橫屬縣。並達。皇朝通志。

運河。又東南經滸墅關。有光福河西自太湖東流。經木瀆鎮。北而東來會。又東南分爲數汊。正派東

南經虎邱山麓。又東南至蘇州府城西北。分絡左右。而南於城之西南。有木瀆河西自太湖東流。經

金墅鎮北合石湖諸渠來會。城東南北三面支渠縱橫。屬縣並達。東北爲元和塘。北通常熟。東爲官塘河。東通崑山太倉。東南通嘉定及松江各縣。南爲呂淞江。西洩太湖之水。以東注大海。運河於府城南稍東而南。又有太湖諸水支汊相接。又南至吳江縣北。又南經城東。有太湖支津。東南流爲吳淞江。吳淞江見後。又東南並太湖。經八拆鎮。又東南有松江府河。自東南來會。又南經平望。又南經梅堰。有溪河。卽湖州府運道也。西南經震澤鎮。東北流來會。水道提綱。

蘇州府運河自嘉興府秀水縣流經震澤縣南平望鎮。曰南塘河。亦曰上塘河。與荻塘河合流。曰官塘河。西北行四十里。至吳江縣城東。曰北塘河。亦曰古塘河。凡三十里。至夾浦。入長洲縣界。又西北入吳縣界。爲胥江。爲南濠。又北繞白公隄。出望亭。入無錫縣界。明統志。運河在府城西十里。南連嘉興。北接無錫。又有新開河。在府西三里南濠。其水由閘門運河轉西北。入楓橋運河。大清一統志。

吳縣長洲元和三縣運河。在府城西漕渠。考自吳江縣南平望鎮。接嘉興府界。引而北。四十里抵吳江縣。又北五十里。經府城西。又北三十里。達潯墅西。又十五里。至望亭。接無錫縣界。水利書云。運河自嘉興石塘由平望而北。繞府城爲胥江。爲南濠。至閘門無錫北來。水自望亭而南。經潯墅楓橋。東出渡僧橋。交會於閘門。絕灣湍急。故釣橋爲第一洪。崑山新陽二縣運河。曰至和塘。在城南。舊名崑山塘。北納昆城湖。南吐松江。風濤馳突。爲舟楫田廬患。宋至和二年。縣主簿邱與權。修築隄防。橫絕巨浸。積土爲塘。因以紀年爲名。自是相繼修浚。今自府城婁門而東北二十里。經沙湖。又東經唯亭及眞義浦。至縣治。一南繞城爲濠。東行轉北。一北行而東。橫貫城中。又東入太倉州界。常熟昭

文二縣運河在縣城南。又南十五里。歷華蕩。又南二十五里。爲吳塔與長洲接界。又南爲永倉敵樓。經蠡口陸墓。抵郡城齊門。凡九十里。折而西。合於楓橋運河。舊名元和塘。唐元和三年。郡守李素所開。今呼爲常熟塘。蘇州府志。

經吳江縣北。而東貫吳淞江。又東南有松江府河來會。皇朝通志。

吳江震澤二縣運河在城東。自嘉興府王江涇而北。凡三十三里。至縣境之平望鎮者。曰南塘河。亦曰上塘河。自湖州府南潯鎮而東。凡五十三里。至平望經鴛鴦湖與南塘河合者。曰西塘河。亦曰荻塘河。二河既合。曰官塘河。西北行四十里。至城東。又引而西北。曰北塘河。亦曰古塘河。凡二十里。至夾浦。入元和縣界。蘇州府志。

吳淞江自太湖分流。出吳江縣。東南經吳縣。合龐山湖。經崑山縣西。又經青浦之澱山湖。入華亭縣境。合趙屯大盈。顧會崧子盤龍五浦水。入上海縣。西北至黃浦。合嘉興平湖縣水。及蘇州澱山湖。滙爲三泖湖。東北入於海。皇朝通志。

吳淞江古名笠澤。亦曰松陵江。自太湖分流。出吳江縣城東南之長橋。東北流合龐山湖。湖在蘇州府城南二十里。又東南爲黎湖。菱湖。葉澤湖。新湖。皆曲折旁注。與吳江境地相接。又東北經唐浦。折東南流十餘里。爲舟直浦。卽古角里。在崑山城西四十里。又東南流經澱山湖。湖周二百里。北爲崑山。東北爲青浦。東爲松江府。入松江府境。合趙屯在松江府西北七十里。大盈在府西北六十里。顧會。在府西北二十五里。崧子在府北十五里。盤龍在崧子浦東。五大浦流。入上海縣西北境之宋家



橋。又東南流。至縣東北三十六里。與黃浦合。又迤邐爲吳淞口。入於海。水道提綱。

松江舊名吳淞江。後以水災。去水從松。亦曰松陵江。自吳江長橋東流。至尹山。北流至甫里。東北流至澱山。北合趙屯浦。又東合大盈浦。又東合顧會浦。又東合崧子浦。盤龍浦。凡五大浦。至宋家橋。轉東南流。與黃浦會。而入海。松江府志。

黃浦亦曰春申浦。在松江府城東南十八里。旣會吳淞。俗因稱吳淞江爲黃浦江。其上游卽嘉興府秀州塘水。與蘇州府澱山湖水。滙爲上中下三泖湖。三泖湖闊十八里。其西岸達澱山湖十里。其東岸達松江府城三十五里。爲數郡衆流之滙。凡嘉湖以東太湖以南諸流。並會平湖縣北境水。亦北流注之。至黃浦。又折而北。經上海縣城東二里。又折而東北。與吳淞江合。水道提綱。

黃浦在郡南境。或稱春申浦。其首曰橫潦涇。受黃橋斜塘及秀州塘水。東流至詹家滙。爲瓜涇塘。演迤而東。凡南北兩涯之水。皆入焉。至鄒家寺。折而北。流趨上海縣。東西兩涯之水。皆入焉。明洪武間。吳淞江淤塞。永樂元年浚江通海。引流直接黃浦。遂名黃浦江。今橫闊六七里。折東北入海。松江府志。

婁江今日劉家河。自太湖分流。經吳江縣西北。至蘇州府城西。入運河。又東受陽城巴城諸湖水。經崑山縣南。又經太倉州城南。諸水悉會。至劉家口。入於海。其別支爲七鴉浦。自崑山合常熟諸水。至太倉州北。入於海。皇朝通志。

婁江今日劉家河。自太湖分流。於吳江縣西北十八里之鮎魚口。北流至蘇州府城西三十里之水。

瀆口由胥門外日暉橋入運河。經城東爲婁門湖。又東至瀆墅湖。在城東南二十里。又東爲陳湖。在城東南三十五里。又東受陽城崑山西三十五里。巴城崑山西北二十里。二湖之水。經崑山縣城南一里。又東四十里。經太倉州城南。自州西南諸水悉會。又東稍南七十里。曰劉家口。入於海。自此浮海至崇明百二十四里。元人海運由此入海。七鴉浦在太倉州北三十六里。本婁江之別支。自崑山至和塘。而北合常熟諸水。爲七浦。經州西之直塘市。又東三十里。經沙頭市塗松鎮。至七鴉口入於海。水道提綱。

薛澱湖一名澱山湖。在府西北七十二里。南接三泖。東由大盈浦。北由趙屯浦。以洩於松江。三泖曰圓泖。曰大泖。曰長泖。爛路港長十八里。界大小連湖之間。北接薛澱。南通泖湖。爲華亭、奉賢、婁縣、金山、青浦五縣糧艘入湖運道。水勢寬深。湖口近起沙帶。糧艘自泖來者。多由清水港。轉入爛路港。  
松江府志。

婁江西受震澤。東逕蘇州府婁門東下。又東至崑山。爲至和塘。又東至太倉州境。爲太倉塘。太倉塘自崑山縣治東三十六里。至太倉州城。又大西門出東水門闌。吳淞江西受震澤。東逕夏駕浦。又東至嘉定。又東迤北至寶山。太倉州志。

又南有溪河。卽湖州府運道。東北流來會。皇朝通志。

太湖諸水。荆溪在宜興縣城南。其在城西者。曰西溪。東曰東溪。凡廣德州、溧陽、金壇諸縣水。皆來會。東北流至百瀆口入太湖。金線泉河出長興縣西北境。東南流至夾浦港入太湖。合溪卽箬溪。

亦名茗溪。出長興縣西。東流。有南溪來會。經縣北。運河支渠來會。至大沈灣港。入太湖。茗溪出孝豐縣南之天目山。經縣城東北。流經安吉縣東南。分二支而合。會諸水。又分二支。一經長興縣東南。合運河。又分二支。一支仍入運河。一支與正流合。至湖州府城西。有餘不溪來會。又分二支。一爲小梅溪。入太湖。一會府城東諸水。至大錢湖口。入太湖。餘不溪卽東茗水。其上源曰北溪。出臨安縣西北。與孝豐界之東天目山東南流。一源曰南溪。出臨安縣西。與於潛界之化龍鎮東流。與北溪會。經餘杭縣南。分二支而合。有武康縣水來會。北流有小山河。自錢塘縣北界來會。經德清縣南。有封溪及後溪。自武康縣來會。分爲三派。一東塘河。自德清經歸安石門縣。至湖州府城南。一西塘河。行德清縣境。一正流。經武康縣東。至湖州府城西南。並合。又分支津。一經嘉興府西北境。又經吳江界。入運河。正流會茗溪水。至大錢湖口。入太湖。七十二灩。在烏程縣者三十有八。在長興縣者三十有四。並入太湖。太湖卽古震澤。亦名具區。又名笠澤。五湖環二省。常州、蘇州、湖州三府。宜興、荆溪、武進、陽湖、無錫、金匱、吳縣、長洲、吳江、震澤、長興、烏程、歸安十三縣。地下流入海。最大者曰吳淞江。曰婁江。皇朝通志。

太湖周二萬六千頃。在江南常州府城東南百里。蘇州府城西南三十里。浙江湖州府城北二十八里。湖之上源在西。曰宜興百瀆。在西南。曰吳興苕諸溪。宜興荆溪。在縣城南。其在城西曰西溪。東曰東溪。凡廣德、溧陽、金壇及縣西諸水。俱匯流於西溪。貫城繞郭而東。是爲東溪。又東北四十五里入太湖。曰百瀆口。又有竹山港。在縣東北六十五里。湖州府水。俱入太湖。其港最大者。府治烏

程縣東北之大錢湖。正北之小梅湖。二口爲西南孝豐安吉州之苕溪。及南臨安餘杭武康德清之餘不溪。二水之匯。而長興縣在府西北。其東入太湖。有三港口。大錢港口在府城東北十八里。瀉水之口二十有八。其支港口黃泥港。在城北四里。趨小梅港。以入太湖。在府城北十八里。瀉水之口有八。長興北境水曰金線泉河。出西北境顧渚山。南流有金山水。自西界來會。東南流經水口鎮南。又東南折而東流。至縣東北境之夾浦港。入太湖。水長百餘里。港口東北對湖中大雷山。西境水曰合溪。出縣西東流。至合溪鎮。南有南溪支津。自南來會。又東流經城北。又東運河自東南及南溪正流。自西南來會。而支渠北來相通。又東北至大沈灣港。入太湖。港南又有新塘港。卽南溪。自縣西南來。東北流入太湖。苕溪源出孝豐南天目山。北流折而東北。俗曰龍溪河。七十餘里。合南來一水。折正北流。經城東。又北流七十里。經安吉城東南。有東溪河。自東南來會。北經城東。又北二十里。分爲二派。一正北流。有橫溪。西南自龍潭山。東北流經安吉西境。而東北來會。又東北經小市鎮。北梅溪鎮南。又東北流。其一派東北流。會東溪支流。經小市鎮南。又北經莫干山西麓。而二派復合。總曰龍溪河。亦曰梅溪。東北至和平鎮。北受南一小水。又分爲二派。一正北至長興縣東南。合運河。又西北而長興縣南之南溪來會。南溪出長興西南四安鎮。東北流數十里。分二支。一北流。經縣西境。與合溪會。其正派東北流。經縣南境。又分二支。其正支北流。與運河北經縣城東。又分三渠。一東南通小梅河口。入太湖。一東北至大沈灣港。入太湖。一北合合溪。東北於夾浦港。入太湖。其東南流會苕溪。又北於長興縣東分二支。一東南於小梅河口會正流。一東北入大沈灣港。而一派東北流。合運

河東至湖州府城。西有餘不溪。自南來會。又北於城西北分二派。一正北流。爲小梅溪。數十里。折而西。會南溪支津。北入蔡浦港。入太湖。卽小梅湖口也。一東抱城北而東。會城東諸水。又東北至大錢湖口。入太湖。是爲最大水口。東北六十里。卽湖中小雷山。又東分一小支。於新涇港入太湖。餘不溪卽東苕水。其上游卽臨安縣之南北溪。北溪出縣西北天目山。東南流經縣北。又東南至青山鎮。南南溪出縣西化龍鎮。東南流。合西南一水。東流經縣城南。又東流折東北。與北溪會。經青山鎮南。又東北經餘杭縣城南。稍東分爲二派。一北流經城東。又東北至安溪鎮東。又北會東南來支津。又北有一水。自西來會。又北而小山河。東南自錢塘北界西北流來會。卽安溪一派東流者也。又北受西來下渚湖水。又北至德清縣南。曰霽溪河。有封溪。西自武康縣前來會。卽前溪也。又北至縣城南。而武康前後溪。自西合而來會。環城而北。分三派。東北曰東塘河。北曰西塘河。其西北正流。俱北流九十里。至湖州府城南。復合。循城東。分支津二。東南曰澗溪河。東通連市烏鎮。正東爲運河。至南潯鎮。南折而東。北經嘉興府西北境。又東北經吳江界。入運河。餘不溪正流於湖州府城東北。會城北。苕溪。又東北至大錢湖口。入太湖支津。又東而北。至新涇港。入太湖。水道提綱。

入浙江界。經秀水縣。北有水自烏鎮南通桐鄉。西通湖州府來會。其東有支渠。達嘉善縣及松江府。又南至嘉興府城北。分絡左右。而南有支渠。通屬縣境。經桐鄉縣東南。有長水塘。接海寧海鹽二縣。又西南有桐鄉河來會。經石門縣城南。有河自德清縣來會。皇朝通志。

又南入浙江界。經秀水縣北境之王江涇鎮東。又南有水。西南自烏鎮南通桐鄉。西通湖州府分潯。

溪東北流來會。其東有支渠。東通嘉善及松江府運河。又南至嘉興府城北。分支夾城。左右而南。其西有支渠。西北一支。西自湖州府烏鎮東流。一西南一支。南自桐鄉東北流並會。其東有支渠二。一東北流通嘉善北境之崇福河。一東流。至嘉善城南。曰華亭河。松江府舟。由此入運。嘉善縣東之魏塘河。東北之清風涇。北之章練塘河。俱流合華亭河。東達華亭之仰湖。會於城南之南湖。東南有支渠。東通平湖。此渠東北通松江。北通嘉善。南通海鹽。西南及海寧。又南經桐鄉縣東南境。有支渠曰長水塘。東南接海寧。東接海鹽二縣。又西南桐鄉城河。自北來會。又西南經石門縣城南。縣西北有河。自德清流入。東北有石門塘。北達烏鎮。南接運河。水道提綱。

嘉興府運河。自湖州府德清縣界。流經石門縣西北。穿濠北出。受左右諸涇之水。經石門塘。入桐鄉縣界。東北流二十里。至斗門。又東二十里。至嘉興西水驛。亦曰西漕河。又東分三支。南出者濬爲鴛鴦湖。東流者貫城東出而爲市河。其北流者爲運河正道。東北出杉青閘。受穆溪水爲北漕渠。又東北流三十三里。爲王江涇。接江蘇吳江縣界。本朝康熙四十六年。經撫臣王然奏請疏濬。旁有土石塘。石塘起杉青閘。至王江涇二十七里。土塘起西水驛。西至語兒九十里。唐建。歷明屢修。本朝康熙十二年。水溢塘圯。加石培土。雍正五年。六年。撫臣李衛增築。大清一統志。

漕渠自餘杭而來。穿石門縣。出受塘左之涇。十有八。楓樹。南陽。縣學。舉兒。茅家。朱港。吳陵。石人。瓜塔。李莊。排頭。沙木。徐家。張涇。福殿。黃絳。游屯。北沈。塘右之涇。十有三。石門。邵家。柿林。同門。羔羊。秋家。雙排。周門。烽火。上莫。新橋。南界。包角。至石門塘。折而東。彎環如帶。曰玉彎。入桐鄉境。受塘南之涇。五。唐

涇。蔡墅。陸墅。永新。南界。塘北之涇六石門。新涇。大姚。東溪。永新北界。東經皂林。入秀水境。經學繡塔。白龍潭。瀦爲鴛鴦湖。分爲三支。東流經五龍橋南。合長水。東南入海鹽。塘水匯爲澎湖。由鹽倉橋。鱸橋。過雙溪橋。出會龍橋中流。入通越門。一由焦家園東流。東引南宮浜。西引范蠡湖。出澄海門。一由老人橋東北。經郡治南。經嘉興縣南。縣橋東。出春波門。一由大悲橋北流。經府學前。爲鳳凰池。東至韭溪橋。又分爲二支。一東流。南引府治左右二水。繞嘉興縣四面。出春波門。一北流。東引浣花池水。西引秀水縣前水。繞秀水學前後。東引禪杖橋。天妃浜水。出望吳門。其澄海望吳兩門出水。總會於春波門。由天馬駟馬兩橋。出會龍橋。一北流。過西麗橋。繞郡城而東。過北麗橋。東由鉏家橋。經石條街南。相家湖。東北爲麟湖。官蕩。陳盛蕩。天荒蕩。祥符蕩。夏墓蕩。長蕩。許家蕩。水月蕩。入汾湖。北由杉青閘。出王江涇。東爲聞湖。西爲雁蕩。由平望入吳江。亦自黃浦入海。其大概如此。嘉興府志

嘉興府長水塘。源自杭州海寧諸水。北流入嘉興境。東通練塘。東南通橫塘。橫塘在府東南五里。其流匯爲澎湖。轉馬塘堰而上。南至海鹽縣。練塘在府南二十五里。與橫塘長水塘通。長水塘正流至府城南。爲鴛鴦湖。府城東十里。有雙溪。松江漕舟。由嘉善至此。又西北合運河水道。提綱

嘉興府城東有鳳凰洲。洲以南水入平湖縣界。洲以北水曰華亭塘。入嘉善縣界。嘉善魏塘河。自華亭塘分出。東流繞城而東。卽秀州塘。俗呼官塘。南合白水塘。東合大雲塘諸水。又東至松江府城西。南六十里之交界處。曰風涇鎮。又東十里。過白牛塘。絕長泖而北流。又東合黃橋門及斜門。以東諸水。至沈涇塘。入松江府城西水門。貫城東。出與兪塘諸水合流。入黃浦。松江運舟。由此水以達運河。

水道提綱

秀州塘俗呼爲官塘。在府西南。其源出杭州西湖。歷嘉興而東。至楓涇鎮入界。由鎮而東。過白牛塘。絕長泖。至萬安橋。北流合滕港。又合黃橋門。合邪塘。東流入橫潦涇。爲黃浦。斜塘自大泖來。與黃橋門水。東入橫潦涇。爲今金山縣糧船入泖運道。松江府志。

又西南至長安鎮。有支河通海鹽平湖。嘉善達於杭州。又經德清縣東境。至仁和縣北。而海寧、德清、餘杭諸水皆會。過北新關。至杭州府城之北。皇朝通志。

又西南海寧河。東南自長安鎮來會。此河東通海鹽。北通平湖嘉善。於長安鎮之南南流。折而西。經臨平鎮。又西南達杭城。又西南經德清縣東境之大麻村。又西南經仁和縣北境之塘棲鎮。又西南折而東南。又南而東西支渠皆會。東自海寧。北自德清。西自餘杭。諸水並合。過北新關南。至杭州府城之北。杭城北至嘉興府城一百八十里。又三十里入江南蘇州府吳江縣界。又北至鎮江府京口。

古稱八百里平江。水道提綱。

杭州府上下塘河。在仁和縣北。自武林水門接城內大河西湖諸水。過清湖。上中下三閘。東與外沙河菜市河。泛洋河諸水。分爲二派。一派由東北上塘。至長安壩。曰上塘河。一派由西北至江漲橋。與子塘河合。又餘杭塘河亦西來會焉。又出北新關橋。曰下塘河。西北接新開運河。至塘棲鎮。入石門縣界。元末張士誠以舊河窄狹。自塘棲南五杖港開河。至江漲橋。因名新開運河。亦名北關河。本朝康熙四十七年重濬。雍正五年。又濬上塘河。自良山門施家橋。至施湖堰止。長七千七百七十九



丈濬下塘河。自驛橋至清河。開長三百二丈。大清一統志。

上塘河南自天宗水門餘杭水門二河合於北。

務前山清河堰開至德勝橋。與城東外沙河菜

市河泛洋湖水相合。分爲二派。一由東北上塘過東倉新橋入大運河。至長安閘入嘉興。曰運河。咸

淳志。南宋運道俱自長安入艮山水門。抵東新河而止。此其故道也。讀史方輿紀要上塘河舊名運

河。一名長河。一名夾塘河。西自德勝橋抵長安壩。南通外沙河。前沙河。後沙河。與蔡官人塘河。東連

赤岸河。施河。材河。方興河。兩岸田土。何止千頃。嘉靖仁和縣志。下塘河一派。由西北過德勝橋。上

北城堰。過江漲橋。喻家橋。北新橋。以北入安吉州界。曰下塘河。咸淳志。至江漲橋。與子塘河合流。成

化舊志。子塘河在江漲橋稅司北。爲斷河頭。北行經米市橋。入清水潭。過左家橋。西達餘杭塘河。

北達新開運河。其源則自清湖南北斗門爲多。成化舊志。今自江漲稅司落陡門橋。陡門閘。經望佛

橋。進范婆橋。南至新河壩。夾河北流。入清水潭。舊志。新開運河。見前。浙西運河。自臨安府北郭

務至鎮江。江口閘。六百四十一里。宋史河渠志。在北新橋之北。通蘇湖常秀潤等河。凡諸路綱運及

販米客舟。皆由此達於行都。咸淳志。自北郭務至謝村。北爲十二里。洋爲塘棲。德清之水入之。踰北

陸橋。入崇德縣界。明史河渠志。其源有三。一自城西北三里。西河壩。上承西湖之水。一自城北三里

德勝壩。上承上塘河之水。俱匯於府北之江漲橋。又餘杭塘河之水。亦由江漲橋西北以會運河。出

北新關。至塘棲鎮。接嘉興府界。此河卽江南河也。隋大業中。將巡會稽。乃發民開江南河。自京口至

餘杭八百餘里。後代因而修之。以通漕運。讀史方輿紀要地有三里漾。十二里漾。蘆叢水。灤。向爲盜

續行水金鑑 卷七十二 運河水

一六七八

賊淵藪。正統七年。巡撫侍郎周忱。相度便宜。築隄岸一萬二千餘丈。水陸並利。行旅無憂。嘉靖仁和县志。杭州府新志。

# 續行水金鑑卷第七十三

## 運河水章 廣一

聖祖仁皇帝康熙三十五年六月。先是上以每年漕運遲滯。命大理寺卿貝和諾往漕河封閘蓄水。故糧艘抵通較速於昔。至是貝和諾回奏。上曰。濟寧以南各閘止賴一嶧山湖之水。以濟其流。豈可令其啓閘不時耶。此法既於漕運有益。著每歲遣官行之。仁皇帝聖訓。

康熙三十七年五月初一日。上巡視武清縣隄岸。衆民跪奏曰。夏兒渡地方。自蒙皇上修築。迄今永無水患。此地隄岸。正當水勢衝射。請於隄岸之外。另築一隄。上諭曰。此隄岸之外。若另作一隄。爾等田畝。豈不多致占廢。衆民奏曰。原非一家田畝。即稍築入隄。於小民亦無大損。儻河水一決。其患更甚。上諭曰。轉盼間。雨潦將屆。今歲不及修築。暫立木椿。堅護隄岸。另開小河。以殺水勢。今歲田畝可以無虞。俟明春雨水前。另築重隄。爾等田廬俱得安固矣。仁皇帝聖訓。

十二月初七日。上諭大學士等曰。運河一帶。惟黃水清水交匯之處。甚屬緊要。此處得宜。則他處易治。前日子成龍亦謂大墩地方緊要。此處修築堅固。始可無慮。此言極是。夫河務深微。不訪土著之人。不可而全聽其言。亦不可如向日天妃閘。以版阻水。啓版行船。須五六百人。搥挽。方得過閘。今已平緩。船隻不需搥挽。坦然而行。以此觀之。乃時候之不同也。仁皇帝聖訓。

康熙三十八年二月十二日。上諭直隸巡撫李光地等曰。漳河與漳沱河故道。原各自入海。今雨水合流。

所以其勢氾濫。爾等往視。如漳河故道可尋。即可開通。引入運河。如慮運河難容。卽於運道之東。別挑一河。使之赴海。其可否修濬情形。爾等閱後。再奏。仁皇帝聖訓。

康熙三十九年。聖祖仁皇帝親閱指示。築隄濬川。開焦家口引河。自廣福樓東南分洩。潯沱水勢。爲子牙新河。大修欽定民堰。共長一千五百二十里。畿輔安瀾志。

康熙四十一年九月。河道總督張鵬翮疏報秋水情形。上諭大學士等曰。覽奏挑水壩築成。逼黃河大溜。直趨陶莊引河。循北岸而行。黃水從大通口暢出海口。極其深通。淮水從清口暢流敵黃。絕無黃水倒灌之患。高家堰隄工完固。加謹防守。經伏秋大漲。俱獲無虞。運河水由涇河潤河人字芒稻等河。分洩各處。工程亦皆保固。觀此。河工大有望矣。又諭曰。今所開陶莊引河甚善。朕巡視南河時。曾令員外郎黑碩色。將引河之椿。加意深築。其疏濬人字芒稻二河亦佳。得此二河。運河甚爲有益。朕觀明朝治河。俱自徐州以上。在河南地方修築。我朝自康熙元年以來。俱在徐州以下修築。然治下流。須預防上流。若上流潰決。下流必至壅滯。嗣後徐州以上地方。河臣亦當留意。再黃河之水。遷徙無定。朕前在寧夏之時。見黃河大溜。每年更移。其性如此。况九河故道。原在河間地方。後漸移向南。歷代以來。果能每年防禦。相機修理。則河道何至如此大壞。皆因時常多事。或十年。或五年。不修築。不開濬。所以漸難治矣。明朝三百年間。嘗講求河工治法。彼時措置。亦得其宜。如山東微山湖。將水蓄聚山中。澇則蓄之。旱則洩之。皆深有益於治河者也。仁皇帝聖訓。

康熙四十三年十月初一日。上諭內務府郎中齊蘇勒曰。裏兒渡東旺西旺等處。運河兩邊。向來皆沙。其

隄工係沙土築成。故不堅固。且敵數處山水兼之海潮。一日二次倒灌。所以逼回運河之水。不及流行。常漲滿。盈出於隄者。因不能容受之。故朕前閱楊村相近。有舊河形迹一道。卽於此間。建減水石壩。以分水勢。甚爲有益。此處近海。疏通甚易。所分之水。不可使通百靈港。寶坻縣。香河縣。此三處地勢低窪。難以抵敵。至建造減水壩。須口寬四五十丈。以石鋪之。使尾長而斜。堅固修築。若水長不至四尺。不能越減水壩。可將見存舊河形迹。挑寬十丈。將土卽築兩邊之隄。爾會同直隸巡撫李光地。前往驗看。丈量具奏。仁皇帝聖訓。

是月初二日。上諭大學士等曰。曩日要兒渡等處隄岸。常被衝決。是以朕親臨遍視。見楊村原有一引河。去海尙近。卽欲疏此引河。建滾水壩。水長開閘。使河水入海。因需餉浩繁。又恐無益。故不輕舉。朕今遣李光地等往估。欲仍開此引河。大都天津海潮至時。一股向王慶坨。一股向楊村逆流。故河水長時。卽相觸旁流。以致隄岸衝決。今將楊村舊引河挑濬建壩。自必有益。再子牙河廣福樓。亦有引河。昔開引河時。文安大城百姓。謂開河於彼有益。而青縣等處百姓。則稱開河於彼不便。互相爭論。皆集河干。各控其情。及朕諭以挑此引河。不獨便於文安大城。而青縣亦自無虞。民始各退。後果兩處皆便矣。仁皇帝聖訓。

是月二十六日。上巡幸畿內。臨閱齊蘇勒等所勘薛家莊擬築減水壩處。諭大學士等曰。此處迎溜頂衝。若築減水石壩。遇水漲時。石壩雖不妨。而兩邊土壩可虞。如水漲過四尺。由減水壩流出。視其流高幾寸。可算知一晝夜水洩幾分。如能流洩水之三分。則大有濟矣。此處河勢南岸露出礮嘴。北邊暗被衝刷。今已近北岸矣。朕向巡幸西塞之外。見黃河一邊露出礮嘴。則一邊必然衝刷。水性原如此。朕故知之。此處

斷不可築減水壩也。因問之士民皆云三十年前河原遶南岸衆皆驚服。仁皇帝聖訓。

是月二十七日上閱視筐兒港隄工。諭齊蘇勒等曰。昨日踏勘之處迎溜頂衝。彼處若築減水壩甚爲可虞。儻水發時衝刷其東。則所築減水壩反在河中。徒費人工矣。其楊村以南河岸離隄雖遠而相其地勢亦難修築。此筐兒港近處有磯嘴與河隄相去不遠。且河路又直通舊河。取道甚順。况東邊原因修築堅固。屢經大水並無妨礙。此處修築減水壩甚好。朕製木樁式樣與之。減水壩兩邊雁翅須令加高。與隄平。其外邊流水之處盡用石鋪預鑿兩路柱眼。其上則搭橋以便行人。築減水壩時須令其尾長如此。則下注之水可無妨礙。若欲保減水壩之水溜當於東邊酌量修築數處挑水壩。以分頂衝水勢。俟後再定。至新挑河兩邊築隄。則兩邊田地之水爲隄所阻不能流出。或恐不利於田地。若使通於新挑河及分減大河之水。令入漯河淀湖內。則水集而滿。必致泛溢。恐民田地淹沒。可將湖邊丈量。圈築小隄。使水不至漫流。以保護田地。修築大河兩邊隄工。附近民居俱請加高。朕看此隄加高大有裨益。可將此隄先修。俟工部堂官到日。爾會同前來將舊隄加高之處丈量估算。需用錢糧幾何。具題之日再將修築減水壩之處定奪。仁皇帝聖訓。

康熙四十四年二月二十六日上巡視河工舟泊土橋閘。諭大學士等曰。河道總督張鵬翮昨日來問以河工形勢。彼云河已治矣。從前駱馬湖口設竹絡壩。湖水大則從壩流入黃河。河水大則溢流入壩內。今竹絡壩止有湖水暢流。黃水並無浸灌。則黃河之深通可知。聞下河等處地方連年皆大熟。亦從前所未有也。仁皇帝聖訓。

三月十一日。上諭張鵬翮曰。河工已經告成。善後之策。更爲緊要。朕今親臨閱視。修建天妃閘。甚當。儻黃水長至五六尺。而清水不長。則勢弱不能敵黃。黃水倒灌。亦必致之理。豈可因此卽謂治河失策乎。若遇倒灌。卽將天妃閘暫時下板。蓄清水全力以敵黃流。不過數日。黃水卽退。遇糧船過時。卽起板開放。若黃水不灌入。不必下板。其惠濟祠一帶。雖建有石工。但運河與黃河止有一線之隄。若黃溜衝刷。石工恐不足恃。可於上下適中之處。相度形勢。建挑水壩三四處。挑溜開行。其王公隄亦應相度形勢。修建挑水壩。其運河東隄。保守最爲緊要。隄岸應行加幫。其高郵迤南湖水勢。相平界首。迤南河水高於湖水。東西兩隄卑薄。應加幫修。可量建石工。淮安近城隄尾卑薄之處。亦應相度形勢。修建石工。黃河南岸隄工。關係緊要。應加謹修防。至於直隸山東之河。與河道總督相距甚遠。應照河南例。各交與該省巡撫。就近易於料理。其楊村通判。並無經管之事。應行裁去。爾會同行在九卿。速議以聞。仁皇帝聖訓。

是月十八日。上諭張鵬翮及河工官員等曰。今河工雖已告成。不可不預爲修理防護。以圖善後之策。朕見淮揚一帶。隄岸卑薄。未甚堅固。儻不加保護。以致衝決。則淮揚地方百姓。何以能堪。爾等宜急籌之。仁皇帝聖訓。

康熙四十六年五月初二日。上諭張鵬翮等曰。古今治河。形勢不同。舊時常患清水不足敵黃水。每有黃

水倒灌之虞。今清水敵黃水有餘。運河清水甚大。反流入高郵湖。設高郵湖水長溢入運河。則運河東隄受險。少有疎虞。雖堵塞不難。而生民田廬不可問矣。應加謹防護。以保無虞。清口湖水七分敵黃。三分濟運。今應將大墩分水處西岸草壩。再加挑寬大。使清水多出黃河一分。少入運河一分。則運河東隄不致受險。又於蔣家壩開河建閘。引水由人字河芒稻河入江。新修五里滾水壩。由下河及廟灣等處入海。不惟洪澤湖之水可以宣洩。而盱眙泗州積水田地亦漸次涸出。水小則下板蓄水。以敵黃水。大則啓板洩水。且便於商民舟楫往來。其祥符閘口門甚窄狹。趁此黃水不甚高之時。將歸仁安仁利仁三閘。委幹員改寬洩水。則徐州一帶民田可無淹沒之虞。仁皇帝聖訓。

白河會潮。沾榆沙通。惠諸河之水。源高勢峻。西北諸山泉流滙聚。伏秋積雨未歇。怒流已至。頃刻尋丈。非隄防所能捍禦也。康熙三十八年。決武清縣筐兒港。三十九年。聖祖仁皇帝親臨閱視。命員外郎牛鈕等於決處建減水壩二十丈。開挖引河。夾以長隄。而注之塌河淀。由賈家沾道洩入海楊村。上下百餘里。河平隄固。有御製碑文誌其事。五十年。以河西務工程險要。親臨指授。命牛鈕開挖引河。以河西務城東有舊河形。對新河下口至三里屯。長四百餘丈。特命開直河一道。次年工成。於是新河之溜。移流於西。而東岸大隄。免於汕刷。嬰兒渡之衝險無虞矣。畿輔安瀾志。

康熙五十五年。開微山湖西引河一道。宣洩山東諸湖之水。下入江境。按此因大水之年。湖水泛溢。開河洩入江境也。鑿玉皇廟至班家山三千四百餘丈之長河。引水南下。去路不可不審。微山諸湖之水。由湖口出者。入運濟漕。水大開伊家河。洩入江境之駱馬湖。由六塘河下海。若於微湖之西。開河洩水。舍荆



山橋別無去路。荆山本屬溝河。容水不多。下游地窪。山東諸水下洩。銅、邳、宿、桃窪地。皆成澤國。此甯家山壩所以常封也。微湖蓄水濟運。下流亦謹漫溢。若分流入運。運不能受。宜導入黃。勢必尋洩水之故道。破潘屯大隄。引黃倒灌。關係尤鉅。不可爲法。河渠紀聞。

康熙五十七年。河道總督趙世顯題奉旨。該部議奏。議得趙世顯疏稱。沛縣地方積水。作何疏洩。於民田有益。漕運不致有誤。准部咨令。勘議具題。臣等查沛縣地勢低窪。水性就下。山東金鄉、魚臺等處之水。由沛縣昭陽湖歷微山湖。從荆山口出。貓兒窩入運。濟漕近因荆山口之上。茶城十字河一帶久淤。兼之雨水屯積。低田被淹。應將十字河酌量濬深。俾有餘之水。暢流下注。期免淹沒民田。再於十字河之上。築草壩一座。若運河水小。則堵塞不放。俾水歸微山湖。出湖口閘。以濟下八閘漕運。其東省運河南岸之徐家營房邱家壩一帶。隄工單薄。臣等會移東撫。設法幫築。寬厚。今自關帝廟起至班家山止。挑河築隄。工長三千四百五十七丈。并築攔河草壩。共估工料土方一萬四千八百二十三兩零。臣等公議無庸請帑。將所得兩淮鹽規公費。捐用興修等因。應如所請。速行奉旨依議。山東運河道冊。

康熙五十八年。巡撫李樹德題請。濟寧道准改爲兗寧道。統轄兗州府屬各州縣地方事務。山東運河道冊。

康熙五十九年。議芒稻開啓董家壩。以備分洩。按揚屬湖河交錯。衆水滙歸。全在宣洩得宜。芒稻二閘。董家大壩洩水最近。惟不能先期開放。預爲宣洩。以致潰隄。淮揚道傅澤洪詳稱。揚屬湖河北接淮流。西受天長盱泗之水。上游水漲。天然各壩放水。建瓴直下。西風鼓浪。運隄在在危險。溯查康熙四十年。欽遵

聖訓挑濬金灣三閘迤下人字河。芒稻河及鳳凰橋引河。修砌芒稻東西二閘。董家溝壩。因時啓閉。水勢隨長隨洩。隄無潰決。田不淹沒。糧艘鹽船亦運行無誤。祇緣建係商捐。築砌不堅。以致閘壞不能下板。反於二閘上築壩堵塞。並將董家溝壩堵閉。必遇水長盈隄。始行開放。往往猝不及洩。甚至旋開旋塞。汎濫益甚。去年伏秋水漲。破隄東出。下河七邑俱遭昏墊。實因不先分洩所致。現在底水較去年高二尺餘。桃汛將至。請速放芒稻河董家溝閘壩。補修閘座。民鹽兩益。河渠紀聞。

康熙六十年九月十四日。奉上諭。直隸總督趙宏燮奏稱。河南黃沁隄岸衝決。水勢泛濫。至長垣等處。朕卽遣官查視所決地方。據司官傅爾寨回奏。河南武陟縣黃沁隄岸潰決。由長垣流入山東張秋鎮。又據山東巡撫李樹德奏稱。河水汎溢。自直隸開州習城流入山東張秋鎮等處。由鹽河入海。以致運河隄決。漕船阻滯。其衝決隄岸。現今修築。可略加修防。使漕船無阻。始竟行堵塞。水無歸洩。他處必又被衝決。斷乎不可。開州古黃河故道。今黃沁泛濫。由開州至山東地方。已成河道。現今決處堵塞完日。不使沁水入黃。直引至山東。或有裨益。亦未可定。俟朕另有諭旨。朕留心河務。各處黃河渡口。俱會親臨詳察。適遣往看河司官所呈圖樣。及李樹德所進河圖。朕俱詳覽。知之最明。著張鵬翮所審事完。卽速會同總漕施世綸。至張秋鎮等處。詳細查勘。使漕船不致遲誤。如張鵬翮已經回來。卽於接旨之處。作速前往。至於修築決河。甚屬緊要。朕至京中。另遣專官。著總河趙世顯。將熟諳河務官員工役派出。並修築所用下埽料物。多爲捐助。作速發往河南衝決地方。嗣張鵬翮等會勘具題。俟河南上流堵塞合龍。先動藩庫銀兩。堵築曹家單薄。挑挖臨清月河。以洩水勢。於十二月二十日合龍完竣。山東運河道冊。

十月二十五日。欽差吏部尙書張鵬翮。奉上諭。黃河決口堵築報竣後。引沁濟運。時分水龍王廟之中八閘北八閘處。春時水淺。船行有阻。將沁河之水。於此處引入運河。如不能容納。由鹽河瀉水於運道。有益分水龍王廟南八閘。水多不需水濟。張鵬翮差主事吳爾登摺奏。十月二十二日。奉旨著吳爾登告訴九卿面奏。又傳吳爾登在九卿前奉上諭。你速去。著張鵬翮由張秋隨溜而上。看至河南決口。今畫來三圖各異。決口果係何處衝決。離黃沁交匯之處。隔有多遠。如引沁水東下。其間地勢高卑。有無阻礙。一并明白查勘。其沁水入衛一支。亦著查勘。大約十一月內。可以前來。嗣於十二月張鵬翮回京。十九日。奉上諭。朕原意引沁入運河。今看張鵬翮所奏。甚是。著依伊行。山東運河道冊。

是年。總河趙世顯。修築高寶江三邑西隄。補砌甃石。以資防禦。按是時方濬徐塘之淤。以利運行。修清口小壩三城壩等處隄工。以保運道。而高寶一帶之隄。尤爲河湖關鍵。溯自三十九年。西水盛下。西隄盡淹。河湖一片。經張文端奏請興修。已閱有年。唐埂等六壩堵閉。高寶江都西岸隄根。漸次涸出。所有殘缺石工。應加修築。至是興築東省運河隄岸。移咨東撫。修築功鉅未舉。南河補築張家對河至白田鋪下。及秤鈎灣殘缺之隄。並高郵護城隄。加埽幫護。東西隄補砌甃石。以次並治。河渠紀聞。

康熙六十一年。黃水復發。東撫李樹德奏稱。前因黃水漫入運河。請暫將曹家單薄新隄。開口洩水。并赴工料理業。經具奏。茲於二月十三日。到張秋。見水從西南來。一望汪洋。卽刻到曹家單薄。查看水勢。其新築埽頂。高出水面。僅有二尺。隄外地勢窪下。若於此處開洩。恐水建瓴而下。附近鹽河一帶田房。或有衝漫。更慮運河洩水過多。致虞淺阻。况去年新下之埽。鑲築堅厚。不但難以挖掘。且恐埽去而衝刷益深。是

以臣復沿隄細勘見曹家單薄一帶老隄西首相隔里許葦河頭地方與運河相等不甚陡峻距運河邊約百餘丈老隄外卽入鹽河之葦河去鹽河止四十里河身通暢於民間田舍無礙在此開口放水則田間漫溢之水立卽宣通入海而運河濟漕之水亦不致多洩事急不及請旨遂於十五日在葦河頭之單薄老隄處督工開掘二十餘丈是夜卽放水出口由葦河注入鹽河十六日早閱視運河及平地之水消落三尺有餘民心已定而沿河隄岸可免危險矣若河南上流決口堵塞一畢則濮州范縣壽張等州縣被淹之地立卽涸出仍可及時耕種再查南旺塘河已經煞壩大挑二月內可以完工惟恐臨清塘河因水勢湍急攔河難以築壩仍由開河宣洩以致不能洩入月河今葦河頭老隄既經開口放水俟運河水勢稍平臨清便可築壩挑濬矣奉旨該部知道運河道冊

世宗憲皇帝雍正元年正月二十四日上諭山東巡撫黃炳山東運河淺阻舊例派撥民夫挑淺濟運切思東省連年薄收百姓困苦未必堪此重役將來流亡日多民生日蹙深爲可憫古人救荒之策有大興役以濟民食者不若竟動正項錢糧雇募民夫給以工食挑濬運河則應雇既多散者復聚民資工食稍延殘喘民心鼓舞工程易就運道早通於興役之中卽寓賑濟之意莫便於此已有旨命修吉圖署理按察司速赴河南與總河齊蘇勒商定回任料理運道俟其到任爾與竭力料理務使小民得沾實惠三月初九日黃炳疏稱皇上軫念窮黎諭令開倉賑濟茲因運道淺阻復以百姓困苦不堪重役令動正項錢糧雇募民夫給以工食挑濬運河務使小民得沾實惠現屆二月重運將臨挑淺工程刻不可緩今署按察司修吉圖由河南而來尙需時日臣先動支藩庫銀二萬兩前赴張秋查明運河淤處揀選能員給銀

雇夫晝夜挑挖務期一律深通不誤漕運如銀兩不敷當再酌量動支奉旨依議運河道冊

四月十八日直隸巡撫李維鈞奏修築太行等隄銀兩請公同捐助奉上諭修築甄家莊等四處漫缺隄工用過銀兩俱因緊要工程動用不必捐補著以正項錢糧奏銷畿輔通志

五月二十日上諭河道總督齊蘇勒漕運總督張大有山東巡撫黃炳歷年漕船遲滯皆由運河淺阻運河全賴山東諸湖蓄水以資灌注近歲諸湖漸淤附近居民或侵占耕種致水小不能濟運今宜乘夏秋雨水之時預爲蓄水之計爾諸臣應各留心相度凡沿河近地已經成田者不必追究其未經耕種者當湖水稍落速宜嚴禁不可仍令侵占至諸湖隄防務須修築堅固引河開座務須啓閉得宜則湖水深廣運道流通將來漕艘更無阻滯之虞矣憲皇帝聖訓

六月十一日黃炳奏據兗州府通判陸允欽報稱六月初八日山水驟發運河水勢急溜沙灣子隄被水衝開一處查此隄原係運河絳道前因黃沁水決曾開此口放水水退卽經堵築今因水發隄復衝開由鹽河歸海幸於民田無害目下天氣晴明便可興工堵閉聞河臣齊蘇勒布政使修吉圖俱詣沙灣缺口處所查看應用工料銀兩臣已行知修吉圖令於挑河存剩銀內動支修築奉上諭河工修築機宜不可自作聰明一切俱聽齊蘇勒調度但將錢糧及夫料等項預備充足不致遲誤汝卽可告無過矣硃批諭旨

七月齊蘇勒等奏遵旨謹查東省湖淀可以蓄水濟運者在汶上則有南旺馬踏蜀山等湖在東平則有安山湖在濟寧則有馬場湖在魚臺則有南陽昭陽獨山等湖在滕嶧二縣則有微山郟山等湖水長則

引河水入湖。水涸則引湖水入漕。隨時收蓄。以濟運河之淺。古人名曰水櫃是也。查昭陽湖。因昔年黃河水淤積有肥土。盡爲豪戶占種。雖借升斗虛名。實奪河漕大利。而安山、南旺等湖原有隄界。近因附近居民覬覦湖地。私種開墾。與昭陽無異。致湖乾水少。見今一望皆爲禾黍之場。臣等遵奉皇上愛民至意。除湖邊已經成田者。不追究外。其未經耕種者。俟湖水消落。嚴行丈量。樹立封界。永禁侵占。將現在入湖之水。設法收蓄濟運。至馬踏、蜀山、馬場、南陽諸湖。原設陡門閘座。須加王壩。方資收蓄。已委兗寧道、濟東道、運河同知等。分途加意節蓄。仍派歷練河務効力人員。協同料理。務期湖水收納深廣。以備來年濟運。而獨山一湖。濱臨運河。一線小堰。且多缺口。每遇山泉漲發。河湖相連。及水勢少落。仍然隨河而洩。毫無關束。現檄魚臺縣知縣駐工相度。如遇河水長時。聽其灌注湖中。一見湖河水平。卽築堰堵截。河水既落。不許湖水走洩涓滴。待後次長水。再灌入湖。漸蓄漸高。以備重運回空。經行。或遇運河淺澀。則引湖水從高下注。庶幾接濟便捷。至諸湖築隄栽樹。統聽山東撫臣就近酌撥錢糧料理。務期秋杪完竣。俾湖河不致虛洩。再開座應照舊例灌塘積水。俟其盈滿。必上開下閉。下開上閉。啓閉以時。庶湖水深廣。運河流通。漕艘無阻滯之虞矣。已嚴飭司閘各官。永行遵照。謹會同總漕臣張大有、山東巡撫黃炳。合詞具題。隨委兗寧道徐湛恩。會同副將閃文繡。遊擊楊枝遠。公同查勘。並飭運捕湖三廳。將所蓄湖內之水。加意節蓄。東撫黃炳。又於八月初四日題稱。准河臣齊蘇勒會稿內開。諸湖築隄栽樹。聽山東撫臣就近料理。務期秋杪完竣等語。竊思湖水之蓄積。全賴隄防周密。閘座完固。方無洩水之虞。今各湖隄防頽廢日久。沿河閘座殘缺頗多。若欲整飭清理。恐非朝夕所能猝辦。况錢糧攸關國帑。動用正項。必須修築堅久。請將蓄水

一事應如河臣所委之寬寧道徐湛恩等。並派來効力。歷練河務之員。分途節省。以備將來。其諸湖隄防。現行有湖州縣查明及時堵築。務使蓄水不致走漏。所需錢糧。酌撥接濟。俟修築堅固後。統於大工案內。一并題銷。再估修隄岸閘座。已交沿河各官。分任估修。以專責成。其雇夫備料。交沿河州縣辦理。并令署布政司須淵親臨督率。以總其事。至一切事宜。皆與河臣商酌舉行。其告成之遲速。實難刻期懸定。已令各員造冊具題等因。部議該撫雖稱造成遲速。難以刻期懸定。但事關河道行文。該撫仍照總河所題。務於秋杪完竣。俟工完。該督撫親勘。將工程丈尺物料銀數。據實造具清冊。具題查核。奉旨依議。運河道冊。八月二十一日。黃炳奏。致治務在得人。敬陳管見。仰請聖裁。奉上諭。已有旨矣。修濬蓄洩各務。雖係河員專任。其夫料等項。一切皆取辦於地方。全賴爾地方各官。戮力同心。共襄厥事。以河漕二臣。呼應不靈也。爾當悉心辦理。稍有閒暇。親赴看視。盡力督催。若至明歲。事不齊備。則疎慢諉延之罪。百喙難辭。與齊蘇勒。張大有。再四會商。妥協而行。朕另有旨。與張大有。令其面諭於伊。將到時。爾迎至中途聽旨。凡關係河運諸務。不時訓飭屬官。必勤敏從事。毋得累民。毋得草率塞責。貽誤是虞。儻河漕屬員。暨奉差督察各員。如須洲等。有騷擾地方有司。以及借端苛求者。爾察明。款據參奏。若爾地方官內。有怠玩遲誤工程者。致被河臣等題參。則修吉圖。余旬。卽是榜樣。爾其加意料理。慎勉毋忽。殊批。諭旨。

十一月十二日。黃炳奏。獨山湖一帶土隄。係運河之東岸。長八十里。俱卑陷不堪。茲據寬寧道徐湛恩等。公同確估。共需銀二萬五千餘兩。前已奏明。是以動支庫銀。委官二十員。分投償修。剋期告竣。至此處運河之西岸。舊有減水閘十四座。盡皆坍塌。急應興修。於來歲重運未到前。務期完工。再馬場湖爲運河蓄

洩之區。隄岸殘缺應修。但目下天寒。難以動土。俟來春興工。又兗州府河道。臣亦詣勘。其金口壩之上流。悉係沙土。每易淤塞。必須不時疏濬。又東平州戴村壩。實爲全河屏障。今因年久。亦多坍塌。設有疎虞。則水勢直洩鹽河。何以濟運。所關甚重。應否修整。謹奏。奉上諭。覽奏。河湖情形甚明。查勘屬實。詳悉周到。照爾所議修理。卽行具題。硃批。諭旨。

是年。濟寧漕河水涸。重運稽阻。至八月初。大雨水發。始得通行過濟。按張清恪言。治河之法。水之小者。可治之使大。其法在蓄水。量塘放船。若水力不聚。何能浮送。僂行漕船。至八月。始得過濟南來。河道建瓴直瀉。分水甚微。自春徂秋。艱難拮据。水小之極也。時議開府河。引水入馬場湖。形勢淺狹。瀦水無多。國初楊方興築楊壩。遏泗洗之水。濟運。然由夏家橋入馬場湖。而後入濟河。其道迂。若使泗洗之水。挾沙并流入天井。建瓴下注。溜急水湧。重運逆挽。而上。稽運糜費。猶未盡善。乾隆丁丑。改壩爲雙槽石閘。以時啓閉。急則借以濟運。緩則儲以待用。伏秋水漲。啓板五路宣洩。兩利無害。是在臨時變通利用也。河渠紀

關

是年。建獨山湖東水土隄。留水口十九。各築壩以備隄防。按獨山湖周圍百餘里。受濟寧鄒滕諸山泉坡水。由隔隄水口入運。張純陽記云。獨山地勢。平行卑窪。自朱宮保奏鑿新河。始蓄爲湖。以資灌注。每遇伏漲。則奔濤傷隄。用石護隄三十餘里。留口引水入運。各引渠闊不過十餘丈。水溢河漲。無宣洩之道。則隄必潰。於是有減水閘十四。築王家口等壩。障薛水。使南趨。由豸裏出地濱溝。以洩之。築皇甫等隄。導沙水北流。入南陽湖以蓄之。閘與壩次第畢舉。水得湖以爲容。湖恃隄以爲固。所謂治之以不治也。前人



用意深遠。至是踵而行之。春夏開十八水口以濟運。伏秋啓昭陽湖單閘滾壩。俾獨山湖水穿運入昭陽湖。下達微山湖收蓄。由韓莊湖口開壩。廣爲宣洩。先期騰空各湖。以容納汛水。預籌修防事宜。蓄洩有法。河渠紀聞。

是年大開府河。引泗沂由金口壩入馬場湖。蓄水濟運。按兗州城東之府河。泗河之分支也。由黑風口分流。穿城西流。至濟。舊由林家橋繞濟寧州北入馬場湖。城東舊有壩。曰金口壩。之上西偏有閘。卽黑風口也。堰沂泗二水。導入閘口。抵府城東門。繞城南。復折而北。經西門。會闕黨諸泉。西流七十里。抵濟寧。東與洸合。出天井閘。蓋元人遺跡也。壩初築以土。隨築隨毀。後易以石。年久失修。山水衝激。壩石圯頽。水瀾原野。田禾盡淹。蓋利於漕者什一。而貽患民田。不啻千百也。至是從張伯行之請。亟爲濬治。明時築壩於戴村。遏汶水分流。汶不入洸。濟寧之南。河漸衍。地漸平。分水亦甚微。不得不截沂泗以合流。居濟一得云。沂河之水。原合泗水。由黑風口入府河。濟運數十年來。舊制不修。有淤至五六尺及七八尺者。河淺不能容水。散漫田間。失其故道。沂水遂不復合泗。入黑風口。竟由金口壩下。直趨魯橋。應亟修復。大加挑濬。卽以挑土築兩岸隄堰。使水不由金口壩南泄。引至長溝入運。汶河口移北十里。南旺大挑。旣易。閘河無慮淺阻。夏鎮一帶。亦不至湖河相連矣。此法常行。民運兼受其益。河渠紀聞。

是年濬治泉源。通流濟運。按山東漕渠。向以五水濟運。汶泗爲大源。諸泉散布於兗泰十七州縣。漚流歸河。運道地勢中高。南北迤邐。就下水洩不收。易致缺乏。濟水伏流齊魯。隨地溢出。爲泉凡二百八十有奇。各就其近。以入汶。泗。沂諸水。伐石起壩。遏注漕渠。分流南北。非濬泉無以廣其流。而濟運泉在山溝。

泥穴中。最旺者萊蕪大汶之源。次則新泰爲小汶之源。次則泰安蒙陰肥城。再次平陰東平汶上萊蕪泉六十四。新泰三十五。泰安六十九。蒙陰五。肥城十六。平陰二。東平四十七。汶上十一。皆分流入大小汶。由分水歸運者也。泗源出陪尾山。其陰有河曰雷澤。左右有泉數十。互灌合流。經卞城橋。橋西南有泉二十。一北流入泗橋。西有泉十三。南流入泗。泗水西流與沂合。入金口堰。又會洸入濟。泉源泗水距運最遠。次則曲阜。次則鄒縣。滋陽。次則寧陽。迄濟寧。泗水泉八十二。曲阜二十九。鄒縣一十七。滋陽十四。濟寧六。與滕嶧魚三縣之泉。分流入運。諸泉皆濟之伏流。濬則溢。出廢則沙沈。運道以徐兗開河爲咽喉。開河以諸泉爲根本。泉源修廢。係運道之通塞。故必歲修無間。河防一覽云。山東泉源屬濟。兗二府州縣入爲五派。濟運新泰萊蕪泰安肥城東平平陰汶上蒙陰之西。寧陽之北。九州縣之泉。俱入南旺分流。爲分水派。泗水曲阜滋陽寧陽迤南四縣之泉。俱入濟寧。爲天井派。鄒縣濟寧魚臺嶧縣之西。曲阜之北。五州縣之泉。俱入魯橋。爲魯橋派。滕縣諸泉。近八獨山呂孟等湖。以達新河。爲新河派。沂水蒙陰諸泉。與嶧縣許池泉。俱入邳州。爲邳州派。酌其緩急。則分水。天井魯橋之派。均屬渭河命脈。疏濬通達。俾源源不絕。山泉砂磧頗多。汶河每虞淤墊。須於大挑之期。一并挑濬。使泉流無阻。亦一策也。河渠紀聞。

雍正二年閏四月二十六日。上諭兩江總督查弼納署江蘇巡撫何天培。河道總督齊蘇勒。漕運總督張大有等。京口一帶運河。爲南北漕運咽喉。歷年以來。挑濬淤淺。皆係丹徒丹陽兩縣百姓。派辦工役物料。俱出民間。殊屬偏累。此運河乃杭嘉湖蘇松常六郡共濟之河。而獨累兩邑之民。其何以堪。朕深爲軫念。今後須確估每年經費。悉心會商。或令地方官支用地丁錢糧。或令河員專司其事。於河帑內動支開銷。

無致累民。更聞六郡向有協濟之例。抑或共襄工費。以濟運道。爾等確護奏聞。以副朕愛惜黎元之至意。  
憲皇帝聖訓。

五月初三日。張大有奏河工挑淺一事。奉硃批諭旨。令據實核奏。欽此。臣到臺莊。往來八閘。查韓莊以上至彭口。有淤淺數處。現築草壩三座。下板蓄水。韓莊以下各閘。俱有淺處。得勝閘以上。雞心洲築草壩一座。張莊閘以上。六里石築草壩一座。俱下板蓄水。糧船始行。緣三閘地高水瀉。河底砂礮。雖加挑挖。不能深通。自萬年閘至臺莊五閘。地勢稍平。雖有淺處。而蓄水既足。船行無阻。再八閘內所挑工程。上年挑挖二次。深一尺至二尺不等。有挑至三尺者。臣謹遵諭旨。據實核奏。硃批諭旨。

是月初六日。山東巡撫陳世倌奏。山東運河在臨清以北者。則資衛水接濟。雖有淺處。隨時撈挖。昨漳河水發。已可通行。至閘河之內。全資汝水。是以閘河每年一小挑。間年一大挑。現不至淤。臣意若汝水流微。卽加挑濬。而無源水接濟。亦不能通。如其流盛。卽不開挑。亦可通達。故此時挑挖閘河。徒屬糜費。於運道無益。臣於初一日。在東平州遇雨。濟兗東三府附近州縣。俱報得雨三四寸不等。將來大雨時行。似不必募夫更挑。惟馬踏諸湖。宜設法蓄洩。至韓莊以東八閘。全恃徼山湖水接濟。聞年來湖水甚細。容詢河湖御史須洲。再爲奏聞。硃批諭旨。

是月二十六日。陳世倌奏。臣於濟南府接奉聖諭。前往催儻糧艘。於茌平縣阻雨一日。見河已發水。未知沙灣隄岸若何。隨於十二日。繞至沙灣。河水長七尺餘。隄岸亦有衝刷。隨檄壽張縣知縣齎銀星夜赴工。又檄布政使兗寧道。迅速發銀。河官詳豐。多備椿料。以防不虞。現在平穩。可以上慰聖懷。惟沙灣對岸一

爲沙灣。一爲趙王河。自開州曹州而來。其上源甚遠。至此會一衝入運河。而運河水漲。自上而下。勢如建瓴。與沙河趙王河水相搏。故沙灣工程最爲危險。臣看沙灣北五里許。有五空橋一座。原洩運漲。入於鹽河。若將沙河改移於此。對五空橋。使水直洩鹽河。則此段工程易於保固。彭口地方。上會玉花泉諸水。出以濟運。挾沙而來。兩岸山積。對岸設有三空橋。使沙隨水衝。直出橋外。年來壅積亦甚。糧艘至此。每苦阻滯。上年撫臣河臣會商。移此口於北二百四十餘丈。上築大壩。攔塞舊河。另開支河一道。以避淤沙。但上源流沙。勢不能免。而支河入運處。又折迤北七十餘丈。方始入運。臣愚以爲水折。則行緩。而沙停。且對岸無處出沙。恐停積運河。若將支河口直出運河。勢更湍急。沙可隨行。於支河對岸。做前人遺制。築三空橋。使沙衝入對岸湖內。則運河無虞。沙墊再韓莊。德勝。張莊三閘。河底俱係沙石。挑濬費力。或於秋冬開挑。或於德勝張莊兩閘間。添建一閘。蓄水。再前任撫臣黃炳。估修閘座二十五處。橋心中塚一處。添建閘一座。臣沿河閱看。有應急修者。有應緩修者。俱未領帑興工。至幫築隄岸。止聊城。博平。堂邑三縣。共領過銀九千九百九十八兩零。現在修築其餘。亦未領帑興工。臣將原估銀數。一并具奏。但兩岸隄工。應幫丈尺若干。舊工若干。須逐段丈量。此時河內水滿。無從核估。所修閘座丈尺料工。亦須逐層核算。而閘內裏石一層。更須乘修築之際。不時查閱。方能責其實在。若待工完查勘。則難再拆驗。臣意上年奉旨設立湖河御史衙門。稽核工程。是其專責。可否交御史督同道廳印河各員。詳加確估。卽責令領帑興修。工完造冊報部核銷。殊批諭旨。

六月十二日。直隸巡撫李維鈞奏。據通永道高鑛呈報。通州武清縣二處運河椿土各工。原係侍郎牛鈕

領帑辦修。與地方官無涉。但今大雨時行。河水驟漲。武清縣屬連河東西兩岸。河西務。棋子淀等處。俱各漫開。皆因向修隄岸。單薄虛鬆。朽裂圻陷所致。臣查運道關係重大。一面飛飭高鑛。親驗各隄。衝決若干丈尺。有無損壞。村莊田禾。俟覆到另奏。合先行奏聞。奉上諭。牛鈕所修工程。朕謂斷不致如高鑛所報之甚。伊受恩深重。諒非木石。何忍如此負朕。今歲雨水。原係異常之大。所以致有衝決。其爲人猶屬直率。頗稱歷練。加之訓教。尙可委用。非棄材也。硃批諭旨。

九月二十三日。陳世倌奏。臣於十三日。自曲阜前赴南陽。查勘湖隄。又直抵臺莊兼勘開座。臣同須洲逐節簽驗。因於運河西岸取土。值糧艘回空南下。一日之中。時復掣拽浮橋。故各員雖竭力興築。不無虛鬆。臣飭令重修堅實。一面會同須洲具題。令再查勘。現在拆修加幫。容另疏題覆。其運河水五尺有餘。回空糧艘。可以過行。惟彭口支河一處略淺。而現無停阻。至前撫臣黃炳會同河臣所估。應修開座隄岸。共需銀二十七萬兩零。臣以爲宜酌緩急。陸續興修。今先將最坍陷之二閘。令覓寧道備料核估。造冊具題。硃批諭旨。

是月二十八日。李維鈞奏。玉田縣還鄉河。於康熙四十二年間衝決。被淹民田四千三十一頃。其地千有餘頃。臣仰體皇上軫念民瘼。至意備發銀兩。委武清縣知縣等修築。並不費民一錢。勞民一力。據報自運河頭起。至牛見莊止。計六十二里有奇。寬十一丈至三四丈不等。疏濬深闊。兩岸隄堰。培高添厚。其莊前決口。建月牙大隄一座。隄前臨水。又築滾水壩一座。莊南決口。亦俱堵築。水歸故道。暢流入海。舊淹旗民之地。盡已涸出。臣念還鄉河兩岸地土。有淹有涸。今河濬隄築。此後地盡可耕。糧皆有著。謹奏。奉上諭。修

濬還鄉河計日成功甚屬可嘉該撫並委員陳良襄等朕已諭部議敘矣硃批諭旨  
是年改造江廣漕運船式以十丈爲率開河蓄水以四尺爲限按江廣糧艘頭闊丈六七尺底深七八尺非比江浙東豫諸船由內河轉運也至是議定加長船式十丈爲率其餘五省之船仍如舊式開河必水深四尺但運河水勢全在蓄洩得宜勢難責以定數豫東宣防錄云准工部咨漕督補熙奏江廣糧船改造十丈爲率開河之水務足四尺行令沿河官弁實力挑挖水勢不足據實查參查挑河在乎人力人力不至固難寬貸然水勢消長不時深淺無定東省開河無源之水從山泉石罅泥穴中尺寸細流會於汝河出南旺分濟南北流經千餘里歷四十八閘層層灌輸晝夜不息不能有長無消加以地勢高下南旺分水之處南高臺莊百十六尺北高臨清九十尺前人設閘蓄水以防傾瀉上閘閉而下閘啓遞相爲用不能兩閘俱深者勢也至長河雖上下閘十餘里至三四十里七八十里以十餘里之水輸於最長之河其必不能如十里之深者亦勢也河水源本山泉春夏雨澤愆期水有去路而無來源其不能不淺者又時也今夏天旱水少嚴下捱牌倒板並依潘季馴偶淺急疏之法多築逼水草壩竭力資送南漕重運並未停滯亦未起剝並無待如數挑深朱之錫治河書載運船正米不過四百石入水深不過六捺六捺者三尺也故水力必與船力相勝若船不足數而徒搭運省船致水力不勝而漕大困不能歸咎於無源之河也自江廣船式改長以來未聞年年淺阻良以水源無幾節宣有制故多不至溢少不至涸惜水正所以利運若概以四尺爲度二月頭幫入閘至五六月尾幫出閘開放四月之久前去後空恐涓滴如金之水消耗於無用之時至江廣重船到時水已告竭反無接濟是因增水以耗水而誤重運也况運軍藉

水不足。借端逗留。沿途貿易。閔鬪生事。亦從此起。運河歷年大小輪挑者。止有汶上、南旺、臨清之輓板。濟寧之天井塘河。並滕縣彭口四處。長各不過七八十丈。通省運河千有餘里。未嘗並治。有不能全疏者。二不可過深者。一南旺等四處。爲運河關鍵。淤沙倍積。是以定二年大挑。一年小挑之例。按夫挑土計工限日。夫少限迫。不能通行挑挖者。一挑河必先築壩。屏水全挑。則河內之水無處收蓄。不能通挖者。二汶水挾沙而來。汛水發時。開東岸常鳴等八斗門。將浮沙掣入南旺湖內。若河身過於挑深。而斗門之底高於河底。勢不能掣沙入湖。河內積淤更甚。此不可過於挑深者也。若執水聚則深之說。全河之水盡歸河洪。兩岸俱係乾灘。河形壁立如溝。漕船亦難掉頭回尾。回空南下。江廣北上兩船。必致頂阻。卽南北差民船隻。亦無路可通。前明蘇惟霖云。山泉之脉。止有此數。河身高則高受。低則低受。水之多寡。原不係河身深淺也。朱之錫疏云。因重運而積水。因倍載而起剝。皆運河不得不然之勢。是從前已有此例。江廣糧船載多起剝。所費無多。酌起剝與通挑增水之費。所省實倍。東省與各省運河不同。不必另定水則。照例挑挖。卽可濟事。此權通河之大勢。而條陳詳明如此。然不能深挖之形。易見。不可深挑之說。難明。蓋運河自高而下。勢若建瓴。挑不如式。一處過深。則上下之河必淺。法貴能蓄。尤貴能留。問水集云。南旺上源分水處。河底僅四丈。下流愈廣愈淺。治水者慎毋病其狹。而務爲廣大也。余濬河至三柳灣。八里灣。孟陽泊。二閘之間。役夫云。下皆生土河底。舊止於此。余猶病其淺。一老叟進云。聞之先輩。兩閘間須留少淺之處。余恍然而悟。蓋中道皆深。下閘一開。上閘之水盡洩。閘近者積水猶易。閘遠者倍費時日矣。故中道留淺十餘丈。船行至此。雖少待。然積水不必盈閘。卽可越之直上。此卽不必過深之說。治運之機。宜深思而自得也。

河渠紀聞

是年張大有等奏稱。臣陛見時。面奏山東運河八閘內之德勝閘。至張莊閘。係十二里直河。水難停蓄。易致淺阻。似宜於兩閘適中處六里石地方。添建一閘。蓄水濟運。隨奉俞旨。命與河臣撫臣商議具奏。欽此。臣等會勘得德勝閘至張莊閘。河勢甚直。岸峻地高。每遇水少。不能存蓄。該管印河各官。每於六里石地方。修築草壩一道。以爲關欄。今若於此再添一閘。則三閘相近。或恐山水暴漲。勢如建瓴。旁無宣洩。閘座難以撐持。細度情形。似應於此草壩處。所再築石壩一座。較比上下閘頂。減矮六尺。水小則收蓄濟運。不致淺澀。水大則漫壩順流。可免漲裂。似於運道有裨。奉旨此議甚妥。該部照奏施行。運河道冊。

是年總河齊蘇勒建六里石閘。按自臺莊至韓莊八十餘里。地勢建瓴。高下懸殊。以閘爲節。使不致直瀉。而張莊至德勝。形勢更直。兩崖陡峻。不能蓄水。是以齊勤恪奏定於適中六里。建閘收蓄。又恐三閘相近。溜勢湍急。山水暴漲。宣洩不及。金門較比上下兩閘。減矮六尺。嗣以閘面太低。漕運不便。漕督張大有議加高閘牆。用以草代石之法。於閘面鑲草六尺。水發聽其漂失。水仍暢流。總河白鍾山復議於閘之雙槽下板實土。漕船由月河行走。水勢紆曲。不令直瀉。蓋爲蓄水計。下板則可議節宣。鑲草卽不便啓閉。爲船運計。則利由金門逕過。而厭月河之紆曲。居濟一得云。爲湖河接濟。運河不足。故八閘常宜閉板蓄水。至水不足用。則啓板接濟。若湖水盛漲。則啓閘不下板。開月河放之。是八閘以啓閉爲節也。而運丁輒爲口實。故在漕言漕。則有鑲草六尺之議。而閘不能啓閉。竟爲虛設。相時所宜。使水大由月隄旋轉。無礙運行。閘仍啓閉如法。又得疏洩漲水爲兩得也。河渠紀聞。



是年始建邳州運河清定成三閘。按張伯行言濟寧至臺莊相去四百里中間設閘二十座臺莊以下至淮黃交匯中間將及四百里並無蓄水之閘宜於臺莊以下徐塘以上增建閘座其時言之未行至齊勤恪始用其議創建三閘一曰河清兩牆長二十二丈四尺高二丈八尺八寸金門寬二丈二尺閘旁月河一百二十尺二曰河定金門兩牆高寬丈尺與河清同閘旁月河丈尺亦同三曰河成兩牆長十六丈四尺高二丈七尺金門寬二丈二尺月河百三十八丈工竣三閘東下瀉之水月河佐以行運永爲漕利然自河成至楊莊運口三百餘里並無關束河流直瀉淺運乾隆乙巳奏建閘於貓兒窩迤下之八堡曰利運宿遷關以下之王莊曰亨濟嗣奉諭旨兩閘恐不足資擊蓄乾隆丁未議於河成閘下馬莊亨濟閘下坡墩各添一閘奏覆如議工竣賜名滙澤潔流自黃林莊以南層層關鎖啓閉由人重運經臨足資淨送嘉慶癸亥衡工漫口水注張秋臺莊以下運道水淺賴諸閘擊蓄空重如期往還貽謀深遠流澤孔長矣。河渠紀聞。

是年改恩縣四女寺減水閘爲滾水壩。按此分洩運河有餘之水易閘爲壩以暢其流也。閘建於明嘉靖時洩漲水入老黃河救山東直隸水患制之最善者。年久閘壞引河淤塞至是修舉以舊閘洩水不暢改建滾壩寬八丈壩身高河底丈有七尺壩南修砌輒工自壩口挑支河五百餘丈嗣經侍郎趙殿最勸議下流尚淤奏請從壩口起至德州九龍廟入老黃河估挑河泓二千三百餘丈又將輒工迤西至三義廟幫築土隄估辦完竣後朱文端公軾復請將壩口河身概落低二尺口門開寬三十丈引河開寬二十四丈總河朱藻議以引河寬於運河本小支大恐致奪河而當時引河半淤路遙費鉅工久不舉張清恪

言復開壩易復引河難。此通達之論也。數千里長河。僅開數丈之渠。民力已懼難支。卽勉力竣事。而水長沙壅。岸平流緩。無急溜淘刷。不數年輒淤。其事在當事之調劑矣。河渠紀聞。

先是磁人於東開北十里閤家淺。建閘攔河。名第三閘。由是下流邯鄲永年二縣。當春耕時。不得沾滄水涓滴之利。是歲奉旨兩省勘議。割磁州入直隸廣平。毀第三閘。刻日分水。始得均利。部議得總督李衛議。覆張廷勳條奏。磁州攔河三閘一案。疏稱。據河道趙國麟詳。據磁永邯曲雞五州縣覆稱。滄河一水。向因磁州築閘。任意啓閉。以致水利不均。今會議磁州東西二閘。仍循例自三月至八月止。定限十日。輪流啓閉。竊思三月至八月。正田禾長。養成粒之時。儻雨澤稀少。必待十日。灌注恐磁永上下失水澤之利。且滄爲商船往來之道。若必十日始放。則商船坐守一旬。必將有斂金買水之事。應以五日爲限。留水灌漑磁州。則東西兩閘五日俱閉。放水灌邯永等縣。則東西兩閘五日俱開。永杜爭訟。州議按磁州縣閘有七洞。每洞下板八塊。每塊一尺三寸爲度。積水至板六塊。卽可分注溝渠。至八塊而各田充足。請自二月三十日將閘板全下。每月啓閉六次。啓閉之法。水底留板六塊。水面去板二塊。使本地溝水常存。而下游餘波不絕。旣不閉水以病鄰。亦不竭上以益下。東閘止一洞。下板十三塊。每塊以一尺爲度。使與水閘同日啓閉。水底留板九塊。水面去板四塊。每遇啓閉。委官看視。俟水與板平。卽啓。一啓以五日爲率。由東閘而下。閤家淺第三閘。拆毀不許復建。畿輔安瀾志。

# 續行水金鑑卷第七十四

## 運河水章牘二

雍正三年三月二十五日。李維鈞奏。文安。大城兩縣交界之艾頭莊至灘里村等處。被水地方。經都統額爾金奏請挑河築隄。奉旨前往查丈之日。會同勘明。詳議具奏。臣遵於十五日。會同額爾金。並率同子牙河分司霸昌道文安。大城兩縣等。勘得子牙河隄東有艾頭莊支河。長二十餘里。闊四五六七丈不等。其河南抵子牙河大隄。北通淀河水。大之年。淀河水灌支河。河邊十九村莊。往往被淹。臣等會商於艾頭莊前築一小堰。攔截淀水。不入支河。可以保衛十九村莊。而艾頭莊百姓。又以東北風大。則淀河水勢直衝艾頭。若將支河口堵截。則艾頭莊之受害。比十九村爲更甚。因從支河口泝流而南。地名張毘口。向有民堰一道。高出水面二尺。其址猶存。擬照舊堰基址。築堰一道。仍高水面二尺。則水小之年。十九村可以保守。水大之年。艾頭莊亦不受衝激。奉上諭。卽照所議行。硃批。諭旨。

七月初七日。九卿議奏。先經原任大理寺少卿須淵條奏。內開。山東運河。額設淺溜壩。等夫。以備隨時挑淺。但挑淺人立水中。難於施力。豈能濬之使深。且所用之夫。俱出各州縣派送。由是有幫貼之錢。比額設工食更多。在州縣則取之百姓。在河官未必散於夫役。查各汛夫食額銀。約二萬四千餘兩。運河自北而南。長一千二百餘里。俱有應轄州縣衛所。若令印官不時巡查。如有淺澀。卽用正項錢糧。挑濬報明河道。歲終稽核奏銷。計終歲各州縣衛所。其費不過數千餘兩。而幫貼竟可停止。至大挑小挑。亦係各州縣

照田派錢送於河官雇夫名爲酌補夫。今若以挑淺工程責之印官。則每歲額銀二萬四千餘兩。必多餘剩。可以隨時雇募。不必再從民派。况大挑原有恩賞銀兩。卽添入額銀之內。雇夫更無不足。於河工無損。而民免苛派。似亦公私兩利等因。經九卿覆令該督撫據實確查。妥議具題。今據齊蘇勒疏稱。東省運河云云。應如所請。其巡防疏濬。仍責令河官專司其事。至需用夫役。責成濱河地方官。將幫貼工食銀錢。酌量雇募。呼應得靈。工不貽誤。如有印河各官。多派短給等弊。該撫卽行指參。年終仍令該撫將所收若干。所給若干。造冊報部。再查挑淺一事。有關運道。該督既稱大挑小挑。乃歲修定例。臨期挑淺。乃至急之搶工。似應循舊爲便。應如所請。仍令每年一小挑。間年一大挑。至臨期或有淺阻。務令卽挑濬深通。使漕艘遄行。運道無阻。儻有捏稱淤淺。希圖冒銷情弊。該撫卽行查參。交部從重治罪。八月初八日。奉旨依議。此議內稱幫貼工食銀錢收給數目。該撫年終造報等語。此項銀錢。巡撫無憑稽察。卽交與河道總督造冊報部。運河道冊。

是月十一日。陳世倌奏。據溫文桂條奏。疏濬平度州境內膠河緣由。奉旨著臣查明具奏。臣因委原任膠州知州馮景夏。會同該地方官。將膠河確勘。今據稱平度州南鄉。並非膠河。溫文桂所奏。乃膠萊之運河也。此河自膠州海口之麻灣入口。由平度。高密。昌邑三州縣。至掖縣海倉口入海。長一百九十九里零。係元時運糧之河。中間有分水嶺。形如龜背。水至此東西分流。不能合一。今就地勢作兩截疏濬。東半截一十六處。西半截六十五處。河身窄淺。止須挑挖寬深。惟掖縣海倉口。乃全河洩水入海之處。現今沙積計長五里。以致水散無歸。淹及地畝。此處應加開掘。俾河水暢流入海。則莊田均有裨益。但須於三四月間。

無大北風捲潮入口時。施工爲便。此溫文桂條奏之河。應行疏濬者也。至膠河發源膠州鐵嶺山外長城嶺南。由膠州境五十七里。經高密縣境九十六里。入平度州南之膠萊運河。此河患在上流寬闊。下流窄狹。而歸入膠萊運河之處。淺不成河者。四里有奇。淤如平陸者。一十五里有奇。水勢散漫。兼有百脈湖。五龍河。張魯河。會流泛溢。各州縣雖築隄堵塞。而水無去路。難免潰決。今應將淺窄積淤處所挑深。引水歸河。自無淹沒之慮。此溫文桂條奏所未及。應並行疏濬者也。計兩河共估挑土一十四萬九千二百七十方。擬於農隙舉行。謹奏奉。上諭。凡一切條奏地方事宜。朕概發與爾等督撫。勘酌可否。非朕所真知灼見。必欲舉行之事也。此所奏膠河。如確乎有益。則亟宜興工疏濬。無益則止。總在爾審定之耳。硃批。諭旨。是月二十日。上命內閣學士何國宗等。閱視河道。諭曰。運河關係重大。言者皆是近理。而議論多有不同。今蔣廷錫條奏款項。爾等前往詳加閱看。凡泉源湖身。與各水源地。方勢。務須身到測看。方得確準。定議。不可苟且草率。意爲揣度。以致後日勢不可行。河道總督。凡黃河所經。皆其管轄。豈能處處親到。卽河屬官員。偶有所見。亦未敢輕易舉行。爾等將儀器輿圖。一并帶去。再有算法館行走明白測量人員。著何國宗指明舉奏二人。帶去詳加測量。或蔣廷錫條奏款項之外。有關係運道。應查看修理之處。亦逐一審視。會同該督撫詳議具奏。務期一勞永逸。總河齊蘇勒。現在堵築決口。爾等此去。先看漳河衛河後。到濟寧。則總河隄工事完。便可會同閱看。儻該督撫有緊要事務。爾等或稍候數日。或躬往就之。勿致貽誤地方。憲皇帝聖訓。

先是戶部左侍郎蔣廷錫條奏。查浙江湖廣江西漕船。過淮而北。自淮安關至臺莊。爲江南運道。長四百

二十里。自臺莊至李家莊。爲山東運道。長九百里。自李家莊至天津關。爲直隸運道。長七百六十里。淮安至臺莊。爲新運河。爲裏河。爲黃河。爲濟運中河。爲皂河。爲泇河。會沂泗沙肥之流。益以淮徐諸湖之水。漕艘歲無淺阻。其自臺莊至濟寧天井閘。惟資沂泗泇三水。天井閘至臨清會通閘。則獨藉汶水一支。計此四水源流微弱。或遇雨澤短少。運河水往往不能濟運。地方有司及押運官弁。惟議挑淺以濟起剝。竊思水源不充。徒事挑挖。但見河身日深。河水究無增益。籌畫似未爲善。又自會通閘至青縣。惟有衛水經流。年來亦漸微緩。恐將來泥沙壅滯。有妨運道。查明代漕政河防諸書。於泉湖節宣濬蓄之道。講求甚備。而本朝立制。亦極詳盡。良法美意。載在方策。又前人有分漳濟衛之說。似亦可採。臣引舊聞。謹條奏五事。爲我皇上陳之。一廣濬泉源。以裕灌注也。查山東漕河。資汶泇沂泗之水。而四水源皆微細。全賴泉源輸助。明肇域誌云。山東之泉。百有八十。其派有五。今按五派已詳載雍正元年河渠紀聞所引濟治泉流一條內。茲不載。皆所以濟漕也。各州縣俱設泉夫。不時疏濬。又慮泉水泛漫無歸。以相近之泉。或五或三。引委歸一。滙爲小河。同出一道。謂之泉河池口。我朝特設管泉分司。以董其事。後雖裁分司。而泉夫至今仍設。但各州縣以事非己責。或不經心。而本地豪強有力。遏泉灌田。澆圃甚者。引爲池沼。以致泉政多弛。通流無幾。伏請敕下河道總督山東巡撫。嚴飭有泉州縣。按誌考圖。親率泉夫。力爲疏濬。其有盜遏者。照律治罪。庶使灌注易盈。於漕渠定有裨益。又明于欽齊。乘載歷城縣金線等七十二泉。後復濬得天鏡等新泉五十七處。萬歷時。濟南道呂坤。以濟汶之泉無幾。重濬得曲阜等州縣新跑諸泉十八處。於是汶水流旺。漕舟通行。蓋濟竟爲濟水伏流之地。隨處發見。今廣爲濬導。安知砂礫草莽中。不有奮湧出地者。是在

地方官勤爲勤勵。如泉夫濬出新泉。官立賞格。賚以銀米。其各州縣亦於年終將開疏舊泉若干。搜濬新泉若干。詳報總河巡撫。如果泉湧暢達。運道通利。題請議敘。或將舊泉廢棄。運道淤淺者。卽指參交部議處。庶人心奮勉。泉政不弛。再有泉各州縣泉夫多寡不同。如磁陽平陰二縣。僅十名。濟寧州僅九名。嶧縣僅五名。恐不敷疏濬之用。應否添加。請并交總河巡撫酌議具奏。一、開復湖地。以預儲蓄也。山東運河。旣賴諸泉灌注。而泉源有時微細。尤賴諸湖積水。以濟輸輓。查諸泉所滙爲湖十五。分水口之南曰南旺。東西二湖。其北曰馬踏。又北曰安山。南旺之南曰蜀山。曰蘇魯。又南曰馬場。皆所以資放水之不足也。濟寧州之南曰南陽。亦曰獨山。又南曰大小昭陽。又南曰武家。曰郝山。曰微山。曰呂蒙。曰張莊。皆所以資沂沭泗水之不足也。諸湖連注。各建長隄。陡門爲減水閘。以時啓閉。漕溢則減漕。以入湖。漕涸則放湖。以濟漕。故謂諸湖曰水櫃。當時盜決占種有禁。每年一大挑。至明萬歷時。諸湖積淤成陸。又百姓壅水自利。私塞陡門。所建隄閘。逐漸湮廢。然是時巡撫李戴開挑湖地。疏所記諸湖低窪蓄水之處。較宣德時尙存十七。一經修復。漕運大利。今又百六十餘年矣。聞安山南旺獨山昭陽等湖。大半爲人占種。低窪之地。亦生菱草。其積沙處。高與漕河隄岸相等。是蓄之無處蓄也。及水潦之時。湖身旣高。不能存貯湖水。反溢入於漕。是減之無所減也。而陡門閘壩。恐亦湮塞坍塌。請敕下河道總督山東巡撫。查勘諸湖耕種升科之地若干。其已經佃種徵租。久爲民業者。仍聽耕種外。將低窪菱草處。悉行挑深。復古水櫃之法。以貯積泉流。卽將挑出之土。築爲高隄。以約束水櫃。每湖開小支流數道。以承諸泉之入。益漕水之流。每支河口。建減水閘壩。以時減放。庶蓄洩得宜。運道有賴矣。一、嚴定築壩開壩日期。以撙節水泉也。查漕政考山東

運河每歲十月築壩遏流分洩諸湖。候來春冰泮開壩受水。冬則以漕水滙於湖。春則以湖水放於漕。故會通閘南至臺莊。既得乘時挑濬。不致淤阻。又得素有蓄儲。不致淺涸。法至善也。但法久玩生。築壩之期。每至十一月中。未免過遲。開壩之期。每至正月初旬。未免過早。夫時至十一月。河水將冰。已不能約水趨湖。則遏流之壩。實爲空築。又天寒冰凍。乃驅河閘之夫。裸體跣足。鑿冰挑淺。詎有益乎。藉令鑿見河身。可以挑土。然挑去一擔之沙。其中必雜冰三四斗。是挑淺十分。已消去河水十分之三矣。及來年冰解。正宜封固以蓄春水。乃於正月初旬。卽放水行舟。且將上下諸閘。通行啓板。一任船隻往來。夫三冬歸壑。水蓄幾何。節省尙恐不繼。而以建瓴地勢。聽其南北放注。欲長流不缺。難矣。設或三春無雨。運艘方至。將何以濟。請敕下河道總督山東巡撫。轉飭管河各員。每年築壩之期。務於十月十五日前開壩之期。必至二月朔日後。其大挑之年。則於九月終卽行堵築。有過期者。該督撫題參議處。夫河水多蓄一日。卽可裕一日之用。且河冰未合。易於遏流歸湖。使河身露底。則施工亦便而淺。夫免嚴寒凍坼之苦。似於河政有益。或以築早開遲。於商船有礙。第思河水若得充盈。則漕船過行無阻。計五月入臺莊閘。六月盡出會通閘。其春二三月。秋七八九月。皆商船來往之時。春水既有蓄儲。及七八月間。正當雨澤時。行河流盛滿。行舟可計程而進。臣愚竊謂不惟無礙。而且甚利也。一修築坎河灘壩。以防滲漏也。山東運河自臨清會通閘。至濟寧天井閘。長四百二十八里。惟賴汶水一派。分流南北。以成漕濟運。是汶之涓滴。皆當護惜。而戴村壩西北有坎河口。爲汶水北趨大清河入海之道。其勢就下。奔注甚易。明宣德時。築戴村壩於汶水南。以遏汶之入洸。建坎河石壩於汶水北。以節汶之入海。嘉靖時。總河侍郎萬恭。復堆集石灘。水溢則縱之歸。



海水平則流之入湖。後雖歲修，久恐頽廢。萬一汝水北注，挾湖泉而盡趨於大清河，則四百餘里之運道，所關非小。請敕下河道總督山東巡撫，遣諳練河員，相度形勢，將舊時石灘，有無毀廢，作何修復，及應否改建滾水石壩，以爲蓄洩，會同詳議具奏。一、分漳資衛之故道，似可復也。衛水出輝縣百門泉，其流甚細，雖東引淇湯洹之水，而三水亦弱，故河南漕艘，自衛輝水次受兌，至於館陶，每苦淺阻。又北九十里，至臨清，與會通河合，河身稍寬，然每當豫漕北上時，會通河諸閘，正當封閉，蓄水以待南漕，其流入衛者，不過於南船放閘時，順下分寸之水耳。其自臨清至青縣，仍僅衛水一流供運也。考元河渠諸書云：衛水至山東館陶，漳水合焉。北與會通河合。北歷德滄諸州，至青縣合滹沱河。北達天津，會白河入海。故衛河充足，運道無阻。今青縣以北，猶是昔日故迹，而漳水北徙，則在明萬歷時，先是永樂中，漳水入衛之道湮塞。宣德八年，御史林廷舉按元時舊迹，於廣平縣大留村，鑿通故道，置閘遏水，轉入於衛。嗣後衛河水增，漕舟便利。至萬歷二十八年，漳溢滙流而北，入衛之道遂廢。給事中王德完上言：衛水昔仰漳而令舍，漳是以細緩不能刷沙，宜塞高家口，漳水合溢之道，導漳入小屯河，達衛，費小利多，實爲上策。時議不果行。自此漳與衛分而爲二矣。夫衛水自輝縣至大名，有淇湯洹三流，足以濟漕。雖盤剝多費，幸道里尙近，自大名至青縣六百餘里，若得漳水以廣其流，誠七省漕運之大利也。臣嘗考地圖，今廣平南至冠縣西，有地溝一道，長五十餘里，俗所稱古屯氏河也。每漳水盛長，常有漫水溢入，通流於衛，卽林廷舉所開故跡。今若於此處施工，因淺加深，因狹加廣，開引漳之口，導入衛之流，所費諒不甚鉅，可以復先時之利。但漳大衛小，恐有泛溢，宜於所開之河，多置閘座，衛盛則閉閘，約漳北趨，衛弱則開閘，引漳濟衛，似於衛河運道。

甚有裨益。請敕下直隸總督會同河道總督委員詳勘定議具奏。奉旨著九卿看。並問九卿目今現任官員內平日明白河道之人可舉出。或候選官員內有知河道者亦著舉出。該臣等會議得蔣廷錫條奏運道五款似屬周詳。但臣等於運道情形未能周知。伏乞皇上將原奏敕發河道總督直隸總督山東巡撫詳悉定議具題。都察院舉出御史尤清王之錡。吏部舉出郎中喬世臣。工部舉出員外郎馬泰。具奏奉旨著派出學士何國宗。護軍參領翟桑。御史尤清王之錡。員外郎馬泰。將蔣廷錫條奏摺內款項逐一詳看。巡撫管轄之處會同巡撫看閱詳議具奏。係河道總督管轄之處會同河道總督看閱詳議具奏。運河道冊。

十一月初十日。豫撫田文鏡奏。欽差學士何國宗等於上月二十三日。到臨漳縣。查看衛河。臣適因閃跌。隨知會副河臣嵇曾筠會同閱看。今何國宗等查看到省。與臣會議。臣查據條奏所請。引漳濟衛及分沁入衛之處。俱因水性極暴。難以建閘。不便輕開。無庸詳議。臣查有輝縣之蘇門山。百泉河。內縣之小丹河。安陽縣之洹河。雖均係入衛之水。現各通流。應再開深廣。以濟漕運。又湯陰縣之湯河。源輝縣之蓮花泉。紫微觀泉。萬泉。焦泉。丁公泉。重泉。梅竹泉。修武縣之五里泉。馬方泉。淇縣之淇泉。安陽縣之珍珠泉。并洹河源善應山泉。亦現飭各地方官估計。再加挑挖。使泉水盡入衛河。濟運。除將各河泉源會議。並一應開挖工段丈尺數目。繕冊疏題。理合具奏。奉上諭。此係專差。何國宗等會同查議之事。總俟伊等奏到再定。殊批諭旨。

十二月十六日。陳世倌奏。臣會同學士何國宗等。沿途測量。安山湖現有積水。止須修築圈隄。不必更濬。

南旺湖亦尚有出水之處。可以達運。又戴村壩壩底椿木年久朽損。壩石亦有坍塌。應行修整。經何國宗等會同河臣齊蘇勒及臣詳議。現在會題。今何國宗等將已勘之處。先行繪圖定稿。於十二日起程回京。奉上諭。何國宗等到京。朕自有裁奪。硃批諭旨。

是月二十九日奉旨。何國宗等所奏運河情形。甚爲明晰。但督理工程。若委之地方官。恐因循遲誤。若特差官員前往。又恐呼應不靈。且不得其人。反滋煩擾。朕意欲將沿河應修工程之州縣。俱著揀選賢員補用。果能實心任事。朕自加恩議敘。如此似於地方工程。均有裨益。著九卿速議具奏。該臣等會議得內閣學士何國宗等奏稱。東省濟寧天井閘以北。惟賴汶水一支。春夏之交。必藉湖水。以濟輪輓。非蓄以水櫃。則無由積其有餘。非束以隄岸。則無由防其旁洩。但湖水必須蓄高。方能入漕濟運。應於河高湖低之處。建閘減水入湖。放水入漕。庶蓄洩得宜。運道有賴。安山湖久經廢棄。南旺湖北濟運閘壩。又復淤坍。惟仗馬踏湖一流濟運。今安山湖現有積水。請因其窪下。將周圍湖隄。循照舊址。再加修築。所有湖內民居。並地畝錢糧。作何安置。豁免聽撫臣查明具題。再南旺馬踏蜀山馬場等湖隄。並關家壩。俱應加高培厚。修建重板石閘。則啓閉易而蓄洩以時。其分水口南北積沙成山。請於兩岸沙山之下。各築束沙壩一道。每年估修。則河不致淤挑淺亦便。至山東運河例係冬則築壩挑淺。春則開壩濟漕。怕開壩閉壩。俱以糧船來去爲期。築壩太遲。則冰堅水涸。不惟挑挖難施。且河水亦多消耗。請敕諭該督嚴飭押運。催漕文武官弁。及沿途印河各官。於重運開行之際。嚴催抵通倉場收兌。催償回空一過。卽行築壩挑淺。如不行築壩。仍聽商船往來。或糧船未及過淮。先行開壩等弊。該撫卽將該管各官查參。又修戴村壩於汶水之南。建

坎河石壩於汶水之北。請敕下河道總督山東巡撫。遣諳練河員。往度形勢。將舊時石灘。有無坍塌。作何修復。及應否建滾水石壩。以資蓄洩。會同詳議具奏。但舊壩地平椿多。若盡行起拔換新。則土鬆不能堅固。若用舊椿。恐年久朽壞。必致坍塌。請於舊壩內添築滾水石壩。即用舊壩裏頭添砌。中實以土。再將舊石壩椿間刷空。石塊虛懸之處。重加填實安砌。并中間亂石壩跌水衝深者。俱用亂石填平。以爲坦坡。以上各項工程。撫臣現飭印河各官。確估另奏外。臣等合詞具奏等因。應令總河並山東巡撫。轉飭諳練河員。逐一查明妥議。又奏稱准漕運總督張大有咨稱。南旺迤北。現在濟運之水。止有馬踏一湖。但日久淤高。應築隄蓄水。安山一湖。因民間升科納糧。此湖盡廢。今中間尚有空闊低窪處。所似應圈隄數十里。以時蓄水。實於運河有益。再開河之西。舊有關家大壩一座。原爲南旺湖水濟運。因淤久闌廢。今應仍挑引河。修復此閘。引水濟運。則開河以北。無虞淺澀等因。臣等現於何國宗等所奏內。議令該撫將各項應修應建工程。查明具題。此項毋庸再議。其沿河有應修工程之州縣。令該撫會同總河等。揀選賢能熟諳河務者。保題引見調補。如果實心任事。該督撫等將該員功績造冊具題。請旨議敘。則人皆鼓舞。而於地方工程。均有裨益矣。奉旨依議。運河道冊。

是月奉諭。河道總督齊蘇勒。宿遷以下。因黃河決口。尙未堵成。黃河大溜。不能暢直通流。至有淤淺一二處。水勢急溜。河身復多沙礫。該地方官。槩不實心料理。以致回空漕船。至此不無阻滯。儻冬底春初。決口尙未合龍。河溜不歸故道。宿遷運河一二淺處。明年重運漕船。定多梗阻。干係甚大。該總河常嚴飭河員。上緊堵築。必於桃汛之前。將宿遷決口。修築堅固。其淤淺處。加工挑濬。則來歲糧船重運。方無遲誤之

惠憲皇帝聖訓

是年。怡親王朱軾會奏查勘直隸之水。總會天津。以達於海。其經流有三。自北來者曰白河。自南來者曰衛河。而淀池之水。貫乎自衛之間者。曰淀河。白衛爲漕艘通達要津。額設夫役錢糧。責成河官。分段歲修。而統轄於河道直隸總督。年來白河安瀾。無汎溢之患。惟飭河道官員。加謹防護。衛河發源河南輝縣。至山東臨清州。與汶河合流。東下。河身陡峻。勢如建瓴。德棣滄景以下。春多淺阻。遇伏秋暴漲。不免衝潰。查滄之南有甄河。青縣之南有興濟河。乃昔年分減衛水故道。今河形宛然。閘石現存。請照舊疏通。於舊建閘處築減水壩。以洩衛河之漲。又靜海縣權家口潰隄數丈。衝溜成溝。直接寬河。東趨白糖口入海河。亦應就現在河形。逐段開疏。於決口築壩減水。均與運道有益。白糖口入海之處。舊有石閘二座。甄河興濟二河之委。應開直河一道。歸并白塘出口。澇則開閘放水。不惟殺運河之漲。而河東積澇。亦得消滅。且海潮自閘內逆流。早則引流灌溉。溝洫通而水利溥。滄青靜海天。津數百里斥鹵之地。盡爲膏腴之壤矣。至沿河隄工。大半低薄。應飭修築高厚。仍令總督將玩忽河官參處。至東西二淀跨雄霸等十餘州縣。廣袤百餘里。畿內六十餘河之水。會於西淀。經霸州苑家口。會同河合子牙永定二河之水。滙爲東淀。蓋羣水之所儲蓄也。數年以來。各淀半淤。惟憑淀河數道通流。一經暴漲。不但淀河旁溢。凡上流諸水之入淀者。皆滂決奔溢。總緣東淀逼窄。不能容納之故。故治直隸之水。必自淀始。凡古淀之尙能存水者。均應疏濬深廣。并多開引河。使諸淀相通。其已淤成田者。四面開渠。中穿溝洫。洫達於渠。渠達於河於淀。而以現在淀內之河身。疏濬通暢。爲衆流之綱。經緯條貫。脈絡交通。不竭不盈。而後旱澇有備。生息日滋。小民享淀。

池之利。自必隨時經理。不煩官吏督責。而淀可常治矣。周淀舊有隄岸。加修高厚。無隄之處。量度修築。其趙北苑家二口。爲東西二淀咽喉。趙北口隄長七里。板石橋八座。俱應升高加闊。并於易陽橋南。添設木橋。隄身加高五六尺。橋空各濬深丈餘。每橋之下。順水開河。直貫柴火淀。而東苑家口北新開中淀河。近復淤塞。亦應疏濬。其上流玉帶河。對岸爲十望河舊道。應自張清口開通。由老隄頭入中亭河。會蘇橋三岔河。達於東淀。庶咽喉無梗。尾閘得舒。子牙永定二河。以淀爲壑。淀廓而河有歸。亦必河治而淀不壅。此治二河之法。所當計也。子牙爲漳漳下流。清濁二漳。發源山西至武安縣。交漳口會流。經廣平正定。而滹沱滄陽大陸之水會焉。蔡沈禹貢注云。唐人言漳水獨自達海。請以爲瀆。可知天津歸海之水。以子牙爲正流。其餘諸水。皆附之以達海者也。夫以奔騰注海之勢。蔽以數百里紆曲之隄。河淤高於平地。兩岸相距。不過數丈。舊時支港概湮。欲不衝決。安可得乎。考任邱舊誌。子牙下流有清河。夾河。月河。皆分子牙之流。同趨於淀。今宜尋故道。開通分注。以緩奔放之勢。永定河俗名渾河。其源不大。所以遷徙無定者。緣水濁泥多。河底逐年淤高。久之洪流壅滯。必決於窪下之地。其流旣改。故道遂湮。今應於每年水退後。挖去淤泥。俾現在河形。不致淤積。庶將來不復遷徙。二河出口。俱在東淀之西。淀之淤塞。實由於此。臣等面奉諭旨。令引渾河別由一道。此聖謨遠照。經久無弊之至計。今應自柳坌口引渾河稍北。繞王慶坨東北入淀。子牙河現由王家口分爲二股。今應障其西流。約束歸一。兩河各依南北岸分道東流。仍於淀內築隄。使河自河。而淀自淀。河身務須深濬。使淀水高於河水。仍設淺夫。隨時挑濬。毋令淤塞。兩河淀內之隄。至三角淀而止。蓋三角一淀。爲衆淀之歸宿。容蓄廣而委輸疾。但照舊開通。逐年撈濬。二河之濁流。自不爲

患矣。此郭清淀池調劑二河之大略也。再各處隄防衝潰甚多。應俟隄內水洩。興工修築。其高陽河之柴淀口。河身南徙。舊河淤斷。應速挑復其故道。新河之南界連任邱。有古隄一道。亦衝潰數段。至任邱西北村莊盡淹。鄭州一帶通衢。宛在水中。今任令詳請開挑淀隄消洩。亦應俟水退後。照舊修築。墊高行路。以便往來。又新安之雹河。自西折東。繞縣治南入淀。而徐河會入漕河。復至劉家莊。泛濫而下。新安正當二河之衝。每患漂沒。應於三台村南開河一道。引漕河水會入雹河。由縣正北入應家淀。南岸築隄。以護縣治。凡縣屬之大小澱。俱可以圩田稱樹。凡如此者不少。尙須逐一查勘。并天津海口京東畿南等處。統俟來春查明具奏。奉上諭。直隸地方向來旱澇無備。皆因水患未除。水利未興所致。朕宵旰軫念。莫釋於懷。特命怡親王及大學士朱軾前往查勘。今據查明繪圖陳奏。所議甚爲明晰。且於一月之內。衝寒往返。而能歷勘周詳。區畫悉當。具見爲國計民生。盡心經畫。甚屬可嘉。著九卿速議具奏。至於工程應用人員。若交與九卿揀選。恐有掣肘。卽令怡親王及朱軾揀選。請旨。其從前差往修城修隄之員。俱著於水利工程處。一同辦理。畿輔通志

是年何國宗議開安山湖復設水櫃。按運河分水。迤北自南旺下至衛河。四百餘里。無支河泉源。昔以安山湖爲濟運水櫃。自順治七年河決。金龍口湖口淤填。聽民墾種。康熙十八年墾田起科。徵解河庫。至是何國宗議將安山湖復設水櫃。重築臨河圈湖等隄。修通湖似蛇溝二閘。於八里灣十里鋪兩廢閘之間。建閘曰安濟閘。閘下各設支河。通入湖心。其湖南六隄口。亦各建閘挑河。以納坡水。開柳長湖。引魚營陂。宋家窪兩處積水入湖。議定施功。引二水入湖。中隔金線嶺。不能相通。治河方略云。自明許民佃田百

里湖地盡爲麥田。然湖形如盆碟。高下不甚相懸。湖水隨風蕩漾。西北風則流入東南。燥地未及濟運。消耗過半。西北地卑勢散。不能瀦水。昔人言安山湖。但稱水壑。不可稱水櫃。且湖已淤平。前河使曾議挑濬。費二十餘萬。無可設法而止。實則不爭此無源之水也。河渠紀聞。

雍正四年正月十九日。張大有奏。淮安一帶運河。因朱家海決口。堵築未竣。宿遷桃源中河水勢。間有淺澀。其清江浦以上運河亦淺。臣於十二日查看黃淮交匯之處。既無黃水敵清。湖水大溜。奔注黃河。致入運水弱。河臣齊蘇勒現飭河官挑濬。又於十五日開放濟運閘。引湖中支河濟運。再大雪後。水勢增長。淮安大河等幫重運業經開行。其揚州一帶運河亦有一二淺處。因高寶湖水接濟。船可通行。至徐州幫船現在催令由朱家海引河開行。赴次如有稽阻。卽飭糧道設法兌運。不致有誤。硃批諭旨。

二月工部議覆副總河嵇曾筠疏言。豫省衛河水勢奔瀉。河底俱係浮沙。隨挖隨淤。創淺無益。請於汲縣濬縣湯陰內黃等處築草壩二十六座。其直隸大名縣張兒莊亦建築草壩一座。首尾接應。以濟漕運。應如所請。奉旨依議。河渠志稿。

是月怡親王等請定營田四局。兼設河道官員。疏言臣等查修水利。徧視諸河。隄埧河塞。蓋由事權不一。稽核難周。統轄總河既有遙制之艱。專隸分司不無因循之弊。致錢糧不實。工程苟且。衝潰泛溢。率由於此。臣愚以爲直隸之河宜分爲四局。南運河與臧家橋以下之子牙河。苑家口以東之淀河。爲一局。應設一道員總理。查天津道駐劄天津州。與二河相近。控制甚便。舊有天津同知泊頭通判。及各地方管河同知通判。州判縣丞主簿等員。悉令受其統轄。永定河爲二局。應設一道員總理。永定河舊有分司。及部發



効力筆帖式。此等人員。既非地方專官。於民事漠不相關。採買收受。未免胥役擾累。而該州縣之於分司。體有尊卑。權無統轄。卽分司實心任事。亦呼應不靈。請將永定河分司。改爲河道。駐劄固安縣。總理永定河事務。其沿河州縣。各添州判縣丞主簿等官。以資分防。所有同知一員。照舊管理。將向來効力人員。一概發回。則地方既有專員。工程必無貽誤。北運河爲一局。舊設分司。亦應撤回。一切河務。令通永道就近兼轄。其管河州判等官。俱聽統轄。又苑家口以西各淀。及畿南諸河。繇互五六百里。經由州縣二十餘處。亦應爲一局。目今挑挖計費不貲。若不特設河員。統理恐工程旋修旋廢。請將大名道改爲清河河道。移駐保定府。畿南諸河。舊有管河同知。通判州判縣丞主簿等員。悉聽管轄。至天津道衙門。向來止管河間一府。大名道止管廣大二府。所屬州縣錢糧命盜案件。原聽直隸藩臬稽考。道員甚屬閒冗。今旣定爲河道專官。應將所屬州縣事務。總歸知府考成。省無益之案牘。勵有用之精神。而河道事務。可以悉心料理矣。至通永道所屬除永平一府。應不屬管轄外。通州等八州縣。本無知府統轄。該道有稽查錢糧之責。應照舊管理。再各河道除錢糧舊有歲修處。仍照舊額設外。其有未設錢糧。與雖設而不敷修理者。應酌議增設分貯各道庫。以憑給發。其各處水田溝洫。須每年經理。令各道督率所屬州縣官。按時修濬。定爲考成。其道員錢糧。有無虛冒。工程有無修廢。皆歸直督考核。抑更有請者。凡茲河道之員。必久任熟練。方於工程有益。其河道大員。應聽直督揀選。具題引見簡用。同知以下各員。俱照南河例。總於河工員內揀補。則事皆熟悉。卽丞簿微員。亦有遠到之望。無不砥礪自奮。且官久習諳。駕輕就熟。人人爲知河之人。百世享平成之利矣。十一日。經吏部議准。得旨。速行。畿輔水利四案。

是月怡親王奏京東之水白河爲漕運要津農田之蓄洩不與焉然河西曠野平原數十里內止有鳳河一道自南苑流出蜿蜒而東至武清之墩上村斷流而河身淤爲平陸此外行水無溝瀦水無澤一有雨潦不但田廬瀾漫卽運河隄岸亦宛在水中矣查涼水河源自京城西南由南苑出宏仁橋至張家灣入運請於高各莊開河分流至墩上循鳳河故道疏濬由大河頭入仍於分流處各建一閘以時啓閉庶積潦有歸既可溉田亦可通運也運河之東則香河其下爲寶坻沿河隄岸坍塌屢災二邑應飭河官及時修築高厚並於牛牧屯以上斜築長隄一道以障上流東溢則香河寶坻無運河之患矣畿輔水利四案

是月怡親王奏通州烟郊以南之水皆匯於窩頭分爲二股一股南入運河一股東流經香河縣吳村匯於百家灣入七里屯達於寶坻查七里屯以上沙淤地鹵難以開鑿若將南流一股疏通則窩頭經流歸於運河分入吳村者無多稍加濬導可免衝溢又夏店之箭杆河經香河東北入寶坻溝頭河漫流入淀應從溝頭疏濬導流於寶坻南會七里屯水東入八門城達於大河庶水有攸歸不致漫溢且潮水自八門逆流入河於農田亦有利寶坻之西北壤接薊州薊州運河自三臺營會諸山之水東南至寶邑會白龍港又南經玉田豐潤合漚水達海河身深闊所謂棄之則害用之則利者也請先築河隄務須高厚然後於下倉以南建石橋一座橋空下閘壅水而升之注於兩岸以資灌溉又多開溝澮遠近縱橫用之不乏矣漚水又名還鄉河發源遷安之泉莊懸壁而下旣入平地則委折蛇行土人有九曲三灣之稱自康熙四十二年決運河頭奪流而西至雍正元年始塞決口挑引舊河然河狹隄卑東決則淹豐潤西決則淹玉田二邑士民請展狹爲廣改曲爲直其說近是然建瓴直瀉恐下流益患衝潰似應酌量於甚曲之

處如劉欽莊王木匠莊各開直河一道其舊流勿令壅塞俾得兩處分瀉隄堰之逼近河身者拓而廣之加以高厚可免衝決至沿河一帶建閘開渠地皆沃壤土人動言硬水湍急爲患不知敗稼之洪濤卽長稼之膏澤凡潰而爲害者皆分而爲利者也玉田本屬稻鄉藍泉河出藍山西南流入薊運夾河濼水爲湖伏秋山水暴發河與湖平應將河身疏通深廣東以隄防西北另開小河一道引山澗之水入河下流使湖無泛濫而河得安瀾仍於曲河頭建閘開渠引水繞東湖而南湖內外田均沾灌溉仍於湖心最下處作圩爲水櫃以濟泉水之不足又泉水發源小泉山東流會孟家泉煖泉達於薊運河現在引流種稻所當搜滌泉源以廣水利者也豐潤負山帶水湧地成泉誌乘所謂潤澤豐美邑之得名非虛也臣等歷勘所至如城東之天宮寺牛鹿山鐵坎及沿河沮洳之處或疏泉或引河皆可種稻惟縣南接連大泊平疇萬頃土膏滋潤內有王家河汭河龍堂灣泥河共四道皆春夏不涸王家河汭河流入大泊龍堂灣泥河西入薊運河而田疇不沾勺水之利深爲可惜請滌源疏流壩以壅之隄以蓄之東北引陡河爲大渠橫貫四河中開溝洫滌洄阡陌數十里內取之逢源潑則田之水達於溝溝達於渠渠會於河河歸於大泊大泊廣八里長方十餘里若於東南穿河導入陡河以達海而泊內可耕之田多矣陡河卽館水源自灤州館山東流繞縣境而南傍河村莊曰上稻地下稻地南曰官渠蓋昔年圩田種稻之處溝塍遺址尙有存者宣各莊以下至今稻田數百頃村農以此饒裕若推而廣之沿河緊築隄防多設閘壩以時蓄洩則兩岸良田不可數計至板橋狼窩鋪等處東連榛子鎮一帶流泉大概入灤州境矣灤州爲永平屬邑永平之水灤河爲大源遠居高推壅沙石旣難東以隄防亦難資其灌溉然各屬支河藉以匯歸故少

漲溢之患。如灤州近城之別故河。淤漫數十年於茲。若照舊疏通。不惟城闈不受浸嚙。而西南負郭之田。皆得浸潤。城南則有龍溪。出五子山東。大泉騰沸。流至五官營。伏入地中。至閻家莊復見。卽清河之源也。按此係遷安縣之清河。城西則有沂河。經芹菜山南流。折而東。又轉而南。二河之間。地勢平衍。土岡環之。東南皆可播流而溉也。西南則游觀莊之靳家黃坨河。引泉可田。南則稻河吳家龍堂等處。引河可田。西北則自沙河驛之東。榛子鎮之西。龍溪黃崖煖泉。會於牯牛河。按此係灤州之牯牛河。經雙橋而圍山。瀑水入之。流清而駛。地平而潤。沿岸建閘開溝。無處非耕耨之地矣。灤州之北。爲遷安。城北徐流營。湧出五泉。合流入桃林河。又三里橋湧泉。流出灤陽蠶姑廟泉河。與灤河相接。龍王廟之泉頭。流爲三里河。經十里橋而南。夾河皆可爲田。黃山之麓。浮沫如珠。西漾入石渠。渠岸泉湧。卽還鄉河自出也。自泉莊至新集五六里。兩岸地與水平。可種稻田百餘頃。且可分還鄉河上流之勢。灤河經府治之西。青龍河會焉。青龍河卽盧水。縣以此得名。境內岡巒起伏。地高水深。難以汲引。惟縣北燕河營湧泉成河。及營東五泉漫溢。四出。至張家莊皆可挹取。爲樹藝之利。他如撫寧。昌黎。樂亭。及遵化。三河。等州縣。雖臣等未歷。然按圖考誌。水澤之利居多。伏念京東土壤膏腴。甲於天下。祇緣俗玩因循。人有遺力。地多遺利。臣等查勘所至。宣揚聖德。明白曉諭。民情踴躍。今春融凍解。正動工修築之時。臣等分遣効力人員。逐一確估興工。惟地廣工鉅。高下隨宜。容有變通之處。抑或委員經理。未合機宜。圩田多寡。奏效遲速。統俟工完。彙齊送冊。飭下工部於三月初四日議准。諭令速行。畿輔水利四案。

三月二十七日。田文鏡奏。彰衛懷三府所屬各道河源。據欽差學士何國宗等。業俱勘畢。同副河臣嵇曾

筠至省。與臣會議。欲將彰衛等府所屬百泉等水。分別改造。通流濟運。其說於國計民生兩益。故隨卽畫題。臣准咨委員。分往百泉等處。勘估工料。沿河士民。始知議挖改河。無不陳說利害。當據地方各官轉稟到臣。隨札致何國宗。未敢冒昧具奏。茲臣接准部咨。知何國宗等。卽將臣書內情節具奏。蒙恩飭九卿議覆。令再確勘。臣於三月初五日。自省赴彰德府。當據沿河士民。俱各稱從前欽差勘時。並未傳集曉諭。作何更改。及委員來估工料。始知定議。但洹河百泉。如照依前議改造。名雖分水。實無涓滴灌田。至小丹河水勢。每年伏秋。極爲洶湧。今斗門止寬一丈四寸。尙被水淹。查康熙五十五年六月。山水漲發。由斗門開直至清化鎮西門。勢甚迅猛。今若再加寬。民命田廬難保。臣會同查勘。安陽縣洹河。自善應山發源。至高平村。河上有石橋一座。內除東西兩頭無水橋空外。餘計四十三空。現在流水長三十三丈。河面寬百餘丈。橋之東北一百四十丈。緊靠東崖。建有進水灌田石閘一座。口寬一丈。河灘上有順水斜向西南石壩一道。長四十丈。內沙淤二十丈。出土微高者。止二十丈。並非攔河築壩。截水斷流。再現今河水通流濟運。田高水低。並無涓滴入閘。每年農民需水灌田。於橋東第一洞至第十洞止。沿河東邊壘石。引水八分之一。已足灌溉。餘俱暢流濟運。若通行過入地畝。盡爲巨浸。此前議拆去石壩。另築挑水壩座。實於漕運無益。徒費錢糧。毋庸議改者也。臣與何國宗查勘。如民間需水之時。東岸仍照舊給民橋空十洞。聽民順河壘砌石子。引水灌田。西岸橋空三十有三。疏濬深通。俱歸運道。實屬官民兩便。再輝縣百泉之南。兩旁各有石堰。開有小口。稱爲仁義禮智信五閘。各閘旁皆有還河。閉住閘口。泉水卽從還河而入。民間借水灌田後。餘水復由還河歸入大河。仍濟漕運。前議於池南建石壩一道。開三口門。分爲三渠。官渠口門寬一

丈六尺。民渠口門東寬三尺六寸。西寬四尺四寸。共寬八尺。渠內仍照舊各建五閘。分灌民田。但臣查水勢就下。官渠居中。中泓寬深。勢必建瓴直瀉。且仁字閘逼近分水之口。非惟不能遏水使灌民田。並恐一經閘住。官渠洩瀉勢急。去不復回。是仁字一閘已萬難灌注。何況以下之田。今議將民渠兩處水口共加寬二尺。仁義閘座從分水渠口下移。聽民自便。地勢漸低。便可引水灌漑。舊存五閘。並皆堵塞。舊堰內各另築石堰。使官渠之水不能旁洩。俱通流入衛。於漕運大有裨益。臣遵卽會詞具奏。惟是河內縣之小丹河。臣察勘地勢民情。其進水石斗門有斷不宜加寬者。不如將小丹河之水盡入衛河。以濟運道。而小丹河內東西民地。查有秦董二渠。均可量爲加寬。分水灌漑。不特上與漕運有益。抑且永無後患。民情俱安。副總河嵇曾筠亦深以爲然。而何國宗堅執前議。臣止能另議。同嵇曾筠合詞。與何國宗等一并彙疏具奏。奉上諭。爾等第各抒所見。秉公籌議。朕自有審擇兩端取中之道。硃批諭旨。

六月十六日。直隸總督李紱奏。四月二十一日。恭蒙皇上將大理寺少卿吳隆元一摺。交臣。茲據大名府轉據魏縣知縣查稱。漳水遷徙不常。向從廣平府成安肥鄉等處分流。嗣於康熙五十四年間。流至魏縣護城隄北。水發時。俱如巨浸。年甚一年。已成河身。會詳前院。但批漳水無定。望其他徙等語。未經題豁。今於雍正三年十月。詳請已蒙勘明河流地畝。造冊申送。又隄南羅兒莊被淹地畝。俱已造入。請豁河流冊內等因。核與吳隆元所奏相合。至別查涸出之地。以抵豁免之糧。臣細查漳水。向由廣平府成安廣平等縣東行。其經由魏縣。因康熙三十八年。於魏縣北路開挑支河一道。大勢日漸南徙。遂至魏縣護城隄北。是魏縣原無舊淹。今涸之地。無可查抵。容臣另行廣平府勘報。以抵豁免之糧。硃批諭旨。

七月初六日。工部議得河督齊蘇勒等疏稱。東省運河改夫爲兵一案。奉旨交與總河及山東巡撫。俟何國宗等到日。會同確議具奏。欽此。臣等查山東河道計長一千二百餘里。其間額設淺溜閘壩。備鋪夫共二千餘名。專司挖淺幫隄。挽溜啓閉之事。若遇緊急工程。並大挑小挑。額夫原不敷用。是以動用州縣額解幫貼銀錢。添雇人夫。均係撈泥挑土之役。原無住守防險釘樁下埽之工。毋庸改夫爲兵。再運河自奉旨動帑興挑後。彭口添有截沙埽工。沙灣有護隄埽工。微山湖有新設防風等工。獨山湖有攔湖草壩等工。前歲興修。因東省額夫不諳椿埽。俱調遣江南河兵。又雇募江南河兵年老解退者。來東教習修理。今此埽壩工程。若交不諳額夫修守。必致廢弛。應改設河兵住守修防。以保永久。查此四處原有四百三十八名。應將額夫內揀選改設河兵二百名。仍撥江南老練椿埽手每處各二名。隨工教習。又安山南旺馬踏蜀山馬場五處水櫃。新修隄工閘座。有關蓄洩。且有應修防風埽工之處。亦應於該廳額設夫內揀選改設河兵二百名。仍撥江南老練椿埽手每處各二名。隨工教習。分汛修防。各兵所需糧餉。卽以前改之額夫工食內撥給。其不敷餉銀。在額解幫貼銀內補給。令其居住舊有窩鋪。不必另造營房。統聽兗寧道管轄。毋庸另設專管。庶兵夫得宜。而河工運道有裨。均應如該督等所題。行令山東巡撫。再查各省有壩夫。舊夫淺夫名色。所給工食。有三分三分三釐至四分不等。今所改河兵。係在何項額夫內揀選。至不敷工食銀兩。於額解幫貼銀內補給若干。應令該撫分晰報部。奉旨依議。運河道冊。

是月十四日。九卿議覆何國宗條奏。一。河南百泉。洹河。丹河之水。民資其利。惟三日濟運。一日灌田之舊制。實屬有名無實。查百泉原分三渠。中爲官渠。東西爲民渠。東口門寬四尺四寸。西口門寬三尺六寸。

請將東口加寬一尺一寸。西口加寬九寸。其洹河請自石橋東第十洞。許民於需水之際。自築石壩。開渠引水。其西三十三洞。盡行疏濬。則灌田濟運。均有攸賴。應如所請。至小丹河斗門。何國宗等請加寬一丈六尺。副總河嵇曾筠河南巡撫田文鏡議稱。恐山水直下。一時瀉洩不及。不便拆造。惟將小丹河上下之秦董二渠口門。量爲開寬。使小丹河出水分灌民田。其在內之三十六口門。並皆堵塞。俾水勢盡入衛河。於漕運有益。應遵旨照嵇曾筠田文鏡所議。一山東運道全賴泉源輸助。請令州縣官時加疏濬。其額設泉夫。因地酌加增減。有能濬出新泉者。酌給銀米。以示獎勵。又獨山湖東水土壩。南陽湖石閘。張穀山草壩。皆以蓄水濟運。宜加謹修防。一徒駭馬頰二河。乃東省運道蓄水之支河。宜相機挑濬。鬲津趙牛等支渠水道。係民間溝洫。宜於農隙之時。令地方官督率民夫挑挖。均應如所請。一恩縣四女寺。請建滾水壩一座。博平縣運河西岸。修復進水閘二座。東岸建滾水壩一座。濮州境內。舊於沙河會趙王河之處。築有土壩。向北開引河。以分其勢。請將土壩修築。並開濬引河。其河西州縣聽民開通水道。滙入沙河。於運道民生。均有裨益。武城縣運河北岸。恩縣運河北岸。請各挑引河一道。均應如所請。河渠志稿。奉上諭。九卿據何國宗等條奏河道事宜。河南小丹河一件。何國宗等與田文鏡嵇曾筠兩議具奏。何國宗等乃一己之見。田文鏡嵇曾筠身在地方。所見必確。著照田文鏡嵇曾筠所議行。其山東疏濬泉源一件。何國宗等議設管泉通判一員。甚是。著照所請行。山東挑濬馬頰徒駭二河。前經陳世倌差委道員徐德倬辦理。此處工程緊要。徐德倬不稱此任。著御史尤清王之錡各管一處。聽陳世倌調度。不得自立意見。其高家堰加修隄土。關係緊要。若於歲修案內。逐漸增修。恐致遲緩。著照何國宗等所議。卽動正項錢糧。作



速估計興修。著九卿會議具奏。憲皇帝聖訓。

九月初一日。工部會議得何國宗等奏。山東運道實賴諸泉輸助。然石泉常通。沙泉易淤。且泉池易濬。泉河難疏。應令該督撫嚴飭有泉州縣督夫勤濬。其沙土泉池。或用石墊砌。或用笆圈攔。并疏泉河池口。使其一律暢流。有泉州縣泉之通塞。向無議敘處分。請飭該管各官勤爲勸勵。如泉夫有濬出新泉。卽酌給銀米示獎。州縣各官將開濬舊泉。搜濬新泉數目。年終詳報總河巡撫。如果泉流暢達。題請議敘。有廢棄者。指名題參。有泉州縣道廳各官不能徧察。請添設管泉通判一員。駐劄南旺分司舊署。有泉州縣泉夫多寡不同。除東平。汶上。滋陽。濟寧。泰安。萊蕪。新泰。泗水。肥城。蒙陰。平陰。毋庸議增議裁外。其寧陽縣額設九十三名。應裁三名。曲阜縣額設二十六名。應增十四名。鄒縣額設二十四名。應增六名。滕縣額設二十九名。應增十一名。嶧縣額設五名。應增十五名。魚臺縣額設十一名。應增九名。其各泉夫工食俱於幫貼項內給發。泰安州海旺泉南岸淤灘內。俱有泉源。應行開挖。取名海闊泉。馬溝泉。西有深溝一道。應行開挖。取名泰運泉。又萊蕪縣靈泉寺郭娘錦泉。東南有土泉。應行挑挖。取名靈泉。郭娘錦泉。迤西櫻桃園下。有沙泉。應加開挖。取名櫻桃園泉。又烏江山石泉。西數畝。俱有泉噴湧。應行開挖。取名廣潤泉。又泗水縣泉林寺南。徧地泉湧。現今有二十二泉池。泉河回繞。每年疏濬。總取名寺前泉。各立石碣。以垂永久。南陽閘以下。運河東岸。有獨山湖。雍正元年。築東水土隄一道。內留水口十九座。各築草壩。應歲加修築。秋冬閉壩蓄水。春夏放水濟漕。又運河西岸南陽閘下。有南陽湖。東卽運河。西岸原有長隄。雍正二年。建石閘十二座。三空橋三座。運河水大。則開洩入湖。但一線長隄。每遇湖漲。單薄堪虞。近年歲修。較前稍爲高厚。

嗣後應仍督率額設夫役。加意修防。又昭陽等湖。長九十二里。水大汪洋一片。水小一綫相通。惟東南張穀山口。爲湖之尾閘。雍正二年。創築草壩。以防耗洩。請飭加謹防守。如疎忽誤運。卽指名題參等語。應如何國宗等所奏。至疏濬溝洫。係地方專責。應將所請議敘之處。無庸議。奉旨依議。運河道冊。

是日。工部等會議。得何國宗等奏。恩縣四女寺。運河東岸。有減水閘。係明靖嘉十五年創建。後河淤閘廢。康熙四十四年。照舊修建。今河道東山開翅。半入河身。而支河久塞。河水不能東洩。臣等測量得四女寺舊閘底。比老黃河底高二丈二尺。地勢甚便。自四女寺至黃河涯兩邊。現有隄岸。開挖之費。亦不甚多。請於四女寺建滾水壩一座。口門寬八丈。兩邊用石裹頭。上作板橋。以爲緯道。下將支河照舊開挖。面寬十丈。至十四五丈不等。底寬五丈。至七丈不等。深一二尺。至一丈二三尺不等。各隨地勢。一例深通。又博平縣境內。運河東岸。舊有減水閘五座。西岸有進水閘三座。後閘壞。河淤。請於西岸修復進水閘二座。各寬一丈五尺。河西諸縣。聽民自尋故道。開渠洩水。東岸建滾水壩一座。口門寬八丈。兩邊用石裹頭。上作板橋。以爲緯道。再於引河頭。作一涵洞。以便挑淺。時築壩洩水。下開引渠。歸馬頰河。以下淤淺處。並爲開通。又東昌府境內。自運河開後。南北橫穿。西岸設進水閘三座。東岸設減水閘四座。以資宣洩。今淤久閘廢。東岸僅餘一空橋。洩於運河。西岸修復進水閘二座。各寬一丈五尺。河西州縣。聽民自尋故道。開渠洩水。流入運河。東岸建滾水壩一座。口門寬八丈。兩邊用石裹頭。上作板橋。以爲緯道。下開引渠。歸徒駭河。以下淤淺。亦爲開通。又濮州境內。有古魏河。今河西一帶。尙有河形。西岸有進水閘一座。已經傾圮。現在估修。但雨大水盛。不足宣洩。故舊制於沙河會趙王河之處。築一土壩。向北開引河。以分其勢。今土壩衝坍。

引河淺狹。請將土壩修築。加以椿埽。每年歲修。並將引河開濬深廣。河西州縣聽民開通水道。滙入沙河。至利津入海。至於滾水壩頂上下。通計河身。除足浮送重運外。再留三尺。與壩頂相平。如此則河水既可蓄以濟漕。而異漲亦有所宣洩。運道民生。均有裨益。以上各工程。現飭該管印河各官。確估另題等因。應如所奏。奉旨依議。運河道冊。

是日工部等會議。得何國宗等奏。東平州有柳長河一道。係洩魚營宋家窪民田陂水。入安山湖。去歲議開估銀五萬餘兩。曾經奏明。今濮州等處之魏河。聊城。博平等處運河。西岸之洩水河。民間自願挑挖。柳長河亦屬一例。臣等酌議。應聽民自挑挖。則濮州。聊城等處居民亦免觀望。再武城北運河北岸。淤出沙嘴。挑水南逼城隅。議於北岸挑引河一道。並將沙嘴挑去。使水循北岸。則城垣可保。又恩縣四女寺運河西岸。淤出沙嘴。挑水頂衝。現今動帑搶護。議於西岸挑引河一道。並將沙嘴挑去。使水循西岸。則東岸無虞。等因。查聊城長河。據估銀五萬餘兩。工程浩大。民間果否自願挑挖。並未聲明。應行總河東撫。妥議具題。到日再議。至魏河洩水河。應聽民自挑。其武城縣運河北岸。恩縣運河西岸。各挑引河一道。並將沙嘴挑去之處。行令總河並該撫。作速估計造冊。送部奉旨依議。運河道冊。

十月。怡親王奏各工告竣。一京東州縣工程甚多。臣等歷勘具奏。今武清縣鳳河。自高各莊分流。至垓上村而歸故道。逐段疏濬。引入淀池。野水藉以消涸。而武郭沮洳之區。盡成沃壤。香河縣之牛牧屯。以上舊無隄堰。運河泛溢爲災。今斜築長隄一道。不惟除香河之患。而寶坻亦免波及矣。寶坻爲衆澇所歸。通州之窩頭河。夏店之箭杆河。爲害尤劇。今俱疏濬。分流各依縣治南北。而會於八門城。達於薊運河。積漲

全消。還鄉河源峻流紆。屢年衝決。今已於劉欽王木匠莊曲處。各開直河。俾與舊流分瀉。而沿河隄岸。展闊築堅。從此無復衝潰。灤州之別故河。疏滌淤沙。導自廟山。繞城南而入灤水。不惟免城闈侵蝕。且負郭皆腴田也。畿輔水利四案。

十二月十五日。嵇曾筠奏。豫省糧船全資丹衛二河濟運。而丹衛合流。又需各處山泉匯集。查衛輝府輝縣蘇門山。有百泉池。臣於上年九月。親履審視。見泉池西首。伏有泉眼。因另鑿一池。源源滾滾。與百泉無異。當經奏聞。叩請敕封衛河源神。蒙御書靈源昭瑞匾額。懸挂廟庭。今年二三月。臣復鑿寶築崖。盡力疏濬。泉源渙發。其餘各道山泉。當此冬涸之時。俱皆暢達。滙入丹衛交流。茲據河南糧道楊夢揆具報。於十二月初八日。豫省糧船盡數開行無誤。硃批諭旨。

是年。齊蘇勒議於彭口南岸。開月河三里。以濟淺。按彭口噴沙。爲害最大。齊勤恪改種家渡南之舊彭口於十字河。而彭口沙仍堆積。又以下游無關束。復建閘以束之。而壅塞如故。蓋緣滕嶧薛沙。滙諸泉出沛之河口。以入運河。開泃後。築東邵壩於薛河中。遏水使盡入沙河。由彭口入運。而水挾沙行。歲必挑濬。初築大壩於兩頭。以攔河水。又必逐段築出壩十餘道。以隔兩旁之水。又須就岸築龍溝。百餘丈。以辱挑濬。時流聚之水。事竣必去淨。始可通行。歲以爲常。勞費如此。故河防志有改挑引河。使山水歸呂壩。入微湖居濟一得。有輪挑三河口彭口。並疏石壩上下河之說。然引山水入湖。墊高湖底。蓄水愈少。濟運愈難。輪挑亦費。輾轉石壩上下之河。仍不免停積。不得已而議於彭口南岸。另開新河三里。餘如月河形借舊河以囊沙。期運無淺阻。部議三里正河囊沙有限。數十處泉河噴沙無窮。不一二年。卽致盈滿。非惟糜費。

亦恐礙運。誠爲通達事理。陸朗甫謂開此月河。使盛漲時舟從月河行走。仍可撈正河之淤。並令回空全走月河。正河大挑。改於九月。如明代萬恭議。以爲於事有濟。然山河百泉壅至。仰珠大勝雙勝蕊珠三山龍灣等泉。滙沛滕諸泉分流之水。俱入彭口。所至停沙。惟有歲勤疏濬。無一勞永逸之道也。河渠紀聞。是年東河增設管泉。通判於寧陽。按汝泗交流入運之水。復覓泰十七州縣。泉源分布於山溝泥穴中。或一地數十泉。或發一二泉於百十里外。泉夫分地疏濬。必專員督率。前明設管泉分司於寧陽。康熙十四年。裁歸濟寧。運河同知兼管。至是以何國宗言。復增設焉。明初開會通河。命主事顧大奇等。徧歷山川。疏泉濟運。後王孜史鑑侯暉等。相繼開導。正統中。參將湯節大加疏治。諸泉盡出。山東漕渠。雖名有五水。其濟運則專賴汝泗。泉源湧出山穴。互相灌激。合而成渠。南北交流。分派泉河。設官督率。曷可少哉。河渠紀聞。

是年何國宗於戴村三壩內。增築石壩一道。石工橫互。水涓滴不行。按戴村壩。遏絕汝流。開河引水。至南旺。分流濟運。水過沙停。大挑歲勞民力。水漲漫淹。南北數十州縣。議者謂戴村應建閘。如堽城舊制。中作斗門。視水消長。爲啓閉。仍建二閘。引水由閘。至南旺。以節宣運河。茲於三壩內。增築石壩。汝河挾沙入運。淤積日高。雍正辛亥。田文鏡拆修舊壩。沙壅如故。嗣後屢有更制。均不能疏。伏秋盛漲。過壩之水。時有衝塌。明萬恭以石爲灘。潘季馴以石爲壩。因時異建。罔弗合宜。陸朗甫運河備覽云。戴村三壩。通長一百二十六丈八尺。此爲瓏壩。高七尺。長五十五丈七尺。中爲亂石壩。高六尺二寸。長四十九丈一尺。南爲滾水壩。高五丈。長二十二丈二尺。滙流濟運。所以水大不泛。沙走不淤。前人於此。幾經斟酌而出。未可輕

續行水金鑑

卷七十四 運河水

議改制矣。河渠紀聞。

# 續行水金鑑卷第七十五

## 運河水章廣三

雍正五年三月二十四日。署理江南江西總督印務都統范時繹奏。二月初八日。通州知州李世裔到省。轉傳上諭。爲通州水口建閘一事。臣卽會同撫臣陳時夏。於二月二十九日抵通。連日率同該知州等。赴各水口查看。通州水口雖多。惟觀音壩鹽倉壩唐家壩三處最關緊要。但觀音壩地係流沙。難以建閘。鹽倉則係廢壩。不若仍將舊壩修築。早旣可蓄。澇亦可開。至唐家壩離城不遠。若修閘濬淤。以時啓閉。則水旱皆可無虞。適臣等有公同赴淮之便。歸途順赴通州。勘明建閘築壩情形。繕摺奏聞。硃批諭旨。

四月十七日。諭營田水利官員等。朕以畿輔之地。水患未除。水利未興。宵旰焦勞。修建大功。欲登民生於安阜。爾等官員。皆情願効力。經朕引見。命往者。自當仰體朕心。朝夕黽勉。方爲稱職。將來朕自加恩。今聞在工人員。多有因循怠忽。不肯實在出力者。揣爾等之意。以爲信任怡親王大學士朱軾。而爾等在怡親王朱軾蔭庇之下。可以免於過愆。遂耽逸偷安。苟且塞責。或有見從前議敘人員。効力未久。俱得邀恩。遂各存僥倖之念。而無誠實辦事之心。此等意見。愚昧已極。朕信任怡親王朱軾。而怡親王朱軾所用之人。朕豈深信。而宥其過愆乎。况怡親王朱軾。公忠體國。若爾等不肯盡力工程。豈肯徇情。稍爲容隱乎。嗣後痛加峻改。勉力急公。儻仍前怠玩。遲悞公事。必從重治罪。若係已經議敘之員。先勤而後怠。其罪更不可追。再怡親王朱軾。不能親身到工。凡督率在工人員。稽察勤惰。分別優劣。實係段如蕙張燦之專責。段如

蕙爲人柔善。張燦涉於浮夸。不能整飭。甚負朕擢用委任之意。亦著改除舊習。儻瞻顧情面。苟且姑容。朕嚴加議處之時。悔之不及矣。畿輔通志

五月十六日。大學士馬爾賽等奏。治河方略內。載有原任給事中許承宣條奏揚州水利一疏。五月初五日。奉旨著問揚州府在京官員具奏。臣等傳問揚州府在京之通政使繆沅。右通政申大成。編修王安國。御史夏之芳。郎中唐繼祖。主事朱濬等。據稱揚州舊有五塘。漢陳登守廣陵。築塘溉田。今名陳公塘。唐李襲譽築句城塘。又有上雷塘。下雷塘。小新塘。皆以儲蓄天長六合上游之水。及盱泗壽春支流汭澗諸水。接於高寶各湖。漢唐以來。爲利甚久。其端有五。山水所得儲蓄。不致泛溢入湖。河隄免至潰決。一也。五塘在運河上流。歷代資以濟運。前明直運河驟涸。開放塘水接濟。有功漕運。二也。自灣頭引入運鹽河。兼濟鹽運。商民利賴。三也。江都儀徵山田數十萬頃。咸取塘水灌溉。四也。五塘滙入城壕。氣脈通暢。居民有益。五也。昔人建立閘壩。由保障湖入城河。自龍頭關而出。建閘啓閉。旱則由烏塔溝放水。南入運河。濟運。歲設塘夫守閘。專司旱澇。自明季豪強侵占爲田。五塘湮塞。其遺址尙可考。今蒙皇上天恩。以許承宣一疏下詢臣等。據實上奏。至三十六鹽場。有串場河道。在五塘下流。運鹽出場。卽爲揚州諸水入海之徑。淮南商向會挑濬。但工力未齊。日久淤淺。得邀詢旨。照舊開修。衆商尤必踴躍趨事等語。奉旨著交與總督范時繹。總河齊蘇勒。巡撫陳時夏。定議具奏。南河成案。

六月二十九日。山東巡撫塞楞額奏。徒駭馬頰二河工程告竣。臣於初六日。自省起程。以次查勘。深寬丈尺。俱各如式。至齊河。禹城。高唐。樂陵。武定。濱州等州縣。向多積水難消。今適成禾黍之場。惟兩河舊有橋



梁俱淤後所築。今河已挑挖深通。橋梁根基多有浮露。衝刷日久。必至坍塌。臣酌動公費。轉飭修固。以爲經久之計。奉上諭。爲政以大德。不以小惠。修築橋梁。務宜永久堅固。使民實享其利。若苟且塞責。以圖一時美觀。則猶夫以乘輿濟人於溱洧也。硃批諭旨。

七月初九日。塞楞額奏。聊成縣龍灣鋪河隄漫決。臣經奏明。今於本月初九日。據東昌府印河各官報稱。自初三日後。連朝晴霽。河水漸消。所有衝決隄口。於初七日堵築完固。民廬並無被淹。卽低處田禾稍浸。幸際成熟。不致爲害。奉上諭。近日幾旬以內。秋雨連綿。朕甚憂慮。爾宜飭諭各屬於一切隄工。小心防護。毋致疏虞。慎之慎之。硃批諭旨。

八月初六日。塞楞額奏。據東昌府知府金啓洛報稱。七月二十六日。大風驟雨。城北護城大隄。衝開二十餘丈。幸二十七日晴霽後。水勢漸消。城郭無虞。隄內居民三千餘口。俱用小船載入城內安置。房屋雖被淹沒。人口無傷等情。臣卽委濟南府知府張體仁。前往會同金啓洛。酌動銀米。將被水窮民。加意撫恤。并將護城大隄。作速搶修。硃批諭旨。

是月十六日。塞楞額奏。前以東昌城北護城被水衝決。令張體仁協同料理。今已晝夜搶築完固。其被水人民。各有生理者。已各歸本業外。尙有無衣貧民。男婦大小一千四百餘口。內大口給銀五錢。小口給銀二錢。以資餬口。俟隄內積水涸盡。再按戶酌給搭蓋房屋之費。再運河隄岸漫溢處。應卽鑲墊。但目下水未消落。隄內隄外水面相等。取土維艱。現飭印河各官相度。一俟水退。卽便興修。奉上諭。觀爾前後摺奏。光景衝決勢大。淹沒或不止於此。凡地方水滂之患。亦所時有。但宜講求撫恤之方。斷不可絲毫隱諱也。

殊批諭旨。

十二月和碩怡親王奏一切工程保守防護必有一定年限方能專其責成查定例黃河工程保固一年運河工程保固二年若直隸河道工程子牙河則係民力修防天津以南運河則係淺夫修防永定河北運河則係分司歲修皆無保固年限臣等酌其水勢平險工程難易清將子牙河及天津以南運河新修工程俱照運河例定限保固三年永定河歲修工程照黃河例定限一年北運河工程較永定河稍易較南運河爲險請定限保固二年儻限內衝決照例著落承修官賠修至歲修工程現今四道各有額設銀兩其應增應減之處俟一二年經試汛水後酌量定數另行具奏奉旨依議永定河志

是年諭自古治水之法在順其自然之勢而利導之蓋水之爲害者大抵由於故道湮塞使水不得徑直暢流以致泛溢爲患但徑直之路湮塞年久或民間既已蓋造室廬開墾田畝或且安葬墳墓人情各顧其私不知遠大之計今見欲於此地開濬河道則百計阻撓而司其事者未免惑於浮議遂使遷就紆回苟且從事而不能成一勞永逸之舉昨據岳鍾琪奏陝西現在興修漢渠但開濬之處不無礙於墳墓故爾遲回朕諭之曰果係民間墳墓所在當給與買地之價令其遷葬民自樂從今江南興修水利著該督撫與欽差官員照此辦理皇朝文獻通考

是年范時繹等奏臣等欽遵諭旨前經會勘地勢水利情形並應挑應建河道閘座涵洞隄壩等工飭行兩淮運司張燦等確估於十二月初八日會疏題覆該臣等會勘得揚屬高寶興泰並淮屬蓋城等州縣地勢卑窪當諸湖下流爲洩水入海之尾閭因閘座廢弛海河淤墊水漲宣洩不及兼遇鹹潮內灌瀦壅

停蓄漫溢田禾。商民交困。臣等細加查核。惟江儀兩邑之五塘塘內各溝。毋庸議挑。並飭地方官曉諭田主。將塘內現有溝汊。各築壩洩水。以備乾旱。已備陳前疏。其塘外帶子溝。至陳公塘口。現接連河。足資灌溉。亦毋庸議挑。查烏塔溝。接句城塘口。長二千八百七丈。槐子河。接小新上下雷塘口。長一千八百五十四丈。均屬淤淺。應濬深通。引入河水。以資民田。共估銀五千二百三十六兩一錢二分五毫。又江都運河。自灣頭閘下起。至泰州止。計一百三十里。現在衆商捐挑。無庸議濬。惟北岸高家老壩。徐家涵洞。楊家渡口。黃婦橋四處。爲分洩下河諸水孔道。南岸董家溝。白塔河。董家油房。潘家堰四處。係宣洩運河出口。岸向設土壩水柵。防匪通流。年久損壞。不但阻礙河流。更多販私出沒。今於董溝。估建滾水石壩一座。白塔河。估建石涵洞一座。徐家涵洞。估建木涵洞一座。並於董家油房。潘家堰。高家老壩。楊家渡口。各築木涵洞。黃婦橋。圈添砌橫木。既便蓄洩澆灌。又可妨奸杜私。共估銀一千六百七十八兩八錢一分六釐八毫。又泰州迤東。並如臯河道。均有淤淺。亦應間段挑濬。以利鹽船運道。計長一萬八千六十四丈。其估挑銀一萬一千五百八十八兩八錢八分。又泰州。興化。鹽城。串場河道。自泰州富安場。通遠橋起。至鹽城伍佑場。徐家港止。計三萬四百丈。均應分別挑深。以資容蓄。而利鹽運。內自泰州東臺場。三里灣起。至興化劉莊場止。一萬一千丈。地窪岸薄。今以挑土加幫。近河范隄。其離隄。寫遠處。增築子堰。以期束水便舟。共估銀六萬五千一百三十三兩三分。至場河閘座。依時啓閉。利商便民。最爲緊要。查丁溪場雙門石閘一座。並白駒場。南北中閘三座。尙屬堅固。止須加高補修。便可留用。至小海場草堰場二閘。年久坍塌。存閘基。今酌量採用舊石外。改建雙門石閘二座。以備節宣。又如臯之苴河洋。興化之青龍橋。鹽城之石磯口。廖

家港草堰口等處均係入海要區。最爲便捷。今增建大小石閘五座。其鹽城之天妃口。河寬三十丈八尺。洩水雖暢。但鹽潮倒灌。茫無所禦。民田多淹。今相度地勢。估十洞金門石閘一座。設板啓閉。以資關鍵。又如臯之黃沙洋。係洩水入海要道。因地係浮沙。難建閘座。今勘舊范隄內鄭家廟地方。土性堅實。估建單金門石閘一座。並築子隄二道。直接范隄。以資保障。以上石料土方夫工。共估銀六萬五千五百一十五兩七錢六分七釐五毫三絲六忽八微。查閘下海河。除草堰場白駒場二閘。海河俱各深通。毋庸挑濬。惟丁溪閘下自麻墩起。至智家港東口。接小海閘河內。萬應墩止。共六千二百七丈。小海閘下起。至王家港海口止。共一萬四千九百八十丈。青龍橋改建雙金門石閘一座。閘下河一道。至牛灣河止。共五千七百二十丈。均係場河達海捷徑。年久失挑。河淤成陸。亟應挑濬寬深。共估土方銀三萬四千八百八十一兩六錢九分。又泰州運鹽河自北門新城店起。至何塋場止。長二萬八百八十丈。係由州城直達臨海各場要道。向無隄岸。東水至湖河相連。舟行多險。商民不便。今應挑河一道。卽以河土加築北岸。長隄一百二十里。直接海道。以分湖河。以利挽運。庶田廬不致被淹。於商船亦有裨益。共估土方銀六萬一百五兩三錢三分五釐。又興化地勢最窪。諸水下注該邑。然後分疏入海。有梓新車路白塗海溝界河等五河。上受諸湖奔注。下爲各場海河門戶。梓新白塗二河。地勢稍平。水尙無阻。車路河下尾接丁溪閘。七千七百四十丈。海溝河下尾接白駒場閘。九千丈。地高河淺。界河長一萬八千丈。爲大縱等諸湖洩水要區。現今淤淺。亦應分別疏濬。庶上源迅速。下流無阻。共估土方銀五萬五千七百三十七兩。以上各工。共估銀二十九萬九千八百四十六兩六錢三分九釐八毫三絲六忽八微。茲據兩淮運司張燦等會估。臣細核無

異。除將料估細冊送部查核外。並繪圖恭呈御覽。再此項工程需用銀兩。已據淮商公捐。業經另題。其河道東西南北約計八百餘里。非刻期能竣。議將部發効力人員。並遴選河員分段督修。先將海口要處興工。一交農忙暫行停止。俟秋成後再爲興作。庶水勢消落易於告成。南河成案。

是年范時繹齊蘇勒等議辦運鹽河道水利。修通海各閘事宜。按淮揚二府泰興鹽三州縣西受高寶運河各閘下注之水。北通車路梓新白塗海溝由興化漫入場河出海之道。在泰州則有丁溪下海閘。爲宣洩要津。閘下之水達萬盈墩。合小海河出伍家港以入海。在興化則有南白駒北白駒通牛灣河。卽鬪龍港丁溪草堰小海皆會流於此。在鹽城則有石礎口天妃廟唐家港。通流入海。此下河諸水出口大勢也。先緣許承宣繆沅等先後議開揚州五塘。並及申場水利。奉旨交范時繹齊蘇勒陳時夏定議。大抵申場河經流之地。率南高北下。故自丁溪以北可資宣洩。而興鹽潴水窪地。必由石礎天妃諸閘宣洩。疏濬之功。信不可少也。河渠紀閘。

是年修臨清板閘。按汝水分流至臨清板閘。西南與衛水會。運艘過此爲出閘。閘下卽外河。更無閘著水。當此接續之際。惟恃閘爲節宣。閘之上下。每有淤沙。定例閘年一大挑。衛水力大勢猛。衝激日久。閘易損傷。至是拆修金門寬二丈高二丈七尺餘。規制之廣狹長短。悉如常度。問水集云。臨清板閘。運河入衛處也。衛河水漲卽壅入閘。或漫閘面以入。故閘上下常淤。運舟每阻。宜增閘面。旱潦俱須下板啓閉。蓋啓則閘下之淤。每日衝洗。閉則衛河不入。閘河之水積盈。及啓則二河水勢相當。淤亦不入矣。張清恪言。板閘啓放時。將輒閘之板多下。滴水不洩。俟板閘啓完。將輒閘板酌放一二三塊。使足送船出口而止。又視

糧船可以盡出閘口。卽將輒閘板依舊嚴下。毋使洩水。如此則水不空洩。而船資浮送。尤得款要。至閘之歲修宜勤。或撤舊板而易新。或仍舊開而易金門。閘底操縱由人。無激射之險矣。河渠紀聞。

是年齊蘇勒建五孔石閘於王家溝。分洩湖水入運。以濟運。按駱馬湖承東省蒙沂白馬諸河之水。由運河北隄入中河。濟運。而湖底不深。蓄水不富。漲盛則滙爲巨浸。潦盡則乾涸。時形於十字河。建竹絡壩。爲通黃之口門。正對湖水入運之口。引以濟運。然遇黃水盛漲。直灌湖口。日漸淤墊。至是齊蘇勒將通湖口門堵閉。另於上游王家溝建五孔石閘一座。分洩湖水入運。既不受黃衝。亦得濟漕之涸。嗣閘底較高。不能暢流。復將石底起深。以資宣洩。中河重運。經臨須藉湖水接濟。固當預爲收蓄。以濟運。行冬春常慮不足。每年霜降後。將尾閘正引河寧家河等處。一律堵築。蓄湖水不使外出。春間糧艘盛行。啓板分洩。以濟漕運。至夏糧船過完。二麥收穫後。啓放尾閘。由六塘下注王家溝。閘一并啓放。由中河分洩駱馬湖。冬春水小。堵壩蓄。夏秋水大。相機啓放。迨王家溝立閘。更有節制矣。河渠紀聞。

是年諭地方水利關係民生。最爲緊要。江南戶口繁庶。宜更加修濬。時其蓄洩。以防旱澇。我皇考念切民依。康熙四十六年。巡省江浙。躬親講求。將附近太湖及通江潮之處。條分縷晰。特頒諭旨。令江浙督撫於蘇松常鎮杭嘉湖地方。疏濬河港。以資灌溉。修建閘座。以便啓閉。動用公帑錢糧。不使絲毫出於民力。恩至渥也。乃當時督撫諸臣。不能實心仰體。惟以虛文奉行。糜費帑金二十餘萬。而無實效。深可痛恨。今巡撫陳時夏。特行奏請。且稱費用不過十餘萬。卽可成功。著副都統李淑德。原任山東巡撫陳世倌。會同巡撫陳時夏。總河齊蘇勒。總督孔毓珣。悉心踏勘。詳加酌議。凡建立閘座。疏濬河流。務期盡除淤塞。以杜泛

溢之虞。廣蓄水泉。以收灌溉之益。其一應公費。俱動用庫帑支給。又諭蘇松地勢稍下。特遣大臣會同督撫。開濬水道。太湖之水歸海者。經劉河白茆河居多。圖誌載二河形勢。數十里一徑直趨入海。年久潮沙湮塞。悉成平陸。太倉常熟之紳衿士豪。佔種報科者。十無二三。今既開濬。必盡去新漲地畝。以復故道。該督撫等當竭力秉公詳勘。務爲一勞永逸之策。是歲陳世倌疏請先挑吳淞江白茆河孟瀆德勝九曲河。其餘諸河俟完工日。以次開濬。從之。皇朝文獻通考。

是年命李淑德陳世倌陳時夏齊蘇勒孔毓珣踏勘江浙附近太湖及通江湖之處。概行築浚。又諭太湖之水歸海。劉白二河爲要。必徑直深廣。方能順下暢流。其潮沙湮塞之處。居民占耕日久。亦當盡去新漲地畝。以復故道。李淑德等奏言蘇州松江常州鎮江水道。並藉太湖爲吐納。西北承宜興荆溪百瀆之水。西南承杭州苕霅諸山溪之水。而皆由婁江吳淞江黃浦江以入海。是三江實太湖之尾閭。疏其下流。自不致泛濫。請行挑吳淞江白茆河孟瀆德勝九曲河。從之。皇朝通志。

是年議疏揚州五塘。按江以北水利。世皆盛言揚州五塘。潦則有瀦蓄而不致泛隄。旱則資灌溉而兼可濟運。明初平江伯資塘水濟運。成化間侍郎王恕請帑疏上下雷公鉤城陳公諸塘。各築石閘水礎。以瀦水。旱則由淮子河烏塔溝放水入河。接濟運舟。厥後湮廢。塘之利不聞。至是通政司繆沅等言揚州舊有五塘。漢陳登守廣陵。築塘溉田。名陳公塘。唐李襲譽築鉤城塘。又有上雷下雷小新諸塘。瀦蓄天長六合盱泗壽春諸水。接高寶各湖。在運河上流。自龍頭關出。建閘啓閉。旱則由烏塔溝放水入河。濟運。又自灣頭引入鹽河。兼濟鹽運。山水得所瀦蓄。不致泛濫。兼灌江儀數千田疇。滙入城壕。氣脈通暢。爲利甚溥。

明季豪強侵佔爲田。淤成平陸。廢壞不復。疏入。命督撫會勘定議。經江督范時繹、河督齊蘇勒、蘇撫陳時夏勘議。五塘淤澱日久。相傳始自仇鸞佃塘爲田。山水由天長六合東下。阻遏淮水。不得南來。逆走高寶。邵伯諸湖爲患。下河萬歷中興復。小新上下雷塘。然塘民隨修隨決。竇穴滋多。修復不易。後遂盡變爲綠野青疇。難以復還故址。五塘築自漢唐。陳公鉤城二塘。地形高阜。水無來源。惟藉雨集。陳塘隸儀徵。鉤塘去揚郡三十里。水由響水閘出江。小新與上下雷公相接。去揚郡十餘里。受西北高田所下之水。滯蓄成塘。水由槐子河入漕河。漢唐以來。築以蓄水。溉田資運。歲久民佃爲田。輸價納糧。難盡償復。卽築隄修閘。費亦不貲。五塘內隄有溝汊。毋庸議挑。各築土壩。截留雨水。以備旱乾。其塘外葦子溝至陳公塘。接連運河。足資灌溉。惟烏塔溝接鉤城塘口二千八百餘丈。槐子河接小新上下雷塘一千八百餘丈。本屬淤淺。均挑濬深通。引入河水。以資民田灌溉。所謂因勢利導者如此。顧亭林引李文定復塘議云。治水之法。築高堰使西水不入。固漕隄使中水不洩。濬海口使東水不留。三者皆治水之要。然十四塘不復。而所謂三要者皆不能久也。蓋高堰因山陽之高阜爲堰。以排黃淮之水入海。水大漲入湖。則由堰而南。自葉城而下也。葉城者寶應之西塘。乃十四塘之首地也。儀徵之塘四。江都之塘五。高郵之塘三。寶應之塘二。其中五塘爲大。在江都者曰上雷。下雷。小新。在儀徵者曰鉤城。陳公。舉其大者曰五塘。壩閘上通漕運。下利民田。上游形勢。自壽州盱眙天長六合一帶。其地高。水注而東之。則衆河爲之壑。故於界水之處。爲塘閘以防之。各塘之東爲甃社珠湖。新開邵伯馬黃寺朱家赤岸等湖。其勢中洩而東下。則興鹽爲壑。故於河畔之東。築漕隄以蓄之。若遇水年。則西山之水。高不過閘。南浮於江。遇旱塘水不洩。山澗俱通。西田得熟。至



於大旱。漕挽不通。乃東塞茱萸灣。閉漕隄閘。決塘水而灌。則水道不阻。漕運以濟。古人之制善矣。登石爲斗門。設塘長塘夫。以司其事。明洪武永樂間。軍器商鹽材木資塘之便。宏治以來。日漸倒塌。正嘉之際。奸民盜種。先有薛釗。繼則仇鸞。佃官承領。時值倭寇之變。築造瓜城。將各塘之石。移建修城。而塘之故址。不復存矣。遂有勢家土豪。佃塘爲田。官派其租。民獲其利。而不復再議興復之計。致西山之水。無塘可蓄。遇旱則赤地千里。水漲則泛濫盈河。不得已增隄以防之。隄愈高。則水愈漲。隄高則東空而下危。水漲則勢湧而易決。新培客土。日洗於河。隄岸日高。河底日積。一朝潰決。上阻運道。下沒民田。欲爲經久計。惟以復塘爲本。卽費重難舉。姑於塘口。做其舊基。取土實而築之。又不然。如小新二雷。由槐子河而洩。則實槐子之上流。鉤城陳公。由烏塔溝帶子溝而洩。則實烏塔帶子之上流。他如北山水櫃。茅家劉塘。茅柘白水。羨塘。東塘。柳橫塘。鴨塘。亦皆如是。尋其水口。以便築塞。相其隘阜。易於成功。俟有力。則加石制閘。如舊爲費。比高寶每年錢糧不及十分之一。而利倍之。不惟運道挽輸有資。湖隄防守亦固。湖之沮洳。涸出。民田益增。利莫大於此。顧亭林留心水利。其所引證。切於事理。世皆知五塘水無來源。瀦水爲利。然聚西山萬派之水。自高而下。立閘堰。以束之。西山之水。高不過閘。南浮於江。此卽保高堰固漕隄濟運舟之根源。諸議皆未及此。五塘地廣水闊。蓄水而不虞泛濫者。大江爲之尾閘也。當水大之年。西水盛下。閘洞隨地宣洩。不逆走高郵邵伯諸湖。而運隄常安。洪湖洩下之水。騰空湖面。足以容納。併分洪湖之勢。塘水亦得瀦蓄。洩有餘。以濟不足。民田灌漑之益。沾利無窮。是皆行之有效者也。潘季馴言。五塘不可卒復。年遠故蹟久湮。民田佔種。轉相授受。固有難復之勢。然謂古制不宜於今。猶未深原古人立法之意。窺其分湖濟漕。

之妙用。得顧亭林之說而論定矣。河渠紀聞。

雍正六年二月初八日。齊蘇勒奏。雍正元年。奉特頒諭旨。大興挑濬。令臣等疏泉蓄水。作爲水櫃。以濟糧艘。是以歷年運行無阻。此皆我皇上首重漕運。預籌之成效也。今臣由山東運河一路踏勘。各汛大挑工程。除臨清南旺濟寧彭口一帶泥沙積處。現在挑濬。其餘河道。因去歲水勢充足。俱各深通。沿河測量。計其水深之處。可節省幫貼火食銀二萬餘兩。已插標立記。以杜河員指深作淺。冒銷之弊。再運河一帶。向挑泥沙。不行遠送。近堆岸上。間有壁立如山。每遇雨淋。卽坍入河內。致河底仍淤。其南旺彭口噴沙之所。雖建束沙壩工。亦不過包裹口門而止。其餘堆貯泥沙高處。亦應修築護崖攔沙。以免坍卸入河。復於臨河一面。釘椿鑲板。中間填土。作爲緯道。庶河崖不致坍卸。積沙不能入河。而挽緯夫衆。得行平路。此項排椿工程。較諸束沙壩。不惟費省工堅。且於輓運有益。又運河岸隄。年久風雨剝蝕甚多。從無修項。其中有逼近城垣。關係水櫃者。亟宜擇段增修。查定例山東運河。當大挑之年。共幫貼夫食銀六萬餘兩。經臣題明於歲底核有贏餘。存爲下年之用。除雍正三年分節省幫貼銀兩。已經題修禹王臺工程外。所有前項應修排椿隄岸等工。請將上年分節省挑淺銀二萬餘兩動修。庶歸實用。奉。上諭。具題到日。有旨。硃批。驗旨。

是日。又奏黃運兩河。年久殘廢之工。仰蒙皇上。不惜數十萬帑金。通盤修理。將兩岸隄防。一舉全成。但此項大工。橫亙數十里。保守尤須預籌。查從前隄頂之上。愚民蓋房比居。竟有坐臨險工者。不惟地礙捲壩。且鼠穴叢生。人畜踐踏。其中不無孔隙穿漏之虞。上年遵旨通盤修理。卑矮各工。增高一丈爲度。而淮安

府寶應縣城外居民佔住之隄頂。更屬卑窪。若不拆房讓地取平加高。是因隄上草房。故留一大缺口矣。臣按房給價。令其星速拆讓。晝夜買土。儼築一律加高。詎意工甫就而大水至。所長之水較舊日隄頂高四尺餘。此時遷移之衆。方知前居隄上。必無生理。而臨湖居民。見此利害。漸有自行遷避者。今沿河隄工。凡係險處。已經拆讓加幫。惟遙月等隄。與運河絳道里數綿長。鄉民住久。一旦盡令遠遷。恐致失所。嗣後隄頂民房。如遇傾圮。概禁重修。令移蓋隄傍高隙之處。逐漸遷移。數年內可除傷隄之患。而河工搶護。亦不致有礙。再佔住隄上房屋內。有輸納房租者。自徐邳以至江口。每歲徵銀不過百餘兩。於國課益少。於河防害大。此項錢糧。應請聖恩豁免。庶杜私佔之由。而緊要官隄。均得永固矣。奉上諭。忻悅覽之。有應具題處。具本題來。降旨飭行。硃批。諭旨。

是月二十一日。工部議得山東巡撫塞楞額疏稱。柳長河在東平汶上之間。日漸淤淺。田遭水患。近地居民。亟欲挑挖。但河身雖屬相連。而中隔金線嶺一道。北高南下。卽將北嶺開鑿成河。水勢亦難逆注。今議一從嶺北州境柳長河魚營陂開河一道。北注安山入湖。一從嶺南縣境南旺北岸宋家窪。自西而東開河一道。由兼濟閘濟運。庶利國便民。亦有益州縣。再原估銀五萬六千九百九十三兩二錢。今就現在形勢高下。改估應該銀一萬一千一百七十三兩三錢九分零。惟民雖願挑。力有不逮。若非動項。難與大役。應請動正項錢糧。興工挑濬。其所需銀兩。在上年地丁銀內動支。應如該撫所題。奉旨依議。運河道冊。

三月初八日。工部議得江南總督范時繹等具題。查江儀兩邑之五塘。現有溝洫。各築土壩。以備乾旱。臣部已議覆具題。其董家溝。白塔河。徐家涵洞。董家油房。潘家堰。高家老壩。楊家渡口。黃婦橋。並富安楊。丁

溪開、白駒、荻河、洋、青龍橋、石磯口、及天妃口、黃沙洋、麻墩、新城店、車路河等處。應挑應建河道、開座涵洞、隄壩等工。該督既稱非刻期所能完竣。先從海口要處興工。一交農忙。暫行停止。俟秋成後興作。應如所題。令該督撫將前項工程。動支淮南商捐銀。作速遴選賢員。於農隙分段修築。務期堅固。工完日。該督親臨查看。造冊題銷。如有草率浮冒。即將承修各員指參。錢糧著落該員賠補。再兩淮商捐銀三十萬兩。臣部業於上月十四日。遵旨行文該督。詢問商捐實情。再行具奏。奉旨依議。南河成案。

九月初五日。工部議得齊蘇勒等疏稱。山東運河。應修排椿隄岸各工。足以護隄利運。均應修竣。但估需銀五萬六千一百二十九錢零。除動用上年分大挑幫貼節省銀二萬三千餘兩。尚缺銀三萬三千餘兩。暫動東省藩庫銀兩給各廳。於今秋農隙時。辦料募夫興修。俟每年幫貼節省銀兩陸續解司。照數還項具題。應如所題。奉旨依議。運河道冊。

是月二十三日。工部議得署理山東巡撫布政使岳濬疏稱。六里石閘。在萬年閘塘內。似應令設閘官。就近管理。以司啓閉。其閘夫應照各閘例添設三十名。每名每年支給工食銀十兩八錢。共應給工食銀三百二十四兩。每名幫小錢七千四百文。共應幫貼小錢二百二十四千文。其工食銀兩。於運河廳庫河銀內支領。歲底報部核銷。其幫貼小錢。於嶧縣地畝內徵解。相應具題等因。應如所題。再會典開載。東省各閘額設閘夫三十名。向例每名每年給工食銀十兩八錢。並無另有幫貼小錢。所請應毋庸議。奉旨依議。運河道冊。

十一月初七日。工部議得范時繹疏稱。申場河等處。興修水利。伏查建築閘壩涵洞。及挑濬河道海口。并

加築子堰長隄工程數十餘處。酌其緩急。分爲八大段。次第修竣。惟工段既多。須人綜理。查淮揚道白鍾山係地方大員。所有各工。應派令監督。責令催儻効力。刑部員外郎程夢暎。應令協同監督。遇有該道工程不及分身。代其督催。再購辦料物。必得現任印官交辦。查揚州府知府楊繼椿。身任地方。捷於呼應。應令該員照估及時採辦報銷。此項銀兩。既交運庫。令該運司朱一鳳。節慎出入。詳細查核。再部發効力支本固等三十一員。河臣移送効力劉永鑰等十二員。共四十三員。除修築海塘挑出數員。分管外。餘俱派交白鍾山程夢暎。相度工段。分別人才。酌量派委。儻工段迤長。不敷撥用。應於揚屬印佐雜職等員。選其閱歷河務者。協辦分修。候命下日。將分定工段人員。造冊送部。再有請者。河臣有全河之任。而臣與撫臣有地方之責。又皆距工遙遠。深恐兼顧莫及。再四籌畫。刑部郎中鄂禮。原任山東巡撫。陳時夏。現在各處河道。將次告竣。可否仍留管理揚屬工程。庶得綜理有人。抑或聖恩簡員督理。至臣等荷蒙恩眷。諭交水利重務。不敢諉卸。復仍不時稽察。身往履勘。等因。查江南興修水利。經臣部議。令農隙分段修築。工完題銷。如草率浮冒。即將承修各員指參。奉旨依議。今該督既稱興作。須人綜理。應如所請。飭該道白鍾山員外郎程夢暎。於現在修濬處所。一力督催。不時察勘。儻有草率糜費。即詳督撫指參。如該道等不實心催查。有誤工程。該督等查出題參。所用錢糧。俱照原題著落賠補。再稱購辦料物。交揚州府知府楊繼椿採辦等語。但工浩料繁。若僅交楊繼椿一人辦理。惟恐有誤。令該督再遴委地方幹員一人協辦。工完將用過銀兩。會同淮揚道造冊詳報。督撫據實題銷。儻選料不實。浮價短給。遺累小民。即行指參。交部治罪。再前項銀兩。據稱交貯運庫。應如所請。飭該運司朱一鳳。專司出納。詳慎查核。不得稍有措剋。致誤工用。仍

將收支銀數造冊報部查核。再稱効力支本固等。應交白鍾山、程夢暎分段詳請督撫酌量派委。儘不敷撥用。亦詳請督撫在揚屬印佐雜職等員內遴選勤慎熟練河務者。令協辦分修。仍將分定工段人員造冊送部查核。再該督雖稱河臣有全河之任。臣與撫臣有地方之責。但修申場河道係督撫地方事務。不得以督理有人。致疏稽察。應仍於修理工程處所。不時周流查勘。儘有草率浮冒等弊。該督撫會同總河據實題參。如該督撫等不行稽查。工程未及年限。卽行坍塌。將承修督催各員及該督撫等一并交部分別議處。至郎中鄂禮革職巡撫陳時夏。乃皇上命往督理蘇松水利之員。今申場河道應否仍令稽察綜理。抑或皇上簡員督理。恭候聖旨。奉旨依議。申場河道工程著鄂禮、陳世倌、陳時夏稽查督理。南河成案

是月范時繹等奏。丁溪小海青龍橋等入海三河。上承河運。爲各河尾閘。必使勢若建瓴。方能導洩高竇。興化各邑之瀦澤。查三項河道原估開寬河面五丈。河底二丈五尺。應加挑深。或二尺三尺。至六七尺不等。水小之年。原可暢流無阻。若水大時。湖水暴漲。由湖及運。瀉入下河。儻水口稍狹。消洩不速。猶患漫入運道。淹沒田疇。臣等度勢測量。擬將海河三道。照原估河面加寬一丈。河底加寬五尺。每河量分四股。自閘下至海口。六尺以至一丈。逐段加深。務使順水就下。大其會歸。以期下河諸邑。可免漫溢。卽湖運上流。亦得疏洩。公私兩濟。永固隄工。丁溪海河。今估銀一萬七千八百六十一兩零。較原估增銀一萬一千五百七十兩零。小海海河。今估銀四萬四千三百七十兩零。較原估增銀二萬四千七百九十七兩零。青龍橋海河。今估銀一萬五千八百六十兩零。較原估增銀六千八百五十兩零。再泰州南門高橋起。至如臯丁堰止。前年帶水量估。間段開挑。將淺者連水面濬深四尺五寸。深者原屬寬通。鹽漕船隻足資輓運。今

通河厚水。見有不挑段落。或河底積淤。或兩岸勢欹。此時雖無礙行舟。但既與新濬之處。不能砥平。誠恐異日停沙傾卸。有梗全河。今亦擬稍爲施工。一律開深五尺。秦州運河。今估銀一萬二千九百六十七兩零。較原估增銀八千四百三十六兩零。共銀一十萬五千二百一十二兩零。再串場通河。自秦州富安場至鹽城。共一百六十餘里。橫互各場。爲鹽船濟運西水經流之道。原估通河開濬。今逐段測量。自興化白駒場至鹽城伍佑場北段七十里。現在水淺。仍照原估開挑。自秦州富安場至興化白駒場南段九十餘里。流急刷深。河底水深六七尺不等。行舟洩水。寬然有餘。儘可停挑。查照原估。應節省夫工銀三萬二千八百五十兩。再勘出興化車路等河。有於原估丈尺內。現以爲水刷深。無庸開濬。工段及河身灣曲。開挑徑直。內核減丈尺。界河省銀一萬四百五十兩。車路河省銀二千九百五十兩零。海溝河省銀一千五百七十兩。再如臯苴河洋黃沙洋二處。前議建閘。欲以遏潮蓄水。今審度地勢。外既高仰。內又水弱。外高則潮常內灌。內弱則無力下達。是內水不能刷沙而出。外潮反得擁沙而入。淤淀頻仍。無濟宣洩。與丁溪小海青龍三處。爲洩水要區者不同。地勢水性不同。施工自宜權變。今擬改築土壩二道。外可禦潮。內可蓄水。濟運漑田。均有裨益。卽遇水大。可以開壩宣洩。且爲費無多。而受益勝於建閘。可省開壩工料銀一萬二十兩。其所省子隄銀兩。卽爲改築土壩之用。築壩需用銀兩。現飭白鍾山程夢暎料估。統於冊內聲明。再鹽城縣天妃海口。前估建築閘座。原爲捍潮蓄水而設。今掘看河底。土性鬆浮。卽設閘座。恐難持久。且又形勢細小。此處水口。特以堵禦海潮者。其利小。賴以宣洩內水者。其利大。若遇水大。正可留爲消水門戶。是前估閘座。無庸建築。應節省銀二萬二千八百兩零。又現在開挑各工。核減丈尺。扣除銀七千二百

二十二兩零。以上共省銀八萬七千八百六十二兩零。除增出銀數外。仍省銀二萬八千九百九十六兩零。至應用錢糧。查較原題估計。裒益抵補。原足敷用。無庸請帑。現將酌改工程。乘此東作未興。改估丈尺土方。發銀嚴飭承修各員。上緊儻修。造冊送部查核。南河成案。

十二月初十日。齊蘇勒奏。請除河工積弊。以固運道。東省河道定例。一年一小挑。間年一大挑。所有額設淺溜泉壩等夫。不敷應用。遂派民夫協濟。續經山東撫臣佛倫題明。酌令民間按畝出錢。幫貼雇夫。以均徭役。並不妨農誤工。歷年稱便。無如奉行不善。法久弊生。地方官以少派多。就中漁利。管河官捏淺作深。希圖分肥。臣查大挑之年。各州縣幫貼之銀。約六萬餘兩。小挑約四萬餘兩。俱係地方官徵收雇夫發價。案查此項幫貼銀錢。年年全收全用。從無餘剩。亦無不足。夫歷年水勢。豈無大小。河底泥沙。豈無多寡。而皆處處一例挑濬。年年一例銷算。毫無分別。明係地方官與管河官通同冒銷分肥。無惑乎向年運道淺阻。以致如是也。自雍正元年。荷蒙諭旨。寓賑於工。大加挑濬。河道賴以深通。糧艘進行無阻。但東省河道噴沙易淤。其每年挑濬之工。必不可少。此項幫貼銀兩。自雍正三年奉旨。令臣稽查後。每年挑濬時。仍恐河官作弊。俱令探量河底深淺。積泥多寡。標記擇段興修。淺者務令深通。深者無庸挑濬。至五年共節省幫貼銀二萬七千二百餘兩。今年小挑。按工估算。又節省銀二萬二千七百餘兩。又有存剩黃河廳屬五六年分徭夫幫貼銀一萬一千四百餘兩。共節省銀六萬一千三百餘兩。現令貯庫充用。恐此外又有別項隱瞞。一面密訪。一面敬宣上諭。令其自首。今據運河同知及東昌上河下河張秋泲河各通判等首出。每逢大挑小挑。各州縣俱有餽送陋規。又有每年餽送漕糧規儀。河銀隨平等銀兩。伊等有收過者。亦有



自行裁革者。又有新任未收者。查各河員所受陋規。俱係出自地方官餽送。而地方官斷非出自己囊。必有藉公費之名。加派民間。理宜禁革。又訪得臨清州知州。除正項淺夫銀兩外。每於大挑派徵銀三千六百餘兩。小挑派徵銀二千四百餘兩。及查該州歷年報冊。大挑止額收銀一千九百餘兩。小挑止額收銀一千三百餘兩。計算所剩之銀。爲數甚多。明係該州多徵私用。以一州計之。其餘額有幫貼之四十州縣。其多派銀兩。更不知凡幾。似此指工漁利。更當嚴行禁革。總之嗣後保守修防。要在實力奉行。方可持久。一切事宜。難容絲毫弊竇。容臣查明。一并具題。永行禁革。奉上諭。朕嘉悅覽之。向來河官之積弊。不止此一端。其餘未協處。總賴卿一一次第釐剔之耳。硃批諭旨。

是年議近海諸河。設犁船混江龍。以疏積沙。河渠紀聞。今按河渠紀聞說見黃河。

是年開皂河攔黃壩通運。挑月河一道。以資行漕。按自斬文襄開通皂河運道。漕船抵皂河口。攔黃壩入運。嗣以皂河地勢高仰。黃流乘高而入。倒灌淤漕。皂河迤南二十里之張莊。低於皂河二尺餘。內外水高低相準。遂開皂河攔黃壩。挑河直達皂河而上。運船改由張莊進口。自中河開而張莊亦閉矣。惟徐屬漕船。向由徐州鎮口開。歷茶城達夏鎮入運。康熙二十八年。中河開挑。後鎮口開。故道淤塞。徐淮南幫漕船。於徐州水次受兌。卽由黃河至竹絡壩入運。嗣竹絡壩受淤。漕船不能進口。勢必由楊莊繞道。復開皂河運口。以利徐淮之漕。然皂河地勢本高。黃河底日漸淤高。若建領直下。雖利徐漕。而兩河安危所係。利害大奪。溜則河湖並淤。是以不久卽閉。仍將黃運兩隄填塘築實。斯經久不易之道也。河渠紀聞。

是年修泲河廳韓莊閘。以束水勢。按自臺莊至韓莊八閘層層關束。韓莊首接微湖水口。十二東西坡。

水入運。平山、牛山、疊路、雞心、朱家等溝泉，皆引坡水入運者也。微山湖接濟運河之不足，首嚴啓閉。自韓莊迤下，德勝六里、張莊、萬年、丁廟、頓莊、侯遷，至臺莊，地勢以次遞降。雖有湖口及山泉坡水濟運，而建瓴直寫，必有閘以束水勢。水小下板，收蓄不洩，爲運計也。水大閘不下板，開月河以放水。居濟一得云：韓莊以下八閘，月河皆宜挑挖寬深，使微山湖之水有所洩，則濟寧南鄉及魚沛徐邳之田，不致淹沒。八閘月河皆淤，微湖水出荆山，洩入彭家河，之道亦淤，不能宣洩，須將月河挑深，以備分洩湖水。濟寧魚臺一帶，始不泛濫，此爲伏秋盛漲言之。春月微湖水小，自宜蓄以濟運。如乾隆乙亥，孫集漫口，渾水直趨東南，入微山諸湖。荆山橋等河淤爲平地，湖不洩水，銅沛皆受淹浸。多方疏濬而始通，此不可爲常者也。河渠紀聞。

是月，改龍灣減水閘爲滾水壩。按龍灣舊閘在運河東，洩汶水並聊城、陽穀、莘縣坡水，逕博平、高唐、茌平、禹城、齊河、臨邑、濟陽、商河、惠民、濱州，至霑化之久山入海。明正統中建，徐有貞作一空二空三空四空五空等橋。第五空橋分支入小鹽河，歸大清河。大鹽河故道已湮，餘四橋俱洩入土河，卽霑化故溝。俗所謂徒駭也。今用第一空橋爲滾水壩，第二空橋爲減水閘，閘壩在運河東岸，而於西岸東昌曹州一帶最關緊要。西受陽穀魯家口急流，並接濮范朝觀等州縣之坡水。汛時水勢加長，運河頂阻，疏洩無路，必候運河水落，方能開西岸閘，放入運河。由運入大清河歸海。若運河消落稍遲，則數州縣不免淹浸。嗣通聊城至臨邑八州縣淤墊之河坡水，俱由減壩洩出。張清恪言壩底高，不能暢洩，宜易壩爲閘，故有改鋪石底之議。河渠紀聞。

是年修臨清州輒板二閘。更番啓閉。以爲防沙通運之道。按河道自臨清南至徐州千餘里。地形高下。不啻數丈。置閘蓄水。而舟始通。迨後衛河益深。閘益高。水勢衝激益險。改深與河相等。水勢始平。舊閘草創。輒以堰之名曰輒閘。板以閘之名曰板閘。繼復改爲石閘。名仍其舊。運道至是爲會通。河盡境。卽爲閘。河盡境。衛河歷館陶至臨清。與汶合流而北。糧艘過此卽出閘矣。汶清而微。衛濁而盛。倒灌卽沙壅。故衛水漲時。嚴禁擅開。二閘互相啓閉。以防壅沙。爲內外河樞紐。輒閘寬二丈。高二丈四尺。板閘寬二丈。高二丈七尺六寸。上下高寬相等。東西相應。用以節宣塘水。加金板閘一啓。內外一洩無餘。外河無閘蓄水。每致淤淺。須於輒閘灌塘。板閘放船時。輒閘多下板塊。使之滴水不洩。視船將淺。擱酌量啓輒閘之板。無不濟事。否則塘水建瓴直下。船未過盡。而水已涸矣。居濟一得云。灌塘時。必使糧船在民船前。以民船喫水小而糧船喫水大也。糧船至淺澀時。民船猶可行。若先放民船。比及水小。糧船卽不能行。潘季馴謂宜於閘口百丈外。用椿草再築土壩。中留金門。安置活板。如閘制。將啓閘板。先閉活板。使外有所障。水勢稍緩。運艘出口易放。若衛水大發。則從拆卸。亦權宜之術。然在臨時。相其所宜。或草率從事。稽延時日。則障衛而患更大。不可不慎也。河渠紀略。

是年條奏運河挑淺。舊係河官之事。沿河州縣。供億夫役而已。夫河官原係家道殷實之人。効力河工。故另設大計。以年之久近。職之修廢。定其黜陟。以其各有攸司也。今皆責之州縣。領帑挑濬。則河官將何所事乎。且巡撫總河查勘。又多帶河官。以察州縣之能否。所至地方。供億費已不貲。一不當意。則持其短長。是前之河官黜陟。操之總河。而今之州縣進退。操之河官。前此查勘供億。止一巡撫總河。而今此查勘供

億且數十巡撫總河矣。又豈非山東官虧空之一端乎。伏懇皇上勅諭總河。凡一切河工。仍責之河官。不得他諉。則州縣官得責職守。或親臨委官查勘。勿得多帶官吏。借端需索。則供億不繁。而州縣之虧空可杜矣。諭齊蘇勒。有人條奏此事。爾宜留心。若不令州縣官協力相助。又恐河官呼應不靈。有掣肘之虞。若據此奏而論。在地方官實爲難堪。而其嚴飭屬員。慎毋仍前擾害地方。儻朕訪出。連爾等上司。一併治罪。亟當嚴加誡飭。不可稍有疏懈。殊批諭旨。

# 續行水金鑑卷第七十六

## 運河水章牘四

雍正七年二月十七日。范時繹奏京口運河。乃蘇杭八府州漕艘經由要道。自丹徒江口起。至丹陽三板橋一帶。河身歲淤。年需撈浚。雍正三年。欽奉上諭。題議建閘挑濬。續以胡連冒帑誤工。題參另行修估。上年十一月。據鎮江道王之琦詳估。緣臣曾經親履。備悉此河。接近江口。水之深淺。唯視江潮之來去。又兼岸高土鬆。沙隨潮墊。縱加開濬。仍需歲修。業經備陳情形。請免動帑大修。唯照歲修之法。及時撈深。漕運即可無阻。會題隨飭測量撈浚去後。業據該道等具報。僉稱於十二月十九二十等日。開工撈淺。糧艘通行無阻。現仍隨時量浚。又據差委催漕守備次第報稱。自正月十二日起。業經催過浙江江南二省各幫糧船。共二千五十三隻。平穩渡江。奉上諭。欣悅覽之。硃批諭旨。

四月二十一日。吏部尚書總督河南山東河道嵇曾筠奏。東省運河。上自德州起。下至江南邳州止。長一千一百四十三里。爲漕艘經由要地。河則年挑。隄則歲補。所有運河捕河泲河東昌上下河五廳汛內。共額設淺溜橋閘兵徭酌壩等夫三千三百三十三名。歲領工食銀三萬二千兩零。至冬春大挑。不敷力作。加募夫五千四百七十名。幫貼銀六萬二千二百一十三兩零。小挑募夫一千二百四十一名。幫貼銀四萬四千一十三兩零。俱係州縣徵解。交河官散給。例沿已久。其中加派多徵。扣剋浮冒等弊不一。臣現嚴查。令各屬自首革除外。至幫貼一項。前河臣齊蘇勒於雍正五年節省銀二萬三千一百七十二兩零。六

年節省銀二萬二千七百二十六兩零。但去弊務盡。立法當久。若不定有成規。恐將來此弊又起。且既經節省。廳汛各官。無所浮冒。遂將各項夫役。應領工食銀兩。肆其剋扣。侵漁窮民。經年力作。取微利以養贍家口。今有名無實。則裹足不前。大挑小挑。呼應不靈。甚至掩飾草率。殊非經久之圖。臣現在檄行東省。司道費金吾等。酌議將運河各廳所管汛內。通盤核算。每年額設夫役若干名。應給工食若干兩。逐一派定。飭令道廳各員。點數查工。不許絲毫虛扣。其餘幫貼銀兩。竟行藩司。禁止多派。祇照舊額徵收。解貯河庫。遇有挑淺築隄要工。再行詳請加募。按工雇夫。給價則應徵之夫食。悉歸實用。多派之規費。徹數革除。所有幫貼羨餘銀兩。全以歸公。不特有裨國帑。無累民生。而河道隄工。歲修月浚。亦無虞矣。單薄淺澀。一條分縷悉之處。尙在詳加妥議。方敢恭疏具題。奉上諭。朕御極之初。卽有人條陳此一節。經發廷臣會議。咸言不便更張。朕意如果有利無弊。諒齊蘇勒必早奏聞矣。不可邀一時虛譽。任意增減。臨期束手無策。挪西補東。翻致弄巧成拙。田文鏡老成練達。權量得宜。不涉偏執。朕所信任。弗疑者。當與之密相妥商。會摺具奏。硃批諭旨。

六月。嵇曾筠田文鏡奏。月之十六日。臣嵇曾筠接奉皇上御批。仰見睿慮周祥。無微不至。臣緣查勘豫省隄工。卽馳至汴城。與督臣田文鏡會議。查東省運河。額設淺溜橋閘等項。長夫共計三千三百三十三名。歲支工食銀三萬二千餘兩。在各州縣地丁項下。動用報銷。冬春小挑。不敷力作。則於長夫外。添設酌補夫一千四百二十一名。間年大挑。則於酌補外。又加募夫五千四百七十名。所需工食。往例在民間地土。按畝輸錢。名曰幫貼。小挑之年。計幫貼銀四萬四千餘兩。大挑之年。計幫貼銀六萬二千餘兩。此酌補加

募之由也。總因運河水勢靡定。水小流緩沙停。水大噴沙淤積。是以大挑小挑。乃運河一定工程。長夫募夫。係河工必需力作。此項幫貼銀兩。惟常察除額外浮費。不便議減定例。但從前毫無稽察。經徽州縣多派濫徵。廳汛員役需索陋規。扣短冒銷。雖邇年以來。在工員役冒銷之弊漸除。其他仍然如故。臣等留心查察。以期民免浮派。帑歸實用。惟各夫工食舊額多寡不同。有已支工食而重索幫貼者。其應添跨夫器具。又令長夫自行雇覓購辦。不但影射侵漁。浮冒分蝕。難以究詰。且有同一夫役。而工食互異。臣等按其力作。通盤核算。酌定工食。以爲常則。請將淺溜軍橋。橋壩等夫。每名每歲給工食銀一十二兩。量給器具銀八錢。開夫啓閉辛勤。每名每歲給工食銀一十四兩四錢。器具銀八錢。兵夫仍照兵餉例。每名每歲給工食銀一十四兩六錢四分。亦量給器具銀八錢。以上各夫。共需銀四萬六千五百六十餘兩。除各州縣額編工食銀三萬二千二百四十餘兩外。其不敷銀一萬四千三百二十餘兩。在幫貼項下照數找足。至酌募等夫。自築壩厚水至啓壩放水。內有需工三十日至六十日者。每日量給工價銀六分。每名量給器具銀二錢。亦於幫貼項下照數支給。仍令各濱河州縣雇募。交發河員。將到工名數冊報道廳轉報到臣。卽遴員分投查點。務使名數著實。按工計夫給價。工程既有定限。夫役亦難虛冒。其節省銀兩。俱令解交運河廳庫報明存貯。以爲河工要用。臨時奏明動用。報部備案。至水勢大小。淤沙厚薄。酌補募夫多寡。原難豫定。設有應添應減。臨期令道廳詳報。以憑酌核。務期無誤。運行所有一應夫工確數。盈餘銀兩。統於冬春挑河竣事後。臣等核實題明造冊咨部。如有扣短侵冒等弊。立即據實糾參。庶帑不虛糜。工收實效。夫食無偏枯。運道有裨益矣。奉上諭。所議甚屬妥協。照此會疏具題。硃批諭旨。

七月十二日。山東布政使費金吾奏。兗州魚臺縣濱河地窪。又爲濟寧、嘉祥、濮州、鉅野、曹縣、單縣、城武、金鄉、定陶諸邑出水咽喉。一遇大雨。上游諸邑之水。建瓴而下。莫可遏禦。且下游江南沛縣之荊山口等處。久淤。水無所歸。致魚臺頻年被水。是魚臺水利。亟宜講求。唯慮是邑淤河一開。則東省十餘州縣之水。全注於江南沛縣。夫江南山東。豈可異視。將欲開魚臺淤河。必先開沛縣淤河。欲開沛縣之淤河。必先查沛縣出水之處。臣已於本年二月。嚴諭魚臺縣關會沛縣。查議疏濬。四月。據魚臺縣詳稱。准沛縣覆稱。沛邑昭陽湖迤東。有張穀山、十字河等處。可達荊山口。引水入運河。因河形久廢。現在詳請開挑。未蒙批示。到縣轉詳。臣隨詳請河臣嵇曾筠。咨催江南河臣撫臣會同疏濬。未奉回咨。於七月初五日。據魚臺縣報稱。六月初七初八日十六等日。天降時雨。咸慶甘霖。而魚臺爲聚水之區。致兩岸窪地。翻被水淹。除飭該府縣加意撫卹。并勸諭補種雜糧外。伏思濟寧州、嘉祥縣等處。應開河道。亦在江南上流。必須江南查明出水處所。會同疏濬。臣均於五月間。詳請河臣嵇曾筠督臣田文鏡咨商。惟俟江南覆准之日。會同辦理。奉上諭覽奏已悉。疏濬事宜。命廷臣現今詳議。候另有諭旨。硃批諭旨。

十月。嵇曾筠奏。豫省漕河。惟資丹衛二水濟運。自衛河源蘇門山新泉湧出。經臣奏聞。奉旨欽賜靈源昭瑞匾額。嗣後每歲泉源暢流。漕艘利涉。然皆於十二月內開船北上。今年糧船回空。卽豫飭疏濬。務期一律深通。濟運。茲據糧道張建德河北道朱藻報稱。庚戌年起運糧船。已於十月二十六日。全出豫境。總由各道泉源濬發。運河深暢。是以糧艘過行。理合奏聞。硃批諭旨。

十二月初二日。孔毓珣奏。臣於陛見時。欽奉上諭。淮安府城逼近河濱。爾到任時。可詳細相度城外隄工。



舊有石工單薄者。加修高厚。無石工者。建築石工。欽此。臣查淮安府城西門一帶。乃係兜灣頂衝。素稱險要。康熙三十八年。建有石工長三百六十丈。現在堅固。西門至南角樓止。隄長二百丈。水勢平緩。非迎溜之處。是以當年止築柴土工程。邇年歲修。臨河添埽。隄身培固。現在高厚足資保障。若議改石工。轉滋糜費。且不能剋日告竣。似可不必改築。查淮郡城西。舊有護城河一道。自運口迤下文華寺閘起。至白馬湖。止計八十里。原屬分洩漲水。以保淮隄。并備曠乾之時。分濟西鄉田畝。實屬緊要。因年久淤墊。隄埽坍塌。一遇開閘。水無收束。西鄉田疇。悉被淹浸。且暴漲之水。宣洩不暢。仍歸運河。細勘形勢。請將此護城河挑深。並修寬兩岸隄堰。凡值汛水異漲。即將文華寺閘啓放。俾一水分而爲二。以六分入運河。四分歸湖內。河身深通。水去循軌。隄工自固。不特淮郡三城。永資屏障。而西鄉民田。既免淹浸。且獲灌溉之利矣。奉上諭。此奏亦命抄發。廷臣會議。覆奏之日。有旨。硃批。諭旨。

是日孔毓珣奏。淮揚高寶江都等七邑。凡河湖之水。上游來自洪澤。下游達至申場等河入海。皇上念切民生。恐洪澤湖天然等壩洩出之水。溢浸民田。諭臣相度修築壩下東水隄工。又淮安運河之水。臣請疏濬文華寺閘護城一河。現經另摺具奏。其申場等河。先蒙欽差郎中鄂禮等督工。將次告竣。是尾閘業已深通。上流又復條暢。若中間支河。稍致淺阻。則下遏上壅。隄工民田。均有妨礙。臣勘高寶諸湖情形。查天然等壩宣洩之水。俱入寶應湖。由傅家嘴唐溝港等處。以達界首高郵等湖。隨逐處探測。惟傅家嘴入水處淺窄。應加疏濬寬深。其寶應運河東岸之范家舍橫溝。馬家塚哈崙溝。清水口蟹兒溝。蜆子灣等處。皆間段淤淺。其界首高郵諸湖之水。由運河東岸。從高郵南關大壩。五里中壩。車邏大壩分洩。今各壩口門。

外俱有淤淺。其南壩五里壩之水。入於南橙子河者。自河頭起。至十里尖地方止。約七八里。間段淤淺。車運壩下橫河。亦屬淺窄。均應疏導。又淮安運河東岸。舊有澗河一道。自興文閘起。下達馬家蕩。專洩淮郡三城積澇。兼洩運河漲水。緣年久河底墊高。蕩口淺澀。一遇水漲。卽患盈溢。亦應疏濬。以利宣洩。以上各支河。若加疏治。則上下源流全體通暢。自無漫溢。惟現在黃運河工。在在緊要。往來查勘。不克分顧。伏乞勅下江南督撫。并水利諸臣。會勘興工。速儻完竣。奉上諭。此奏議論通暢。深中肯綮。現命廷臣議奏。候旨遵行。硃批諭旨。

是月初六日。孔毓珣奏。河庫向例。發辦物料。工程錢糧。每平一百兩。較庫平短一兩八錢。謂之平餘。蓋民間買賣。皆用市平。故也。每年河庫繳送臣總河衙門銀三千兩。與鹽商規禮銀二千兩。同作養廉。俱經前河臣齊蘇勒奏明。臣思此項銀兩。係往來日用所需。相應奏請。仍准存留。今我皇上發帑興修高堰等大工。此係特頒曠典。凡辦料等項。應仍照民間買賣市平給發。所有平餘。臣令存貯河庫。俟工完銷算錢糧之日。一併歸公。合行奏明。奉上諭。凡有需費處。一面取用。一面奏聞可也。硃批諭旨。

又奏。前署山東巡撫布政使費金吾奏。請開挑東省河渠。以洩濟寧等州縣。滙入魚臺之積水。因各州縣應開河道。俱在江南。必須查明出水處。所會同疏濬。經部議覆。令費金吾會同田文鏡。稽會筠。尹繼善。詳議具奏。奉旨依議。經前署河臣尹繼善等。行文兗寧淮徐二道會勘。今據兩道勘覆。臣細查勘議情形。雖據稱徧勘諸水。皆有歸宿。但江南地居下游。稍有不慎。所關匪細。查徐州黃河北岸。李道華家樓起。至蘇家山止。約七十餘里。向不築隄。每值異漲。漫溢之水。從十字河。岡頭湖。荊山口。輾轉入運。今議開挑荊山

口迤下河渠。入運之水。挾帶濁沙。恐仍淤墊。又三岔河迤下運河窄狹。今議修建閘壩。水大時運河宣洩不及。泛漲堪虞。至駱馬湖添納諸水。自必倍加漲湧。又恐運道一綫隄工。難資捍禦。湖水既盛。其三合土壩。恐滾洩不及。湖水滿盈。反高於運。上游之水。從何宣洩。再自三合土壩起。由五花橋合劉老澗之水。導入龍溝。經宿桃等六州縣地方。綿亘長七百餘里。其間挑築工程浩大。而劉老澗乃宣洩中河之水。多係濁沙。更恐挑後復淤。於宿遷。桃源。清河。沭陽。安東。海州。六州縣民田。有礙事關重大。若不區畫萬全。不惟糜帑。且有關漕運民生。除飭會同再行詳議外。臣卽往各處詳看測量。如果宣洩暢流。無傷運道。民田自當據實奏聞。請旨恭候命下。臣再會同田文鏡等詳議具題。奉上諭。前據費金吾摺奏云。與卿等議同。所以有命陳世倌等之旨。今覽此奏。所見甚屬周詳慎重。與費金吾原奏大相逕庭。事關重大。卿會同嵇會筠等議妥。具奏到日。候朕再加詳酌降旨。硃批諭旨。

是月。大濬淮安澗河。疏修淮郡護城河隄。宣洩河漲。利濟田疇。按淮安經大水後。求疏洩之道。於下流澗河。最爲扼要。宋時疏納三城積潦。首接運河尾。入射陽湖。與涇河皆由廟灣入海。射陽深廣。去廟灣更近。澗河入之。爲宣洩要道。明時屢勤疏濬。自童營不戒。黃水漫淤。張文端濬淤。由通濟橋達劉行溝。入射陽湖。一萬四千餘丈。沮洳始去。至是年久湮塞。尹文端尋源竟委。疏與文開迤下至葫蘆套。一萬五千餘丈。創開湖邊新河。使其暢入瀕河。沮洳易爲平疇。又疏築郡西護城河隄。亦利益民生之大計也。河渠紀聞。

是年。疏濬賈家沽道。分減既多。消洩亦暢。故壩門以下河水安流。而河西務一帶。距壩稍遠。山水暴至。遂

復漫決。上廬聖懷發帑遴員授之方略。於河西務上流之青龍灣建壩四十丈。開引河而注之七里海。導七里海水而洩之北塘口。上下分消。區畫盡善。運道民生均獲謐安。畿輔安瀾志。

是年秋高堰大水。堰隄幾決。山陽寶應高郵田廬淹沒。城郭危險。人遷高阜。幸西風未起。獲保平安。按高堰爲淮揚門戶。束淮敵黃。刷沙歸海。衛高寶興鹽七州邑之田廬。黃運之關鍵也。河淮並漲。堰隄幾決。石傾土虛。危而復安。洪湖風湧浪激。非石莫禦。而當西風鼓浪。水激浪湧。隄石著重。往往不畏水而畏風。不畏滿槽而畏半槽。不畏激而畏掣。水無風助。雖滿槽之水。一子堰足抵滿槽。水力平漫。半槽水力直衝。隄身石後有土。激則尚可倚土爲靠。激而後掣。石前空虛。隨水傾欹。一往一來。水力甚重也。洪湖石工。舊制既卑草鑿。終難經久。非大修固防。約束狂瀾。使盡出清口。敵黃東注。則無以障淮揚而衛漕隄。下河州縣難免胥溺。南河險要工程。莫急於此。河渠紀聞。

是年重修靳家閘。接修安山閘。勻調水勢。按北河自荊隆決後。安山湖已淤平。聽民墾種。何國宗議請重濬濟運。日久淤高。不能蓄水。安山一湖皆歸禾黍之場。靳口迤東之關家大閘。五里鋪閘。張伯行所謂放水由開河出。兼濟北運者。今皆淤閉。不能引水入運。靳口東岸之石頭口。分受何家壩水入運。安山西岸之通湖閘。引湖水濟運者。亦皆淤廢。惟時靳口安山諸閘。節宣內塘之水。浮艘北上。自南旺分水以來。水勢自高而下。南旺至開河爲北運來源。再下爲袁口閘。必下板以洩之。懼其過洩也。至靳家口地勢過峻。安山閘乘其下流。兩閘兼權緩急。相繼爲用。歲修以時。靳口金門寬二丈。高二丈四寸。安山金門寬二丈二寸。高二丈尺有三寸。以符舊制。居濟一得云。安山少下板。則靳口地勢太峻。閘上之水。一洩無餘。袁

口開河上下立淺。此理之必然者。再下爲戴廟閘。四十里至荊門閘。此運水門之大關鍵也。與輓板天井在城諸閘機要略同。又爲安山靳口諸閘之總束。設鎖如天井制。嚴筦其鑰。一啓一閉。繳上領下。使船皆可出。而水不大洩。東昌一帶水勢亦有存蓄。此以閘節水之常道也。至當大汛時。沙潮驟長。灌安山靳口而東。出運河北岸戴村壩。受汝河下注之水。入大清河壩內之水。分注開河。又當統全局而權疏洩之宜也。河渠紀聞。

是年拆修徽山湖口石閘。定議水深一丈一尺。開壩蓄水濟運。按湖口開宣洩徽山湖水。及魚臺金鄉滕沛各縣坡水。以濟嶧縣八閘。並江南邳宿運道。閘建於萬曆三十二年。年久剝損。至是拆修寬二丈一尺五寸。高一丈七尺七寸。啓閘放水。以水深一丈一尺爲度。水長逾誌。民田有礙。仍聽放洩。自孫集漫後。廣籌分洩。尹繼善始於湖口迤上。增築滾水壩。又堵截下游邳州盧口入運之水。使徽湖水自小梁山河茶城河內華山河。經荆山橋洩入運運河道。李清時濬伊家河。使自江南之梁王城。分流殺勢。一時濟變非常道也。湖口閘收蓄徽山諸湖之水。節宣濟運。水小之年。湖無來源。惟恃上游九州縣坡水下注入湖。由湖口入運。嶧縣八閘地勢就下。水易洩瀉。江省隅頭駱馬等湖。積年淤涸。專仰徽湖灌注。四百里之遠。途長流弱。難期暢達。湖口閘惜水如金。更番節宣。浮北上之舟。如河湖相平。不能出水。猶用江南屏水法。以資接濟。不得已更引黃水。由潘家屯北出。爲急不暇擇之計。湖口通湖之閘。運道之大關鍵也。平時疏引坡水。嚴下通板。蓄高湖水。至符誌而後。用則無憂消涸。設有異漲。湖口荊山伊家河三路宣洩。亦不淹及民田。爲兩得也。河渠紀聞。

雍正八年正月初十日。孔毓珣奏。瓜洲由閘運口。乃漕船出入咽喉。雍正六年。前河臣齊蘇勒。因先改運口。逼近城垣。而遶城一河。又復甚窄。題請復開舊時運口。建壩挑河。使糧艘商船。經由故道。於漕運城社。大有裨益。查瓜洲由閘下。向有石閘。名爲四閘。與由閘次第啓閉。賴以蓄潮濟運。今流北徙。四閘場久無存。而退潮大溜。旣無四閘以制其洶湧之性。又無支河以分其勢。兼之淮水灌注。閘下之水。勢若建瓴。運口商民船隻。往來艱險。且不日重運經臨。臣於上年十二月。委員赴勘。擬挑越河一道。以利漕商。又行淮揚道議估。今據該道詳稱。應自由閘以上青蓮菴起。至尤家碾止。挑挖越河一道。長三百六十七丈。寬十二丈。仍於河頭上築束水草壩一座。收束水勢。現飭廳造冊。竊思此項要工。目今重運將臨。隨飭河庫道速發帑銀四千五百兩。委員挑河築壩。限一月內完工。一面會同蘇撫尹繼善。赴工督催完工。一面飭令淮揚道。將工段丈尺。及需用銀數。造冊另疏具題。奉上諭。挑築此河。甚有裨益。會題到日。再降諭旨。圖留中。殊批諭旨。

是月二十八日。上諭內閣。北運河青龍灣。修築減水壩。並挑濬引河工程。據怡親王等奏請。交與侍郎何國宗督修。朕思原任侍郎牛鈕。在北運河管工年久。於地方情形。甚爲熟練。著與何國宗協同辦理。其一應錢糧工程等項。令都統莽鵠立耿化祚。副都統佛保。副都御史二格。會同何國宗辦理稽查。其減水壩金門。及所開引河。或應寬二十丈。或應寬四十丈。及運河西岸。可否另開減水壩。並何國宗查議各條。是否妥協。有裨河工之處。爾等可詳詢牛鈕。會議辦理。憲皇帝聖訓。

二月十四日。何國宗奏。壩工河道。於二月十二日興工。臣偕莽鵠立等。由引河向海口查勘。其間有應舍

灣取直。無礙民居者。悉心商辦。其餘修濬各工。大學士公馬爾賽等議令臣同牛鈕。再行查勘。隨勘得河西務城北老涯舊隄。及裏兒渡舊河口魚鱗壩。俱當大溜頂衝。亟宜保護堅固。據通永河道德希壽稱。河西務等處工程。現將該廳估報駁查。難據率轉。臣查河西務裏兒渡二處工程。極爲緊要。若俟該道廳駁核轉報請修。恐致遲誤。仰祈皇上俯念河工重大。卽於臣等所請引河壩工錢糧。先撥銀二萬兩。飭發通永河道。令先辦料興工。一面估報水利營田衙門。請領還項。如有作法未合。臣同牛鈕酌改。至三里淺火燒屯等工程。應如何修治。俟海口回日。再會勘具奏。奉硃批。所議工程修理之處。緩急先後。俱屬合宜。欽此。

輔水利四案

是月二十二日。嵇曾筠奏。上冬今春。例屆大挑。臣以運道輓輸。關係綦重。隨飭道廳查估。臣親馳相度。自臨清至臺莊。凡沙淤之處。俱令撤水歸湖。築壩分挑。除額設淺溜軍衛等夫。通數赴工力役外。其需用補募人夫。應給工食銀兩。悉照定例奉行。檄飭濱河州縣。每名日給銀六分。並給器具之資。俾各夫踴躍趨事。業於月之上旬。陸續報竣。視上年完工較早一月。臣又親勘現在河身。備極寬深。足資容蓄。因查工至泃河。見南來糧艘。已抵東省。於二月十五日。入臺莊閘。聞各幫亦陸續前進。隨飭沿河廳汛。將水櫃各湖口門。緊閉備用。但令開放汶水。灌注接濟。現今東省重運。催儻過行。不特大挑工程。早完一月。卽江南糧艘。亦早到一月。皆由皇上宵旰勤求所致也。現今桃汛將屆。臣將往豫工督率修守。奉上諭。覽運河大挑工竣。水勢深通情形。甚爲嘉悅。非卿殫心籌畫。實力經營。何能奏此速效耶。硃批。諭旨。

是日。又奏東省水利。本年正月。臣在豫省。卽同田文鏡會委。兗寧道呂維炳。前赴魚沛二縣。下游水道。南

抵海口令其徧查專心經理現在沿途逐細詳勘尙未竣事今於二月十七日准吏部咨開江南河臣孔毓珣以呂維炳諳練河務題請調補淮徐道其竟寧道缺令臣與田文鏡會同揀選部覆奉旨康宏勳等依議補授餘依議欽遵咨會但竟寧一道管轄黃運兩河工程錢糧倉儲河務非閱歷河工有年者不能勝任臣等詳加揀選一時難得其人且現在興舉水利驟更生手地形水道不克瞭如指掌仰懇皇上天恩俯允暫留呂維炳經理東省水利事竣俟揀選得人堪以委代方令前赴調任庶臣等得以揀選賢員而水利要務駕輕就熟尤易見功矣奉上諭所奏是田文鏡亦曾具摺陳請但淮徐道所管事務甚屬緊要缺難久懸候朕斟酌有旨硃批諭旨

是月二十五日田文鏡奏疏濬山東江南等州縣水道使歸宿於海一案奉上諭先期派出原任侍郎阿克敦原任巡撫陳世倌甘汝來同司督修之事一切辦理機宜悉聽田文鏡稽會筠孔毓珣尹繼善籌畫調度工料等費悉動帑金支給欽此欽遵轉行間又奉上諭水道工程俟孔毓珣會筠尹繼善等會題到日再著阿克敦甘汝來前往辦理陳世倌著暫在曲阜工程候信俟阿克敦等至山東時一同前赴工所欽此查此案前經署東撫費金吾奏明經王大臣等議覆應令費金吾會同臣田文鏡稽會筠尹繼善詳確定議當於上年閏七月會委山東竟寧道呂維炳徑詣沛縣荆山口會同江南委員淮徐道康宏勳將張穀山十字河等處查勘如何開濬其沛縣下流入運河身並自彭口以下遇雨水過多時是否不致礙運有無支河分流濟寧等州縣應開之河下流豐沛入運入黃最有關係一併查議詳報嗣據詳稱濟寧等州縣積水由南陽昭陽徽山諸湖下注自徽山湖尾閘起歷張穀山至計家山河渠淤墊應挑濬一



十五里。自計家山至荆山口。計二十五里。毋庸疏濬。自荆山口橋東起。抵三岔河一百四十里。河悉寬廣。其三岔河東岸。原有洩運河。異漲入駱馬湖去路。上游洩下之水。可以從此分洩。一半入湖。三岔河迤下十二里。至貓兒窩。此處運河狹窄。其分洩一半入運之水。誠恐急不能容。查貓兒窩十二里至馬莊。有減水閘一座。又十里至萬莊。亦有減水閘一座。再於此二閘適中處。照式添建減水閘兩座。又八里至窰灣。有減水竹絡壩一座。又六里至牛頭三灣。有減水草壩二座。以上四閘三壩。可以洩水入湖。以保運道。及水入湖。行六十五里。至宿遷之三合土壩。由五花橋匯歸劉老澗壩下河。內歷桃源、清河、沭陽、安東、海州。計三百五十餘里。止有安東沈家集迤下一帶。地窪河淺。應行挑濬。約百餘里。其餘河悉深通。但六州縣兩岸隄堰。卑淺殘缺。應加高厚。其自龍溝以下。即係大河。可以引水入海。諸水皆有歸宿。臣查此案。勘議開通。工程既大。自應審度兩省地勢高下。悉心區畫。使上源積水流通。下游受水之區。足以容納。即遇異漲。亦得安流。俾田廬永無淹漫。首尾暢達於海。臣因未得親勘。正月內。河臣嵇曾筠。因公路過開封。臣與面議。總期詳慎永安。又會委兗寧道呂維炳。趁此水涸。即會同江南淮徐道。再加勘議。復揀選河南河內縣縣丞林逸。熟悉河務。檄令該道帶往一路測量水平。先將東省上源濟寧、汶上、嘉祥、鉅野、曹單、城武、金鄉、及魚、沛等州縣。徧加履勘。將應挑應浚之道里遠近。丈尺寬深確估。務使水無壅滯。匯歸湖河。其湖水蓄洩。必盈虧得宜。於漕運民生。兩無妨礙。再將江南下源各處。應挑應築水道工程。勘估繪圖冊報。以憑嵇曾筠、孔毓珣等查勘後。臣與會議具題。奉硃批。一切籌畫調度。悉合機宜。硃批。諭旨。

三月二十四日。何國宗奏。臣同牛鈕。於上月二十日抵海口。復溯引河。一路查看。二十七日。回青龍灣。將

草壩工程。逐項安派。并引河淺深。隄身高度。逐段估算畢。三月初五日。沿運河兩岸踏勘。查東岸三里淺一處。歷係險工。應建挑水壩一座。並將舊雞嘴壩重修。其隄灣回溜處。應修排椿一路。又筐兒港壩門上首一處。急溜汕刷。應建挑水小板壩一座。大板壩一座。順水排椿一路。又孤雲寺一處。係大溜停灣。排椿損壞。應行修補。西岸華家口一處。係舊河上口。原有攔河壩一座。連年衝刷。僅存靠隄。陡岸壁立。舊河地勢尤窪。誠恐疎失。水歸故道。致阻糧艘。應修葺一段。又張家莊一處。係新生險工。老隄刷去。僅存月隄。仍係埽溜。應建挑水板壩一座。後接排椿。又火燒屯一處。係歷來險工。舊有排椿。應行修補。又上年水漫隄頂二十處。應行加培。以上各工。據道廳共估銀一萬九千餘兩。請卽令該河道動用道庫歲修錢糧修理。一面估報水利營田衙門。如有不敷。照例請領。得旨允行。畿輔水利四案。

是日又奏。查看得筐兒港減水壩引河工程。除壩臺堅固。海漫三合土。微有衝刷。無庸修補。金門內所衝舊土。卽本來地身。同知朱斐文已築實填平。俱無庸議外。其減水引河。臣同牛鈕察看酌議。先經原任通永河道高鑛。將壩門加寬四十丈。其引河亦須通身挑寬四十丈。仍將舊引河南岸廢隄拆去。方爲暢順。但工繁日久。擬先於新引河中間。沿舊廢隄開挑深槽。直達揚河。淀寬十丈。深三四尺。至六七尺不等。並將河口淤高及舊河內淤淺處。俱爲開挑。自然水流較暢。再揚河淀下口。有陳家溝舊河。寬八九丈。東隄頭舊河。寬六七丈。賈家估新河。寬八丈。計河三道。寬不及三十丈。擬於賈家估新河旁。再開洩水河。寬三十丈。方足暢流歸海。今先儘力開挑。或七八丈。或十餘丈。亦爲有益。均俟今秋來春。再加開廣挑濬。其引河兩隄。北岸係舊工。內有單薄二段。應行加培。南岸係新工。衝開之處。俱經賠修完固。其圍淀隄工。汕刷

甚多。俱在保固限內。據朱斐文稟稱。隄工內外。皆係淀地。上年諸淀盈滿。風浪排擊。實屬人力難施。應請援例。准六賠四。先動錢糧修理。其應如何賠還。聽水利營田衙門核議。勒限賠還。以上工程。約共需銀四萬餘兩。擬即咨請動撥錢糧。飭發通永河道。即日興工。分晰冊報查核。至減水壩金門寬高。與全河爲消息。原議水小則加堰。蓄水刷河。水大則開放暢洩。上年伏汛後。加築土堰高三尺餘。秋汛長水。未曾過堰。今青龍灣又分減於上流。臣與牛鈕計議。請俟伏秋時詳察水勢。再行議奏。得旨作速料理。少有遲誤。疎虞。惟何國宗是問。一應動用錢糧。與牛鈕無涉。何國宗一人察核可也。畿輔水利四案

是月直督唐執玉議加築密雲縣城外白河隄岸。按密雲縣城外白河。即通濟河也。源出塞地。經密雲霧靈山。爲潮河川。而富河。晉口。七渡。桑乾。三里等河。俱會於此。名曰北河。流經密雲城外。水勢湍悍。春夏山水暴至。直逼城西。沿河築石子隄護城。復築土隄。沙隄木壩爲外護。而河流迅急。土木隄壩。刷去無存。石隄孤立。城垣當險。至是初議築壩塞流。未能一勞永逸。擬於河西另開新河。由北口直趨而南。水勢得洩。可免泛溢。復以議挑之李家莊至師家莊八百餘丈。地勢高出河身三丈有餘。此處開挑新河。大費人力。更須多築隄壩。堵塞舊河東口。方可引歸新河。而應築隄壩處。又直當正衝。隄壩難以築立。糜費無濟。卽舊設之沙土木隄壩。俱橫攔急湍。山水奔注。與壩相激。旋築旋衝。究無裨益。詳察河隄。上有土嘴。以逆水性。下有隄壩。以遏水勢。是以泛濫難洩。議請挑去土嘴。寬讓河身。使暢流南下。并請貼近河身。另築堅厚土隄。以幫石隄。隄根用榆圓載石。以固根基。隄堅則城固。河寬則流平。舊存隄壩。俱無庸修築。此亦順水之性也。順則流。逆則衝。去當衝之隄頭。以順其流。固藩垣以束其溜。則山水不爲患矣。河渠紀聞

是月直隸奏報大開澧河分洩大陸澤之水。滙流暢入於海。按石瑤大陸澤記云嘗出寧晉。間渡於所謂葫蘆河者。平波漫衍。一碧千頃。芟蒲菱藕魚鮭之利。民咸取之。貢賦土人謂之水五社。蓋五社之民沮洳弗田。力胥出此。古所謂大陸之藪。禹貢大陸既作是也。其水滙流翕聚。必有渠以洩之。分疏澧河洩大陸之水歸於海。農務御史舒喜上其事。疏言任縣士民呈稱縣東北有大陸澤。爲沙銘馬泰等十七水之滙。以澧河爲渠。由穆家口至隆平寧晉達天津。水有所歸。任不受害。自澧河塞而大陸之水有蓄無洩。沒民田千餘頃。歷來雖有開導澧河之議。民心不齊。任境四十餘村。千百年來瀰漫汪洋。公私甚苦。特命怡親王省視河防。量度築濬。惟王親詣踏勘。數陳請命。發帑二萬餘兩。剋日興工。自穆家口橋北至寧晉界。袤延四十餘里。爲民興利。不特附近村莊永無被水之虞。卽豁免之田。漸可墾種者。且二百六十餘頃。此所謂利其利而民不能忘也。河渠紀聞。

是月澧河通流。並引百泉水分灌民田。按澧河洩大陸之水。下流既通。支港畢貫。志稱南和有澧水。百泉水支流也。順德地多磽确。少汗萊。民間汲鑿。始小有所獲。百泉在邢東南七里。下注南和封內。故兩縣沃野多穫。百泉滙澧歸大陸。流潤郊野。李東陽百泉水利記云。順德之百泉河。自邢臺東注南和之河頭郭村。舊有石橋水門止。二捲水勢洶湧難受。歲一奔潰。激沙淤田。多所墊溺。於是增廣其橋。爲三水門。以殺水勢。築隄捍外。疏渠灌田。用是旱澇無災。利興害除。良以南北土性異宜。而望澤則一。三湘七澤之墟。以上地下平者。爲勝燕薊。則泉流灌注爲沃壤。百泉之流。與澧河同功矣。河渠紀聞。

五月初四日。怡親王薨。賜諡曰賢。入祀賢良祠。初十日。命大學士朱軾總理水利營田事務。理藩院左侍

郎莽鵠立內閣學士對琳工部右侍郎何國宗協同辦理畿輔水利四案

七月東省蒙沂諸山水同漲直注邳州決宿虹之孟城庵朱衣城外河之沈家圩邳宿桃清漫缺數十處  
滙歸洪湖今按此語殊未明晰蒙沂山水暴注運河狹不能容潰隄四溢壑所必至既歸黃河極盛亦祇  
能逼溜南行似無橫穿黃河匯入洪湖之事意其時適逢湖漲過於河水不能外注故啓天然等壩以保  
堰工而運河下注之水來猛去速旋亦就平謂因山圩壩啓而蒙沂山水落未爲確論按山東蒙沂邳  
費滕嶧之水伏秋盛漲滙入駱馬湖直衝邳宿而下加以沫水由穆林西流會碩桑諸湖莒蒙諸山之水  
衝運入黃浮隄越岸邳宿桃清經過之地一望汪洋洪湖水盛開天然二壩滾水三壩以洩其流蓋啓高  
寶閘壩分流洩入江海山水旋落漫口掛淤斷流分道堵築彌月竣工禹貢淮沂其乂沫合於沂沂沫巨  
浸自古患之其關鍵在禹王臺昔人於此壘石爲壩遏沫西出之水俾東由漣河下海明季寇亂毀臺取  
石修城沫河之鎖鑰既開西流之橫暴益甚前王新命用竹篾裝石堵塞令由故道入海于成龍又於沂  
河兩岸築隄萬餘丈以束其流其患稍息嗣陳鵬年接築土堰齊蘇勒增修茨防俱有區畫至是霖雨水  
漲漫壩而下合沂浸淫建瓴直注暴漲來猛去速又啓高堰天然諸壩洩淮以殺其勢故不爲大患及其  
塞決不待霜後進埽及時繕治宿遷迤下諸口間斷掛淤始得併力堵築計日蒞事至爲曲突徙薪之計  
則禹王臺攔水大壩爲運河關鍵民命所係竹絡規模具在壘石增培浚其入海故道而先爲之備善後  
扼要之急工當有因時而起者時豫省亦以漲發衝漂祥符陳家寨月隄埽段隄工埽場過半田文鏡督  
率弁夫晝夜加幫裏餒百餘丈搶護至七月底竣事蓋勵精圖治之時也河渠紀聞

九月初一日田文鏡奏東省漕河爲糧艘經行要道全賴汶水濟運而汶水又以東平州戴村壩爲關鍵利在用其水而去其沙洩其有餘而蓄其不足是以明臣宋禮先建玲瓏壩後萬恭建亂石壩潘季馴又建滾水壩三壩俱出水三尺蓋汶水挾沙而行上清下濁伏秋漲發水由壩面滾入鹽河歸海其沙卽從玲瓏亂石壩之洞隙隨水滾注鹽河冬春水弱築堰滙流濟運迨齊蘇勒因彼時乾旱之後汶水甚微不能濟運隨將玲瓏壩洞隙堵實至雍正四年何國宗又議增築石壩計高七尺長一百二十餘丈緊貼玲瓏亂石滾水三壩高厚堅實滴水不洩其時雖爲東水濟運但汶河會泰安萊蕪等九州縣之泉水源大流長加以汛漲無處宣洩而石工橫亘旣無尾閘洩水又無罅隙通沙致水漫沙停不但瀕河地方被患而汶河挽沙入運日漸淤積今歲夏秋雨水過多九州縣泉河一時並漲歸海無路奔注入運運河又不能容漫溢隄岸南則濟汝魚沛北則東昌臨清均被水患下游宣洩不及上源之水正盛致將戴村壩東北民隄衝開百餘丈直注東平淹沒田禾此雖雨水異漲人力難施亦由石壩高厚無從宣洩之故但決口後汶水又盡注鹽河並不達運及運河水退劉老口等處沙積水淺舟行艱澀臣隨飛飭動用河庫節省夫價銀兩備料堵口一面募夫挑沙挖淺開放馬踏湖水濟運回空糧船始得無誤九月初三日決口已堵汶水仍歸運河現運河水深四五尺不等據道廳各官稟報漕白糧船共五千九百四十三隻十九日前共過濟寧五千一百二十九隻計十月初卽可全行過濟但汶河自雍正四年戴村加築石壩以來沙淤河淺壩根現淤三尺臣已面致協理河臣朱藻到東確勘俟其勘回臣再會同嵇曾筠定議具奏奉上諭覽奏戴村壩決口堵塞緣由已悉如果石壩與運河有礙急應籌酌具疏題奏候朕裁奪可也硃批

諭旨。

十二月初五日。工部遵旨。議奏直隸河工。關係重大。請設立河道水利總督一員。駐劄天津。令四道廳員及印河各官。受其節制。一切事務。俱照東河總河例行。其營田事務。歸直隸總督管理。十九日。以吏部左侍郎劉於義爲直隸河道水利總督。內閣學士徐洪恩協辦河道事務。畿輔水利四案。

是年。汝河石梁口決。汝上。鉅野。嘉祥。濟寧。滋陽。寧陽。鄒魚。滕嶧。及江南之沛縣。徐州。邳州。皆被水患。按。汝河。魯之大川。歷年衝刷。寬深。赴南。旺順而易。入鹽河。逆而難。水不歸海。盡趨南。旺。運河十丈之渠。豈能容汝河數百丈泛漲之水。一綫漕隄。漫決衝潰。漫溢民田。勢所必至。寧陽。汝河南岸。石梁口。向稱險要。一遇衝決。先淹寧陽。次及汝上。濟寧。滋陽。又次及鄒縣。魚臺。滕嶧。而後至江南。沛縣。徐州。邳州。數十州縣。歷來被水。皆由石梁口爲患。汝河南岸衝決。更不止石梁一口。桑家口相連並決。倍於往昔。是水不以海爲壑。而以山東運河兩岸州縣爲壑也。且以江南運河兩岸州縣爲壑也。運隄單薄。坐當頂衝。離隄數十丈。內有高阜之地。可以加築月隄。石梁口上下。殘缺甚多。應於石梁口隄後。加築月隄。桑家等口。培築堅固。并於沿河隄岸。加幫高厚。庶寧陽。汝上。濟寧。滋陽等數十州縣。得免淹沒。先事豫防。莫要於此。更由坎河口洩水入鹽河下海。尤爲釜底抽薪之計也。河渠紀聞。

是年。議停荊山口水道工程。按。歐陽公言。事有利害。輕重懸殊。擇其害少者任之。此通達之論也。東省蓄水。害僅一隅。放入江南。害及半壁。况黃運之交。尤有不可言者。山東泉河。原有本境歸海之路。向以各湖爲水櫃。蓄水濟運。遇水大之年。汝泗以上。則有大清河爲東漢以來。黃河出海故道。寬深暢達。西來諸

水馬頰徒駭諸河。均能導流歸海。魚沛以下。雖有由張穀山荆山口入運通湖之路。而南陽、昭陽、微山諸湖。大堪容蓄。伊、泲、湖、口諸道。亦足分洩。且使運行寬裕。從未有東省之水。開渠由江南荆山口宣洩入海者。有之。自費金吾奏疏。魚臺積水始。常時部議。令會同田文鏡、嵇曾筠、尹繼善詳議。經兗、寧、淮、徐兩道。勘詳。孔毓珣據詳。未能定議。及嵇曾筠調任南河。疏稱濟寧各州縣積窪之水。全注江南。竊恐下游難受。况徐州黃河北岸。接連蘇家山。寬衍數十里。不議築隄。黃水出槽漫灘。從岡頭十字河荆山口。輾轉東注。而荆山口橋下。尙留山麓坡陀。勿使開鑿深廣。誠恐黃水入運挾淤。良存深意。今議開濬。誠如部議。不入於運。卽入於黃。甚有關係。此江南水道上截之形勢也。又自徐塘口三岔河迤下。運河窄狹。今再益山東河泉坡窪之衆水。運河西岸及邳州、唐宋山、格隄。均難保固。雖有馬莊、萬莊減水石壩。增減然湖水高於黃運。患不可言。誠如部議。諸湖滙流而下。或致急不能容。且湖水一片。繹道安能飛越。此江南水道中截之形勢也。至駱馬湖。既承受諸山各河之水。湖之尾閘。勢必宣洩不及。且宿桃清安直至龍溝海。自應一律築隄。但兩省之水歸注。安有縣長千里之隄。可資抵禦。况沭邑有沭水滙流。海州有海潮上壅。儻河海相抵。不能順下。卽有高隄。亦恐撞擊散漫。六州縣城址民田。沈於水底。此江南河道下截之形勢也。通查確勘。權其輕重緩急。開渠洩水。實未能舉行。疏上奉旨停止。自此由荆山宣洩之道。永不復啓。嵇文敏履任正值蒙沂漲發。合微山、昭陽諸湖之水。奪運入黃。此堵彼決。不得已開天然等壩。患始稍定。而下河州縣已遭沈淪。不獨邳、宿、六州縣城社也。分疏上中下三截。條暢分明。洵爲經國之論。至今嚴閉蘭家三壩。不輕議啓。惟遇北岸有事。決水自西北而下。必須廣籌分洩。斯黃水涸渴。河身騰空。正可納入衝沙十字河。



古城子房山諸處均可暢洩入黃。其入運入湖之水。河海分道。不相侵奪。亦無慮阻運橫流。至平成後。河槽盈滿。河底高仰。黃水倒灌掣溜。未能語此也。河渠紀聞。

此  
页  
空  
白

# 續行水金鑑卷第七十七

運河水車履五

雍正九年四月十一日。嵇曾筠奏。山東禹王臺壩工。實爲江南下游保障。緣上年咨商修築。未免隔屬耽延。仰蒙諭旨。臣卽前詣該工。看得泇水源長性猛。今於竹絡石壩二十七丈外。依其頂衝形勢。統建石工六百餘丈。蓋以竹絡盛石。堅重隨沙坐實。且上秋水力猛峻。而石壩屹然不動。已有明驗。其餘接連岡阜。仍築土隄。泇河口門大爲挑浚。以順其入海之路。所有料物已發帑購辦。上緊疏築。務期壩高隄實。河深堵截。泇水俾由故道直趨入海。以除浮溢之患。再江工引河業已挑浚。夾江鐵心壩亦已築成。從前夾江之水逼注瓜洲。今創築壩工攔截。俾夾江水全歸南岸。依山東下而瓜洲水減丈餘。將來伏汛屆臨。開放引河後。大溜自必更加分減。瓜城可保無虞。奉上諭嘉悅覽焉。保障江河一切要務。惟卿是賴。勉爲之。聖人垂訓。智仁勇三字並重。缺一不可。在卿分中。勇字更當加勉。凡應獨力承當之事。概弗推諉。下吏自必咸皆感服奮興。無論鉅細工程。須集衆心羣力。方使成功。非一二人所可能者。運道民生關係綦重。省帑乃屬末節。萬勿狃於節慎之見。以致因小而誤大也。誌之。殊批諭旨。

是月二十三日部題。上年十二月初十日。嵇曾筠奏。宿遷駱馬湖。一承東省運河水。一承蒙沂山水。一承荆山口宣洩河水。滙爲巨浸。且與運河僅隔一綫孤隄。舊有蓄洩口門名十字河。引湖濟運。兼以刷黃。歷年久遠。有利無患。其湖之尾閘。有六塘河以資宣洩。歷宿遷。桃源。清河。安東。沭陽。至海州歸海。嗣湖水微

弱。恐黃水倒灌。將十字河口門堵閉。又於西寧橋迤西高處。建築攔湖隄壩。因此湖水不通。專資黃水濟運。致中河之水。由劉老澗挾沙而下。將入海舊路淤阻。今秋東省山水暴漲。合流下瀉。全無去路。浮溢隄岸。臣等籌畫。亟應將十字河口門復舊。俾駱馬湖水流入中河。刷深運道。兼敵黃流。其西寧橋迤西攔湖隄壩。酌量開寬。俾湖水由六塘河迤下分流入海。則上游水有歸宿。不至壅滯浮溢。如慮開放後湖水微弱。應於十字河口門建草壩一座。伏秋水盛開放。冬春水弱堵閉。其西寧橋迤西。亦如前法建築草壩。視水盈縮。以爲漲洩。至六塘河迤下河身。在宿桃境內者。尙屬流通。在清安沭海境內者。間段淤墊。亟宜大挑。卽以挑土幫築子堰。當經檄飭淮揚道白鍾山。淮徐道呂維炳。勘估據詳。駱馬湖三合土壩之下。項沖中河廟灣頭埽工。應酌挑引河。長六百十三丈。導水東注。其六塘河至清河朱家莊。河分南北二股。北股自朱家莊起。歷沭陽至安東謝家莊。入碩項湖。由海州龍溝義澤河入潮河歸海。應挑河六千七百九十四丈。南股亦自朱家莊起。歷安東蘇家蕩。至沭陽孟家渡武障河入潮河歸海。應挑河六千八百七十七丈。每方照例給銀九分。約計土方銀五萬一千餘兩。卽以挑土運於兩岸。各離河十五丈外。築子堰攔束水勢。所有宿桃安清海贛三廳。應請加兼管水利職銜。以便查察。如有淤淺。卽令該地方官督同佐貳。率夫於農隙疏濬。其挑土並可增培子堰。將見河深堰高。暢流無滯。安東沭陽至邳宿一帶。不惟河防有賴。抑且水利無窮。二月初十日奉旨。該部議奏。部議應如所題。奉旨依議。南河成案。

五月初四日田文鏡奏。四月二十七日接山東撫臣岳濬札開。請設駐沂道員。敬錄硃批諭旨。命臣等商酌。意見相同。時題請原奏。請將兗寧道所轄之泰安州。及各州屬縣。並安東一衛。共三州八縣一衛。另設

一分巡秦莒沂道管轄。駐劄沂州。臣查沂州爲南北衝途要地。向有副將駐劄。今再設道員彈壓。誠爲周密。惟泰安州係濟東道所轄。該道駐劄省城。泰安州與省城較近。距沂稍遠。若改歸沂州道管轄。一切事務文移舍近就遠。未免不便。而去此泰安及所屬三縣。又止莒沂兩州。並所屬五縣。似於監司體制未稱。查兗寧道所管運河千有餘里。道遠事繁。是以從前係濟寧道銜專司河務。無分巡地方之責。迨康熙五十三年。東兗道裁汰後。始將兗州府屬歸入管轄。改爲兗寧道。事務倍繁。難於兼顧。今沂州旣復設道員。則兗州府所屬十四州縣。莫若仍歸沂州道管轄。連沂莒所屬共二十一州縣。至兗寧道所屬。尙有直隸曹州。東平。並所屬八縣。雖舊隸兗州府。亦爲東兗道所轄。但距沂州遙遠。若一併改歸沂州道。又恐鞭長莫及。且曹東等州縣。俱係沿河地方。附近濟寧。而兗寧道已去兗府十四屬。止此兩州八縣。尙可管理。似應就近仍令兗寧道管轄。如此則責均任專。於地方河務有益。臣已備細札覆撫臣商酌。至沂州舊道衙門。作何修整之處。亦一併札致撫臣查明定議。請旨遵行。奉上諭所議是。會疏題請。硃批諭旨。

六月初六日。山東河南河道總督沈廷正奏。東省戴村壩工。臣兩次親勘。應將接連滾水壩之新建石壩。高出二尺處。先行拆去。與舊壩相平。與部議適合。其接連亂石壩之新壩。高於舊壩止有六寸。接連玲瓏壩之新壩。高於舊壩一尺三寸。若俱拆去二尺。尙應增補方平舊壩。但辦石鑿砌。大需時日。今臨伏汛。恐工半水至。非特糜帑。且汝水傾注。不能抵禦。况霜降過後。仍應會勘拆修。則此接連亂石玲瓏之新壩。似應停其拆砌。霜降後。勘明興工。臣赴豫。商之督臣田文鏡。及協理河臣朱藻。意見相符。已經會同咨部。俟秋汛後。再同朱藻前往確勘興工。另奏。至禹王臺竹絡壩工。前因領帑分築之沂郯海贛同知吳象賢。玩

工侵帑業經會參。遴委泃河通判蔣祈年往署接修。任事以來。勇往急公。所修竹絡壩。上下兩層。照估剋期築竣。現在攢砌邊絡。不日完工。俟工竣後。應聽江南河臣嵇曾筠會題。惟沂邳海贛同知一缺。經管兩省工程。最爲緊要。今通判蔣祈年辦事勤敏。堪膺此任。臣與督臣田文鏡商酌題請。奉 上諭。所請是。硃批諭旨。

是日又奏。東省運隄。經前署河臣田文鏡題估。仰蒙俞允發帑興工。臣接部文。隨撥帑銀。令道廳等遴選幹員。募夫分修。復親赴各工詳勘。務期帑不虛糜。工收實效。臣兼至汶上縣所轄之何家壩查勘。該壩坐當汶河西岸。蓄水濟運。衝刷流沙。爲南北運行關鍵。因年久椿腐石坍。復經上年大水。其雁翅隄岸。又俱潰缺。一遇汶漲。沙流入運。劉老閘頭二口。遂致淤淺。此壩工急。須照舊速修。俾資蓄洩。已飭兗寧道王鴻勳據實確估。俟詳到題請修築。硃批諭旨。

八月嵇曾筠奏。臣因宿遷黃運兩河。當駱馬湖之首衝。所以臣親駐宿遷。上下策應調度。於七月內湖水長發。已經搶護平穩。今八月初十以後。湖水又長。隄埽工程。業已搶築加高。湖流循軌東注。總因禹王臺竹絡壩工修築完固。約攔湖之上源。不使沫水合流。又六塘河疏濬通暢。宣洩湖之下游。俾得去路順利。是以湖水雖大而無疎虞。伏查沫水。於七月初九等日。長至七尺五寸。至二十九日。又陡長一丈。而禹王臺千丈壩工抵住水勢。卽由沫河就近入海。不得下趨。所有邳宿黃運湖河一帶。運道民生。咸資利涉。而登衽席。硃批諭旨。

十一月二十六日。工部議得。山東河南河道總督。今管理直隸河道總督沈廷正等。疏稱東省東平州戴

村壩。原賴以遏汶濟運。聚泉利漕。爲運河最要關鍵。原有州判專司壩務。後經奉裁。遂無專責。今奉拆新整舊。正興大工。錢糧料物。更須專員查察。况東平州係捕河廳汛地。其管河州判卽屬該廳管轄。是以請將戴村壩。統歸捕河廳管理。交東平州州判專司。其戴村壩下。至分水口一帶汶河。係東平州地方者。仍歸捕河廳統轄。係汶上縣地方者。應歸連河廳統轄。以專責成。應如所題。奉旨依議。運河道冊。

是年堵築完固。口先是濤沱漸趨北道。雍正初。單家橋河頓涸。五年。怡賢親王開挑淤塞。導水入運。至是議者以水性分流。則緩濁停妨。運復堵塞之。畿輔安瀾志。

是年朱藻督理東河。修南旺湖圈隄。加浚斗門。按南旺湖古之大野也。禹貢大野既濳。周禮兗州澤曰大野。地在鉅野縣北。濟水故瀆所入也。漢決瓠子注鉅野。五代後河南徙。滙於鉅澤。與梁山礫合爲一連。南旺蜀山諸湖。方數百里。今南旺在汶水西南。漕河貫其中。湖界爲二。東湖廣倍西湖。南盡蜀山。北接馬踏。西北接安山。西南接馬場及昭陽諸湖。於五水櫃中。最當要會。禹治水大野。鍾洙泗濟水而成。泗通於汶。沂通於淮。泗之上源。又自大野通於濟。揚徐。兗之貢道。由此而達。地形與任城太白樓齊。南北通達之脊也。西湖環築隄岸。萬五千六百餘丈。開渠與隄並長。湖內橫穿小渠二十餘道。引水入漕。東湖以東地高。無須防遏。植柳豎石封界。南至長溝。小河口。蘇魯橋。北至田家樓。受水處亦築隄。視西湖功又倍焉。迨後湖身日淤。占種盜決。皆爲民田。常居敬於高下相承之地。築東湖小隄。隄內永爲水櫃。隄外作爲湖田。聽民佃種。康熙四十年。大加修築。至是重修補治殘缺。兼復斗門。使汶水收入湖內。南運不足。開濟運閘放水。使南北運不足。開關家大閘。五里鋪滾水石壩。放水北注。今雖運道改行新河。南旺湖落在西岸。水

低於運。然運河水大。則可洩以爲蓄。運河水小。亦可引入昭陽等湖。遇旱乾蓄水。水車亦足濟事。圈隄斗門之濬築不可緩也。全河備考云。西湖積沙日久。高地雖多。而窪處仍可洩蓄。濟運宜疏通復其原界。不可聽民開墾。若輕給耕種。必且廢爲平陸。一遇旱潦。緩急無恃。非如安山無礙運河者。比南旺一湖北運資以利濟。卽南運需水。亦必俟金口壩。黑風口。五里營閘。十里鋪閘。安居閘。並楊家壩。盡皆啓放。仍不足濟運。然後開十字河。俟重船一過南旺。卽將十字河堵閉。南旺湖之重若此。而後可以權南北之運也。河渠紀聞。

是年堵閉花莊閘。改建草壩。大浚鹽河。按鹽河分洩中河盛漲之水。經清山安海入潮河歸海。轉運場鹽海柴。灌溉田疇。康熙二十六年。靳文襄始建閘於清河縣西之臨運口門。迨運口改於楊莊。鹽河口門亦移花莊。至是大溜下移。鹽河口門形勢不順。閉閘改建草壩。冬春水小。堵閉草壩。蓄以濟漕。夏秋糧艘過完。啓放草壩。運送鹽柴。惟河窄水淺。紆曲綿長。攻沙力弱。若通入黃水。濁淤更速。故王營減壩不輕議啓。長河以時疏濬。菑文敏於改建草壩後。大疏鹽河。爲善後計。自鹽河閘越河頭壩起。至山安界朱元莊。迄新安鎮濬河。二萬九千六百丈。有奇。又平旺河隄尾迤下。至新安鎮三十餘里。向無隄堰。水勢散漫。安洙海一帶。田竈被淹。卽以挑出之土。築成子堰。鹽運民田兩益。近時於下流武障。項沖。牛墩。六里。義澤等河。各建滾水石壩。口門設草壩。隨時啓閉。水有收束。以防橫流。亦制沙不敵之法也。河渠紀聞。

是年修復戴村壩。舊制拆低。新壩改建。磯心五十六。中留水竇五十五。以資宣洩。按汶河下注之水。入於大清河。大清河亦名鹽河。卽禹貢導沔水東流。爲濟東北會於汶者也。宋禮於坎河口西築戴村壩。截



汝南流至分水口。南北濟運壩。初用土增築高。厚植柳培護。水無旁洩。留坎河口。刮沙作壩。蓄水歸運。水漲聽其連沙衝出。然歲築歲決。明萬恭疊石爲灘。潘季馴築石爲滾壩。屢加修治。何國宗又於三壩內增築石壩。涓滴不行。淤積日高。至是總河田文鏡。朱藻先後定議。改壩爲閘。建礮心五十六。中留水門五十。五安設閘板。以資蓄洩。又以不能啓閉。另築土壩。名春秋壩。前人作事。謀慮深遠。宋尙書不壩坎河口。與馬之貞堰城築土壩。同一作用。余毅中以坎河創石爲壩。有隙可以洩水。無路可以通沙。擬建閘。以時蓄洩。張文奇仍議築土壩。謂石灘能走水。不能走沙。均不出宋公留坎河不壩之意。萬公以石爲灘。潘公以石爲壩。亦得其意。而變通用之。不敢輕視坎河。誠慎之也。河渠紀聞。

雍正十年五月。署江督尹繼善。河督嵇曾筠。議奏江南水利事宜。按會勘籌議疏。運鹽河。又山陽縣境內。向有河二道。中夾沙岡。其南爲大沙河。其北爲界溝河。舟行由此往來。田畝賴以蓄洩。自康熙三十五年。童家營隄工漫淹。二河遂淤。水無從洩。田常被浸。亟應疏浚。以利民生。再揚州府城河二道。又繞城河二道。處處委積。致揚城內外積潦莫洩。貨運不便。應浚深通。水口各建石閘。以便啓閉。河渠紀聞。

是年直督劉於義。議青龍灣壩工。毋庸改作事宜。疏稱青龍灣壩工。皇上親授方略。建減水壩。以洩全河之水。使河石務險工保穩。爲運道民生永奠安瀾。筐兒港舊壩。寬二十丈。不能洩水。展寬四十丈。共成六十丈。北運河洩水始暢。雍正七年。水大湧至。筐兒港以下隄岸。俱得保全。此壩面寬闊之明驗。青龍灣二十丈壩。面不能暢洩。明矣。今何國宗不遵行四十丈原制。議壩內添建礮心十四座。每座寬七丈。共寬九丈八尺。則四十丈壩面。實祇存二十丈二尺。礮心阻水。必不暢達。現未建立。乘此中止。仍照原寬四十丈。

費省工倍。河西務等工程可望平穩。於運道民生實有裨益。河渠紀聞。

是年江督尹繼善議疏。串場河存水五尺爲度。按江南水利。揚州一帶河道。必兼權運鹽民田。開人字河入芒稻閘。則鹽船有開水過陡。上下不便之說。再疏越河築三空閘。底高於芒稻三尺。以平其流。又以芒稻洩水過大。恐掣鹽河之水下洩。水淺不能任載。議建閘築壩二條。復經會議開壩俱不可行。惟加挑串場河。使蓄水常存五尺。無礙鹽運。而議始定。至是疏稱。鹽河蓄水須以五尺爲準。查如臯丁堰至豐利掘港場百二十里。爲鹽艘必由之道。自丁堰至三岔河水俱深通。岔河迤東至掘港場五十里止。深二尺至四尺餘不等。應請分段浚深。蓄足五尺。以利運行。又如臯力乏橋至周于溝三十七里。入泰州新河口。至拚茶場東新橋三十九里。鹽河一道。乃拚茶角斜兩場運鹽要津。兩岸數十里。竈田均資蓄洩灌溉。現在水深二尺至三尺餘不等。應請加浚。蓄水五尺。新壩橋向有土壩。內蓄河水。外攔海潮。河水大聽其由。滾水壩出海。潮大亦必過壩方入。出入俱有分寸。又泰州劉莊場至鹽城縣串場河一百六十餘里。前止估挑白駒至伍祐七十里。尙有白駒南段至草堰場九十餘里。以水深停浚。今白駒場三里灣至草堰場三十餘里。水深二尺至四尺餘不等。每多淺塞。查草堰白駒劉莊伍祐等場之鹽。俱由此運載。兩岸竈田亦資灌溉。應請一律疏浚。如此通河籌計。隨其淺深高下。蓄水五尺。以符定制。旣不有礙鹽運。息場商之異議。又無需築壩建閘。妨入江之水道。而下河窪地。民田均獲豐收。再泰州河內舊有秦唐港。白塔河。百汶河。三路。旁趨入江。亦甚捷便。因防私鹽往來。築壩堵塞。致水溢下河。今若將土壩改建閘門。以時啓閉。並挑通河路。旣防私鹽。復洩漲水。似亦兩利。此爲運河下流籌分洩入江之路。疏串場河以利鹽運也。斬

文襄公治河書云。淮南運鹽之艱有三。一則串場河底高低不一。天氣稍旱。則河底高處卽淤。多挽拽之費。二則串場河不通運河。凡引鹽出場。必另用小船。由漫灘積水湖內盤壩至運河。多盤脚雇船之費。三則鹽船必經芒稻河。每遇水漲大溜。掣船異常危險。非用數百人增添繩纜。設法挽拽。不能過溜。又多雇夫之費。計每鹽一引。須增費二錢不等。若築隄束水。則運河大船可以竟至串場河受載。自串場河開行。或過高郵閘。或過邵伯閘。寬河大港。直達揚州。省費既多。而鹽船又得安流。爲運鹽之大利。然費鉅難行。工長修守不易。惟疏串場河存水五尺。爲平近易行經久不敝之道。今鹽運已改道。北上由六閘出口。不由芒稻。以時疏濬串場河。使運鹽不憂涸澀。民田積水暢洩入江。無患掣水誤運。民運兩益。否則以洩水之故。築壩收蓄。不誤鹽則澹田前車可鑒也。河渠紀聞。

是年修築禹王臺竹絡石壩。按郟城禹王臺。原以抵遏沫水。俾東由沭陽海州南行入海。不容會合蒙沂白馬諸山河之水。入駱馬湖。致爲運道民生患。至是東省山水異漲。將禹王臺土埽石壩各工。全行衝塌。僅存竹絡石壩二十七丈。並壩之南北殘缺土隄二百餘丈。難資抵禦。因建壩添築九百四十丈。有奇。補舊石工三百五十餘丈。嗣以壩工坐當迎溜。地勢低窪。加修裏餞石工捍禦。臺在郟城北。傳爲大禹遺蹟。旣鑿馬陵山以導沫水。復築臺以遏其衝。俾沫水由沭陽海州注海。不使滙入駱馬湖爲害。故俗諺有沂沫不相見。見面成一片之語。王新命初建竹絡石壩。陳鵬年齊蘇勒。先後增修隄堰。茲復加修增固。漢王景塞館陶。以竹絡盛小石兩船夾載。下之禹王臺竹絡壩。襲用古法。堵禦洪流。沫水無南下之患矣。河

集紀聞。

是年嵇曾筠題請修築宿遷一帶運中河開壩蓄洩利運。按治運必以時節宣疏其來源。尤必通其去路。運河水少則易竭。多則易盈。權盈虛而蓄洩之。其樞在於開壩。嵇文敏經大水後。亟請修築。疏稱宿遷運河分黃水駱馬湖及東省諸泉之水濟運。最爲緊要。駱馬湖對岸黃運交會處。有東西竹絡石壩。年久失修。竹絡損壞無存。且當湖水頂衝。碎石衝湍。沙淤凝阻。又運河西岸黃墩一湖。受徐、邳、睢三州縣。唐宋等處會歸之水。岸繞隄環。水無去路。應於西岸建小石壩。宣洩湖內積水。又中河北岸。舊有劉老澗。九孔八礮心減水石壩。每遇開放。勢若建瓴。下口三合土跌塘成坎。石壩下雁翅底石椿木。悉皆衝損。各工及時應修。此運中河蓄洩之關鍵也。駱馬湖口竹絡壩。始建於王新命。節宣黃河大漲。嗣黃河身高。黃流倒灌。穿湖滙入中河。妨運。張鵬翮塞舊口。引駱馬湖水由舊中河逕石閘入黃河。黃漲閉閘禦之。陳鵬年於宿遷黃運交會處。修東西竹絡中留口門十五丈。以爲湖河關鍵。張鵬翮建劉老澗九孔八礮心石壩。宣洩運水。由六塘河經安東碩項湖。串入運鹽河。達於海。東省蒙沂白馬諸水分流入運。遇漲奔騰南下。由劉老澗宣入六塘。修復以資分洩。西岸黃墩湖。蓄之水。建閘疏洩。入運歸湖。而皆由六塘河下海。洩湖入黃之數少。由湖入海之數多。奔流易泛。則六塘以下之支河。疏浚不可緩也。鹽河口草壩。亦能洩運河之水。新安河尾尤爲喫緊。取挑河之土以築隄。兩工並得。今河身愈高。通黃之壩皆塞。汛水入運。惟恃六塘宣洩。六塘去路。在潮漣諸河。由沭海歸壑之分渠。以時鑿深。暢流東出。運隄之險平矣。近時黃水不入中河。河道日漸刷深。暢流下注。無藉劉老澗石壩分洩。王營減壩亦不時開。俾六塘河洩水東注。又非一閘一壩之能爲功也。河渠紀聞。

雍正十一年正月。上諭內閣。江南范公隄爲沿海之藩籬。鹽場之保障。聞現在殘缺甚多。急應修築堅固。現據兩江總督魏廷珍委員確勘料估。著卽一面具題。一面乘二三月間作速興工。使沿海窮民得以傭工餬口。但工程綿遠。需大員董理。著交與協理河務西柱督率各工。悉心查辦。憲皇帝聖訓。

三月。朱藻奏。查臣濟標中左右及城守四營原額兵丁一千九百二十一名。蒙皇上天恩賞銀六千兩。交與濟寧州各富商營運生息。按月加二。已獲利息銀四千九百二十兩。雍正九年。添兵一千名。雖在恩賞之後。已經臣咨請部示。卽在此項利銀內。一例賞給以上係馬步戰守之兵也。河南河兵一千一百名。蒙恩賞銀六千兩。交祥符等州縣各富商營運生息。每年長年加二。共獲利銀三千九百七十八兩零。再查雍正四年。何國宗等改設河兵四百名。雍正五年。嵇曾筠改設河兵二百名。此六百名。從前恩賞時。未經開入河兵數內。臣查此六百名河兵。雖添在山東地方。實與河南一千一百名河兵皆習練樁埽之兵。丁與濟寧四營戰弁兵丁不同。查同一恩賞銀六千兩。濟寧四營領此六千兩利銀者。已有兵二千九百二十一名之多。不便再將此六百名撥隨濟寧四營一體領賞。似應撥歸河南河兵內。共計兵一千七百名。在河南利銀一體領賞。臣已咨明戶部。並示諭於雍正十一年正月。起不分馬步。吉禮賞銀四兩。凶禮賞銀八兩。一例開賞矣。運河道冊。

四月十五日。嵇曾筠奏。宿遷駱馬湖。向來四五月間水涸。艱於濟運。上年秋後。臣嚴飭廳汛多築草壩。東水廣爲蓄蓄。昨桃汛後。正值糧艘盛行。需水接濟。隨挑開各草壩。湖水俱從十字河口暢注運河。再桃源縣運河。古城汛內舊有砂礮橫亘。是以重運經臨。每多淺澀。上年開挖深通。不用多挽。舟行便捷。又孫宿

運河西岸舊有黃墩一湖。上受徐、邳、睢、三州縣唐宋山等處之水。因岸繞隄環。水無出路。漫延阡陌。臣亦於上年題明。動帑一千餘兩。並檢取沿河舊石。建造小閘一座。開放積水。不惟濟運。且涸出河灘千有餘頃。小民得以種麥。至黃運湖河歲搶工程。臣俱逐一詳勘。飭該管官下埽加鑲。務使高出水面八九尺。至一丈餘不等。足可抵禦汎水。奉上諭覽奏。運河水勢深通。糧艘利涉無阻。並工程齊備各情形。朕心深慰。卿宜防有術。殊屬可嘉。硃批諭旨。

七月十五日岳濬奏。上月三十日據德州報稱。衛河上流漲水暴發。境內隄岸加防。復值二十三、四等日大雨晝夜不息。河水倍增洶湧。隨於二十四日將東岸老虎倉衝溢。隄口五十餘丈。直注東北。又州城小西門外振河閣石岸。輒岸俱有衝坍。現在搶修等語。臣隨委員弁費銀馳赴德州。交該州備料作速修築。並令該員弁等將德州左近河隄逐一查覆。今據稟稱。老虎倉溢口一處。約五十餘丈。水深五六七尺不等。其水直趨東北。向直隸之吳橋、寧津。並東省德平、樂陵等縣流去。該州督率人夫。於本月初二日興工下椿。上緊堵塞。又振河閣下護城石岸坍塌一段。長一十二丈。寬二丈。輒岸坍塌一段。長一十七丈。寬二丈。現在下壩墊土。日夜防護。又德州衛所管河道哨馬營隄岸漫溢一段。長三丈四尺。第三店隄岸漫溢一段。長二丈三尺。該備均在搶修等語。臣隨檄委署糧道廣壽督催該州衛修築。剋期完竣。復據德州並德州衛報稱。該州衛境內既有溢水。又有積潦。田房均在被水。又鄰近衛河之冠縣、武城。並溢水所經之德平、樂陵。皆被淹灌。各詳報到。臣隨會同督臣王士俊。飛飭布政司委員逐一查勘。惟冠縣水退。無礙田廬。其德州等處。先將境內積滯。設法疏導。凡被水窮民。房屋坍塌無可棲身者。按等給銀。令苫蓋草舍。仍

履畝細勘秋禾果否成災據實申報。硃批諭旨。

九月初三日直隸總督李衛奏畿南漳河多係民堰舊隄每年夏秋水驟發勢猛州縣各顧本處未能齊心保護雖有漳河同知一員常至顧此失彼而清河道相去遙遠鞭長莫及是以臣前請以順廣大三郡河工分歸復設之大名道就近辦理但恐新任之員未卽熟諳查現任清河道宋韋金誠謹小心於漳河形勢已歷數年而大名等三府民情與伊原籍河南無異可否以之調補大名道將全漳河務責成專辦於地方河工似覺相宜謹奏奉上諭覽奏俱悉。硃批諭旨。

是月初六日大學士管理江南河道總督事務嵇曾筠奏沿海范隄工程侍讀學士西柱奏請大爲修築臣率領道廳並州縣印汛等官沿隄確勘查宋范仲淹創築此隄原係因地因時酌量建設嗣後瀕海竈戶隨圯隨培自爲修補經六七百年海汊遷徙不常居民聚散不一地形高下不同往往有昔與海近而今遠者亦有昔與海遠而今近者則隄岸修舉自當因去海遠近分別工程緩急方能利及商民今自淮安府阜寧縣廟灣場起至通州呂四場止共計二十五場延亘六百餘里除泰州屬拼茶斜角二場范隄臣於去冬逐加勘度議奏於舊隄內移進四五里建築越隄一道旋經西柱遵奉諭旨動用運庫商捐銀二萬三千四百餘兩建新補舊一律完竣現今捍禦鹹潮毋庸議修外其次則如臯豐利掘港馬塘通州石港西亭金沙餘西餘東呂四等十場亦經西柱擇其殘缺動支運庫捐銀量行修補其餘未修之工竈戶鹽總亦自行葺補高厚一律完整無庸修築者也再有秦州富安安豐梁塚東臺何塚五場現在地勢高阜廬舍市廛聯接居住年深日久查勘舊隄有改作民房全無基址者有僅存隄形者訪之居民

僉云百餘年來海潮去遠。久無鹹水灌入村莊。是此隄不必重修明矣。又興化、鹽城、阜寧所屬白駒、伍祐、廟灣、三場舊隄雖高矮不等。但地俱高阜。去海亦遠。居民僉云潮水最大時。去隄尙十餘里。並未漫及隄根。是此地實非緊要。均可緩爲修築。祇有地勢低窪。如秦州草堰場應修隄六百一十二丈。小海場應修隄一百三丈。丁溪場應修隄四百三十二丈。興化劉莊場應修隄二百四十五丈。鹽城新興場應修隄六十餘丈。共計范隄一千四百五十餘丈。地形卑下。應間段加修。自二三尺起至五六尺不等。各工共估計動用運庫捐銀三千餘兩。卽足捍禦潮汐。請照黃運兩河隄岸之例。召募近民充當堡夫。挑積土牛。修補殘缺。並搜捕獾鼠。填墊水溝。每夫一名。月給銀五錢。每歲約計銀二千餘兩。仍令各場大使就近募充。每月動支運庫捐銀散給。其修理隄工。責成汛員查核催儻。奉上諭。卿旣再三斟酌。自中肯綮。朕焉有信不及處。卽照所議施行可也。硃批諭旨。

十二月初七日。工部議得河南山東總督朱藻等疏稱。山東德州城振河閣下護崖甃工。長一百六十一丈。切近城垣。坐當運河頂衝。經年水擊。輒性鬆脆。每易墊裂。親赴該工相度。應於城西南上游馬家回溜起。至舊月河頭底。估挑引河。其舊河估建攔水夾土埽壩。俾水歸引河。城垣避衝。實爲一勞永逸之計。今估挑引河長二百六十五丈。又估建攔水夾土埽壩。後幫土餞長二十六丈。共需土方工料銀八千二百六十三兩五錢二分二釐。在山東司庫雍正十一年地丁銀內動支。飭該管廳印各官領帑興工。造冊具題。應如所題。奉旨依議。運河道冊。

是年直督王朝恩奏報。伏汛水勢大漲。北運減水各壩。暢洩無虞。按北河伏汛漲水。惟漳滏南北運四



河水勢甚盛。一日之內。陡長丈餘。其漳河長水。挾衛汶兩河奔流而下。維時南運河東岸縷隄。漾開溢出。直由南窪入海。而北運河水勢驟漲。雖亦出槽平隄。賴青龍灣。筐兒港。減壩宣洩。得以無事。先是何國宗。牛鈕。查勘北運河工程。青龍灣。筐兒港。均關緊要。修減水壩。開挑引河。以備宣洩。前時壩門加寬四十丈。引河亦加寬四十丈。拆去舊引河南岸廢隄。以順水勢。又沿舊隄開挑深槽。直達場河淀。寬十丈。深三四尺。至六七尺不等。並將河口淤高。及舊河淤處。俱爲開挑。使水暢流。場河淀下口有陳家溝。舊河寬八九丈。東隄舊河寬六七丈。賈家沽新河寬八丈。計三河寬不及三十丈。再於賈家新河旁。大開洩水河。寬三十丈。俾暢流歸海。並將河西務城北老崖舊隄。及要兒渡舊河口大壩。保護堅固。節節疏通。束水歸流。自無不固其防者。所益於北運者不少也。故南運滄州水溢。北運得以無警。修防導流。曷可不早哉。河渠紀聞。

是年大學士。仍管理江南總河事務。在任守制。嵇曾筠署理江南河道總督印務。高斌奏辛家蕩縷隄。舊有減水石壩。係康熙四十年前河臣張鵬翮題建。以備洩黃異漲。嗣因黃流順軌。海口深通。隄內村民稠密。此壩從未開放。淤廢已久。自應將舊石拆移。別工應用。查揚河廳寶應縣西隄。向有竹絡壩一座。原備宣洩運水。雍正九年。因壩底年久虛鬆。臣嵇曾筠請另建新壩。照例蓄洩。但水長挑壩開放。保隄水落下。埽堵蓄濟。漕既非一勞永逸。且有歲修之煩。不若將辛家蕩舊石拆於寶應西隄。審擇地基。改建減水石閘。因時啓閉。且建閘後。舊時埽壩可永遠堵閉。一轉移間。不特無用舊石。皆成有用。可省錢糧。而揚屬運隄益資鞏固。漕運民生。均有裨益。奉上諭。因地制宜。移彼就此。卿之措施。諒應不謬也。硃批。諭旨。

雍正十二年正月二十六日。直督李衛奏。運河上游直屬故城等縣。與東省德州衛並武城縣毘聯。係河流東注轉灣之處。向未築有隄堰。惟憑崖岸高深。遮護內地。設遇水發。宣洩不及。由灣底低處出漕。漫溢直趨景州吳橋等處。此兩省運河交界。各地方亦宜料理整備。因面與河臣朱藻。撫臣岳濬商酌。彼此委員查勘。將崖岸低缺者。培築高厚。如有一律單薄地方。勸民僱築土堰。以工代賑。一舉兩便。又直境運河地勢蜿蜒。原因當年漳水不藉運道出海。以爲停蓄濟運。防其驟洩淺塞之故。但自導引全漳歸運出海後。源頭勢猛。常患漫溢。一遇河身曲折。衝決民田。又當擇河流激湍對頭大灣難轉之處。開通無阻。既與兩岸田廬險工有益。亦於漕運無悞。奉上諭。所陳三條內。惟開通大灣一說。似不合宜。不但徒費工力。無益。且恐河身改直之後。勢猛流急。更易潰決也。餘照議施行。硃批諭旨。

三月初六日。署理江南河督布政使高斌奏。謹將河務情形。開略奏請聖訓。一。駱馬湖口十字河之竹絡壩。係宿遷黃運交匯之處。今壩外支河淤淺。黃溜南移。相度形勢。將支河挖深二尺。開挑河口。引導黃流。以便徐州糧艘。由此入運。一。今春運河水深足用。惟宿遷車路口桃源之砂礮溜。礙心灘二處河底。俱係硬砂。歷來春月水淺。漕臣魏廷珍。向臣言。必得四尺五寸深水。重船方不起剝。臣探量水底。加築束水草壩。又以參將朱永凡之言。於河中接築順水草壩。水勢添長。糧船過行無阻。以上七條。今按四條。皆係照常例事。一條黃河常例。此冊但存二條。臣近日所辦河務情形。節略據實敬陳。奉上諭覽奏。所辦河務大概情形。知道了。勉之毋怠。硃批諭旨。

四月十三日。工部議得河東河督朱藻奏。東省黃運兩河幅員廣闊。其間歲搶各修。及空重往還。從前設

濟寧道一員督查。不管地方民事。康熙五十八年。撫臣李樹德題。請改濟寧道爲兗寧道。將兗州府二十  
七屬分隸管轄。始有地方之責。雍正九年。撫臣岳濬。又以兗寧道專司河務。難於兼顧。題請復設駐沂道  
一員。改兗寧道爲曹東道。止轄曹東二州。本年十月。接准部咨。嗣後各省直隸州知州。承審本州自理刑  
名命盜等案。俱責成該道。照知府承審之限。核審轉解。奉旨依議在案。竊思東省黃河。自曹縣芝麻莊起  
至單縣諸望壩止。長二百四十里。運道自嶧縣黃林莊起。至德州桑園鎮止。長一千二百餘里。該道東西  
查核。南北修防。日不暇給。再以曹東二州。刑名等事。責其審轉。萬一汛水長發。住宿隄頭。而解審案件。又  
復彙集。若令靜候工完。則違限之咎難辭。叩懇皇上天恩。可否將曹東道。改爲山東管河道。專管通省黃  
運兩河事務。所屬曹州。改歸兗沂道管轄。東平州。改歸濟東道管轄。則職守專一。不致顧此失彼等因。  
應如該督所請。再兗沂道員缺。現據河東總督王士俊題請裁汰。改設河東按察使。分巡兗沂二府事  
務。其管轄曹州之處。臣部另行疏題。仍令該督撫。將各道經管事宜。造冊送部可也。奉旨依議。運河道冊。  
七月二十六日。岳濬奏臨清以北之衛河。遠通河南衛水。山西漳水上源。雨漲衆川。匯流自六月二十六  
日起。連次報增。至七月初九日。長至二丈有零。隨於本日亥時。將德州衛哨馬營白鹽地方。漫溢東岸。寬  
十丈餘。水注曹家隄口。入鉤盤河。以達老黃河。據該州衛飛報。臣思白鹽地方。卽臣與直督李衛等會勘  
開河之道。原係衛河頂溜。關繫匪輕。隨備具料銀。委員馳送德州。交糧道廣壽。給發該州衛辦料堵築。並  
飭該道親加督率。茲據該州衛詳稱。現於白鹽漫口。建築月隄一道。長六十五丈。圈阻溢水。自十一日起。  
縣十五日巳時。合龍。衛河漲水不復旁注。坡地存水悉退等語。合據實奏報。奉上諭。適據李衛亦已奏聞。

衛河漫口堵築迅速。剋期竣工。甚屬可嘉。殊批諭旨。

九月十二日。工部會議得。東撫岳濬等疏稱。德州地方。正在衛河回溜頂衝之處。每經漲發。直潰東隄。應開渠引水出陳公隄。歸老黃河入海。以備宣洩。經臣奏准。部行會勘。議題。今於正月十四日。會同查勘。德州城北有哨馬營地方。在衛河東岸。距州城八里。應於此開挖新河。東行十里。至陳公隄。由曹村隄口放水入鉤盤河故道。東北流至直隸吳橋縣之玉泉莊。歸老黃河。經寧津。南皮。樂陵。鹽山。慶雲。至海豐之大沽河入海。應於哨馬營建滾水壩一座。上設石柱板橋。以接絳道。自壩塘口起。至鉤盤河中心止。挑河一道。兩岸各築遙隄。酌開涵洞四座。以宣洩德州城東坡水。復於哨馬營。至曹村口東西適中之盧家莊前。建橋一座。以通行旅。仍將鉤盤河老黃河。疏濬淤淺。其陳公隄殘缺處。逐段修補。臣等確估哨馬營建滾水壩口寬三十丈。壩面高一丈六尺。壩上南北兩牆各高九尺六寸。前修迎水。後修分水。仍於分水下平鋪塘口長三十丈。壩上建石柱二十九路。上搭板橋。共需工料銀五萬一千四百七十八兩七分零。自壩下塘口起。至曹村隄口外。鉤盤河中心止。挑河一道。長一千七百九十五丈。挑深五六尺至四尺不等。近壩塘河挑寬三十八丈。以下逐漸收束。由三十餘丈至十六丈不等。共需土方銀二萬七千八百二錢一分零。又於兩岸各築遙隄。相鉅一百丈。南隄長一千八百二十八丈。北隄長一千八百三十丈。因地加高。隨高加寬。底寬六丈至七丈六尺。頂寬一丈八九尺至二丈。高隨地勢。八九尺一丈不等。卽以挑河之土。堆貯兩岸。每方加夯礮銀三分。其需銀二千七百六十七兩九錢一分零。又於南岸遙隄內。設立涵洞四座。需工料銀三千一百三十四兩七錢四分零。又於盧家莊前。建石柱板橋一座。需工料銀五百四十六

兩八錢一分零。其德州鉤盤河應挖淺二段。陳公隄應補築缺口十四處。共需土方銀二千八百六十一兩七錢八分零。又吳橋等縣境內應疏挖鉤盤河二段。老黃河二段。應補築陳公隄缺口二十三處。應幫培護城隄一道。共需土方銀五千一百四十九兩四錢九分零。以上共估計銀九萬二千九百四十七兩零。查東省工程。共需銀八萬七千七百九十七兩五錢二分零。直隸工程。共需銀五千一百四十二兩四錢九分零。應各照銀數。在各該省藩庫本年地丁銀內支用。工竣。各由本省報銷。再該工需料繁多。且離山窳遠。採辦樁石灰汁等項。均需時日。一面發帑辦料。以免稽遲。又自哨馬營開挖至曹村隄口。均係民間有糧之地。應給還地價。豁免錢糧。現飭該管府州確查。由司核報。應如所題。奉旨依議。運河道冊。

是月十五日。嵇曾筠。白鍾山。奏。裏河應屬清江浦。有龍汪石閘一座。當南北通津。運道民生攸關。建造百餘年。未經修理。水勢溜急。根底虛鬆。北岸迎水石牆。蟄卸三丈餘尺。其餘閘牆亦多脹裂。亟須重築。以濟漕運。現飭淮揚道確估閘座工料冊。具題請旨。臣等伏思。拆閘重建。築壩興工。動經數月。方能告竣。轉瞬重運北上。恐誤過行。今於龍汪閘迤上鳳陽廠。自五孔橋至雲壩口。查有舊引河一道。長一千五百餘丈。年久淤墊。形址猶存。宜先將此河挑濬寬闊深通。俾運河之水。由此流通無誤。明春運行。方可築壩修閘。隨檄道廳等勘估。挑濬引河。需二十七萬六千餘方。計銀二萬二千一百餘兩。又以挑土幫高兩岸隄工。應用潑水夯礮。並搶築新隄。計銀一萬一千九百餘兩。以上共銀三萬四千餘兩。加以建閘工料。未免費多。臣等籌畫節省。查江南河工。額設河兵堡夫一萬餘名。目下霜降已屆。各廳營修防事竣。正值兵夫閒暇。擬於通工內抽撥兵夫。調赴清江浦。勒限挑築。每名每日給飯食銀二分。業於九月初六日開工。尅期

完竣。只需飯食夫工銀一萬二千餘兩。不特來年重運得以進行。且開工修竣後。又可留此河身。以爲運河水長宜洩之用。似於運道民生。均有裨益。奉上諭。如此經營。可謂辦國計如家務矣。褒獎之外。更有何諭。殊批諭旨。

是月三十日。工部議得河東河道總督朱藻奏稱。東省河工錢糧。自正項河銀外。又有軍餉淺溜開壩等兵夫工食之不一。又有幫貼裁曠遇閏加增之不同。所收之銀。則有直隸江南山東三省。遠近之不齊。所解之處。則有內部南工。及東省各衙門多寡之不等。而各項錢糧。向例俱解運河廳。東昌府兩庫。名爲河庫。凡經收支解。俱由該府廳爲政。其餘若黃河泉河。及捕枷上下六河廳兵夫工食。并大小挑酌募幫貼銀兩。亦由各該廳收支。俟有盈餘。始解河庫應用。此東省歷來成規。惟正雜俱係錢糧。絲毫悉關國帑。款項既多。頭緒百出。而竟聽該府廳自收支自解。其中恐有不肖屬員。輕出重入。扣剋侵挪情弊。况各員中。每年不無升遷事。故其間交代盤查。文移往返。胥役乘機捏領混銷。俱未可定。是以該府廳凡有收解動用。卽令報明備案。仍不時稽查。查通省錢糧。既以藩司爲總滙。則通共錢糧。亦應以河道爲統司。豫省河工錢糧。俱解貯管河道庫彙收彙貯。入則有案可稽。分解分支。出則有數可核。今山東曹東道。既經改爲通省管河道。可否照豫省例。將連河東昌兩庫。及黃河。泉河。捕河。枷河。上河。下河。各廳銀兩。俱歸貯山東管河道庫。嗣後凡有徵收河工一切正雜錢糧。飭令徑解道庫。遇有應用。各廳向河道衙門支領。仍令報查。其有應解別處錢糧。令河道查明。具詳臣衙門給咨批解。則經收支解。俱歸河道專管。而臣亦得就近查察。儻有侵挪扣剋等弊。卽據實嚴參。庶責成專而稽查便。豫東兩省河庫錢糧。均歸畫一。應如該督

所奏奉旨依議。運河道冊。

雍正十三年七月二十六日。工部議得河東河道總督白鍾山奏稱。河道一切工程。俱應於工竣驗工計帑核實報銷。庶工不草率。帑不浮冒。今山東運河大小挑夫工。歷係次年七月內題銷。如雍正十一年冬間大挑。至十二年正月內已經完竣。必待十三年七月始行銷算。所挑之河。久經開放。其是否如式。有無虛冒。無可查驗。設遇河臣新任。或經手道廳升遷更易。更無可詢之人。殊難稽核。因查所以隔年報銷之故。緣大小挑夫工。有額設淺鋪等。長夫有現募酌補等。人夫二項。其現募人夫。係按日支給工價。至長夫各有本身額設工食。不再另給挑價。是以必俟長夫一年工食支完。始將募夫挑河工價一併彙銷。但長夫工食。自有收支工食本案題報。何必將現募人夫所支挑河工價。牽入彙題。致稽歲月。工帑均難查核。臣於本年正月二十六日到任時。雍正十二年小挑尚未完工。臣督挑一竣。即飭管河道驗工核價。茲據該道開報。募夫一千四百五十二名。給工價銀二千九百五十二兩六錢。又給各夫器具銀二千八百七十二兩一錢。逐一清查。今歲尚有堪用器具。值銀九百四十二兩等情。隨飭造冊報銷。並令將查出堪用器具。交各廳收存。爲下年之用。卽於下年應發器具銀兩內。照數扣除。以後每年照此清查。留用省費。臣查大小挑工完。卽行驗勘核查。卽如此項器具堪用。竟有三分之一小挑尙然。大挑更屬可知。若不早爲稽查。日久夫散。必致無存。甚或私行藏匿。次年重費錢糧。請嗣後東省運河大小挑。除額設長夫。仍於收支工食本案報銷外。其現募人夫所挑河道工價。務卽勘核。於工完後三個月內造冊題銷。則工帑得以隨時清楚。如蒙恩允。所有十二年小挑工程。臣卽催該道造冊。到日核題。應如所奏。奉旨依議。運河道

是月大挑東省運河奉諭革除山東運河派幫民夫工食銀五萬三千四百餘兩工用動帑報銷白鍾山補授河東河道總督高斌署理江南河道總督印務按東省挑河事宜大挑各州縣募夫六千二十四名請動工價器具並下河廳雇船價銀一萬七千二百兩零小挑各州縣募夫一千二百五十五名價銀二千八百四十兩零此守白莊恪定議通行悉動庫項給發東省派幫貼價全行革除其時惟銅沛廳協濟之夫照舊力役後亦裁汰統歸州縣募夫承辦州縣不諳工程又不常時在工致丁役串通汶上老人侵公牽累近復除弊另定章程委員領辦帑歸實用估挑以七尺爲度如水深三尺估挑四尺水深四尺估挑三尺臨清塘河挑與閘底相平漕道通流兩岸束水行運惟興挑正在深冬徒役竭蹶將事陸朗甫言萬恭九月挑河之策允宜籌復至民無幫貼之擾官免承辦之累夫役公平受募亦可量力赴工矣河渠紀聞

是年停築安山湖圈隄聽民墾種按運河自南旺至衛河四百餘里別無來源需水接濟宋禮經營漕河既成設水櫃圈築安山湖隄蓄水助漕爲四大水櫃之一湖廣百里高者宜田卑者宜櫃卑者止四百六十頃前明於高下相承處築壩畫分增建二閘於似蛇溝八里灣窪地以爲蓄洩順治七年河決荊隆口湖口填淤聽民墾種雍正四年何國宗議將安山湖復設水櫃重築臨河並圈湖等隄修通湖似蛇溝二閘并於八里灣十里鋪兩廢閘間建石閘曰安濟閘閘下各設支河通入湖心湖南六隄口每處建閘挑河以納陂水又請開柳長湖引魚臺陂宋家窪兩處積水入湖中隔金線嶺不通復請從金線嶺北魚



營陂開河。下注柳長河入湖。又從金線嶺南宋窪開河。東出兼濟閘入運。其後河並淤高。不能洩水。至是以東撫岳濬言。止其役。濬言湖水無源。不堪復作四櫃。停築圈隄。湖自荊隆漫淤。後形如盤碟。淺不蓄水。兼地燥沙漏。存水不久。屢議興復不果。蓋限於不得不已之勢也。四百餘里之閘河無水接應。本費籌畫。張伯行議開沙河棗林二河之水。入運濟漕。棗林卽趙王河分支也。沙趙工大難舉。由運洩入大清。未易兩利。各閘層層關束。上啓下閉。節洩以時。亦可無廢事矣。河渠紀聞。

此  
页  
空  
白

# 續行水金鑑卷第七十八

## 運河水章 履六

高宗純皇帝乾隆元年六月初八日奉。上諭。史書詳誌河渠經術。兼明水利。誠以國計民生所關也。果使水道疏通。脈絡流注。陂澤非沮洳之藪。隄防有蓄水之方。旱澇有備。田廬無虞。其裨於閭閻。誠非淺鮮矣。我皇考軫恤黎元。興行水利。凡直省泉源河湖。莫不濬導。至於蘇松之太湖。吳淞白茆。劉河歸海要道。淮揚之槐子烏塔河。秦州如皋之運河。串場車邏海溝等河。尤不惜帑金。專員督理。清查各河故道。一一開通。建閘築隄。按時啓閉。利賴甚溥。自開浚以來。已閱數年。圩岸不無坍塌。沙泥不無淤積。著令管理水利河務各官。及濱河州縣。於所屬境內。相視河流淺阻。每歲農隙。募夫挑挖。逐年舉行。必令功施可久。惠濟生民。毋得玩誤工作。絲毫擾累。陽奉陰違。謹按高宗純皇帝勤求治理。興修水利。停止三汊河商七民三輪挑之例。蘇撫邵基奏定一切河道官民分挑疏濬。江蘇各屬濱江近海河湖交錯。大小各河。向有官民挑濬之分。官挑動帑募夫。民挑業食佃力。農隙修濬。如運道官河。爲糧艘商船來往。及湖海疏洩要道。自當依舊發帑募挑。其支河汊港。民間灌田蓄水之區。向係民挑。沿江沿海溝河潮汐往來。淤沙易積。民挑則隨淤隨濬。可以不時興工。若概歸官浚。無論公帑難繼。且浚後易淤。地方官顧慮賠修。挨延不浚。縱民情願與挑。亦懼稟官滋累。反非便民之道。請將官挑民挑二項分晰。查定造冊咨部。除江甘徒陽運河及江河湖海分洩要區。每年動支藩運二庫公項挑挖外。其餘支河汊港。爲灌漑田疇而設者。仍聽地方

官於農隙時查照業食佃力及時興辦報明存案運鹽河道亦如舊例均經部覆准行河渠紀聞  
七月二十六日掌江南道事協理河南道監察御史臣常祿奏江南淮揚二郡運河自清口至瓜洲三百餘里上關漕運下濟民田爲淮揚二郡保障每年有歲修搶修等工程臣巡視南漕親履河隄見隄與淮安府城牆相埒下瞰倉庫民居田地廨宇皆如釜底危隄壁立以爲障隔勢甚險迫細加諮詢緣昔年運河凡隔數年卽行挑挖平日又不時疏濬所以河流安軌水行地中自數十年來運河不復挑濬每遇清不敵黃黃水灌入運河沙淤日甚一日致運河底高水面因之亦高而河臣祇事加高隄岸致全河之水激而行於地上更聞淮安迤下寶應高郵地形愈下其勢愈危臣念水性無不趨下今因水高而增隄使高何不因河高而濬水使深夫增隄之與濬河費雖較省而安危迥別從前專恃築隄束水不爲久計殊非治法如再不疏濬將來水勢愈高民居愈下設遇河水長發隄有滲漏勢若建瓴淮揚兩郡運道民生城池倉庫田圃悉受其害臣目擊情形理合陳奏伏祈皇上勅下河臣會同督撫漕臣將淮揚一帶民居水勢悉心相度於秋冬水涸農畢糧艘回空歸次時將運河通身大興挑挖挖河之土傾積河岸不但河勢深通而隄岸亦愈加寬厚務使運道安流民登衽席雖一時多費而端本之治爲利無窮似於河漕工務均有裨益奉硃批總理事務王大臣速議具奏內閣抄出常祿奏淮揚運河應行挑濬深通一摺查淮揚運河關係運道民生歷來河臣但於隄岸加高於河身未議疏濬今常祿請將運河通身大興挑挖俾河通隄厚所見極是但疏濬之後河身旣低黃水保無衝入自應先濬海口俾黃水迅流入海方於運道無礙而疏濬數百里之工程非旦夕可畢又將暫停漕運始可施工此事關係甚大非身在地方熟悉水

勢情形不便輕爲置議。請一面將常祿所奏交河臣會同督撫漕臣悉心詳酌。無惜勞費。無憚更張。無苟且而貽害。無輕舉而召患。並請勅交九卿。並通曉河務諸臣。及淮揚現任京職。如各有所見。令據實陳奏。南河成案。

是月二十九日。內閣抄出總理事務王大臣議覆常祿奏。臣巡漕駐劄淮安。見運河兩隄間有涵洞。詢係民間設立。引水溉田。其洞直穿官隄。或木或石不等。共一十七座。向來聽民修築。小修每洞費銀六七十兩。大修每洞費銀五六百兩。皆民自願。按田攤派。公舉一人爲洞頭。具呈管河廳官。協同胥吏估計。暨修有官隄民田所繫甚重。年來胥吏洞頭勾通作弊。包修每洞小修勒銀一百六七十兩。大修勒至一千餘兩。藉稱有礙官隄。若無賄費。決不能修。橫征強索。民不勝累。將來攤派維艱。一時難修。不惟溉田無資。且恐涵洞漸不堅固。官以爲民所應修。民以爲力不能辦。妨礙官隄。正復不少。臣聞河南孟縣小金隄。武陟縣木欒店沁河隄。工向俱民修。蒙降諭旨。著河臣確實勘估。委員承修。不以絲毫累民。臣愚以爲淮城涵洞。雖爲民田而設。實與隄工有關。應否與小金隄沁河隄工一例勘估承修。伏候聖裁。又訪聞民間布種栽秧。全資涵洞灌溉。而不肖胥吏狡計措索。將涵洞下板緊閉。必先飽其囊橐。然後申明該管河員啓板。小民救秧情迫。不得不斂費。祈早啓板。或涵洞放水既遲。而秧已損其五六。妨農害民。莫此爲甚。伏祈勅下河臣。於民田用水時。將從前措索諸弊。嚴加禁革。庶田得灌溉。而豐年屢慶矣。查涵洞爲民間所設。向係民修。豈容奸胥從中包攬需索。且秧苗正需灌溉。奸胥故將涵洞緊閉。待飽慾壑。然後啓板。秧已損傷。情尤可惡。應請勅交河臣會同撫臣。秉公查明。於官隄有無妨礙。明白曉示。俾胥吏不得借辭勒索。儻

仍有包攬索費及擅行封閉者。從重處治。務俾官民兩便。胥吏不擾。至所稱歸官修理之處。查各處圩堰隄岸。民間自築自修者甚多。應聽其便。必一概歸官。恐仍有官役濫派等弊。稽察難周。應毋庸議。南河成案。

八月。江南河道總督高斌奏。淮揚運河。自清口至瓜洲。計三百餘里。上源係分清口。洪澤湖。水入天妃閘。建瓴而下。經淮安。寶應。高郵。揚州。達於江。惟藉東西岸隄以爲防固。原屬險要。更因日久沙淤。底高隄峻。淮安城郭。勢如釜底。每當伏秋汛發。雖有天妃一閘束水。而湖水自運口而下。勢湧溜急。人力難施。遂致平槽滿岸。隄工城邑。勢甚危險。必減洩搶護。方保無虞。此每年修防最要之機宜也。向來減洩之法。天妃閘而下。有文華寺引河。再下有寶應竹絡壩。但臣於今年水發時。親驗兩處宜洩。僅能減水數寸及尺許不等。而平槽滿岸。仍屬危險。勢難刻緩。不得已。將洪湖尾閘之山盱天然南北三壩開放。湖水漸減。而運河水亦漸退。此洪湖與運河一體相關之明驗也。但山盱天然南北二壩一開。雖保淮城。而清黃入海。全在蓄清有力。若尾閘宣洩太過。未免通湖元氣受傷。且洩水全歸高寶諸湖。湖不能容。必從運河西隄各港口放入運河。運不能受。又須開放高郵城南之東隄三大壩洩入下河。而高寶興鹽之窪下民田。遂致淹漫。是淮郡安危全係運河之平險。而運河平險。惟視河水之大小。而洪湖之水。欲其并力禦黃。蓄洩之間。利害甚鉅。今若湖水過大。不爲宣洩。恐其潰隄危城。洩水下歸高寶諸湖。又必淹田害民。均未盡善。此運河形勢。有不得不經營斟酌者也。伏查運河底高。自應議挑。第洪湖水高。運河水下。若但議浚河。而不關攔運口。則河底雖深。河身縱有容納之量。水面仍無減退之形。終不足保隄護城。臣之愚見。欲使運河

無險當先使運口有關鎖。關鎖既緊，則啓閉在人。而洪湖異漲可禦。夫運口關鎖，開壩是也。現在運口內止有草壩二座，及天妃越河石閘各一座。今關攔水勢，議於天妃正越兩閘下，相去百餘丈，各建草壩二座。草壩下酌量遠近，再建正石閘二座。越河石閘二座，又於所建二閘尾各建草壩二座。如此重關疊鎖，層層收蓄，則水平溜緩，操縱由人。湖漲可禦，河水可減矣。至挑浚事宜，接奉部文，卽委員將運口通身測量。現在水深者有一丈五六尺，至二丈不等。淺者亦有七八九尺，至一丈一二尺不等。雖每年漕艘通行無阻，但運口既有關鎖，則水勢必小。淺處卽不足以運漕。自應將閘斷淤處，先加挑浚。今議以水深一丈五尺爲準，其餘一律估挑。卽以挑河之土幫築隄岸，但令培厚，不必加高。如此則河底深通，河隄寬厚。運口石閘相機啓閉，但使分水足以濟運而止。洪湖雖有漲水，不使多洩入運，則淮揚城邑人民安如磐石矣。再洪澤湖水，向例三分入運，七分會黃入運之水，恐其過多，而難受會黃之水，欲其勢盛而力強。今運口既有關鎖，則入運之水不虞過多，而湖水并力出口，更足禦黃。東注至山盱尾閘之天然南北二壩，原用宣洩洪湖異漲，藉保淮城大隄。今運道無虞，而高堰大隄，又蒙世宗憲皇帝特發百萬帑金，修築堅固。將來非有異漲，二壩斷不輕開，使清水全力禦黃，而高寶諸河所受之水，循軌入江，不溢下河。是運隄益固，而高寶興鹽民田，不受洪湖洩水之患矣。現在通盤計算，其工費約估需銀五十餘萬兩，應俟議定奉旨准行後，再行細估題報。至各項工程，只須多員僱做，自可計月告竣。請勅下漕臣將乾隆二年回空趕早一月過完。三年重運，展限於三月進瓜洲江口，計限半年，可以辦理無悞。毋庸暫停漕運，合并聲明。事關重大，未敢遽同督撫漕臣定議。謹就愚昧之見，繕摺具奏。奉硃批總理事務王大臣會同九卿速議具

奏南河成案。

是月監察御史夏之芳奏。常祿條奏。挑浚運河一摺。總理事務王大臣等議及。淮揚現任京職。如有所見。據實陳奏。臣生長淮南。竊聞淮揚兩府地方。宋元以前。並無水患。其時黃水淮水分道入海。各不相犯。自前明黃水北流盡絕。全河南徙。淮爲黃逼。不能制黃。所屯洪澤湖水。遂致漫害。康熙初年。淮揚疊罹水災。聖祖仁皇帝。親勘指授方略。發帑築隄濬河。河道以治。世宗憲皇帝。復將高家堰隄。全用石工。一切修防。更爲備至。而淮揚人民。猶不能無隱憂者。總因淮揚地最低窪。以最低窪之地。受全淮七十二澗之水。又加以黃河肆虐。其間止恃隄閘。以爲束洩。來水橫決。去水紆回。無怪乎受患不支也。今海口淤澱。黃水倒灌。清口西則逆漲。洪湖漫溢。下流東南則直灌運河。湖河俱爲黃水墊高。每遇水發。黃淮運河交會爲一。泛濫無所不至。今旣浚運河而不治黃淮。將運河愈深。黃淮愈增建瓴之勢。水患終不能絕。是必於未浚運河之先。通治河之上流。旣浚運河之後。兼治河之下流。使黃自北淮自南。運河止。受清水濟運。不令黃水涓滴下注。而後河防漕務生民賦稅。萬全無弊。臣謹按其形勢。揭其梗概。一一爲我皇上陳之。一黃水宜分導也。淮揚之患在淮。而淮病在黃。必黃不侵淮。而淮乃治。宋時黃水原有南北清河兩路入海。北清河卽濟水故道。南清河卽今淮泗合流之區。迨前明北清河塞。猶於濮范間鑿渠分水。或於蘭陽儀封開口以洩之。嗣又開桃源黃壩新河。自黃家嘴五港口洩黃入海。皆分黃導淮之意。今黃河上無出路。止以一淮受全黃之水。而清口並海口故道復淤。故河南之武陟山陽之王家營。安東之茆良口。桃浪之龍窩口。時爲衝決。皆黃水不分之故。似應於黃河上流。尋討分流故道。遠則曹單鄆濟。近則桃清一帶。如黃家



嘴、娘子莊、五港口等處。度地卑下，酌浚支河，以導黃水。黃退一尺，則淮進一尺；黃弱一分，則淮強一分。殺黃助淮，俾得借清刷黃，以入海。此則黃淮轉運之大關鍵也。一海口宜通浚也。昔人謂導淮先疏黃，疏黃先關海口。蓋海口不關，則黃流不迅，病黃卽以病淮。今王大臣等已有先浚海口之議。惟海口內外地寬久淤，旣欲浚入海之口，當先浚近海口之河。河口浚深，以水攻水，更足助人力所不及。查海口寬不下百里，固宜設法挑浚。其自海口而上至雲梯關，亦幾百里有餘，尤宜疏通，使沙去水迅，駛流直下。則海口挑浚之士，日經衝汕開廣，自覺事半功倍。至淤沙堅軟不一，或做昔人爬沙船層層疏浚，又在司其事者酌量土性，相機施工。一湖水宜堅束也。淮水外障全在高堰，而借清刷黃，尤仗高堰之水。前明至今，皆以束湖水出清口，爲治河良策。康熙三十六七年間，屢挑爛泥淺，裴家場、張福口等處，以導水出口，卽古人築隄束水，借水攻沙之意。今高堰堅築，而淮水出口之勢不暢者，聞近來黃水倒灌，漲入洪澤湖口，堰外淤成坦坡，不但湖水出口無力，并湖口受水之地漸狹，將來黃水盡占淮界，逼淮四溢，何所底止？似應度湖口淤處，從天然引河下至清口，並加挑浚深廣，再於堰外餘地築隄，綿亙清口，障水北流。其運河口天妃閘，或循舊制添設閘板，以時啓閉，使淮水之勢不分，迅流直達海口，益得暢洩。一支河宜並疏也。運河旣浚，則下河宜通。高寶一帶，雖各有閘壩，但自山陽歷高寶、興鹽等處而後入海，其勢緩，緩則水過之地已不勝衝決。惟山陽以下，高寶以上，有入海舊路，如山陽城北烏沙河、城南涇河、寶應城北黃浦、高郵城北子嬰溝，皆與高堰各壩相應，下注射陽湖入海，最爲便捷。今則閘口窄小，水口淤淺，一線支河出水無多，往往泛溢，似應將各閘照舊式修造，水門務令寬廣，各支河挑浚，河面亦令寬闊，使水由各閘迅洩射陽。

湖入海。則河水初入之路既通。較紆回數百里入海者。其勢倍蓰矣。一尾閭宜暢洩也。河淮之水不入海。則入江。高寶興秦形如釜底。每逢異漲。湖河溝洫瀰漫。專恃下河一帶閘河宣通。故入江之口。則有揚子河。三汊河。芒稻河等處。俱宜疏浚。而芒稻一河。尤衆水所會。最爲要路。河口有東西兩閘。不屬河員管理。商人蓄水行鹽。每將閘口堵塞。以致啓閉失所。應令商人挑浚鹽運舊河。以便行運。將芒稻河兩閘改歸河員管轄。其兩閘上下。盡去堵塞。決之使通。庶湖河水由金灣人字河。鳳凰橋。壁虎橋。灣頭等處。直注芒稻河入江。至興泰。鹽城。迤東海口。亦多淤澱。如天妃。石礎等閘。白駒。草堰。丁溪諸河。皆宜挑挖。勿令瀦水。庶下流河道宣通。尾閭得所歸宿。而河可無患矣。以上五條。皆疏浚運河兼宜經理之事。蓋淮黃運道。相爲表裏。自當窮究原委。治黃以治淮。治黃淮以濟運。爲一勞永逸也。奉旨。總理事務王大臣議奏。議得御史夏之芳奏。通籌淮揚水道一摺。應暫存內閣。俟河漕督撫諸臣詳酌到日。及九卿等。如有陳奏。一併會同斟酌定議。南河成案。

是月刑部主事孫籛孫奏。本年七月二十八日。奉旨。淮揚現任京職。如各有所見。令其據實陳奏。以備採擇。臣孫籛孫。揚州府高郵州人。理合遵旨據實陳奏。竊惟淮揚兩府襟江帶淮。爲南北水陸衝要。而更爲漕糧輸輓咽喉。按古輿地圖。淮安府安東雲梯關。爲淮水入海故道。其會黃入海。則始自宋金元三朝。然黃河有北流南流二支。及明宏治中。劉大夏築斷黃陵岡。北流遂絕。於是一淮受全河之水。兩瀆並流入海。每遇泛漲。淮揚受害。萬歷年間。潘季馴用束淮刷黃之策。堅築高家堰。蓄洪湖所注全淮之水。以七分入清口。刷黃入海。以三分入運河。自山陽寶應高郵江都。三百里達於江。每年四月。糧船過淮後。仍於天

妃開外築草壩一道。以控禦黃水。不使涓滴入運。蓋恐倒灌。淤阻漕運。運河內又置撈淺夫役。三年募民夫大挑一次。俾糧船通行無礙。故自萬曆及我朝定鼎。淮揚一帶。田廬安枕。運道通行。其治水成法。載在河防一覽者。可考也。順治十八年。防海寇由雲梯關入口。於水中釘梅花椿。以限其入。而黃河沙停漸淤。此海口受病者一。康熙元年。南河分司吳煒。擅開周橋。洪湖水直入高寶湖。致淮水中分力。若不能刷黃。而清水流緩。雲梯關又淤。海口受病者二。康熙七年。平地水高數丈。田廬沈沒。蒙聖祖仁皇帝。全蠲大賑。災民得生。此後疊災頻賑。而糧運亦阻。於是講求治水良法。特遣大臣閱視。此數年中。經科臣李宗孔。彭之鳳等。屢疏請塞歸仁隄。閉周家橋。築高家堰。皆以束淮刷黃。疏通海口爲要策。乃河臣如朱之錫。王光裕等。或惑於浮議。觀望不前。或陽爲奉行。苟且塞責。十九年。洪湖大漲。從高堰漫入高寶湖。運河東隄。清水潭等處。皆決。淮揚州縣田廬盡沒。高郵城內水深四五尺。是時總河靳輔。欲分淮水使東注高寶湖。疏請於高堰開滾水壩六座。洩洪湖水。又於高郵城南。開滾水壩六座。洩高寶湖水。其意以爲淮水分則黃水出雲梯關。易於容受。不知淮水中分力弱。不能刷黃。清口日淤。黃水尾淮水而行。遂入天妃閘內。運河又疏稱兩河已治。運河永不須挑。改挑淺夫爲河兵。而運河之底日淤。日高。自此始矣。二十四年大水。仍如十九年。是冬。聖祖仁皇帝南巡。高郵士民葛天祚等叩關。不敢斥言六壩之害。但求於漕隄東挑浚鹽場河。俾六壩之水。由范公隄海口下海。仰蒙動帑開浚。以按察使于成龍。侍郎孫在豐。爲下河總河。專司其事。但范公隄一帶。海口所洩者。運隄以東射陽湖。綠陽湖等水。並高寶湖。由運河閘洞。以入隄東之水。而洪湖之水。非以此爲出路也。今六壩之水東下。先沒高寶。上下河民田。而後達海。六壩不閉。則范公隄

海口之開無益。况清口日淤。海口日塞。靳輔疏稱。兩河已歸故道。涸出田畝。請開官屯。雖經督撫臺臣參奏。屯田必不可行。停止其事。而此新淤之地。皆在安東地方。今所稱葦蕩營多置弁員。收蘆葦以備工料。卽曩時所置官屯之地。夫以當日出水之路。淤而爲田。則海口之受病彌顯。患亦更烈矣。雲梯關不能暢流。遂勢迫安東。總河董安國築攔黃壩一道。以護安東城郭。上流阻而下流壅。釀至三十五年。大水從高堰漫入高寶湖。城郭不沒者三版。其險較十九年。二十四年更甚。二十八年。又衝決邵伯鎮。漂屋淹民。不計其數。三十九年三月初一日。欽奉聖祖仁皇帝上諭。各隄岸愈高。而水愈大。非水大之過。皆因黃河淤墊甚高。致節年漫溢。黃河淤高一尺。則水高一尺。淤高一丈。則水高一丈。若治河單以築隄。終屬無益。十一月十一日。又欽奉上諭。朕聞南省來人云。黃水比淮水高丈餘。若將高堰隄岸。增加堅築。以束淮水。使刷黃而行。亦似有益。欽此。仰見聖明洞鑒。前此治河者。不築高家堰。而開六壩。不疏清口。而加築隄岸。之爲害矣。四十年。總河張鵬翮。閉六壩。而洪湖水不分洩。浚爛泥淺。而清口之淤漸通。業有頭緒。此時若於清口上流。堅築歸仁隄。遏睢水入黃河。以助其衝刷。且爲高家堰外障。則清口當必更通。運河不致倒灌。再於安東下流。疏關雲梯關舊口。或於安東迤北未淤處。另爲開關。使與現今海口相連。俾寬廣深通。一如曩時。則下流宣洩。上流自迅。豈惟運河無虞倒灌。海潮亦無逆漲之勢矣。乃瞻顧皇惑。恐黃淮合漲。致有衝決。遂欲分淮導黃。議於盱眙縣上流溜淮套之處。燒山鑿道。引淮水由六合縣入江。荷蒙聖祖仁皇帝親巡。見其決不可行。遂寢其說。因改洪湖六壩爲三壩。將壩底加高三尺。以備宣洩。不許輕開。數年水患略平。遽以成功入告。兼薦趙世顯自代。所舉非人。工程日壞。海口日淤。運道淺阻。水患頻仍。釀至六十

年。豫省武陟縣秦家廠。詹家店等處隄決。黃水直衝山東張秋鎮。淹損人民。不計其數。且水不歸槽。運道有阻。於是以陳鵬年爲總河。至雍正元年。決口始塞。卽於是年六月。豫省中牟縣十里店漫決。九月。楊橋隄工又決。三年六月。河決江南睢寧縣。朱家海口隄工。豫省蘭陽縣板廠隄工。亦報漫決。以上諸決口。雖經堵塞。而凡南岸決口。水勢皆直灌洪湖。於是又以淮水所瀦之區。變爲全黃所注之地。黃河淤墊。而洪湖面之廣者日狹。底之深者日高。况由三閘直注高寶湖。而高寶又淤。且灌入運河。河底益高。於是加隄蓄水以濟運。而城郭如在釜底。夏秋水漲。西風驟起。危如累卵。惟有開高郵城南三壩。以洩入隄。東下河甚或宣洩不及。河官盜決東隄。以保城郭。而興泰等州縣。又成巨浸。更可異者。自朱家海決後。睢寧。虹縣。泗州。桃源。宿遷。盡有淤地。齊蘇勒奏稱。涸出沃壤四年。請設淮安衛守備。專放五州縣淤地。增輸錢糧七年。尹繼善奏。裁守備。並請減賦。雖奉旨裁減。而此淤出地畝。現在清口上流。如爛泥淺。裴家場等七道引河之上。惟一道開通。則清口之淤。此又明驗矣。黃不能出清口上流。惟漫溢於洪湖。不得不奏請將高堰三壩開底。改低二尺五寸。是仍踵六壩之故智。且增一黃水建瓴直下矣。近日河臣視爲故常。更欲於毛城鋪地方挑引河。使黃水直注洪湖。不思以洪湖貯黃水。則湖底日高。高堰日危。七年。世宗憲皇帝發帑金百萬。修築高堰。其爲淮揚運道民生計者至矣。今反欲使黃淮之水。皆從高堰漫溢而下。豈不與聖意背乎。八年七月。黃淮並漲。高堰幾決。山陽高寶田廬盡沒。城郭危在旦夕。人民逃避高阜。今年七月。天雨連綿。又加三壩之水。瀾漫而來。較八年大水。僅少數寸。上下河田。盡皆淹沒。幸西風未起。城郭人民。尙得保全。然此等危險。豈可屢試。僥倖無恙。設河淮大漲。衝蕩高堰。全注高寶。東浸興泰。南奪邗溝。與江流會。

合至通州入海。則淮揚諸州縣城郭廬舍陸沈水底。田賦鹽課俱無所出。而自鎮江以至淮安數百里運道一望汪洋。牽挽無所施。風波不可測。其爲害又豈淺鮮哉。今蒙皇上天恩。因臺臣之請。疏運河。爰集衆議。以圖更改。此淮揚百姓更生之機。用敢將歷年河道通塞源流。敬爲我皇上陳之。然其患尙不獨在淮揚而已。禹貢河自碣石入海。至周定王五年。河南徙。從天津入海。東漢歷唐及宋初。又南徙。從山東利津入海。自宋慶歷八年。又合淮入海。迄今近七百年。南徙之勢已極。天道循環。無往不復。况江、淮、河、濟稱四瀆。瀆者獨也。今河已混濟奪淮。若再徙而南。勢必合江入海。四瀆合流。必無此理。且水性就下。其由北而南遷者。以北高南下也。南行既久。日益淤墊。則南高而北下。自康熙六十年。六十一年。北岸決口塞後。雖屢決於南。然每決必淤。淤則河身必高。十數年南岸河身高於北岸。故北岸多險。况河之淤也。由下而上。曩時河決在徐、邳、桃、宿。今徐、邳、桃、宿皆淤。則其決又必在曹、單、豐、沛。此黃河變遷之形勢也。淮水逆漲。泗州城於康熙二十一、二年已沈水中。近又逆漲於五河、宿州。設遇黃淮並漲。合而北決。則曹、單、豐、沛必受其害。是今日淮揚之患。有形可見。異日東甞之患。機兆已成。此臣所謂當合全局以務更改也。在臺臣之請浚運河。亟宜補救。不爲無見。而王大臣議及疏浚海口。更爲切中事宜。但東安海口。現在通行者。乃當日十分之二三耳。雍正六年。齊蘇勒題報濱江射陽湖淤出良田。給民領墾。現在遵行淤出之田。非即海口之水路乎。其不能闢海口而南明矣。至安東迤北。乃海州地方。有黑峯口。航海數十里。可至鬱洲山。年來竟可捨舟陸行。則海潮之自東而西。挾沙淤入內地數十里。其不可闢海口而北且東也。又明矣。已淤之海口。無論難以施工。且恐旋浚旋淤。勞費無益。况黃河自開封以下。逐段淤塞。欲東不能。欲南不得。則

河必舍現行之道而北徙。揆度天時地勢。殆必然也。臣謹按地圖。今之封邱縣北岸有金龍口。乃當日黃河由張秋鎮入大清河故道。現有河形。康熙六十年河決武陟。亦東注張秋鎮。又將故道衝開。現今東河總河所轄境內。惟金龍口最險。今若自金龍口而下。依照河形。先爲挑浚深廣。凡當水之衝者。戒民將田廬塚墓悉遷他所。官給其費。於兩岸築縷隄束水。更於縷隄外築遙隄。使暴水至。得左右游衍。而不致旁潰。又於張秋東北。由大清河入海故道。亦挑河築岸。其現行海口。在海豐利津地方。雍正五年。曾遣何國宗開浚引河。但未如式。今若再疏關。俱使廣闊深通。然後決金龍口。使之自北而東。仍復宋之東流。金元之北派。因其故道以入海。最易爲力。蓋安東已淤之海口。難以再闢。而海豐利津未淤之海口。易於施工也。夫以一黃河之水。分而兩流。則勢必弱。然後堅閉高堰三壩。大關清口。使淮水暢流安東海口。刷黃而行。旣不停淤。亦不內灌。然後挑浚運河。建置閘洞。淮揚城郭田廬可保。自瓜儀至天妃閘之運道無阻。而徐邳桃宿以上。開封以下之隄。永無危險。此賈讓上策。當亟行於今日者也。或疑河無兩行。不知凡大川有經流。必有支流。禹斲二渠。疏九河。漢有屯氏諸河。唐有馬頰。宋有二股河。皆并行入一海口。且宋有北流東流。金有南派北派。皆分流各入一海口。安在不可分也。又或疑有妨運道。不知運道自濟寧而北。臨清以南。皆用汶水濟運。無藉於黃。黃水由張秋鎮以入大清河。不過穿運河而東。猶淮安天妃閘之入新河口。糧船可揚帆而渡。無衝擊之危。牽挽之苦也。自明永樂建都燕京。全賴會通河運漕。而黃河之自漫出者。猶有六。其二入淮。其四合漕以入淮。出長垣者。自陽穀入漕。出曹州者。自魚臺入漕。出儀封者。自徐之小浮橋入漕。出沛之南者。從飛雲橋入漕。出徐沛之中境山之北者。從魚溝入漕。方且以黃濟漕。安在

其妨運也。今不早計。一旦決高堰。則無淮揚。衝金龍口。則無東甌。與其每年築隄防險。何如先事預防。爲曲突徙薪之計。但更改之法。必須籌畫萬全。故禹曰。予荒度土功。荒度者。必躬履其地。量道路之高下。遠近。測水流之廣狹。淺深。目覩全勢。方可次第施工。剋期告成。伏乞皇上。特簡大臣。中有才識幹略。能肩重任者。趁此三冬水涸。從原至委。相度形勢。繪圖入告。然後集廷議。以僉同奉審裁。而舉事。庶足爲久安長治之謀也。臣世受國恩。年已七十。其生之年。卽淮揚被水患之始。目覩耳聞。紀載甚悉。自爲諸生時。原任總河張鵬翮。陳時夏。每舟過高郵。必召臣問計。深以臣言爲然。而未竟其用。今蒙皇上軫念河工。下詢芻蕘。敢不以管窺之見。上備採擇。奉硃批。總理事務王大臣速議具奏。欽此。議得刑部主事孫蓮孫陳奏河工事宜。稱從前黃河有北流南流二支。及歷來河臣修築原由。言之頗爲全備。其言治河之道。當合全局料理。安東已淤之海口。難以再闢。而海豐。利津未淤之海口。易於施工。因勢利導。以黃河之水。分爲兩流。原屬賈讓治河上策。但關係重大。勢難懸揣。現奉諭旨。交河漕諸臣。詳悉妥議。尙未具題。孫蓮孫所請。特簡大臣相度之處。目前似尙可緩。請將此摺抄寄河漕諸臣。令悉心閱看。務須通盤籌算。爲一勞永逸之計。作速妥議。到日。交九卿公同議定。請旨簡派大臣前往查看。奉旨依議。南河成案。

十二月初九日。兵部會議得。河東總督白鍾山奏。河工力作。雖在弁兵。而指使在乎守備。江南向設淮。徐。淮。揚。河營。守備十餘員。豫省黃河兩岸。亦設守備二員。臣因汛遠工多。力難兼顧。已於請改豫省船兵案內。奏請添設協辦守備。分汛巡防。至東省黃運河。共有千總八員。河兵六百名。但無守備管轄。恐千把末弁。猝遇要工。下埽簽樁。少不如法。誤工費帑。所關匪細。請東省添設河營守備一員。令管束兩河千把兵。



丁駐劄緊要地方。仍聽山東管河道管轄。應如所請。其新設東省河營守備員缺。應令該督於熟諳河務千總內揀選題補。奉旨依議。運河道冊。

是年總理事務和碩莊親王等會議。臣等伏思。淮揚運河。關係運道民生。年來河身淤高。淮揚頻受水患。自宜大加挑浚。而治運必兼治黃。又恐運河疏後。黃水倒灌入運。是以前議覆常祿摺內。有先濬海口之議。而夏之芳。孫灑孫條奏。亦稱海口淤高。宜加疏濬。今據高斌奏。淮揚運河。宜加挑濬。並請增建閘壩。以時啓閉。而於海口。應否疏濬。未曾議及。臣等面詢。據稱黃河入海之口。內外現甚寬深。不必疏濬。竊思高斌職司河務。於水勢情形。自必熟悉。既以不必疏濬海口爲言。自可保黃水暢流入海。其淮揚運河。原借洪湖之水。以濟漕運。每恐引黃入河。故建天妃一閘。以阻扼黃水。近來黃水長發。每至倒灌入運。今高斌請於天妃正越兩閘下。多建石閘草壩。關束水勢。亦屬分減運口來源。蓄水敵黃之策。應如所奏。添建石閘四座。草壩十二座。並將運河淤處。一律挑濬。總以水深一丈五尺爲準。其所需料銀。委員估勘。將建築石閘草壩。並挑河工段。高寬丈尺。先行造冊題估。動支河庫銀兩。給發承辦各員。預備料物。並行漕運總督。將乾隆二年回空漕船。趕早一月過完。三年重運。限三月進瓜洲江口。以便督令各員。依限趕築。工完將用過銀兩。題報工部核銷。所建閘壩。務令相時啓閉。以濟漕運。天然南北二壩。勿得輕開。務使湖水蓄聚有力。以免黃水倒灌。至洪澤湖水。原藉以刷黃。其出水之清口。必寬闊深通。方得暢流。前據夏之芳。孫灑孫所奏。俱以近來黃水倒灌。入洪澤湖口。堰外淤成坦坡。不但湖水無力。並河內受水之地。亦漸狹隘。是現在清口狹隘。湖流勢緩。難以敵黃。雖如高斌所稱。海口果係深通。而上流壅滯。恐下流亦未必疏暢。

如何開闢深廣。應令高斌會同大學士嵇曾筠、副總河劉永澄等詳度妥議具奏。再夏之芳奏稱黃水宜分導。孫夔孫奏黃水宜分兩流。雖屬賈讓治河上策。但揆之時勢。實屬難行。又夏之芳奏湖水宜堅束一條。與高斌所奏建築閘壩相同。俱毋庸議。又夏之芳奏滾壩宜高墊支河宜並疏。尾閘宜暢洩三條。似於建築閘壩後亦應次第酌籌。應俟高斌回任會同一並酌議具奏。此案現奉諭旨交河漕督撫諸臣詳議。今除該總河議請建閘挑河外。如尚有應增疏濬工程。該督撫漕臣務期一秉公忠。仍與該總河商酌會題。臣等再行詳議。南河成案。

是年濬通州呂四等場河二萬六千八百餘丈。以利民運。按此浚運鹽河。以疏積水。利鹽運也。運鹽河經秦州如臯。接西亭河直達呂四場。場東舊有東洲。乃其故道也。通州分司轄馬塘、掘港、石港、西亭、金沙、餘西、餘東。餘中爲十場運鹽。河旁通各支。范公隄自海門呂四繞各鹽場之西。截外潮使不得入。而濬呂四一帶場河。使內水有所出。通流便運。政之善者。明浚雲翼。築范公隄。浚串場支河。疏稱自隄坍塌。高寶隄亦衝決。其中大小支河所在淤塞。於是以高寶與秦爲壑。而洩水無路。民竈罷於昏墊矣。其治之道有二。惟疏上流使入江。洩下流使入海。沿漕隄一帶爲上流。沿范隄一帶爲下流。如西引邵伯湖水轉南至新安湖。復東入運河至芒稻河入江。有餘則聽其直瀉。不足則引以濟漕。則上流疏矣。如牛灣河、姜家堰、廟灣爲三大海口。引各支河。東會於串場河。北會於射陽湖俱入海。則下流洩矣。方輿紀要云。范公隄起自海門呂四場。迄鹽城徐濱。繞三十鹽場之西。隄外俱竈地。淡水出則鹽課消。隄以護之。隄內係民田。潮水入則田租損。隄以防之。中間有洩水入海之路。而民竈每不相值。兼利爲難。芒稻入江之路捷。而西水

過大。則不能盡洩入江。放入下河。民田盡沈。大啓芒稻一洩無餘。而鹽運涸澀。率不能如意。然此就形勢言之。若盡人事。亦有引水歸流之用。如李衷純建石礎於江中。自得節宣之宜。分疏馬橋。通泰。暇思等港。亦皆順入場河。惟在調劑得宜。民運不相妨。而相得。呂四一帶場河。轉輸宜便。亦下河民田宜洩之路也。隨地疏導。以謹蓄洩。以消積水。使糧鹽入淤之河。復循故軌。支河之利普矣。通州東北阻海。南通大江大海。過通州海門。至呂四場東南。蓼角嘴。始與江合。中有鹹淡二水。不相混雜。呂四場有白水蕩。其通海處。曰新河。蓋江海之交。而內水吐納之地也。河渠紀聞。

是年白鍾山奏覆。淮揚運河。毋庸挑濬。疏通尾閭事宜。按。淮揚運河消長。與河湖相權。黃河挾高勢。至清口會淮。全賴以清敵黃。俾黃水順流東下。而黃慮其強。淮恐其弱。是以洪湖水七分出清口。敵黃三分歸運。復於清口東西。建束水大壩。收束淮水。以助其勢。若淮水入運過多。黃卽乘淮弱倒灌。此權衡之不爽者。至是以常祿奏請。挑濬淮揚運河。白鍾山議稱。自清口東西壩建設以來。黃不倒灌。運道無淤。清強於黃。已有明效。前靳輔因黃水內灌。運淤漕梗。是以緩漕移關。大興工作。張鵬翮亦擇淺間段挑濬。其時運道尙未一律深通。今河道已深。漕艘利運。惟以高寶地處窪下。欲將運河大挑。如不深於平地。仍不免河高地窪。如加深至平地。河身太低。淮水建瓴直瀉。歸運必多。出清口者必少。力不足以敵黃。勢必致黃水倒灌入湖歸運。不但所挑運河不久仍淤。而黃水倒灌。向來敵黃會流歸海之七分淮水。不能涓滴出口。加以黃河萬里奔流。與淮合并南趨。汎濫四出。恐淮安高寶受害匪淺。此王大臣所議。疏浚之後。河身既低。黃水保無衝入等語。爲慮遠之大計也。卽慮河高地窪。遇運河水漲。淮安以北。有文華寺閘。開放達

白馬諸湖永利開開放歸漁濱河淮安以南有興文平河涇河黃浦孫家諸橋開開放俱歸射陽湖寶應以南有朱馬狼兒永安子嬰界首六漫各閘壩及頭二閘高郵以南有南關五里車邏昭關各壩琵琶火燒各閘及頭二閘金灣三閘金灣壩俱可開開放達運鹽串場車路等河又南有芒稻各閘洩水入江是清口至瓜洲節節宣洩不患容納無地雍正八年運河異漲開放開壩水即消落淮安高寶城郭居民無恙其明驗也惟運鹽串場車路等河爲宜洩淮水尾閘歲勤疏濬自必迅利其餘各閘壩歸入湖河經由之處亦必一律寬深俾運河水由開壩開放不致旁溢民田爲萬全之道此權衡於黃淮強弱而運河以不治治之其理深微而著明也河渠紀聞

是年議定疏浚淮揚運河添建運口開壩事宜按治運以避黃納清爲用而納之無節清亦病運高文定以治運河水勢先減運口來源欲減運口來源在增開壩關鎖關鎖嚴而天然之尾閘可閉二壩閉而下河之淹浸無虞開壩操縱在人蓄全湖以禦黃此卽平江伯福與四閘之遺意當時議者如常祿夏之芳孫藻孫輩知運河宜疏不知上流當束知減壩宜閉不思消納有道知海口當濬不思海無可濬而蓄清滌沙更欲踵南北清河之覆轍開支河於曹單鄆濟尋故道於黃嘴五港前明分黃之謬亦猶是矣至孫藻孫引禹廐二渠襲賈讓上策謂濟寧迤北臨清以南止用汶水濟運無藉於黃欲引黃水由張秋鎮入大清河穿運而東由利津出海謂安東爲已淤之海口利津爲未淤之海口其見尤舛無論大工未可輕舉黃流難以力制一經穿運張秋上下運河必淤爲平陸豈開壩所能防禦黃水到處馬頰徒駭各支河皆淤西水勢橫又無洪湖之水刷沙敵黃海口亦淤汜濫更不可言其嘗斬文襄開六壩亦自有說當

時河壞已極。不得不先治其標。河平旋卽封閉。卽張文端之改三壩高閘底。因時立事。均未可輕議。若不窮源探本。但論目前。皆耳食也。至議挑運河。白鍾山以運河今已刷深見底。若再大加挑濬。恐河身太低。淮水直瀉。歸運過多。敵黃力微。黃流倒灌。入湖歸運。所挑之河易淤。黃水合淮南趨。淮安高寶受害更深。雍正五年。議浚運河。齊蘇勒奏請停止。其時未議及閘壩收束。惟慮弱淮引黃。若添建石閘四座。草壩十二座。節節收束。則入運之水。不致奔騰。而疏浚運河。以利漕運。水由地中行。以保隄工。兩利無害。如任上高下淺。而惟恃南關車邏等壩宣洩。無論阻隔漕艘。亦恐淹及下河。淮安高寶。大受其害。固當兼權熟計。於事前驗之事後。而益信也。河渠紀聞。

是年河督高斌。加修禹王臺壩工。堅築裏餞石工。汛前撥兵防守。按禹王臺壩。自雍正八年大水衝潰。越運漫黃之後。嵇文敏奏。建竹絡壩工六百餘丈。補修堰工三百餘丈。下接鄰宿沭河民堰。捍衛精密。然壩臺坐當迎溜。地勢尙窪。猶宜慎護。至是更加裏餞石工。誠怖於沭水之不可西也。丙午大漲。沭沂合流。幾成洚洞。無涯之巨浸。禹王臺之修防。曷可不慎哉。河渠紀聞。

民安局移贈圖書

上海图书馆藏书



A541 212 0006 1525B

上海图书馆

